

瑜伽師地論科句披尋記卷第七十一

彌勒菩薩說

唐三藏沙門玄奘奉詔譯

韓清淨科記

攝決擇分中聲聞地之五

辛五、義類差別<sup>14</sup> 壬一、七種義

復次，有七種義。一、應推義，二、應攝義，三、應避義，四、應引義，五、應遮義，六、應持義，七、應發義。

壬二、七種喜

復次，有七種喜。一、聞所引喜，二、思所引喜，三、修所引喜，四、離蓋所引喜，五、議論所引喜，六、念自功德所引喜，七、於諸下劣不生知足所引喜。

壬三、五種法

復次，有五種法。一、教法，二、行法，三、攝受法，四、受用法，五、證法。

壬四、三善射德<sup>2</sup> 癸一、標列

復次，具三種德，方能善射。一、由弓德，二、由箭德，三、由中的德。

癸二、隨釋<sup>3</sup> 子一、弓德

弓有二德。一、其性堅牢，二、善作究竟。

子二、箭德

箭有一德。善作究竟。

子三、中的德

中的有三德。一、究竟工巧，二、串習工巧，三、師學工巧。

壬五、法教差別<sup>2</sup> 癸一、略列三種

復次，如來教有三種。一、長時教，二、無間教，三、不重說教。

癸二、略攝理趣

復次，如來無量法教，皆由三種理趣。一、由義差別理趣，二、由文差別理趣，三、由難釋差別理趣。

壬六、涉道對治

復次，夫涉道者，須五對治。一、炎光對治，二、艱險對治，三、江河對治，四、枯竭對治，五、身勞對治。

壬七、能生善趣二尸羅相

復次，尸羅有二種相，能生善趣。一、攝受尸羅，二、不闕尸羅。

壬八、現法受欲有三種義

復次，諸受欲者，於現法中有三種義。一、追尋財寶，二、守護財寶，三、耽著受用。

壬九、壽命變壞及分位別

復次，壽命變壞有二種。一、麤變壞，二、細變壞。變壞分位亦有二種。

一、麤，二、細。

壬十、智德差別<sup>2</sup> 癸一、標列

復次，智有二德。一、正行義德，二、自性德。

癸二、隨釋<sup>2</sup> 子一、正行義德

正行義德者，謂速疾正行、決定正行、微細正行。

子二、自性德

自性德者，謂是定地，不可退轉，是出世間，已善修習，於所行無有罣礙，勝餘一切自類善根，勝於一切他類善根。

勝餘一切自類善根等者：修所成慧勝餘聞思，出世間慧勝餘世間，如是智慧自類相望，說此勝餘一切自類善根。一切善根智為最勝，說此勝於一切他類善根。

壬十一、三顧戀別

復次，有三顧戀，修四念住能為對治。一、顧戀助伴，二、顧戀利養，三、顧戀後有。

壬十二、現觀差別<sup>2</sup> 癸一、明分位<sup>3</sup> 子一、標三種

復次，加行故、現觀故、相續故。

子二、別釋相

欲貪、無明對治，是加行；現見安立、非安立諦，是現觀；已離欲、未離欲，是相續。

子三、隨應廣

又依故、地故、品故、未修定故、已修未得得故、所依清淨障故、作意清淨障故、彼障對治故。

癸二、辨六種<sup>2</sup> 子一、指前標

復次，如說六種現觀，謂思現觀乃至究竟現觀。

子二、依次釋<sup>22</sup> 丑一、辨行相<sup>2</sup> 寅一、辨<sup>6</sup> 卯一、思現觀相<sup>2</sup> 辰一、問

問：思現觀有何相？

辰二、答<sup>2</sup> 巳一、標成就

答：若有成就思現觀者，能決定了諸行無常、一切行苦、諸法無我、涅槃寂靜。

巳二、顯無奪

住異生位，已能證得如是決定，非諸沙門、若婆羅門、若天魔梵及餘所能如法引奪。

卯二、信現觀相

問：信現觀有何相？答：若有成就信現觀者，或是異生、或非異生，或於現法及後法中，終不妄稱餘是大師、餘法善說、餘僧正行。

卯三、戒現觀相

問：戒現觀有何相？答：若有成就戒現觀者，終不復能乃至故心斷傍生命、不與而取、習欲邪行、知而妄語、飲米等酒諸放逸處。

卯四、現觀智諦現觀相

問：現觀智諦現觀有何相？答：若有成就現觀智諦現觀者，終不復能依諸妄

見而有所作，於自所證而有疑惑，於諸生處而有貪染，現行世相計為清淨，誹謗聲聞、獨覺、大乘作惡趣業，何況能造害父母等諸無間業，乃至不能生第八有。

現行世相計為清淨者：謂諸異生，或有妄計世瑞吉祥，以為清淨。成就現觀智諦現觀，則無是事，是故舉說。

卯五、現觀邊智諦現觀相

問：現觀邊智諦現觀有何相？答：若有成就現觀邊智諦現觀者，終不於彼他所詰問而生怖畏。

卯六、究竟現觀相

問：究竟現觀有何相？答：若有成就究竟現觀者，終不復能犯於五處，亦不復能乃至故斷諸傍生命、不與而取、行非梵行習婬欲法、知而妄語、蓄積財寶諸妙欲具而受用之，亦不怖畏不可記事，亦不妄計所有苦樂自作、他作、自他俱作、非自非他無因而生。

寅二、結

如是等類，當知是名諸現觀相。

終不復能犯於五處者：本地分說：阿羅漢苾芻諸漏永盡，不能習近五種處所。一者、不能故思殺害諸眾生生命，二者、不能不與而取，三者、不能行非梵行習姪欲法，四者、不能知而妄語，五者、不能貯蓄受用諸欲資具。乃至廣說。（陵本三十四卷二十六頁<sup>2813</sup>）與此義同。由是當知，非離斷傍生命，乃至受用妙欲。別有五處，說不復犯。

丑二、辨自性<sup>6</sup> 寅一、思現觀

問：思現觀何自性？答：上品思所成慧為自性，或此俱行菩提分法為自性。

寅二、信現觀

問：信現觀何自性？答：緣三寶境，上品世間、出世間清淨信為自性，或此俱行菩提分法為自性。

寅三、戒現觀



問：戒現觀何自性？答：聖所愛身語業為自性，或此俱行菩提分法為自性。

寅四、現觀智諦現觀

問：現觀智諦現觀何自性？答：緣非安立諦境慧為自性，或此俱行菩提分法為自性。

寅五、現觀邊智諦現觀

問：現觀邊智諦現觀何自性？答：緣安立諦境慧為自性，或此俱行菩提分法為自性。

寅六、究竟現觀

問：究竟現觀何自性？答：盡、無生智等為自性，或此俱行菩提分法為自性。

丑三、辨繫不繫

問：此六現觀，幾欲界繫，乃至幾不繫？答：一，唯欲界繫；一種一分，或欲界繫、或色界繫、或無色界繫；即此一分及餘三，此四是不繫；一，通繫及不繫。

一唯欲界繫等者：謂思現觀，唯欲界繫。若信現觀，異生所攝一分，通三界繫。非異生攝一分，及戒現觀、現觀智諦現觀、究竟現觀，此四是不繫。現觀邊智諦現觀，通繫不繫。

丑四、辨依處<sup>2</sup> 寅一、問答依<sup>2</sup> 卯一、問

問：此六現觀，幾依未至依可得？幾乃至依無所有處依可得？

卯二、答<sup>2</sup> 辰一、明可得

答：一，依非依可得；餘，依一切依可得。

辰二、依生起

又三，依五依生；一種一分亦爾。

一依非依可得等者：謂思現觀非定地起，名依非依可得。所餘一切現觀，一切定地起故，名依一切依可得。又戒現觀、現觀智諦現觀、現觀邊智諦現觀，三種全分依未至依，乃至第四靜慮而生。信現觀一種一分亦爾。究竟現觀非定依五，是故不說。

寅二、釋妨難

問：若現觀智諦現觀離眾相故，名無分別，云何依有尋有伺依可得？答：由彼思惟尋伺等全分靜慮真如而入於定，是故雖依有尋有伺靜慮可得，然是離相無有分別。

由彼思惟尋伺等全分靜慮真如而入於定者：本地分中三摩呬多地說：於初靜慮具足五支。一、尋，二、伺，三、喜，四、樂，五、心一境性。（陵本十一卷八頁<sup>871</sup>）名尋伺等全分靜慮。依彼靜慮，思惟真如而入於定。未證真時，思惟真如相，有尋有伺；已證真時，離彼尋伺，故無分別。本地分中有尋有伺地說：依尋伺處法，緣真如為境入此定故。（陵本四卷二頁<sup>266</sup>）其義應知。

丑五、辨緣諦

問：此諸現觀，幾緣世俗諦？幾緣勝義諦？答：一緣世俗諦，及一種一分；一無所緣；一緣安立勝義諦，及一種一分；一緣非安立勝義諦，及一種一

分。

一緣世俗諦及一種一分等者：思現觀全，及信現觀一種一分，緣世俗諦。戒現觀全，身語業為自性，故無所緣。現觀邊智諦現觀全，及究竟現觀一種一分，緣安立勝義諦。現觀智諦現觀全，及究竟現觀一種一分，緣非安立勝義諦。

丑六、辨有相無相

問：此諸現觀，幾有相？幾無相？答：四有相，一無相，一亦有相亦無相。四有相等者：思現觀、信現觀、戒現觀及現觀邊智諦現觀四有相。現觀智諦現觀一無相。究竟現觀一亦有相亦無相。

丑七、辨有分別無分別

問：此諸現觀，幾有分別？幾無分別？答：如有相、無相，當知有分別、無分別亦爾。

丑八、辨受俱行

問：此諸現觀，幾喜俱行？幾樂俱行？幾捨俱行？答：初唯喜俱行，餘通喜、樂、捨俱行。

丑九、辨四對治

問：此諸現觀，幾是壞對治？幾是斷對治？幾是持對治？幾是遠分對治？

答：二唯壞對治，一通斷、持、遠分對治，一通持、遠分對治，二非對治。

二唯壞對治等者：謂思現觀、信現觀，唯壞對治。現觀智諦現觀，通斷、持、遠分對治。現觀邊智諦現觀，通持、遠分對治。戒現觀、究竟現觀，非對治，非慧性故，漏已盡故。

丑十、辨二對治

問：此諸現觀，幾是諸纏制伏對治？幾是隨眠永害對治？答：三是諸纏制伏對治，一俱對治，二俱非對治。

三是諸纏制伏對治等者：謂思現觀、信現觀、現觀邊智諦現觀，是諸纏制伏對治。現觀智諦現觀，是俱對治。戒現觀、究竟現觀，俱非對治。

丑十一、辨斷對治

問：此諸現觀，幾是地地軟中上品煩惱斷對治？答：一。餘隨順此，為此助伴，非斷對治。

餘隨順此等者：謂斷對治，唯現觀智諦現觀。所餘思現觀、信現觀，隨順斷對治；戒現觀、現觀邊智諦現觀、究竟現觀，為斷對治助伴；是故皆非正斷對治。

丑十二、辨得遍知果

問：六現觀得九遍知。謂欲繫見苦、集所斷煩惱斷故，立初遍知；色無色繫見苦、集所斷煩惱斷故，立第二遍知；欲繫見滅所斷煩惱斷故，立第三遍知；色無色繫見滅所斷煩惱斷故，立第四遍知；欲繫見道所斷煩惱斷故，立第五遍知；色無色繫見道所斷煩惱斷故，立第六遍知；下分結斷故，立第七遍知；色貪斷故，立第八遍知；無色貪斷故，立第九遍知。此六現觀，誰得幾遍知果？答：一得九遍知果，餘不得彼果。

丑十三、辨斷惑時分

問：此諸現觀能為煩惱斷對治者，為生已作斷對治耶？為未生耶？答：此非未生，雖言生已，而非後時。當知煩惱斷時、對治生時，平等平等；即於爾時，假施設說對治生已，諸煩惱斷。

丑十四、辨得四沙門果

問：此諸現觀，誰得幾果？答：一得一切四果，一得圓滿沙門果時，餘是一助伴、是得前行。

一得一切四果等者：謂現觀智諦現觀，得一切四果。究竟現觀，是得圓滿沙門果時。所餘戒現觀、現觀邊智諦現觀，是得一沙門果助伴；思現觀、信現觀，是得一沙門果前行。

丑十五、辨轉根

問：是諸現觀，幾能轉根？答：除一，餘一切。

除一餘一切者：除戒現觀，所餘一切皆能轉根。下說引發功德，當知亦

爾。

丑十六、辨引發功德

問：是諸現觀，幾能引發諸神通等殊勝功德？答：除一，餘一切。

丑十七、辨作業<sup>2</sup> 寅一、問

問：思現觀，當言作何業？乃至究竟現觀，當言作何業？

寅二、答<sup>6</sup> 卯一、思現觀

答：思現觀，當言能生正行所攝清淨品善法為業，能生無罪歡喜為業，能轉一切所疑為業，能趣入修功德為業，能引所餘現觀為業，能往一切善趣為業。

卯二、信現觀

信現觀，由意樂故，於三寶中能生不動勝解為業，正行清淨為業，一分能往善趣為業。

卯三、戒現觀



戒現觀，解脫惡趣眾苦為業。

卯四、現觀智諦現觀

現觀智諦現觀，能得一切沙門果為業，能引發一切功德清淨為業，能引所餘現觀為業，能於善趣助感光淨果及異熟為業。

卯五、現觀邊智諦現觀

現觀邊智諦現觀，能於一切安立諦中，問答善巧為業，速疾通慧為業，能引此後現觀為業。

卯六、究竟現觀

究竟現觀，能引第一現法樂住為業，解脫一切生死大苦為業，任持最後身為業。

丑十八、辨種數<sup>2</sup> 寅一、問

問：思現觀有幾種？乃至究竟現觀有幾種？

寅二、答<sup>4</sup> 卯一、思現觀

答：思現觀，當知有無量種。謂契經思，應誦思，記別思，乃至方廣、未曾有法、論議思，苦思，集、滅、道思，真如、實際、法界思，蘊、界、處等思，聲聞乘等思，大乘思。如是等類，當知差別有無量思。

卯二、信現觀<sup>2</sup> 辰一、標無量

信現觀，亦無量種。

辰二、辨品類<sup>2</sup> 巳一、約三世辨

謂正憶念過去無量三藐三佛陀，及彼法、彼僧。如於過去，未來、現在亦爾。

巳二、約世界辨

又正憶念此世界中，及餘十方無量世界所有如來，及彼法、彼僧。隨正憶念有爾所量，亦有爾所信現觀體品數差別。

卯三、戒現觀<sup>2</sup> 辰一、標無量

戒現觀，亦無量種。

辰二、辨品類<sup>2</sup> 巳一、約業道辨

謂隨遠離十種不善性罪業道差別多種。

巳二、約相續辨

又隨相續亦有多種。謂預流身乃至阿羅漢身，獨覺、菩薩、如來身等無量差別。

卯四、後三現觀<sup>2</sup> 辰一、舉現觀智諦現觀

現觀智諦現觀，亦無量種。謂念住、正斷、神足、根、力、覺支、道支等菩提分法無量差別。

辰二、例餘後二現觀

如現觀智諦現觀，當知現觀邊智諦現觀、究竟現觀亦爾。

丑十九、辨自性非自性

問：此諸現觀，由如是名、由如是言所安立故；當言是彼自性，當言非彼自性耶？答：世俗說故，當言是彼自性；第一義故，當言非彼自性。何以故？一切法義，法爾不可說故。

丑二十、辨因果<sup>2</sup> 寅一、問

問：思現觀何因何果？如是乃至究竟現觀何因何果？

寅二、答<sup>2</sup> 卯一、舉思現觀

答：思現觀，以佛出世、親近善士、聽聞正法、相續成熟、如理作意為因，以所作業為果。

卯二、例餘一切<sup>2</sup> 辰一、例同

如思現觀，一切現觀，當知亦爾。

辰二、顯別<sup>3</sup> 巳一、信現觀及戒現觀

此中差別者，信現觀，亦以餘現觀為因；戒現觀亦爾。

巳二、現觀智諦現觀

現觀智諦現觀，亦以思現觀為因，亦以順決擇分善根為因，亦以自種姓為因。

巳三、後二現觀

現觀邊智諦現觀，亦以現觀智諦現觀為因；究竟現觀亦爾。

丑二十一、辨攝非攝<sup>2</sup>

寅一、約七作意辨<sup>2</sup>

卯一、問

問：六現觀，七作意謂了相等。為六現觀攝七作意，為七作意攝六現觀耶？

卯二、答<sup>2</sup>

辰一、作意攝現觀

答：二現觀，非作意攝；一現觀，攝樂作意攝；一現觀，攝樂作意、觀察作意攝；一現觀，遠離作意、攝樂作意、加行究竟作意攝；一現觀，加行究竟果作意攝。

辰二、現觀攝作意

餘作意，當知是現觀等流攝，非現觀攝。謂了相作意、勝解作意。

二現觀非作意攝等者：謂思現觀、戒現觀，非作意攝。信現觀，攝樂作意攝。現觀邊智諦現觀，攝樂作意、觀察作意攝。現觀智諦現觀，遠離作意、攝樂作意、加行究竟作意攝。究竟現觀，加行究竟果作意攝。

寅二、約無邊際智等辨

問：無邊際智，及順決擇分善根，何現觀攝？

無邊際智者：生死流轉，名無邊際。了知生死流轉諸所有法無常、苦、空、無我，發起無邊無際勝解，是名無邊際智。義如本地分說。（陵本三

十四卷十七頁<sup>2783</sup>）

答：非諸現觀攝，當知是現觀等流。

丑二十二、辨諸句<sup>2</sup> 寅一、四句分別<sup>2</sup> 卯一、舉初二現觀<sup>2</sup> 辰一、問

問：諸思現觀，亦信現觀耶？設信現觀，亦思現觀耶？

辰二、答<sup>2</sup> 巳一、標四句

答：應作四句。

巳二、釋差別

或有思現觀，非信現觀，謂除緣寶決定思，諸餘緣決定思。或有信現觀，非思現觀，謂緣寶聞、修所成信。或有思現觀，亦信現觀，謂緣寶決定思。除上爾所相，是第四句。

卯二、例所餘現觀

由此道理，應知所餘，亦應作四句。

寅二、餘句分別

復有無量一行、順前句、順後句、四句等道理，依聲聞地決擇道理，皆當了知。

依聲聞地決擇道理者：謂依聲聞乘相應道理而決擇故。簡非大乘，故作是說。

壬十三、八慳垢別<sup>2</sup> 癸一、釋慳垢名

復次，慳之與垢合名慳垢。由八種垢汙心相續，能與其慳作安足處，是故說彼名為慳垢。

癸二、別辨八種<sup>2</sup> 子一、徵

云何為八？

子二、列<sup>8</sup> 丑一、由不串施

一、於惠施先不串習，於現法中愛重財食。

丑二、由重身命

二、於身命極重顧戀，不顧後世。

丑三、由恆共住

三、與慳者恆共止住，又隨順彼。

丑四、由見寡德

四、見所施田無勝功德，及簡擇福田。

丑五、由無慈悲

五、於慈悲先不串習，及於彼處不見勝德。

丑六、由難集想

六、以諸財寶難可積集，數習彼想，故生懶惰及與懈怠。

丑七、由執取見

七、執取於見，及謂惠捨有彼雜染。

丑八、由邪迴向



八、希求財寶而行惠施，及迴向於彼。

執取於見等者：謂無施與、無愛養、無祠祀，不行惠施，是名執取於見。或謂世間皆依名聲讚頌等事，而行惠施，非無所求，是名惠捨有彼雜染。

壬十四、五調善別<sup>2</sup> 癸一、辨五行<sup>2</sup> 子一、略標別

復次，有五種行名為調善。一、感財富行，二、感善趣行，三、感無苦行，四、感自義行，五、感他義行。

子二、隨別釋<sup>5</sup> 丑一、感財富行

感財富行者，謂施性福業事。

丑二、感善趣行

感善趣行者，謂戒性福業事。

丑三、感無苦行

感無苦行者，謂修性福業事。

丑四、感自義行

感自義行者，謂聲聞、獨覺道。

丑五、感他義行

感他義行者，謂菩薩道。

癸二、配五想

為得彼故，應修五想。一、於諸欲中修不淨想，二、於自身命修速滅想，三、於欲界中修有怖想，四、於諸行中修無常想，五、於諸眾生修哀愍想。為得彼故應修五想等者：此中五想，如次能感前說五行。謂不淨想，不著諸欲，能行惠施，由是能得感財富行。於自身命修速滅想，重當來世，能持戒禁，由是能得感善趣行。餘文易知。

庚九、釋醍醐喻經<sup>2</sup> 辛一、標當釋

復次，當釋醍醐喻經。

辛二、辨應知<sup>2</sup> 壬一、了知十二分教<sup>5</sup> 癸一、徵

云何了知契經乃至論議？

癸二、標

謂略由五相。

癸三、列

一、了知假名故；二、了知攝受故；三、了知次第故；四、了知聖教故；五、了知依處故。

癸四、釋<sup>5</sup> 子一、了知假名

云何了知假名？謂能了知差別法門名想施設。

子二、了知攝受

云何了知攝受？謂能了知名身、句身、文身，由此宣說差別法門。

云何了知攝受等者：由名句文諸假施設，各別攝受一切法義，是故知名、知句、知文，說名了知攝受。

子三、了知次第

云何了知次第？謂能了知從此法門至彼法門、從此句至彼句所有次第。

子四、了知聖教

云何了知聖教？謂能了知如是法門，如來所說、或弟子說、或在家說、或出家說。

子五、了知依處

云何了知依處？謂能了知如是法門，依自利說；如是法門，依利他說；如是法門，乃至為令天人利益安樂故說。

癸五、結

如是名為略由五相，了知契經乃至論議。

壬二、了知彼彼語義<sup>4</sup> 癸一、徵

云何了知彼彼語義？

癸二、標

亦由五相。

癸三、列

一、了知緣起故；二、了知句差別故；三、了知次第故；四、了知道理故；五、了知略義故。

癸四、釋<sup>5</sup> 子一、了知緣起

云何了知緣起？謂能了知一分所化應示現義，乃至一分所化應慶喜義。

云何了知緣起等者：謂諸所化有情，或應示現、或應教導、或應讚勵、或應慶喜，了知如是種種差別，是名了知緣起。

子二、了知句差別

云何了知句差別？謂能了知異門、異相訓釋言詞品類差別。

子三、了知次第

云何了知次第？謂能了知解釋次第、成立次第、圓滿次第。

云何了知次第等者：此中三種次第，如攝釋分釋義應知。（陵本八十一卷

十五頁<sup>6212</sup>）

子四、了知道理

云何了知道理？謂能了知四種道理。一、觀待道理，二、證成道理，三、作用道理，四、法爾道理。

子五、了知略義

云何了知略義？謂能了知此是蘊相應語，此是界、處、緣起、處非處、諦相應語，此是念住等相應語，乃至此是八聖支道相應語，此是業相應語，此是煩惱相應語，此是增上戒等學相應語。

庚十、釋正知而住<sup>4</sup> 辛一、知時

復次，云何知時？謂由五相故。一、通達正現在前雜染故；二、通達將現在前雜染故；三、通達不染汙位故；四、等起對治作意故；五、對治作意故。

云何知時等者：本地分說：應時加行，謂於時時間修習止相，於時時間修習觀相，於時時間修習舉相，於時時間修習捨相。又能如實了知其止、止相、止時；了知其觀、觀相、觀時；了知其舉、舉相、舉時；了知其捨、捨相、捨時。（陵本三十一卷八頁<sup>2571</sup>）此中五相，如彼釋義應知。謂若了

知心掉舉時，或沈沒時，是名通達正現在前雜染。又若了知恐掉舉時，或恐沈沒時，是名通達將現在前雜染。又若了知於奢摩他、毗鉢舍那品，所有掉舉心已解脫，是名通達不染汙位。於爾所時，或應修止、或應修舉所有作意，是名等起對治作意；或應修捨，是名對治作意；此說持對治、遠分對治應知。

辛二、知量<sup>2</sup> 壬一、徵

復次，云何知量？

壬二、釋<sup>2</sup> 癸一、出略義<sup>2</sup> 子一、標列

謂於所食、所飲、所噉，乃至廣說。當知此中，略說二種斷隨順性。一、任持隨順性，二、精進隨順性。

子二、隨釋<sup>2</sup> 丑一、任持隨順性

任持隨順性者，謂於所食、所飲、所噉、所嘗善知其量。

丑二、精進隨順性

精進隨順性者，謂於若行、若住，乃至廣說善知其量。

若行若住乃至廣說者：此中廣說，所謂若坐、若臥、若修恬寤、若語、若默、若解勞睡，如本地分別釋應知。（陵本二十四卷十三頁<sup>2044</sup>）

癸二、廣辨相<sup>2</sup> 子一、於所食等善知其量<sup>2</sup> 丑一、徵

此中云何於所食等善知其量？

丑二、釋<sup>2</sup> 寅一、總標

謂於受取及受用中，皆善知量。

寅二、別辨<sup>2</sup> 卯一、於受取<sup>2</sup> 辰一、標差別

於受取中善知量者，謂於此時應受，從此應受，此所應受，齊此應受。

辰二、釋彼相<sup>4</sup> 巳一、何時應受

何時應受？謂曰初分，即於此時為受用故。

巳二、從何應受

從何應受？謂除五種非所行處。



巳三、何所應受

何所應受？謂清淨物，如來所許，除酒肉等所不應飲、不應食物。

巳四、齊何應受

齊何應受？謂知量而受，勿令自損，或損於他。

卯二、於受用<sup>2</sup> 辰一、總標

於受用中善知量者，謂如所受，於此時中應可受用。

辰二、別釋<sup>4</sup> 巳一、於何時中應可受用

於何時中應可受用？謂如前說日之初分，是受用時。

巳二、於何處所應可受用

於何處所應可受用？謂於好處，或居道場、或在聚落。

巳三、何所應受用

何所應受用？謂如前說清淨物等。

巳四、齊何應受用

齊何應受用？謂善知量，應可受用，勿令饑惱、勿不順斷、勿令諸界起平等。

勿令饑惱等者：本地分說：為除饑渴受諸飲食，為攝梵行受諸飲食，為斷故受受諸飲食，為令新受當不更生受諸飲食。（陵本二十三卷十五頁<sup>1989</sup>）

此應準釋。

子二、於勤精進善知其量<sup>2</sup> 丑一、徵

云何於勤精進善知其量？

丑二、釋<sup>2</sup> 寅一、標差別

謂於此時、此處、此事、齊此應勤精進。

寅二、釋彼相<sup>4</sup> 卯一、於何等時應勤精進

於何等時應勤精進？謂於應行時而行，乃至於應解睡眠時而解睡眠。

卯二、於何處所應勤精進

於何處所應勤精進？謂於閑林、或在道場、或居內院、或經行處應修精進。

卯三、於何等事應勤精進

於何等事應修精進？謂應勤行、勤住，乃至勤解睡眠勞倦。

卯四、齊何應修所有精進

齊何應修所有精進？謂善知量而修精進，勿因此故，太沈、太舉。

辛三、知眾<sup>2</sup> 壬一、剎帝利等<sup>2</sup> 癸一、舉剎帝利

復次，云何善知剎帝利眾？謂善了知剎帝利眾如是名、如是種、如是姓、如是食，乃至如是壽量邊際。

癸二、例婆羅門長者等眾

如是乃至善知長者、居士等眾。

壬二、諸沙門眾

云何善知諸沙門眾？謂能善知彼如是名，此是少年、此是長年、此是耆年，此持經者，乃至此是能持論者，善知此是瑜伽師等。

善知此是瑜伽師等者：本地分說：修瑜伽師略有三種。一、初修業瑜伽

師，二、已習行瑜伽師，三、已度作意瑜伽師。如彼應釋。（陵本二十八卷十三頁<sup>2371</sup>）又本地分意地說有六十二種有情之類。（陵本二卷十八頁<sup>169</sup>）此中等言，隨應等取沙門種類應知。

辛四、知往乃至應默<sup>2</sup> 壬一、徵

復次，云何善知我於是中，應當往詣，乃至應默？

壬二、釋<sup>2</sup> 癸一、總標

謂若略說，為此應往乃至應默，及如此應往乃至應默。

癸二、別釋<sup>2</sup> 子一、明所為

何所為故，詣在家眾乃至應默？謂為乞求資生眾具；或復為令未信者信，信者增長；或為慰問遭重疾病、受眾苦者；或為開解諸愁憂者；或為和好展轉怨對互相違者；或為隨順他所作事；或復為他之所勸請；或為隨從軌範、親教同梵行者；或為經營僧所作事；是故應往乃至應默。

子二、明所應<sup>5</sup>

丑一、應如是往

云何了知應如是往？謂如聲聞地已說其相。

如聲聞地已說其相者：本地分說：於其已往或正往時，觀見眾色，於此眾色一分應觀，或有一分所不應觀。於不應觀所有眾色，當攝其眼，善護諸根；於所應觀所有眾色，應善住念而正觀察。乃至廣說其相應知。（陵本

二十四卷十六頁<sub>2052</sub>）

丑二、應如是住

云何了知應如是住？謂往詣已，不應即入，至內門側伏慢而住，或無疑慮徐入其家，至相見處從容而住，先言慰問，含笑開顏，遠離顰蹙，方申愛語。伏慢而住者：謂具慚愧，遠離憍慢故。

丑三、應如是坐

云何了知應如是坐？謂佛開許隨其所有如法之座，以正威儀端嚴而坐。

謂佛開許隨其所有如法之座等者：謂於大床、或小繩床、或草葉座、或諸敷具、或尼師壇，結加趺坐故。

丑四、應如是語<sup>2</sup> 寅一、徵

云何了知應如是語？

寅二、釋<sup>2</sup> 卯一、標差別

謂善了知如時、如理、如量、寂靜、質直而語。

卯二、釋彼相<sup>5</sup> 辰一、如時語<sup>2</sup> 巳一、標三種

時有三種。

巳二、別釋相<sup>3</sup> 午一、樂聞時<sup>3</sup> 未一、標簡

一者、樂聞，非不樂聞。

未二、釋非

不樂聞者，謂如有一，或饑、或渴、或身疲倦、或風熱等之所逼惱。

未三、結名

是名初時。

午二、安住如法威儀時<sup>3</sup> 未一、標簡

二者、安住如法威儀，非非威儀。或復有一，雖樂欲聞，非威儀住。

未二、釋非

非威儀者，謂不應立為坐者說，除彼重病。如別解脫經廣說其相。

未三、結名

是第二時。

如別解脫經廣說其相者：別解脫經說：不為無病處高座者而說正法，不為坐者立說正法，不應居後為前行者而說正法，不為覆頭而說正法。其相應知。

午三、心無染惱時<sup>3</sup> 未一、標簡

三者、其心無有染惱，非染惱心。

未二、釋非

染惱心者，謂如有一，其心忽遽，於彼彼事增上勤劬，或荒或亂，或復渾濁；或他僕使，或作業者，或復殺者、敵者、怨者。

未三、結名

是第三時。

辰二、如理語

理有三種。謂有求請、如法求請、如量求請，方為宣說、如法為說、有義利說。

辰三、如量語

由三種相，當知如量。一、不亂不雜而有所說；二、圓滿文句宣說諸法；三、凡所宣說言詞不重，謂不重說所有言詞。若諸語言無用非義，尚不少說，何況多說。

理有三種等者：謂有求請，方為宣說；如法求請，如法為說；如量求請，有義利說。是名三種如理而語。

辰四、寂靜語<sup>2</sup> 巳一、標列

當知寂靜，亦有三種。一、威儀寂靜，二、言音寂靜，三、其心寂靜。



巳二、隨釋<sup>3</sup> 午一、威儀寂靜

威儀寂靜者，謂諸根寂靜、無有躁擾、亦不高舉、支節不動而有所說。

午二、言音寂靜

言音寂靜者，謂有所說聲不太高，亦不太急。

午三、其心寂靜

心寂靜者，謂雖觸惱，亦不生憤而有所說，況不觸惱。又無染心而有所說。

辰五、質直語

又質直語，亦有三種。謂如時語時乃至寂靜語時，或由宿習方便，任性而語；或由現法串習加行作意而語；或由愛樂學處，以思擇力而自制伏，方有所說。於一切時無有虛誑，若隱、若顯，所言無二。

丑五、應如是默<sup>3</sup> 寅一、徵

云何了知應默？

寅二、標

謂善了知，於五時中應當默然。

寅三、釋<sup>5</sup> 卯一、誼亂時

一者、說者正說語時，若彼聽者故作異言，現相誼亂，爾時說者宜當默然。

卯二、撥止時

二者、說者正說語時，若彼聽者撥言且止，吾不欲聞，爾時說者宜當默然。

卯三、違諍時

三者、說者正說語時，若彼聽者於說者所起求過心，發違諍言，現相乖背，爾時說者宜當默然。

卯四、屈請時

四者、施主以衣食等來相屈請，爾時受者宜當默然，而許可之。

卯五、較論時

五者、若有敵論者來，現相較論，爾時論者宜當默然，聽其言說。

庚十一、釋趣入差別<sup>2</sup>

辛一、趣入自性<sup>3</sup> 壬一、略標列

復次，且由三相，應自了知己所有信，乃至是善男子。一、由依處故；二、由自性故；三、由時分故。

壬二、隨別釋<sup>3</sup>

癸一、由依處

云何由依處故了知己信？謂如實知，若事是信之所依處，信緣彼生，當知彼事決定是我信所依處。

癸二、由自性

云何由自性故了知己信？謂如實知軟中上品已所有信。

癸三、由時分

云何由時分故了知己信？謂如實知，我於某時已得是信。如了知信，如是戒等辯等為後，皆當了知。

壬三、總料簡

此中信是趣入支；戒是入已奢摩他支；聞是毗鉢舍那支；捨是奢摩他、毗鉢舍那資糧支；內思所成慧及他隨順教授教誡，是能攝受奢摩他、毗鉢舍那

支。依止此故，證奢摩他、毗鉢舍那，及能證得諸沙門果。於自所證諸深細義，若有欲知而生疑惑，為斷疑故，如自所證為彼宣說。又為降伏諸敵論者，故須有辯。於他身語邪行起時，須有忍辱柔和所攝善男子性。

辛二、趣入因緣<sup>2</sup>

壬一、簡黑品<sup>10</sup>

癸一、不信

復次，由三因緣，發生不信。一、由不正知三寶功德故；二、行外道見故；三、未遇諸佛及聖弟子三種神變，隨其一種所調伏故。

癸二、不能數往寂靜園林

復次，由三因緣，不能數往寂靜園林。一、放逸懈怠所拘執故；二、多事業故；三、信順人故。

癸三、為性不好造詣於他

復次，由三因緣，為性不好造詣於他。一、性無畏故；二、性高慢故；三、依文字故。

癸四、為性不好親近於他

由三因緣，為性不好親近於他。一、性不黠利故；二、性非福田故；三、無極欲樂故。

癸五、為性不好請問於他

由三因緣，為性不好請問於他。一、於法不善故；二、於義不善故；三、於二俱不善故。

癸六、不能審聽

由三因緣，不能審聽。一、多尋伺故；二、多物務故；三、多諸蓋纏雜染心故。

癸七、為性不能決定任持

由三因緣，為性不能決定任持。一、不聽聞故；二、惡聽聞故；三、覆慧勝慧故。

覆慧勝慧故者：謂由無明障覆所知，慧不現前，說名覆慧。由諸煩惱自在增上，慧無堪能，說名勝慧。

癸八、為性不能觀察諸法

由三因緣，為性不能觀察諸法。一、樂著戲論故；二、愛居憤鬧故；三、不成就審觀察慧故。

癸九、為性不能法隨法行

由三因緣，為性不能法隨法行。一、由顧惜身命；二、由即彼增上力故，樂著利養；三、由樂著恭敬。

癸十、不樂修行利他之行

由三因緣，不樂修行利他之行。一、性是下劣種性故；二、悲微薄故；三、無勢力故。

壬二、翻白品

如是白品，與上相違，應知其相。

庚十二、釋鬼趣遊觀<sup>2</sup>

辛一、標類問

復次，諸聖弟子，非一眾多種種遊觀其事可得，所謂河濱遊觀、山谷遊觀、

鬼趣遊觀，如是等類種種遊觀其事可得。問：何因緣故，諸大聲聞已得神通，乃往鬼趣詰問諸鬼自先業報，為為除自疑故？為為饒益眾生故？若為除自疑者，已得神通，不應道理。若為饒益眾生者，當說云何饒益眾生？

辛二、釋義答<sup>2</sup> 壬一、出二饒益

答：為饒益眾生故，謂欲饒益此諸餓鬼及餘眾生。

壬二、釋其所以<sup>2</sup> 癸一、饒益諸鬼

何以故？由神通力，令諸餓鬼憶念宿世，自說先身所作惡業，深生厭悔，因為說法，便能領悟。由此因緣，速離鬼趣，如是說名饒益諸鬼。

癸二、利餘眾生

已得神通諸大聲聞，聞彼所說種種所受不可愛果先世惡業，乃還人間，展轉宣告，他既聞已，心生厭患，斷惡修善，如是說名利餘眾生。

庚十三、釋欲色名麤<sup>3</sup> 辛一、標

復次，由六種相，當知欲行諸色名麤。

辛二、徵

云何六相說彼名麤？

辛三、列

一、眾多故麤；二、沈重故麤；三、不淨故麤；四、堅彊故麤；五、變壞故麤；六、不隨心轉故麤。

戊三、略不說餘

於此地中餘決擇文，更不復現。

丁二、例獨覺地

又獨覺地諸決擇文，亦不復現。

瑜伽師地論科句披尋記卷第七十一



瑜伽師地論科句披尋記卷第七十二

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之一

丙十一、菩薩地<sup>3</sup> 丁一、結前生後

如是已說聲聞地等決擇。菩薩地決擇，我今當說。

丁二、依品決擇<sup>15</sup> 戊一、種性品

謂如成立聲聞種性，當知成立菩薩種性，亦復如是。

戊二、發心品<sup>2</sup> 己一、種類<sup>2</sup> 庚一、辨十發心<sup>3</sup> 辛一、標

復次，有十發心。

辛二、列

謂世俗受發心、得法性發心、不決定發心、決定發心、不清淨發心、清淨發

心、羸劣發心、彊盛發心、未成果發心、已成果發心。

辛三、釋<sup>10</sup> 壬一、世俗受發心

世俗受發心者，謂諸菩薩未入菩薩正性離生所有發心。

壬二、得法性發心

得法性發心者，謂諸菩薩已入菩薩正性離生，及迴向菩提諸聲聞等所有發心。

迴向菩提諸聲聞等者：有餘依無餘依決擇中說：迴向菩提聲聞，或於學位即能棄捨求聲聞願，或無學位方能棄捨。（陵本八十卷二十四頁<sup>6157</sup>）由是當知，彼諸聲聞皆已證入正性離生，是故名得法性發心。

壬三、不決定發心

不決定發心者，謂非彼種性，設彼種性復退還法所有發心。

壬四、決定發心

與此相違，當知名為決定發心。

壬五、不清淨發心

不清淨發心者，謂如有一，或隨他轉、或被陵逼不揆不量、或怖王難、或怖賊難、或怖鬼難、或怖退轉、或為活命、或為利養恭敬因緣、或復矯誑。如是等類而發心者，當知皆名不清淨發心。

壬六、清淨發心

與此相違而發心者，名清淨發心。

壬七、羸劣發心

羸劣發心者，謂如有一已發心菩薩，貪瞋癡纏所蔽伏故，捨於正行，處於邪行。

壬八、彊盛發心

與此相違，名彊盛發心。

壬九、未成果發心

未成果發心者，謂從勝解行地乃至第十地所有發心。

壬十、已成果發心

已成果發心者，謂如來地所有發心。如世尊言：我已解脫難行之行，我於一切難行之行極善解脫，自正願滿，亦令於他趣證菩提。

庚二、略不說餘

此十發心，幾染汙、幾不染汙等廣決擇文，更不復現。

己二、隨護<sup>2</sup> 庚一、標

復次，有四種心，菩薩應當恆常隨護。

庚二、列

一、聞思所成心，二、悲心，三、資糧心，四、修所成心。

戊三、自他利品<sup>2</sup> 己一、正行邪行別<sup>2</sup> 庚一、正行<sup>2</sup> 辛一、辨九正行<sup>3</sup> 壬一、標

復次，菩薩有九正行，依於自義及與他義。

依於自義及與他義者：本地分自他利品中說：自利利他略有十種。一、純自利利他，二、共自利利他，三、利益種類自利利他，四、安樂種類自利利他，五、因攝自利利他，六、果攝自利利他，七、此世自利利他，八、

他世自利利他，九、畢竟自利利他，十、不畢竟自利利他。如彼廣釋應知。（陵本三十五卷十七頁<sup>2883</sup>）

壬二、列

一、於生死正行，二、於有情正行，三、於自體正行，四、於諸欲正行，五、於身語意業正行，六、於不應損惱有情正行，七、於無間修善法正行，八、於內心奢摩他正行，九、於增上慧法毗鉢舍那正行。

壬三、釋<sup>9</sup> 癸一、於生死

云何菩薩於生死中行於正行？謂如病者於所有病、於辛苦藥。

癸二、於有情

云何菩薩於諸有情行於正行？謂如良醫於有病者。

癸三、於自體

云何菩薩於自體上行於正行？謂如善巧家長於未成就幼童。

謂如善巧家長於未成就幼童者：謂常隨逐守護故，隨學造作身語業故。義

如本地分意地中說。（陵本二卷五頁<sub>125</sub>）

癸四、於諸欲

云何菩薩於諸欲中行於正行？謂如商主行於商路於諸財貨。

癸五、於三業

云何菩薩於身語意業行於正行？謂如浣染衣者於諸衣服。

癸六、於不惱他

云何菩薩於不應損惱有情行於正行？謂如慈父於己膝上放失便利嬰孩小兒。

癸七、於修善法

云何菩薩於無間修諸善法中行於正行？謂如求火者施功於燧。

癸八、於奢摩他

云何菩薩於內心奢摩他中行於正行？謂如其主於能致財可委付者。

癸九、於毗鉢舍那

云何菩薩於增上慧法毗鉢舍那中行於正行？謂如善幻者於諸幻事。

辛二、略不說餘

餘決擇文，更不復現。

庚二、邪行<sup>3</sup> 辛一、標

復次，若於五種有情眾中起邪行時，說名無哀、無愍、無有傷歎。

辛二、列

一、於乞求者，二、於危厄者，三、於有恩者，四、於樂樂者，五、於樂法者。

辛三、釋<sup>2</sup> 壬一、釋有情眾<sup>5</sup> 癸一、乞求

言乞求者，略有五種。一、求飲食，二、求衣服，三、求房舍，四、求病緣醫藥資具，五、求救護。

癸二、危厄

其危厄者，亦有五種。一、住艱乏者，二、住迷亂者，三、來歸依者，四、相投委者，五、來拜覲者。

癸三、有恩

其有恩者，亦有五種。一、母，二、父，三、妻子，四、奴婢僕使，五、朋友兄弟親屬宰官。

其有恩者亦有五種等者：此中有恩，謂所攝受應知。

癸四、樂樂

其樂樂者，亦有五種。一、愛樂事業興盛樂，二、愛樂事業興盛不乖離樂，三、愛樂時節變異苦遠離樂，四、愛樂解疲倦樂，五、愛樂求昇進樂。

癸五、樂法

其樂法者，亦有五種。一、樂說正法，二、樂受持讀誦，三、樂論議決擇，四、樂教授教誡，五、樂法隨法行。

壬二、釋其邪行

此中邪行者，謂於是中，或作加行故、或不作加行故、或不饒益加行故、或中庸加行故，應知其相。



己二、不堪任堪任別<sup>2</sup>

庚一、辨不堪任<sup>4</sup>

辛一、標

復次，於有情中，有五種不堪任性。若諸有情成就此者，諸佛如來尚難化度，況諸菩薩，或復餘者。諸佛如來雖欲於彼作義利樂，然彼不能領受所作義利樂事，又於所作能為障礙；況諸菩薩，或復餘者。

辛二、徵

何等為五？

辛三、列

一、於清淨無堪任性，二、於加行無堪任性，三、於彼果成辦無堪任性，四、於加行及彼果成辦無堪任性，五、於攝受饒益無堪任性。

辛四、釋<sup>5</sup> 壬一、於清淨

於清淨無堪任性者，謂如有一，本性無有般涅槃法。

壬二、於加行

於加行無堪任性者，謂如有一，同般涅槃法相續已熟，

同般涅槃法相續已熟者：謂具涅槃種姓，及於現法中堪能趣入正性離生，是名相續已熟。

於此無間，造作積集能障正加行業。由此因緣，於現法中，無有堪能修正方便。

無有堪能修正方便者：謂無堪能修三十七菩提分法故。

壬三、於彼果成辦

於彼果成辦無堪任性者，謂如有一，同般涅槃法相續未熟，不作不集能障正加行業。由此因緣，無有功能成辦彼果。

壬四、於加行及彼果成辦

於加行及彼果成辦無堪任性者，謂如有一，同般涅槃法相續未熟，於此無間，造作積集能障正加行業。由此因緣，俱無堪能。

壬五、於攝受饒益

於攝受饒益無堪任性者，謂如有一，於此無間，造作積集能感定受貧窮匱乏

苦惱之業。由此因緣，於現法中，無有堪能令彼巨富無匱安樂。

謂如有一於此無間等者：此中有情，通說有種姓及無種姓。謂於此法中，若造能感貧窮匱乏苦惱之業，定受彼果，無有堪能令彼巨富無匱安樂故。

庚二、翻例堪任

與此相違，當知五種有堪任性。

戊四、真實義品<sup>3</sup> 己一、五事<sup>2</sup> 庚一、略標

復次，若欲了知真實義者，當先了知略有五事。

庚二、別辨<sup>2</sup> 辛一、初頌攝<sup>2</sup> 壬一、頌列

嗢柁南曰：

總舉別分別 有實世俗事 若生若異等 相行等色等

壬二、長行釋<sup>11</sup> 癸一、總舉

云何五事？一、相，二、名，三、分別，四、真如，五、正智。

癸二、別分別<sup>5</sup> 子一、相

何等為相？謂若略說，所有言談安足處事。

何等為相等者：謂若是處能為假說所依，是名言談安足處事。此是分別所行境界，是故名相。

子二、名

何等為名？謂即於相所有增語。

子三、分別

何等為分別？謂三界行中所有心心所。

子四、真如

何等為真如？謂法無我所顯，聖智所行，非一切言談安足處事。

子五、正智<sup>4</sup> 丑一、徵

何等為正智？

丑二、標

謂略有二種。

丑三、列

一、唯出世間正智，二、世間出世間正智。

丑四、釋<sup>2</sup> 寅一、唯出世間<sup>2</sup> 卯一、徵

何等名為唯出世間正智？

卯二、釋<sup>2</sup> 辰一、通達真如

謂由此故，聲聞、獨覺、諸菩薩等通達真如。

辰二、淨所知障

又由此故，彼諸菩薩於五明處善修方便，多住如是一切遍行真如智故，速證圓滿所知障淨。

遍行真如智者：謂七真如遍行一切法中，是名遍行真如。一、流轉真如，二、實相真如，三、唯識真如，四、安立真如，五、邪行真如，六、清淨真如，七、正行真如。顯揚論說七種真如作意，如彼別釋應知。（顯揚論三卷八頁）

寅二、世間出世間<sup>2</sup> 卯一、徵

何等名為世間出世間正智？

卯二、釋<sup>3</sup> 辰一、辨差別<sup>2</sup> 巳一、聲聞獨覺

謂聲聞、獨覺以初正智通達真如已，由此後所得世間出世間正智，於諸安立諦中，令心厭怖三界過患，愛味三界寂靜。

巳二、菩薩

又由多分安住此故，速證圓滿煩惱障淨。

又由多分安住此故等者：此說菩薩應知。謂彼多住如是世間出世間正智，速得圓滿煩惱障淨。

辰二、釋得名

又即此智，未曾得義，名出世間；緣言說相為境界義，亦名世間；是故說為世間出世間。

辰三、舉佛說<sup>2</sup>

巳一、標意

世尊依此密意，說如是言：我說有世間智、有出世間智、有世間出世間智。

巳二、釋相

若分別所攝智，唯名為世間；初正智所攝智，唯名出世間；第二正智所攝智，通名世間出世間。

癸三、辨有無<sup>2</sup> 子一、初三事<sup>2</sup> 丑一、舉相<sup>2</sup> 寅一、總問答

問：相當言有耶？當言無耶？答：當言是有。

寅二、別問答<sup>3</sup> 卯一、依假立自性差別

問：為如自性、差別假立故立，如是當言有耶？答：如是當言無。

卯二、依分別所行<sup>2</sup> 辰一、問

問：為如分別所行境，如是當言有耶？

辰二、答<sup>2</sup> 巳一、標有

答：如是當言有。

巳二、釋因

如是菩薩於相有性得善巧故，於諸相中善記為有、善記為無、善記為亦有亦無、善記為非有非無。彼由如是善記別故，遠離增益、損減二邊，行於中道，善說法界。

卯三、依言說離言說義<sup>2</sup> 辰一、問

問：此相為以言說義當言是有？為以離言說義當言是有？

辰二、答<sup>3</sup> 巳一、標

答：俱由二義當言是有。

巳二、徵

何以故？

巳三、釋

若如語言安立足處，如是以言說義當言是有；若如自性、差別假立不成就義，如是以離言說義當言是有。

丑二、例名等



如相，名、分別亦爾。

如相名分別亦爾者：謂名、分別言有言無，如相應知。

子二、後二事

問：真如、正智當言有耶？當言無耶？答：當言是有。

癸四、辨實假<sup>5</sup> 子一、相<sup>2</sup> 丑一、問

問：相當言實有，當言假有？

丑二、答<sup>2</sup> 寅一、標二差別

答：實有行中當言實有，假有行中當言假有。

寅二、例所依行

有相諸行亦有二種。

有相諸行亦有二種者：謂有相行亦通二種。色、心、心所是實有法，不相應行是假有法。

子二、名

問：名當言實有，當言假有？答：當言假有，唯於相中假施設故。

子三、分別

問：分別當言實有，當言假有？答：二種俱有。

二種俱有者：如五識身相應地意地決擇中，於善、不善、無記諸法分別假實應知。（陵本五十五卷五頁<sup>4407</sup>）

子四、真如

問：真如當言實有，當言假有？答：當言實有，勝義攝故。

子五、正智<sup>2</sup> 丑一、問

問：正智當言實有，當言假有？

丑二、答<sup>2</sup> 寅一、標俱有

答：當言俱有。

寅二、釋二種

此中智是實有；若智眷屬諸心心所亦名為智，說之為假；故有二種。

癸五、辨世俗勝義<sup>5</sup> 子一、相<sup>2</sup> 丑一、問

問：相當言世俗有，當言勝義有？

丑二、答<sup>2</sup> 寅一、標世俗有

答：當言世俗有。

寅二、釋二因緣

由二因緣故。一、雜染起故；二、施設器故。

子二、名<sup>2</sup> 丑一、問

問：名當言世俗有，當言勝義有？

丑二、答<sup>2</sup> 寅一、標世俗有

答：當言世俗有。

寅二、釋三因緣

由三因緣故。一、雜染起故；二、施設器故；三、言說所依故。

子三、分別<sup>2</sup> 丑一、問

問：分別當言世俗有，當言勝義有？

丑二、答<sup>2</sup> 寅一、標世俗有

答：當言世俗有。

寅二、釋四因緣

由四因緣故。一、雜染起故；二、施設器故；三、言說隨眠故；四、言說隨覺故。

子四、真如

問：真如當言世俗有，當言勝義有？答：當言勝義有，是清淨所緣境性故。

子五、正智

問：正智當言世俗有，當言勝義有？答：初正智當言勝義有，第二正智當言俱有。

初正智當言勝義有等者：唯出世間正智，名初正智。世出世間正智，名第二正智。

癸六、辨誰所生<sup>5</sup> 子一、相

問：相當言誰所生？答：當言相所生，及先分別所生。

當言相所生等者：此中相言，謂有情世間及器世間現所成相。以彼為緣，名相所生。顯揚論說：於依他起自性，執著初自性故，起於熏習，則成雜染。（顯揚論十六卷十三頁）由是此說先分別所生。

子二、名

問：名當言誰所生？答：當言補特伽羅欲所生。

子三、分別

問：分別當言誰所生？答：當言分別所生，及相所生。

當言分別所生等者：本地分說八種分別。一、自性分別，二、差別分別，三、總執分別，四、我分別，五、我所分別，六、愛分別，七、非愛分別，八、彼俱相違分別。（陵本三十六卷二十頁<sup>2992</sup>）由是此說分別所生。相為所緣緣故，名相所生。

子四、真如

問：真如當言誰所生？答：當言無生。

子五、正智

問：正智當言誰所生？答：當言由聽聞正法、如理作意，正智得生。

癸七、辨異不異<sup>3</sup> 子一、相<sup>4</sup> 丑一、與名<sup>2</sup> 寅一、問

問：相與名當言異，當言不異？

寅二、答<sup>3</sup> 卯一、標不可說

答：俱不可說。

卯二、釋俱有過

何以故？俱有過故。

卯三、出過差別

異有何過？名應實有。不異有何過？若取相時，應亦取名。

名應實有者：如前已說，名是假有，唯於相中假施設故。若許異相別有名

者，是則名應非假施設，而是實有，是故成過。

丑二、與分別<sup>2</sup> 寅一、問

問：相與分別當言異，當言不異？

寅二、答<sup>3</sup> 卯一、標不可說

答：俱不可說。

卯二、釋俱有過

何以故？俱有過故。

卯三、出過差別

異有何過？分別應非相為性。不異有何過？離分別外所有諸相，應以分別為性。

丑三、與真如<sup>2</sup> 寅一、問

問：相與真如當言異，當言不異？

寅二、答<sup>2</sup> 卯一、正辨<sup>5</sup> 辰一、標不可說

答：俱不可說。

辰二、釋俱有過

何以故？俱有過故。

辰三、出過差別<sup>2</sup> 巳一、異過

異有何過？諸相之勝義，應非即真如。又修觀者應捨諸相，別求真如。又於真如得正覺時，不應於相亦得正覺。

巳二、不異過

不異有何過？如真如無差別，一切相亦應無差別。又得相時，應得真如。又得真如時亦如得相，應不清淨。

辰四、舉事喻顯<sup>3</sup> 巳一、舉事<sup>2</sup> 午一、舉種種<sup>3</sup> 未一、說無常等

如諸行上，有無常、苦、無我共相，雖復是有，而不可說與彼諸行若異不異。

未二、說麤重等

又如身心，麤重、輕安雖復是有，而不可說與彼身心若異不異。



未三、說法與種

又如善、惡、無記法中，種子雖有，而不可說與彼諸法若異不異。

午二、釋俱過

何以故？俱有過故。

巳二、引喻<sup>2</sup> 午一、標舉

又如虛空遍一切故，於諸色處雖有虛空，而不可說與彼諸色若異不異。

午二、釋過

何以故？俱有過故。異有何過？不遍一切故，虛空應無常。不異有何過？離色虛空應無所有。

巳三、顯理

此中道理，如其所應，當知亦爾。

辰五、引教證成<sup>3</sup> 巳一、標佛說

聲聞乘中，有處世尊依於諸行，顯示不異亦非不異記別道理。如說：苾芻！

取非即蘊，亦不離蘊。

已二、釋體相

此中欲貪說名為取。

已三、顯俱過

不異何過？誹謗蘊中，善、無記法不清淨過。異有何過？於諸取中，增益常性不清淨過。

誹謗蘊中善無記法不清淨過者：此中不清淨過，當知約彼證成道理為論。

解深密說：由七種相名不清淨。一者、此餘同類可得相，二者、此餘異類可得相，三者、一切同類可得相，四者、一切異類可得相，五者、異類譬喻所得相，六者、非圓成實相，七者、非善清淨言教相。（解深密經五卷六頁）如彼別釋應知。

卯二、例餘

如相與真如不異非不異道理，名、分別、正智與真如，當知亦爾。

丑四、與正智

問：相與正智當言異，當言不異？答：如與分別俱不可說。

子二、名<sup>2</sup> 丑一、與分別

問：名與分別當言異，當言不異？答：當言異。

丑二、與正智

問：名與正智當言異，當言不異？答：當言異。

名與分別當言異者：假實異故，名與正智，當知亦爾。

子三、分別

問：分別與正智當言異，當言不異？答：當言異。

分別與正智當言異者：染淨異故。

癸八、相<sup>5</sup> 子一、相相

問：相有何相？答：分別所行相。

子二、名相

問：名有何相？答：言說所依相。

子三、分別相

問：分別有何相？答：相為所行相。

子四、真如相

問：真如有何相？答：正智所行相。

子五、正智相

問：正智有何相？答：真如為所行相。

癸九、行相<sup>5</sup> 子一、相<sup>2</sup> 丑一、問

問：相有何行相？

丑二、答<sup>4</sup> 寅一、無量相<sup>2</sup> 卯一、標

答：應知此相，有種種行相、無量行相，由分別行相種種無量故。

卯二、列

謂色相、心相、心所有相、心不相應行相、無為相、蘊相、界相、處相、緣

起相、處非處相、根相、諦相、念住相、正斷相、神足相、根相、力相、覺支相、道支相、行跡相、法跡相、奢摩他相、毗鉢舍那相、舉相、捨相、緣相、依相、地相、水相、火相、風相、空相、識相、此世界相、彼世界相、日相、月相、那落迦相、傍生相、餓鬼相、人相、四大王眾天相、三十三天相、夜摩天相、覩史多天相、樂化天相、他化自在天相、初靜慮相、第二靜慮相、第三靜慮相、第四靜慮相、空無邊處相、識無邊處相、無所有處相、非想非非想處相、起相、盡相、有相、非有相、雜染相、清淨相、見聞覺知相、已得尋求相、心隨尋伺相，如是等類餘無量相。

寅二、六相<sup>2</sup> 卯一、標列

復有六相。一、有相相，二、無相相，三、狹小相，四、廣大相，五、無量相，六、無所有相。

卯二、隨釋<sup>6</sup> 辰一、有相相

云何有相相？謂解了事名分別所有相。

辰二、無相相

云何無相相？謂不解了事名分別所有相。

辰三、狹小相

云何狹小相？謂欲界事分別所有相。

辰四、廣大相

云何廣大相？謂色界事分別所有相。

辰五、無量相

云何無量相？謂空、識無邊處無色界事分別所有相。

辰六、無所有相

云何無所有相？謂無所有處無色界事分別所有相。

寅三、五相

復有餘五相。一、相相，二、名相，三、分別相，四、真如相，五、正智相。

寅四、二相<sup>2</sup>

卯一、標列

復有餘二相。一、本性相，二、影像相。

卯二、隨釋<sup>2</sup> 辰一、本性相

云何本性相？謂先分別所生，及相所生共所成相。

及相所生共所成相者：緣有情世間及器世間為境界故，名相所生共所成相。顯揚論說：有情世界、器世界，此之二種雖不依見，亦不應思。何以故？世共了知現所成相故。（顯揚論十七卷八頁）由是說此名本性相。

辰二、影像相

云何影像相？謂遍計所起，勝解所現，非住本性相。

子二、名<sup>2</sup> 丑一、問

問：名有何行相？

丑二、答<sup>2</sup> 寅一、無量種

答：由相勢力，亦有種種無量行相。

寅二、十二種<sup>2</sup> 卯一、標

又若略說有十二種。

卯二、列

一、假說名，二、實事名，三、種類相應名，四、各別相應名，五、隨德名，六、假立名，七、共所知名，八、非共所知名，九、顯了名，十、不顯了名，十一、總名，十二、別名。

一假說名等者：如攝釋分別釋應知。（陵本八十一卷一頁<sub>6165</sub>）

子三、分別<sub>2</sub> 丑一、問

問：分別有何行相？

丑二、答<sub>2</sub> 寅一、無量

答：由相、名勢力故，亦有種種無量行相。

寅二、七種<sub>2</sub> 卯一、標

若略說者，當知有七種。

卯二、列



一、有相分別，二、無相分別，三、於境界任運分別，四、尋求分別，五、伺察分別，六、染汙分別，七、無染汙分別。

一有相分別等者：如本地分意地中釋應知。（陵本一卷十一頁<sup>45</sup>）

子四、真如

問：真如有何行相？答：其相不可說行相。

子五、正智

問：正智有何行相？答：若出世間正智，亦有其相不可說行相；若世間出世間正智，有取安立諦行相。

癸十、差別<sup>5</sup> 子一、相

復次，若相、若影像、若顯現、若有、若戲論、若薩迦耶、若有為、若思所造、若緣生，如是等是相差別。

子二、名

若名、若想、若施設、若假言說、若世俗、若假立、若言論，如是等是名差

別。

子三、分別

若分別、若思惟、若遍計、若邪道、若邪行、若越流、若不正取，如是等是分別差別。

子四、真如

若真如、若實性、若諦性、若無顛倒性、若不顛倒性、若無戲論界、若無相界、若法界、若實際，如是等是真如差別。

子五、正智

若正智、若正慧、若正覺、若正道、若正行、若正流、若正取，如是等是正智差別。

癸十一、色等<sup>36</sup> 子一、依五法辨

問：如是五事，幾色？幾心？幾心所有？幾心不相應行？幾無為？答：相通五種，名唯心不相應行，分別、正智通心及心所有，真如唯無為。

分別正智通心及心所有者：前說：若智眷屬諸心心所亦名為智。由是此說通心及心所有。分別通二，其義易了。

子二、依善巧辨<sup>4</sup> 丑一、蘊非蘊攝

問：如是五事，幾蘊所攝？幾非蘊所攝？答：三蘊所攝，相攝不攝，真如不攝。

三蘊所攝等者：名及分別、正智，皆蘊所攝，義如前說，名唯心不相應行。分別、正智通心及心所有故，相通有為、無為故，應分別說攝不攝。真如唯無為，是故不攝。

丑二、界處非界處攝

問：如是五事，幾界處所攝？幾非界處所攝？答：一切皆是界處所攝。

丑三、緣起非緣起攝<sup>2</sup> 寅一、舉緣起

問：如是五事，幾緣起所攝？幾非緣起所攝？答：三緣起攝，相攝不攝，真如不攝。

寅二、例處非處等

如緣起攝，處非處攝及與根攝，當知亦爾。

三緣起攝等者：名及分別，緣起流轉所攝。正智，緣起清淨所攝。餘如蘊說。

丑四、諦非諦攝<sup>2</sup> 寅一、問

問：如是五事，幾諦所攝？幾非諦所攝？

寅二、答<sup>3</sup> 卯一、標列

答：諦有二種。一、安立諦，二、非安立諦。

卯二、隨釋

安立諦者，謂四聖諦。非安立諦者，謂真如。

卯三、明攝

此中三是安立諦所攝，相亦攝亦不攝，真如唯非安立諦所攝。

三是安立諦所攝等者：名及分別，苦、集諦攝。正智，道諦所攝。相中分

別、正智及與真如，亦諦所攝。唯名一種，非諦所攝。

子三、依四緣辨

問：如是五事，幾因緣所攝？幾等無間緣、幾所緣緣、幾增上緣所攝？答：相，一切緣所攝。名，等無間緣所不攝。分別、正智，四緣所攝。真如唯所緣緣攝。

名等無間緣所不攝者：名唯假設，非如心心所法有其自性，前為後緣，是故說彼等無間緣所不攝。然望名言隨眠、名言隨覺，亦得說彼因緣、所緣緣、增上緣所攝。

子四、依四依辨

問：如是五事，幾法依所攝？幾義依、幾了義經依、幾智依所攝？答：相，三依所攝。名唯法依所攝。如相，分別亦爾。真如，智所行故，義依所攝。正智唯智依所攝。

相三依所攝者：智依所攝，唯是無相無分別出世正智。由是因緣，相及分

別不說彼攝，唯說三依所攝，謂法依、義依、了義經依。

子五、依有色無色等辨<sup>2</sup> 丑一、舉色無色

問：如是五事，幾有色？幾無色？答：相通二種。分別、正智唯無色。名與真如俱非二種，是假有故，不可說故。

丑二、例見無見等

如有色無色，有見無見、有對無對亦爾。

是假有故等者：如次配釋名與真如應知。

子六、依有漏無漏辨

問：如是五事，幾有漏？幾無漏？答：相通二種。二唯有漏。二唯無漏。真如漏盡所緣義故，名無漏，非漏盡相義故。正智漏盡對治義故，名無漏。

非漏盡相義故者：煩惱寂靜，是漏盡相。真如唯是漏盡所緣，非是漏盡自相，故簡非之。

子七、依有為無為辨

問：如是五事，幾有為？幾無為？答：相通二種。三唯有為。真如唯無為，諸行寂靜所緣義故，非諸行寂靜相義故。

子八、依有諍無諍等辨<sup>2</sup>

丑一、舉諍無諍<sup>2</sup>

寅一、問

問：如是五事，幾有諍？幾無諍？

寅二、答<sup>2</sup>

卯一、辨

答：相通二種，二唯有諍，二唯無諍。

卯二、例

如有漏無漏，此中道理，當知亦爾。

丑二、例愛味無愛味等

如有諍無諍，如有愛味無愛味、依耽嗜依出離，當知亦爾。

子九、依世間出世間等辨<sup>2</sup>

丑一、舉世間出世間

問：如是五事，幾世間？幾出世間？答：三是世間。真如是出世間。正智，一分唯出世間，一分通世間出世間。真如，一切言說戲論寂靜所緣義，名出

世間，非超過言說戲論相義故。

丑二、例墮非墮攝

如世間出世間，墮攝非墮攝，當知亦爾。

非超過言說戲論等者：超過言說戲論，唯是出世間智。自相真如名出世間，其義不爾，是故非之。

子十、依內外辨

問：如是五事，幾內？幾外？答：相通二種。名唯是外。分別生所攝，故通二種。真如非二種。如分別，正智亦爾。

名唯是外等者：名法處攝，故唯是外。分別通二，緣內、緣外生所攝故。

子十一、依麤細辨

問：如是五事，幾麤？幾細？答：三通二種。真如唯細，難識義故，非相漸減極略義故。正智唯細，行細義故。

子十二、依劣勝辨



問：如是五事，幾劣？幾勝？答：三通二種。真如唯勝，清淨所緣義故，非從下劣勝進相義故。正智唯勝，真如為所行義故。

子十三、依遠近辨

問：如是五事，幾遠？幾近？答：一由處遠、時遠故，俱通二種。名、分別、正智由時遠故，皆通二種。真如由二故，俱非二種，以無為故。

一由處遠時遠等者：相通有色、無色，說由處遠、時遠，餘通遠近二種。處所、去來、時、方隔越義，是遠義故；與此相違，說名為近。名、分別、正智唯是無色，說由時遠，皆通二種。

子十四、依有執受無執受辨

問：如是五事，幾有執受？幾無執受？答：相通二種，名、分別、正智無執受，真如俱非二種。

子十五、依同分彼同分辨

問：如是五事，幾同分？幾彼同分？答：相通二種。餘非二種，唯依有色諸

根建立同分、彼同分故。

子十六、依因非因等辨<sup>2</sup> 丑一、舉因非因

問：如是五事，幾因？幾非因？答：四是因，真如非因。

丑二、例果非果等

如因非因，果非果、有因非有因、有果非有果，當知亦爾。

子十七、依是異熟非異熟辨

問：如是五事，幾是異熟？幾非異熟？答：相通二種，名非異熟，分別通二種，真如俱非二種，正智非異熟。

子十八、依有非有異熟辨

問：如是五事，幾有異熟？幾非有異熟？答：相通二種，名非有異熟，分別通二種，真如俱非二種，正智定非有異熟。

子十九、依有無所緣等辨<sup>2</sup> 丑一、舉有所緣無所緣

問：如是五事，幾有所緣？幾無所緣？答：相通二種。名無所緣。分別、正

智俱有所緣。真如俱非二種。

丑二、例相應不相應等

如有所緣無所緣，相應不相應、有行無行、有依無依，當知亦爾。

子二十、依有上無上辨

問：如是五事，幾有上？幾無上？答：四有上。真如無上，無為清淨所緣義故。

子二十一、依世非世辨

問：如是五事，幾去來今？幾非去來今？答：四通三種，真如非三種。

子二十二、依繫不繫辨

問：如是五事，幾欲界繫？幾色界繫？幾無色界繫？幾不繫？答：欲、色界繫三。無色界繫亦爾。正智一種，若唯出世間，是不繫；若世間出世間，通繫不繫。真如俱非二種。

欲色界繫三者：相、名、分別，通三界繫應知。

子二十三、依三性辨

問：如是五事，幾善？幾不善？幾無記？答：相及分別通三種。名唯無記。真如唯善，清淨善巧所緣義故，非能攝生可愛果相義故。正智唯善。

子二十四、依三慧及境辨

問：如是五事，幾聞所成，聞所成境？幾思所成，思所成境？幾修所成，修所成境？答：相及分別是三種，是三種境。名是聞思所成，是三種境。真如唯是修所成境。正智是修所成，是三種境。

子二十五、依空等及境辨<sup>2</sup>

丑一、問

問：如是五事，幾是空，是空境？幾是無願，是無願境？幾是無相，是無相境？

丑二、答<sup>2</sup>

寅一、正辨

答：相通三種，亦三種境。名非三種，是二種境。分別通三種，是二種境。真如非三種，是空、無相境。正智通三種，是空所行境。

寅二、料簡<sup>3</sup> 卯一、總說空等

若無差別，總說為空、無願、無相，當知此中，通聞思修所成為性。

卯二、名三摩地

若唯以三摩地名而宣說者，當知此中，唯修所成為性，通世出世。

卯三、名解脫門

若唯以解脫門名而宣說者，當知此中，唯出世間修所成為性。

名非三種等者：空、無願、無相，以聞思修所成為性，名是假有，故非三種。然為空、無願所緣，不為無相所緣，以有相故，由是說言是二種境。分別亦爾。

子二十六、依三學辨

問：如是五事，幾是增上戒、增上戒眷屬？幾是增上心、增上心所行？幾是增上慧、增上慧所行？答：相是增上戒、增上戒眷屬，是增上心、慧，亦心、慧所行。

相是增上戒等者：謂若戒律儀相，是增上戒律儀所攝。諸根境相，名增上戒眷屬。

名是戒眷屬，亦是增上心、慧所行。

名是戒眷屬者：謂戒學中，安立種種差別名故。

分別是增上心、慧，亦心、慧所行，是增上戒眷屬。真如是增上心、慧所行，非三種。正智是增上心、慧，亦心、慧所行，是增上戒眷屬。

子二十七、依學無學等辨

問：如是五事，幾學？幾無學？幾非學非無學？答：相及分別通三種。名唯非學非無學。真如亦唯非學非無學，是無為故。正智通學及無學。

子二十八、依斷不斷辨

問：如是五事，幾見所斷？幾修所斷？幾不斷？答：相通一切，名唯修所斷，分別通見、修所斷，真如是不斷，正智亦唯是不斷。

名唯修所斷者：名唯無記，故修所斷。

子二十九、依四念住辨<sup>5</sup> 丑一、相

問：緣相為境修幾念住？答：四。

丑二、名

問：緣名為境修幾念住？答：一，法念住。

丑三、分別

問：緣分別為境修幾念住？答：三，謂受、心、法念住。

丑四、真如<sup>2</sup> 寅一、問

問：緣真如為境修幾念住？

寅二、答<sup>2</sup> 卯一、法念住

答：一，法念住。

卯二、壞緣法念住

又思惟身相真如，亦修壞緣法念住。受、心、法相，當知亦爾。

丑五、正智

問：緣正智為境修幾念住？答：三，如分別說。

子三十、依四正勤辨<sup>2</sup> 丑一、伏斷捨<sup>2</sup> 寅一、問

問：緣相為境，當言能捨已生、未生惡不善法，當言不能捨耶？

寅二、答<sup>2</sup> 卯一、舉相

答：當言伏斷故捨，非永害隨眠故捨。

卯二、例名等

如相，名、分別亦爾。

丑二、永害捨

緣真如及正智為境，當言亦由永害隨眠故捨。

子三十一、依世間靜慮等定辨<sup>2</sup> 丑一、舉初靜慮

問：是五事中，思惟幾事能入世間初靜慮定？答：思惟欲界所繫及初靜慮所繫相、名、分別。

丑二、例餘一切



如是思惟下地所繫及第二靜慮地所繫相、名、分別，能入世間第二靜慮。如是所餘靜慮、無色，如其所應，當知亦爾。

子三十二、依出世靜慮等定辨<sup>3</sup> 丑一、舉初靜慮

問：是五事中，思惟幾事能入出世初靜慮定？答：即思惟欲界所繫及初靜慮地所繫相、名、分別、真如。

丑二、例至無所有處

如是乃至無所有處，如其所應，當知亦爾。

丑三、別辨非想非非想處<sup>2</sup> 寅一、標唯世間

非想非非想處，本性法爾唯是世間。

非想非非想處本性法爾唯是世間者：由於彼處想不猛利，無出世道，故唯世間。

寅二、問答繫相

問：非想非非想處所繫相，當言是相耶？答：當言無相相，亦名微細相。

當言無相相等者：由於彼處非有想非無想，如其次第，當言無相相。唯有微細想，緣無相境轉，是故亦名微細相。

子三十三、依根力辨<sup>2</sup> 丑一、舉信等根

問：是五事中，信等諸法用何為自性，以何為所緣，於何為增上得根名耶？  
答：分別為自性，名、相為所緣，於真如、正智為增上故，而得根名。

丑二、例信等力<sup>2</sup> 寅一、例力名

如根名，力名亦爾。

寅二、問答位

問：於何位中得力名耶？答：即信等根，非不信等之所陵雜。若成不雜法時，轉名為力。

子三十四、依覺支辨<sup>2</sup> 丑一、世間

如根及力，如是若得菩提支名為覺支，此是世間覺支，以分別為自性。

丑二、出世間

若依菩提支名為覺支，此是出世間覺支，以正智為自性，真如為所緣，於覺悟安立諦為增上。

若得菩提支名為覺支等者：此中覺支，說有二別。若通根、力而得名者，是即得菩提支名為覺支，非如實覺，故是世間，如根及力以分別為自性。若不通餘，唯七覺支而得名者，是即依菩提支名為覺支，如實覺慧用此為支，故此以正智為自性。由是說有二種差別。

子三十五、依道支等辨<sup>2</sup> 丑一、舉道支<sup>2</sup> 寅一、世間

又正見等諸道支，若是世間，如前應知。

若是世間如前應知者：謂正見等世間攝者，如前應知以分別為自性。

寅二、出世間

若出世間，以正智為自性，除諸戒支，安立、非安立真如為所緣，於所證得一切漏盡現法樂住為增上。

除諸戒支者：八道支中，正語、正業、正命，戒蘊所攝，是名戒支。雖由

正智眷屬，亦說正智為其自性，然非諸心心所、非有所緣，是故除之。

丑二、例行跡等<sup>2</sup> 寅一、略標舉

如諸道支，行跡、法跡、奢摩他、毗鉢舍那等，當知亦爾。

寅二、明建立<sup>3</sup> 卯一、行跡

此中行跡，依鈍根、利根，現法樂住已得、未得，差別建立。

此中行跡等者：此有四種。謂苦遲道、苦速道、樂遲道、樂速道。差別建立，如本地分聲聞地釋。（陵本二十六卷十一頁<sup>2202</sup>）

卯二、法跡<sup>2</sup> 辰一、總標

若諸法跡，依能任持世俗、勝義正法，差別建立。

辰二、別釋

謂由任持增上戒世俗正法故，建立初二；由任持所餘增上心、增上慧勝義正法故，建立後二。

卯三、止觀

又由於所緣境不散亂義故，及觀察彼義故，建立奢摩他、毗鉢舍那。

若諸法跡等者：此亦有四。謂無貪跡、無瞋跡、正念跡、正等持跡。差別建立，如顯揚論釋應知。（二卷十八頁）

子三十六、依解脫等辨<sup>3</sup> 丑一、解脫<sup>2</sup> 寅一、辨差別<sup>2</sup> 卯一、問

問：依能解脫相及麤重二種縛故，立八解脫。於五事中，用誰為自性？以誰為所緣？於誰為增上？

卯二、答<sup>3</sup> 辰一、自性

答：用世間出世間正智為自性。

辰二、所緣

初及第二，於諸色中以顯色相及真如相為所緣。第三，即諸色中以攝受相及彼真如相為所緣。

第三即諸色中以攝受相等者：集論中說：云何淨解脫身作證具足住？謂依止靜慮，於內淨不淨諸色，已得展轉相待想、展轉相入想、展轉一味想。

（集論八卷三頁）此說所緣，當知即彼展轉相入想，名攝受相；展轉一味想，名真如相。

次四種，各以自相為所緣，及彼真如為所緣。最後，無所緣。

辰三、增上

於能引發一切聖神通功德為增上。

寅二、明斷障

又修觀者，於諸色相及無色相，為自在障之所障故，為斷彼障起此觀行。

丑二、勝處<sup>2</sup>

寅一、明勝伏事

諸勝處中，前四如初二解脫，後四如第三解脫，由諸色相難可勝故，於此事中能勝伏時，於無色相亦得勝自在。

又修觀者於諸色相等者：顯揚論說：由六障淨增上力故，分別建立解脫功德。六障淨者，一、變化障清淨，由前二解脫。二、最極現法樂住障清淨，由第三解脫，淨與不淨皆清淨顯現故。三、往還障清淨，由第四解

脫。四、引無諍等聖功德障清淨，由第五解脫。五、諸漏及有障清淨，由第六、第七解脫。六、寂靜最極住障清淨，當知由第八解脫。（顯揚論二十卷二頁）此應準知。

寅二、釋勝知見<sup>2</sup> 卯一、聖者

又此中言勝知勝見，謂諸聖者由正作意思惟諸色真如相故，得勝知見。若諸異生，即不如是。

卯二、異生<sup>2</sup> 辰一、問

問：若爾，異生云何名勝？

辰二、答<sup>3</sup> 巳一、總標

答：由三種想故。

巳二、列釋

謂於淨不淨色由展轉相待想；展轉相待故，於淨不淨色由展轉相隨想；展轉相隨故，於淨不淨色由清淨一味想。

已三、明共

此最後勝，異生、聖者二所共得。

由展轉相待想等者：雜集論說：待諸淨色，於餘色中謂為不淨；待不淨色，於餘色中謂為清淨；非不相待。何以故？唯見一類時淨不淨覺無故。又於淨中不淨性所隨入，於不淨中淨性所隨入。何以故？於薄皮所覆共謂為淨中，現有髮毛等三十六種不淨物故。如是展轉總一切色，合為一味清淨想解。（雜集論十三卷十九頁）此應準知。

丑三、遍處<sup>4</sup>

寅一、標所緣

又十遍處，由勝處所緣力，應知其相。

寅二、辨差別

此中差別者，亦以大種相為所緣，及彼真如相為所緣。又空、識無邊處相為所緣，及彼真如相為所緣。

寅三、釋得名



若不爾者，由所依止不遍滿故，能依不應得成遍滿。由彼所緣真如之相所緣境界極遍滿故，得名遍滿。

寅四、顯業用

由勝遍滿二種勢力，令諸解脫亦得清淨。又能引發一切眾聖神通功德。

瑜伽師地論科句披尋記卷第七十二



瑜伽師地論科句披尋記卷第七十三

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之二

辛二、第二頌攝<sup>2</sup> 壬一、列

復次，嗢柁南曰：

思擇自性取 薩迦有世間 真尋思實智 密意與次第

壬二、釋<sup>9</sup> 癸一、思擇<sup>2</sup> 子一、諦攝

問：如是五事，幾諦所攝？答：相，四安立諦攝。名，一苦諦攝。分別，三諦攝，除滅諦。真如，四非安立諦攝。正智，緣安立、非安立諦境道諦攝。

名一苦諦攝者：由彼假名起四顛倒，是故說名苦諦所攝。

子二、句攝<sup>4</sup> 丑一、相與名等<sup>2</sup> 寅一、舉相名

問：諸相是名耶？設名是相耶？答：諸名皆是相，有相而非名，謂除名相餘四相。

寅二、例隨應

餘隨所應，當知亦爾。

餘隨所應當知亦爾者：相通分別、真如、正智，更互相望，當知如名順後句答，故總說言隨應亦爾。

丑二、相與相相

問：諸相皆相相耶？設相相皆相耶？答：諸相相皆是相，有相非相相，謂名等四相。

丑三、相相與名相<sup>2</sup> 寅一、問

問：若分別相相，一切名相相合、相依而分別耶？設分別名相，一切相相相合、相依而分別耶？

寅二、答<sup>2</sup> 卯一、標四句

答：應作四句。

卯二、隨列釋

有分別相相，非名相相合、相依而起分別，謂分別不了其名所有相相，又於諸相已拔名隨眠。有分別名相，非相相相合、相依而起分別，謂分別不了其事所有名相。與上相違，是俱句。除上爾所相，是俱非句。

與上相違是俱句者：如下說言，依二遍計二自性。謂遍計此事是色自性，名之為色；此事是受、想、行、識自性，名受、想、行、識。其義應知。

丑四、真如與相<sup>2</sup>

寅一、思惟真如與觀真如<sup>2</sup> 卯一、問

問：若思惟真如，即觀真如耶？設觀真如，即思惟真如耶？

卯二、答<sup>2</sup> 辰一、標四句

答：應作四句。

辰二、隨列釋

有思惟真如，非觀真如，謂以分別所攝如理作意思惟真如，但見真如相，不

見實真如，乃至未至正通達位，及通達後作意思惟安立真如。有觀真如，非思惟真如，謂通達真如時，由勝義故，思惟其相。有思惟真如，亦觀真如，謂通達後相續思惟非安立真如。有不思惟真如，亦不觀真如，謂離如理所引作意思惟諸相。

若思惟真如即觀真如等者：此中思惟真如，謂於彼有相位。若觀真如，即於彼無相位。由是差別，作四句答，如文可知。

寅二、思惟相與觀相<sup>2</sup> 卯一、問

問：若思惟相，即觀其相耶？設觀其相，即思惟相耶？

卯二、答<sup>2</sup> 辰一、標四句

答：應作四句。

辰二、隨列釋

有思惟相，不觀其相，謂前第二句。

有思惟相不觀其相等者：謂如前第二句：有觀真如，非思惟真如。觀真如

勝義相故，名思惟相。不觀真如相，說名不觀其相。

**有觀其相，不思惟相，謂前初句。**

有觀其相不思惟相等者：謂如前初句：有思惟真如，非觀真如。思惟真如相故，名觀其相。非觀真如思惟勝義相故，名不思惟相。

**有思惟相，亦觀其相，謂前第四句。**

有思惟相亦觀其相等者：謂如前第四句：有不思惟真如，亦不觀真如。不思惟真如故，名思惟相。不觀真如故，名觀其相。此中相言，謂非理攝諸有相境應知。

**有非思惟相，亦非觀其相，謂前第三句。**

有非思惟相亦非觀其相等者：謂如前第三句：有觀真如，非思惟真如。通達真如故，名非思惟相。非由分別思惟真如故，名非觀其相。

癸二、自性<sup>3</sup> 子一、明所攝

**問：如是五事，為攝一切法，為不如是耶？答：如是。**

子二、明自性

問：彼一切法，當言以何而為自性？答：諸法自性不可言說。

子三、明觀相<sup>2</sup> 丑一、問

問：云何應觀彼諸法相？

丑二、答<sup>3</sup> 寅一、立自<sup>2</sup> 卯一、舉喻

答：如幻事相，非全無有。譬如幻事，有幻事性，無象馬、車步、末尼、真珠、金銀等性。

卯二、合法<sup>3</sup> 辰一、總標

如是諸法，體性唯有名相可得，無有自性、差別施設顯現可得。

辰二、別顯<sup>3</sup> 巳一、相

相由相名，相之自性實不可得。

巳二、名等

如相，如是名、名自性，分別、分別自性，真如、真如自性，當知亦爾。



巳三、正智

正智由正智名，正智自性實不可得。

辰三、釋因

何以故？於一切種隨言自性不成就故。

相由相名等者：前已舉喻，今此合法。謂相由相及名有可得義，乃至正智由正智及名有可得義，諸法體性非全無故。然相自性乃至正智自性實不可得，隨言自性不成就故。

寅二、破他<sup>2</sup>

卯一、如名說有<sup>2</sup>

辰一、破斥<sup>3</sup>

巳一、名依相立失<sup>2</sup>

午一、顯過<sup>2</sup>

未一、稱體相違

若謂諸相自性安立，即稱其量假立名言，此假名言依相而立。是則於相假立名前，應有彼覺，如已立名。

未二、多體相違

又於一相所立名言有眾多故、有差別故，應有眾多差別體性。

午二、結非

是故名言依相而立，不應道理。

若謂諸相自性安立等者：此中義顯稱體相違過失。謂於名前無彼覺故，應不可說即稱其量假立名言，是故成失。

已二、相如名立失<sup>4</sup> 午一、顯過<sup>3</sup> 未一、相名俱無過

若謂諸相如名安立，由名勢力，相自性起。是則彼相假立名前，應無自性；彼既無有，假立名言亦應無有，是故二種俱成無過。

未二、體應眾多過

又假名言有眾多故、有差別故，應有眾多差別體性。

未三、相依他假過

又依他過，由彼諸相但依於他假建立故。

午二、結非

是故一切假立名言如其自性，不應道理。

午三、舉喻

猶如所起種種幻類，譬如幻者造作種種幻士夫類，謂男、女、象、馬、熊、羆等類，非彼諸類如其相貌實有體性。

午四、合法

如是諸相，非稱名言有實體性，當知亦爾。

巳三、自性無得失<sup>2</sup> 午一、顯過

若謂離彼相及名言二種和合，有自性生。彼於諸相、或於名言、或二中間應現可得，然不可得。

午二、結非

是故此計不應道理。

若謂離彼相及名言等者：此中義顯自性無得過失。謂若離彼相、名二種和合，有自性生，為遣前難名，依相立相，如名立二種過失，是則應於諸相、或於名言、或二中間別有自性現前可得，然不可得，故不應理。如下

說有依名計義、依義計名、依名計名、依義計義、依二計二五種差別，隨應配釋。此說於相、於名、於二中間，其義應知。

辰二、結成

由此因緣，隨言自性於一切種皆無所有。

卯二、由名能顯<sup>2</sup> 辰一、標非

若謂名言能顯自性，亦不應理。

辰二、顯過<sup>3</sup> 巳一、取不取相過

若取不取假立名言，俱有過故。若取相已假立名言，便不成顯。若不取相假立名言，無事名言不應道理。

巳二、眾多差別過

又如前說，所立名言有眾多故、有差別故，則有眾多差別體性，成大過失。

巳三、喻不相似過

又照了喻不相似故，不應道理。不相似者，照了因緣於一切事無有差別，種

種亦爾。能取因緣，名言不爾。

照了因緣等者：謂如燈照了物，遍於一切或種種事無有差別，能為照了因緣。名言不爾，非於一切種種自性皆能顯了，是故不為一切種種能取因緣。由是道理，喻不相似。

寅三、釋難<sup>3</sup>

卯一、性不可說難<sup>2</sup>

辰一、問<sup>2</sup>

巳一、難相違

問：不可言中，不可言言既現可得，是故法性不可言說，不應道理。

巳二、難幻喻

又造幻者所造種種幻化形類，雖彼形類非如其性，然有種種能造幻事如其自性，是故譬喻亦不相似。

辰二、答<sup>2</sup>

巳一、釋初難

答：正立宗時，不可言言亦已遮遣。

不可言言亦已遮遣者：謂如前說：於一切種隨言自性不成就故。不可言中，不可言言，當知亦爾。不應於此說現可得，由是說言亦已遮遣。

巳二、釋次難

為令覺知如是義故，方便施設譬喻等故，非不相似。雖假名言非如彼性，不可言義非不是有。

方便施設譬喻等故等者：謂幻事喻但喻少分，非如其性成所立宗。不可言義不取一切，由是說言非不相似。

卯二、喻不相似難<sup>2</sup> 辰一、問

問：若諸相事假立名言則便得有，若不假立則不得有。若如是者，喻可相似，不可言計亦應道理。若不爾者，不可言計則為唐捐。

若如是者喻可相似等者：謂幻事喻，由依所造種種幻化形類，能造幻事則便得有；形類若無，幻事亦無。所喻道理，若亦如是，是則彼喻可說相似。由是因緣，為遣彼相，施設安立不可言義，亦應道理。

辰二、答<sup>2</sup> 巳一、顯喻相似

答：如是由先所起八分別故，於現在世三種事生，如本地分已說其相。

如本地分已說其相者：本地分說：又諸愚夫，由於如是所顯真如不了知故，從是因緣，八分別轉，能生三事，能起一切有情世間及器世間。乃至廣說。（陵本三十六卷二十頁<sup>2991</sup>）其相應知。

即此所生三種事故，復起分別。由此道理，諸雜染法展轉相續，無有斷絕。由此因緣其喻相似。

已二、明計不捐

分別假立若斷滅時，諸雜染法皆可隨滅，證得聖智。此是量故，不可言計亦不唐捐。

卯三、相事隨遣難<sup>2</sup> 辰一、問

問：若於爾時，分別假立皆悉斷滅，即於爾時相事隨遣。若爾，隨一獲得聖智，一切相、名、分別所攝情無情數，內外事物皆應永滅，譬如幻者所作幻事？

辰二、答<sup>2</sup> 巳一、舉二因

答：相等諸物，或由不共分別為因，或復由共分別為因。

已二、釋差別<sup>2</sup> 午一、不共因起

若由不共分別所起，無分別者，彼亦隨滅。

午二、共因所起<sup>2</sup> 未一、由他任持

若共分別之所起者，分別雖無，由他分別所任持故，而不永滅。若不爾者，他之分別應無其果。

未二、自得清淨<sup>2</sup> 申一、標舉

彼雖不滅，得清淨者於彼事中正見清淨。

申二、喻合

譬如眾多修觀行者，於一事中，由定心智種種勝解異見可得，彼亦如是。

癸三、取<sup>2</sup> 子一、配能所取

問：如是五事，幾是所取？幾是能取？答：三是所取。分別、正智亦是能取，亦是所取。



三是所取者：謂相、名、真如唯是所取故。

子二、辨取所行<sup>2</sup> 丑一、正辨三種<sup>2</sup> 寅一、問

問：如是五事，當知幾種取所行義？

寅二、答<sup>2</sup> 卯一、標列

答：略有三種。一、有言有相取所行義，二、無言有相取所行義，三、無言無相取所行義。

卯二、判釋<sup>2</sup> 辰一、第一釋

此中最初，是言說隨覺者取所行境；第二，是言說隨眠者取所行境；第三，是於言說離隨眠者取所行境。

辰二、第二釋<sup>3</sup> 巳一、唯世俗取

又初二世俗諦取。

巳二、唯勝義取

最後是勝義諦取。

巳三、通二諦取<sup>2</sup> 午一、標

復有遠離言說隨眠後所得取，通取一切二諦所攝取所行境。

午二、釋<sup>2</sup> 未一、行安立諦

謂世出世智以安立諦為所行故，建立彼智通用二諦為所行境。

未二、出二因緣

此二種取，由二因緣，應知得成世出世性。謂曾得、未曾得故，依言說、不依言說故。

丑二、廣無相取<sup>5</sup> 寅一、明取因緣<sup>2</sup> 卯一、問

問：有相之取世間共成，無相之取非所共成。何因何緣名無相取？無因無緣不應道理。

卯二、答<sup>2</sup> 辰一、舉因緣

答：世俗名言熏習取果，是有相取，世所共成，能令雜染；勝義智見熏習取果，是無相取，非所共成，能令清淨；是故此二有因有緣。

辰二、以喻顯

如眼若有翳等過患，便有髮毛輪等翳相現前可得；若無彼患，便不可得，但有自性無顛倒取。

寅二、明取名義<sup>2</sup> 卯一、名<sup>2</sup> 辰一、釋無相取

問：於無相界若取其相，非無相取；若無所取，亦不得成無相之取。若爾，云何名無相取？答：言說隨眠已遠離故，此取雖復取無相界，不取相故，成無相取。

辰二、釋成取名

問：若無構獲，云何成取？答：雖不構獲諸相差別有所增益，然取無相，故得成取。

卯二、義<sup>4</sup> 辰一、釋取相狀

問：若無構獲，無所增益，此取相狀云何可知？答：取勝義故、取無相故，五種事相皆不顯現以為其相。

五種事相皆不顯現以為其相者：此中五種事相，謂即五種所知境界。云何五種？謂心、心所有、色、不相應、無為。如下說言：令三摩地五種境界影像現前，即緣此事以為境界；除遣此故，彼得轉滅。由是當知，彼影像相，由取勝義皆得除遣，即由此義說不顯現。

辰二、釋非滅無

問：若不分明可立為取，何故不許諸取滅無？答：滅無無有修作義故，非修觀者依於滅無有所修作。

辰三、釋能證知

問：若爾，云何證知其相？答：自內證智之所證知。

辰四、釋不記別

問：若爾，何不如其所證如是記別？答：此內所證非諸名言安足處故。

寅三、明取因果<sup>2</sup>

卯一、因<sup>2</sup> 辰一、釋生因<sup>2</sup> 巳一、問

問：若先無有知無相智；由無有故，亦無數習無相智義；無數習故，知無相

智既無其因，應不得生。

已二、答<sup>2</sup> 午一、標隨順

答：有相亦得為無相因，隨順彼故。

午二、舉例成

如世間智為緣生出世智，有漏智為緣生無漏智，有心定為緣生無心定，此亦如是。

有相亦得為無相因等者：此中因言，謂引發因。依隨順因依處，施設引發因，由是釋言隨順彼故。

辰二、通經難

問：苦等諸智，世尊說為得清淨因。若苦等智，於苦等諦分別苦等，應成有相。若不分別，苦等諸智便非是有；彼無有故，云何能得畢竟清淨？答：由無相智增上力故，於諸諦中，極善清淨通世出世分別智生，即名已斷所斷煩惱。其無相智是苦等智因，正能斷滅所斷煩惱，於此因中假立果名，即假說

此為苦等智，是故無過。

於此因中假立果名等者：謂依前問：苦等諸智，世尊說為得清淨因。當知彼苦等智，非即通世出世分別正智，然無相智是彼苦等智因，從果為名，即假說此為苦等智。世尊依彼說為得清淨因，故無有過。

卯二、果

問：先說所取是能取果，即此能取當言何果？答：此二展轉更互為果。

此二展轉更互為果者：由諸根、境，能取、所取互相繫屬，是故說二展轉更互為果。

寅四、明遣有相轉得無相<sup>4</sup> 卯一、除遣有相

問：若所知境無常、積集、相續、無量、多不現見，云何修觀行者緣彼為境，及令轉滅？答：於彼聞思增上力故，得三摩地。由彼因緣，令三摩地五種境界影像現前，即緣此事以為境界；除遣此故，彼得轉滅。

卯二、轉得無相<sup>2</sup> 辰一、總標問答

問：除遣五種所知境界，當言何相？答：無上轉依無為涅槃以為其相。

辰二、隨釋疑難<sup>3</sup> 巳一、釋名涅槃

云何為涅槃？謂法界清淨煩惱眾苦永寂靜義，非滅無義。

巳二、釋非滅無<sup>2</sup> 午一、問

問：若唯煩惱眾苦永寂名為涅槃，何因緣故非滅無義？

午二、答<sup>2</sup> 未一、舉喻<sup>3</sup> 申一、水界喻

答：如外水界，唯離渾濁得澄清性，非離濁時無澄清性。

申二、真金喻

又如真金，唯離剛彊得調柔性，非離彼時無調柔性。

申三、虛空喻

又如虛空，唯雲霧等翳障寂靜得清淨性，非彼無時其清淨性亦無所有。

未二、合法

此中道理，當知亦爾。

巳三、釋名法界清淨<sup>2</sup> 午一、徵

云何名為法界清淨？

午二、釋<sup>3</sup> 未一、標

謂修正智故，永除諸相，證得真如。

未二、喻

譬如有人，於眠夢中，自見其身為大暴流之所漂溺。為欲越渡如是暴流，發大精進；即由發起大精進故，欸然便覺；既得覺已，於彼暴流都無所見。

未三、合

除相道理，當知亦爾。

卯三、釋斷遣時<sup>2</sup> 辰一、問

問：為即於此言說隨眠正斷滅時諸相除遣，為斷滅已後方除遣？

辰二、答<sup>3</sup> 巳一、如稱低昂喻

答：斷時、遣時平等平等，如稱兩頭低昂道理。



巳二、畫像壞滅喻

又如畫像，采色壞時形相隨滅。

巳三、翳等愈遣喻

亦如翳等過患愈時，髮毛輪等相亦隨遣，愈時、遣時平等平等。此中道理，當知亦爾。

卯四、釋捨得位<sup>2</sup> 辰一、問

問：修觀行者，云何除遣所緣境相？

辰二、答<sup>2</sup> 巳一、明起方便

答：由正定心，於諸所知境界影像先審觀察；後由勝義作意力故，轉捨有相，轉得無相。

巳二、標列五位

此無相轉復有五位。一、少分位，二、遍滿位，三、有動位，四、有加行位，五、成滿位。

此無相轉復有五位等者：修所成慧地決擇中說：少分修、遍行修、動轉修、有加行修、成辦修。（陵本六十七卷三頁<sup>5320</sup>）此中五位，如彼釋義應知。

寅五、無相成滿<sup>3</sup> 卯一、標成滿相

問：如是成滿其相云何？答：不為一切煩惱、一切災橫所陵雜故，究竟無惱清淨所依，說名成滿。即此又是善清淨真實義所行，一切現量所行，一切自在所行。

卯二、顯證差別<sup>2</sup> 辰一、問

問：於此成滿建立幾乘？齊何時證？

辰二、答<sup>2</sup> 巳一、總標

答：隨三種根差別證故，建立三乘。

巳二、別釋<sup>2</sup> 午一、二乘

然彼二乘，用阿耨多羅三藐三菩提乘以為根本。

然彼二乘等者：謂彼二乘補特伽羅，要依諸佛出世說正法教，方能成滿自所轉依，由是說用大乘以為根本。

又彼二乘隨緣差別、隨所成熟無決定故，證得時量亦不決定。

午二、大乘<sup>3</sup> 未一、標

其最後乘，要經三種無數大劫方可證得，依斷三種麤重別故。

未二、徵

何等名為三種麤重？

未三、釋<sup>3</sup> 申一、在皮麤重

一、惡趣不樂品在皮麤重。由斷彼故，不往惡趣，修加行時不為不樂之所間雜。

申二、在肉麤重

二、煩惱障品在肉麤重。由斷彼故，一切種極微細煩惱亦不現行，然未永害一切睡眠。

申三、在心麤重

三、所知障品在心麤重。由斷彼故，永害一切所有隨眠，遍於一切所知境界無障礙智自在而轉。

卯三、廣立乘等<sup>2</sup> 辰一、明建立<sup>3</sup> 巳一、聲聞乘<sup>4</sup> 午一、徵

復次，云何立聲聞乘？

午二、標

謂三因緣故。

午三、列

一、變化故；二、誓願故；三、法性故。

午四、釋<sup>3</sup> 未一、由變化

變化故者，謂隨彼彼所化勢力，如來化作變化聲聞。

未二、由誓願

誓願故者，謂有補特伽羅，於聲聞乘已發誓願，即建立彼以為聲聞。

未三、由法性<sup>2</sup> 申一、安住

法性故者，謂有補特伽羅，本性已來慈悲薄弱，於諸苦事深生怖畏。由此二因，於利他事不深愛樂，非為是事樂處生死。彼由安住此法性故，立為聲聞。

申二、證覺

又覺法性故，謂於一切安立諦中，多分修習怖畏行轉，由此因緣證得圓滿。

已二、獨覺乘

如聲聞乘，獨覺亦爾。出無佛世而證正覺，與此差別。

已三、菩薩乘

即上相違三因緣故，應知菩薩。

辰二、明失壞<sup>2</sup> 已一、聲聞<sup>4</sup> 午一、徵

復次，云何聲聞失壞正法及毗奈耶？

午二、釋

謂有聲聞，計唯無有煩惱燒然名為寂滅，生大怖畏，謂我當斷、我當永壞、我當無有。

午三、喻

譬如有人身嬰熱病，於無病中都無識別，謂病愈時舉體隨滅，便生怖畏，我寧不脫如是熱病，是名失壞。

午四、合

由此譬喻，失壞聲聞，當知亦爾。

巳二、菩薩<sup>4</sup> 午一、徵

復次，云何菩薩失壞大乘？

午二、釋

謂有菩薩，聞一切法甚深無性，即執一切煩惱燒然自性本無，謂己無有生死重病。

午三、喻

譬如有人，於己身中所生熱病，謂為無病，於此熱病不能解脫，名為失壞。

午四、合

由此譬喻，失壞菩薩，當知亦爾。

癸四、薩迦耶等<sup>2</sup> 子一、舉薩迦耶

問：如是五事，幾是薩迦耶？幾非薩迦耶？答：相通二種，二是薩迦耶，一非薩迦耶，真如俱不可說。

子二、例有世間

如薩迦耶，有及世間，當知亦爾。

相通二種等者：五事相中，相相、名相及分別相，薩迦耶欲攝，故是薩迦耶；正智相、真如相，非薩迦耶欲攝，故非薩迦耶；由是總說相通二種。如是名及分別，是薩迦耶。正智一種，非薩迦耶。真如離言，是故俱不可說。

癸五、四種真實

問：如是五事、四種真實，此中何事攝幾真實？答：世間所成真實、道理所成真實，三事所攝。煩惱障淨智所行真實、所知障淨智所行真實，二事所攝。

癸六、四種尋思

問：如是五事、四種尋思，此中何事攝幾尋思？答：如理作意相應分別總攝四種。

如理作意相應分別等者：謂五事中一分別事，如理作意相應攝者，總攝四種尋思。餘皆不攝。

癸七、四如實智

問：如是五事、四種如實遍智，此中何事攝幾如實遍智？答：一切皆是正智所攝。

一切皆是正智所攝者：謂四種如實遍智皆是正智所攝故。

癸八、密意<sup>14</sup> 子一、說無有二



問：世尊依何密意，說一切法皆無有二？答：即依如是所說五事，由俗自性說無自性，由別別相說有自性。

由俗自性說無自性者：謂由世俗名言自性，說一切法皆無自性。簡非都無，故作是說。

子二、說無自性<sup>2</sup> 丑一、問

問：世尊依何密意，說一切法皆無自性？

丑二、答<sup>2</sup> 寅一、總釋密意<sup>3</sup> 卯一、標

答：由依彼彼所化勢力，故說三種無自性性。

卯二、列

一、相無自性性，二、生無自性性，三、勝義無自性性。

卯三、釋<sup>3</sup> 辰一、相無自性性

云何相無自性性？謂一切法世俗言說自性。

辰二、生無自性性

云何生無自性性？謂一切行眾緣所生，緣力故有，非自然有，是故說名生無自性性。

辰三、勝義無自性性<sup>2</sup> 巳一、徵

云何勝義無自性性？

巳二、釋<sup>3</sup> 午一、標說意

謂真實義相所遠離法，此由勝義說無自性性。

午二、釋義想

如觀行苾芻，於大骨聚生假勝解，不能除遣，於此骨聚勝義無自性想恆無間轉。

午三、結應知

如是應知勝義無自性性。

於大骨聚生假勝解等者：謂如苾芻觀身不淨，此不淨想名假勝解，由於事相增益作意故。

寅二、別配五事<sup>2</sup> 卯一、總標簡

此中五事，非由相無自性性故，說無自性；然由生無自性性故、勝義無自性性故，隨其所應，說無自性。

卯二、釋隨應<sup>2</sup> 辰一、配相等

謂相、名、分別、正智，皆由二種無自性性。

辰二、簡真如<sup>2</sup> 巳一、標非

真如不由無自性性說無自性。

巳二、引證

是故世尊依此密意，於伽陀中說如是言：我說一諦，更無第二。

真如不由無自性性等者：由實真如唯自內證，不可言說，是故不由三種無自性性，說無自性。

子三、說無生滅等

問：世尊依何密意，說一切法無生無滅、本來寂靜、自性涅槃？答：依相無

自性性，說如是言。

子四、說等虛空

問：世尊依何密意，說一切法等於虛空？答：亦依相無自性性，說如是言。

子五、說如幻等

問：世尊依何密意，說一切法皆如幻等？答：依生無自性性、勝義無自性性，說如是言。

子六、說有無常<sup>2</sup> 丑一、問

問：世尊依何密意，說等隨觀色乃至識有無常耶？

丑二、答<sup>3</sup> 寅一、標

答：依相無自性性，說如是言。

寅二、徵

何以故？

寅三、釋

欲說等隨觀常無有，故說等隨觀有無常。

子七、說皆有苦

問：世尊依何密意，說等隨觀色乃至識皆有苦耶？答：依生無自性性及勝義無自性性，說如是言。

子八、說空無我<sup>2</sup> 丑一、舉空

問：世尊依何密意，說等隨觀即彼皆空？答：即依生無自性性、勝義無自性性，諸法由遠離相無自性性，說如是言。

丑二、例無我

如依遠離性說彼為空，依異相性說為無我，當知亦爾。

依異相性說為無我者：此說無我，有二差別。若依補特伽羅自性無我，當知說彼諸行相性名異相性。若依諸法自性無我，當知說彼不可說義名異相性。

子九、說無顯現

問：世尊依何密意，說色乃至識如理觀故，審思慮故，乃至觀彼非有顯現？  
答：依相無自性性，說如是言。

子十、說虛偽等

問：世尊依何密意，說彼虛偽不實顯現？答：依生無自性性及勝義無自性性，說如是言。

子十一、說寂滅想

問：世尊依何密意，說如是言：是故今者應知是處，謂於是中眼永寂滅，遠離色想；乃至意永寂滅，遠離法想？答：都不依於無自性性，說如是言。

都不依於無自性性說如是言者：義顯真如所攝，不由無自性性說無自性，故作是說。

子十二、說遣定想

問：世尊依何密意，說由彼故，於一切處遣一切想，帝釋天等亦不能知彼依何處而起靜慮？答：都不依於無自性性，說如是言。

子十三、說無諦等

問：世尊依何密意，說能隨順喜憂捨處眼所識色，乃至意所識法中，無諦、無實、無無顛倒、無不顛倒，復說有聖出世間諦？答：依於一切無自性性，或不依於無自性性，說如是言。

子十四、說不思議

問：世尊依何密意，說靜慮者靜慮境界、諸佛諸佛境界皆不可思議？答：依於一切無自性性，或不依於無自性性，說如是言。

癸九、次第<sup>2</sup> 子一、問

問：如是五事，何緣最初建立其相，乃至最後建立正智？

子二、答<sup>2</sup> 丑一、釋<sup>2</sup> 寅一、顯雜染品次第圓滿

答：若無其事，施設於名不應道理，故此次第施設於名。由此名故，施設自性、施設差別，故此次第施設分別。由分別故，或分別相、或分別名、或俱分別，由此三法顯雜染品次第圓滿。

寅二、顯清淨品次第圓滿

從此乃容修清淨品，謂即觀彼所有雜染諸法真如，由正智故能正觀察，能得清淨，由此二種顯清淨品次第圓滿。

丑二、結

是故顯示如是次第。

己二、三自性<sup>2</sup> 庚一、結前生後

如是於真實義分中，已說事決擇。若欲了知真實義者，於三自性復應修觀。

庚二、諸門觀察<sup>3</sup> 辛一、初頌攝<sup>2</sup> 壬一、頌列

嗚柁南曰：

總舉別分別 緣差別依止 亦微細執著 如名等執性

壬二、長行釋<sup>7</sup> 癸一、總舉

云何名為三種自性？一、遍計所執自性，二、依他起自性，三、圓成實自性。

癸二、別分別<sup>3</sup> 子一、遍計所執性



云何遍計所執自性？謂隨言說、依假名言建立自性。

謂隨言說等者：如下說言：由遍計所執自性相故，彼諸有情於依他起自性及圓成實自性中，隨起言說。如如隨起言說，如是如是由言說熏習心故，或由言說隨覺故，或由言說隨眠故，於依他起自性及圓成實自性中，執著遍計所執自性相。如如執著，如是如是於依他起自性及圓成實自性上，執著遍計所執自性。（陵本七十六卷九頁<sup>5832</sup>）此應準釋。

子二、依他起性

云何依他起自性？謂從眾緣所生自性。

子三、圓成實性

云何圓成實自性？謂諸法真如，聖智所行、聖智境界、聖智所緣，乃至能令證得清淨，能令解脫一切相縛及麤重縛，亦令引發一切功德。

癸三、緣<sup>3</sup> 子一、遍計所執性

問：遍計所執自性緣何應知？答：緣於相、名相屬應知。

緣於相名相屬應知者：如下說有五種遍計所執自性。一、依名遍計義自性，二、依義遍計名自性，三、依名遍計名自性，四、依義遍計義自性，五、依二遍計二自性。應知相、名相屬諸所有相，或復取所行境，如前說有言說隨覺、言說隨眠二種差別，皆此相、名相屬所攝。以此為緣，能令執著遍計所執自性。

子二、依他起性

問：依他起自性緣何應知？答：緣遍計所執自性執應知。

緣遍計所執自性執應知者：顯揚論說：於依他起自性，執著初自性故，起於熏習，則成雜染。（顯揚論十六卷十三頁）此應準知。

子三、圓成實性<sup>2</sup> 丑一、問

問：圓成實自性緣何應知？

丑二、答<sup>2</sup> 寅一、標說義

答：緣遍計所執自性於依他起自性中畢竟不實應知。

寅二、會餘經

世尊於餘經中，說緣不執著遍計所執自性，應知此性者，依得清淨說，不依相說。今此義中，當知依相說。

依得清淨說者：謂已見諦，離諸相縛，名得清淨故。

癸四、差別<sup>2</sup> 子一、初五種<sup>2</sup> 丑一、問

問：遍計所執自性有幾種？

丑二、答<sup>3</sup> 寅一、標

答：略有五種。

寅二、列

一、遍計義自性，二、遍計名自性，三、遍計雜染自性，四、遍計清淨自性，五、遍計非雜染清淨自性。

寅三、釋<sup>5</sup> 卯一、遍計義自性<sup>4</sup> 辰一、徵

云何遍計義自性？

辰二、標

謂有四種。

辰三、列

一、遍計自相，二、遍計差別相，三、遍計所取相，四、遍計能取相。

辰四、釋<sup>4</sup> 巳一、遍計自相

遍計自相者，謂遍計此事是色自性，乃至此事是識自性，此事是眼自性，乃至此事是法自性。

巳二、遍計差別相<sup>2</sup> 午一、舉色蘊

遍計差別相者，謂遍計此色是可意，此色是不可意，此色是非可意非不可意，此色是有見，此色是無見，此色是有對，此色是無對，此色是有漏，此色是無漏，此色是有為，此色是無為。如是等類差別道理，遍計此色所有差別。

午二、例餘蘊等

如色，如是餘蘊、一切處等，當知亦爾。

已三、遍計所取相

遍計所取相者，謂遍計此色是眼所取，此是耳、鼻、舌、身、意所取。又復遍計此受、想、行、識是欲界意所取，此是色界意所取，此是無色界意所取，此是不繫意所取。

已四、遍計能取相

遍計能取相者，謂遍計此色是色能取，此色是聲、香、味、觸、法能取。

遍計此色是色能取等者：謂色蘊中，若法能取有見有對諸色，名色能取，謂即眼根。若法能取有見無對、無見無對諸色，名聲、香、味、觸、法能取，謂即耳根乃至意根。

又復遍計此受、想、行、識是色能取，此是聲、香、味、觸、法能取。

遍計此受想行識是色能取等者：謂若受、想、行、識依眼所生，能取有見有對色故，是色能取。依耳乃至依意所生，能取聲、香、味、觸、法故，

是聲、香、味、觸、法能取。

卯二、遍計名自性<sup>4</sup> 辰一、徵

云何遍計名自性？

辰二、標

謂有二種。

辰三、列

一、無差別，二、有差別。

辰四、釋<sup>2</sup> 巳一、無差別

無差別者，謂遍計一切法所有名。

遍一切法所有名者：謂蘊、界、處。如是等類，通一切法無差別名應知。  
巳二、有差別

有差別者，謂遍計此名為色、此名為受、此名為想、此名為行、此名為識。  
如是等類，無量無數差別法中，各各別名。

卯三、遍計雜染自性<sup>2</sup> 辰一、徵

云何遍計雜染自性？

辰二、釋<sup>2</sup> 巳一、色

謂遍計此色有貪、有瞋、有癡，不能遠離貪瞋癡繫，又與信等一切善法而不相應。

巳二、受等

又復遍計此受、此想、此行、此識，有貪、有瞋、有癡，不能遠離貪瞋癡繫，又與信等一切善法而不相應。

卯四、遍計清淨自性

云何遍計清淨自性？謂與上相違，當知其相。

卯五、遍計非雜染清淨自性<sup>2</sup> 辰一、徵

云何遍計非雜染清淨自性？

辰二、釋<sup>2</sup> 巳一、計所能取

謂遍計此色是所取，此是能取；此受、想、行、識是所取，此是能取。

已二、計無記法

又於一切無記法中，遍計所有無記諸法。

子二、後五種<sup>3</sup> 丑一、標

復次，遍計所執自性，當知復有五種。

丑二、列

一、依名遍計義自性，二、依義遍計名自性，三、依名遍計名自性，四、依義遍計義自性，五、依二遍計二自性。

丑三、釋<sup>5</sup> 寅一、依名遍計義自性

云何依名遍計義自性？謂遍計此色事名，有色實性；此受、想、行、識事名，有受、想、行、識實性。

寅二、依義遍計名自性

云何依義遍計名自性？謂遍計此事名色，或不名色；此事名受、想、行、



識，或不名受、想、行、識。

寅三、依名遍計名自性

云何依名遍計名自性？謂不了色事，分別色名而起遍計；不了受、想、行、識事，分別受、想、行、識名而起遍計。

寅四、依義遍計義自性

云何依義遍計義自性？謂不了色名，由不了名分別色事而起遍計；不了受、想、行、識名，由不了名分別受、想、行、識事而起遍計。

寅五、依二遍計二自性

云何依二遍計二自性？謂遍計此事是色自性，名之為色；此事是受、想、行、識自性，名受、想、行、識。

癸五、依止<sup>3</sup> 子一、標

復次，遍計所執自性執，當知略有二種。

子二、列

一、加行執，二、名施設執。

子三、釋<sup>2</sup> 丑一、加行執

加行執，當知復有五種。一、貪愛加行故；二、瞋恚加行故；三、合會加行故；四、別離加行故；五、捨隨與加行故。

加行執當知復有五種等者：此加行執，當知是思行相，令心造作，而得此名。五識身相應地意地決擇中說：由五種類令心造作。一、為境隨與，二、為彼合會，三、為彼別離，四、能發雜染業，五、令心自在轉。（陵本五十三卷十六頁<sup>4261</sup>）此五種中，初二加行，當知即彼第四能發雜染業攝；餘三加行，當知即彼前三所攝；闕無第五，以非加行執故。

丑二、名施設執<sup>3</sup> 寅一、標

名施設執，當知復有二種。

寅二、列

一、非文字所作，二、文字所作。

寅三、釋<sup>2</sup> 卯一、非文字所作

非文字所作者，謂執此為何物？云何此物？此物是何？此物云何？

卯二、文字所作

文字所作者，謂執此為此物，此物如是或色，乃至或識、或有為、或無為、或常、或無常、或善、或不善、或無記，如是等。

癸六、微細執著

復次，微細執著，當知五種。一、於無常常執，二、於苦樂執，三、於不淨淨執，四、於無我我執，五、於諸相中遍計所執自性執。

癸七、如名等執性<sup>2</sup> 子一、說五因緣<sup>4</sup> 丑一、標

復次，由五因緣，當知愚夫如名、如言，於所詮事執有自性。

丑二、徵

所以者何？

丑三、釋<sup>5</sup> 寅一、第一因緣

謂因問言：此事用何以為自性？答言：此事是色自性，非是色名。或答言：此事是受、想、行、識自性，非受、想、行、識名。

寅二、第二因緣

復次，獨處空閑，精勤觀察諸法自相、共相，尋思此事是色相，非色名；或尋思此事是受、想、行、識相，非受、想、行、識名。

寅三、第三因緣

復次，於此色事尋求色相，不能得時便生不樂，非求色名不能得時。或於此受、想、行、識事，尋求受、想、行、識相，不能得時便生不樂，非求受、想、行、識名不能得時。

寅四、第四因緣<sup>3</sup> 卯一、標

復次，語於名轉，名於義轉。

語於名轉等者：尋伺語行，是名為語。尋伺行相，緣名境生，是謂語於名轉。於相增語，是謂為名。諸所有名，各別行解，隨義而轉，是謂名於義

轉。如下釋相應知。

卯二、釋

此中若名能顯自相義，非此能顯差別相義，非此能顯所取相義，非此能顯能取相義。或名乃至能顯能取相義，非此能顯乃至自相義。

卯三、成

若即彼名於自相義轉，亦於乃至能取相義轉者，此餘諸名各別行解隨義而轉應不可得。此不應理。

寅五、第五因緣<sup>2</sup> 卯一、徵

如是復於各別義轉所有名中，若名於自相義轉，乃至若名於能取相義轉，此名為於有義轉耶？為於無義轉耶？

卯二、辨<sup>2</sup> 辰一、非有義轉

於有義轉且不應理。此不應理，如前觀五事中已辯。

如前觀五事中已辯者：謂如前說，名言依相而立有二過失，不應道理。顯

揚亦云：若義自體如名有者，未得名前，此覺於義應先已有。又名多故，一義應有多種自體。又名不定故，義之自體亦應不定。何以故？即此一名於所餘義亦施設故。（顯揚論十六卷五頁）由是當知，計義自體如名而有，不應道理。

若於無義轉者，是則此名於無相義轉，其理便至。

辰二、成執著性

若於無相義轉，此非有義但能顯示自所增益，若取增益即是執著。

丑四、結

是故如名、如言，於所詮事執著自性，道理成就。

此非有義等者：如名計義，此實非有，但由名言勢力為緣，增益相生，顯現似有，名能顯示自所增益。

子二、說由名縛<sup>2</sup>

丑一、標妄執

復次，一切愚夫於諸相中名言所縛故，當知如名、如言，於所詮事妄執自性。

丑二、問答辨<sup>2</sup> 寅一、問

問：何緣故知於諸相中名言所縛？

寅二、答<sup>2</sup> 卯一、由理教證<sup>2</sup> 辰一、標

答：由理教故。

辰二、釋<sup>2</sup> 巳一、由理<sup>3</sup> 午一、徵

云何由理？

午二、釋<sup>3</sup> 未一、第一道理

謂若離名言，於諸事中喜樂不可得故；若名言俱，於諸事中喜樂可得故；是一道理。

未二、第二道理<sup>2</sup> 申一、標

又復展轉相依而生。何以故？事為依止，名言得生；名言為依，事可得生故。

申二、釋<sup>2</sup> 酉一、名依事生

謂諸世間要依有事，方得生起名言分別，非於無事起此分別。如是當知，事

為依止，名言得生。

酉二、事依名生

如靜慮者內靜慮時，如如意名言作意思惟，如是如是有所知事同分影像生起，方便運轉現在前故。如是當知，名言為依，事可得生。

未三、第三道理

又於名言修對治時，若安置心於無相界，一切諸相皆不現前。若不安心於無相界，不隨所欲，便為諸相漂轉其心。

午三、結

由此道理，當知於相，名言是縛。

巳二、由教

云何由教？如世尊說：愚昧思凡夫，於相為言縛；牟尼脫言縛，於相得自在。

愚昧思凡夫者：住異生位見未清淨，諸所有思名愚昧思，未能如實覺知所知諸法故。



清淨見行者，安住於真智，於自性無得，不見彼所依。

於自性無得等者：謂於諸法如言自性都無所得，亦不見彼所依雜染相故。由真智清淨，說彼為真明，二執不相應，故號為無二。

二執不相應者：此中二執，謂增減執應知。

卯二、舉事例成

又如異生，於諸蘊中善知無我，雖觀蘊中所建立我但是假有，非不於彼我執隨轉，由彼隨眠未永斷故。此中道理，當知亦爾。

瑜伽師地論科句披尋記卷第七十三



瑜伽師地論科句披尋記卷第七十四

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之三

辛二、第二頌攝<sup>2</sup> 壬一、頌列

復次，嘔柁南曰：

攝無性知等 密意等所行 通達與隨入 差別依為後

壬二、長行釋<sup>9</sup> 癸一、攝<sup>2</sup> 子一、明五攝<sup>3</sup> 丑一、初自性

問：三種自性、相等五法。初自性五法中幾所攝？答：都非所攝。

丑二、第二自性

問：第二自性幾所攝？答：四所攝。

四所攝者：謂五法中，相、名、分別、正智所攝應知。

丑三、第三自性

問：第三自性幾所攝？答：一所攝。

一所攝者：謂真如所攝應知。

子二、釋妨難<sup>2</sup> 丑一、難

問：若依他起自性亦正智所攝，何故前說依他起自性緣遍計所執自性執應可了知？

前說依他起自性等者：如前已說：問：依他起自性緣何應知？答：緣遍計所執自性執應知。（陵本七十三卷十三頁<sup>5654</sup>）

丑二、釋

答：彼意唯說依他起自性雜染分，非清淨分。若清淨分，當知緣彼無執應可了知。

癸二、無性<sup>3</sup> 子一、標

復次，三種自性，三種無自性性。

子二、列

謂相無自性性、生無自性性、勝義無自性性。

子三、釋<sup>3</sup> 丑一、遍計所執性

由相無自性性故，遍計所執自性說無自性。

丑二、依他起性<sup>2</sup> 寅一、標

由生無自性性故，及勝義無自性性故，依他起自性說無自性。

寅二、釋

非自然有性故，非清淨所緣性故。

丑三、圓成實性<sup>3</sup> 寅一、標

唯由勝義無自性性故，圓成實自性說無自性。

寅二、徵

何以故？

寅三、釋

由此自性亦是勝義，亦一切法無自性性之所顯故。

唯由勝義無自性性等者：問：前說真如不由無自性性說無自性，今此圓成實自性，何故復說唯由勝義無自性性說無自性？答：此所說義與前有別，故無相違。前說勝義無自性性，謂非勝義；今此不爾，謂是勝義，亦一切法無自性性之所顯故。

癸三、知等<sup>3</sup> 子一、應遍知

問：三種自性，幾應遍知？答：一切。

子二、應永斷

問：幾應永斷？答：一。

幾應永斷答一者：謂依他起自性應知。

子三、應證得

問：幾應證得？答：一。

幾應證得答一者：謂圓成實自性應知。

癸四、隱密等<sup>3</sup> 子一、標

復次，由此三種自性，一切不了義經諸隱密義皆應決了。

子二、釋

謂諸如來祕密語言，及諸菩薩隨無量教祕密語言所有要義，皆由如是三種自性應隨決了。

子三、例<sup>2</sup> 丑一、無生法忍<sup>2</sup> 寅一、問

問：如經中說無生法忍，云何建立？

寅二、答<sup>2</sup> 卯一、標

答：由三自性而得建立。

卯二、釋

謂由遍計所執自性故，立本性無生忍；由依他起自性故，立自然無生忍；由圓成實自性故，立煩惱苦垢無生忍。當知此忍無有退轉。

當知此忍無有退轉者：通說三種無生法忍應知。

丑二、三解脫門<sup>2</sup> 寅一、標

復次，三種解脫門，亦由三自性而得建立。

寅二、釋

謂由遍計所執自性故，立空解脫門；由依他起自性故，立無願解脫門；由圓成實自性故，立無相解脫門。

癸五、所行<sup>3</sup> 子一、遍計所執自性

問：遍計所執自性，何等智所行？為凡智耶？為聖智耶？答：都非智所行，以無相故。

以無相故者：謂遍計所執自性，相無自性性之所攝故。

子二、依他起自性

問：依他起自性，何等智所行？答：是二智所行，然非出世聖智所行。

子三、圓成實自性

問：圓成實自性，何等智所行？答：唯聖智所行。



癸六、通達<sup>2</sup> 子一、舉初自性

問：諸觀行者通達遍計所執自性時，當言行於相耶？當言行於無相耶？答：若以世間智而通達時，當言行於相；若以出世智而通達時，當言行於無相。

子二、例餘一切

如遍計所執自性，依他起自性、圓成實自性，當知亦爾。

癸七、隨入<sup>2</sup> 子一、由悟隨入

問：若觀行者如實悟入遍計所執自性時，當言隨入何等自性？答：圓成實自性。

子二、由入除遣

問：若觀行者隨入圓成實自性時，當言除遣何等自性？答：依他起自性。

癸八、差別<sup>3</sup> 子一、初自性攝<sup>2</sup> 丑一、遍計所執自性

問：遍計所執自性有幾種？答：隨於依他起自性中，施設建立自性、差別所有分量即如其量，遍計所執自性亦爾。是故當知，遍計所執自性無量差別。

丑二、遍計所執自性執<sup>2</sup> 寅一、標

又於依他起自性中，當知有二種遍計所執自性執。

寅二、列

一者、隨覺，二者、串習習氣隨眠。

子二、第二自性<sup>2</sup> 丑一、問

問：依他起自性有幾種？

丑二、答<sup>2</sup> 寅一、指無量

答：當知如相品類差別。

當知如相品類差別者：謂相行相，品類差別種種無量，如前已說應知。

（陵本七十二卷九頁<sup>5586</sup>）

寅二、辨二種

復有二種依他起自性。一、遍計所執自性執所起，二、即彼無執所起。

即彼無執所起者：如前已說：依他起自性，若清淨分，當知緣彼無執應可

了知。此應準釋。

子三、第三自性

問：圓成實自性有幾種？答：於一切處皆一味故，圓成實自性無有安立品數差別。

癸九、依止<sup>3</sup> 子一、初自性

問：遍計所執自性，當言何所依止？答：當言依止三事，謂相、名、分別。

子二、第二自性

問：依他起自性，當言何所依止？答：當言即依遍計所執自性執及自等流。

子三、第三自性

問：圓成實自性，當言何所依止？答：當言無所安住、無所依止。

辛三、第三頌攝<sup>2</sup> 壬一、頌列

復次，嘍陀南曰：

若無有作業 微細等無體 生執等了知 染苦喻分別

壬二、長行釋<sup>10</sup> 癸一、無有<sup>3</sup> 子一、無初自性過

問：若無遍計所執自性，當有何過？答：於依他起自性中，應無名言、無名言執；

應無名言無名言執者：此中名言，謂彼隨覺。名言執者，謂彼隨眠。

此若無者，應不可知雜染、清淨。

子二、無第二自性過

問：若無依他起自性，當有何過？答：不由功用，一切雜染皆應非有；此若無者，應無清淨而可了知。

子三、無第三自性過

問：若無圓成實自性，當有何過？答：一切清淨品皆應不可知。

癸二、作業<sup>3</sup> 子一、初自性

問：遍計所執自性能為幾業？答：五。一、能生依他起自性；二、即於彼性能起言說；三、能生補特伽羅執；四、能生法執；五、能攝受彼二種執習

氣、麤重。

子二、第二自性

問：依他起自性能為幾業？答：亦五。一、能生所有雜染法性；二、能為遍計所執自性及圓成實自性所依；三、能為補特伽羅執所依；四、能為法執所依；五、能為二執習氣、麤重所依。

子三、第三自性

問：圓成實自性能為幾業？答：亦五。由是一種五業對治生起所緣境界性故。

二種五業對治生起等者：謂圓成實自性為所緣故，生起聖智，正能對治遍計所執自性及依他起自性二種五業故。

癸三、微細等<sup>3</sup> 子一、初自性<sup>2</sup> 丑一、舉細麤

問：遍計所執自性，當言微細，當言麤耶？答：當言微細。

丑二、例難見等

如微細，難見、難了，當知亦爾。

當言微細者：無始時來常所隨逐故。

子二、第二自性<sup>2</sup>

丑一、舉細麤

問：依他起自性，當言微細，當言麤耶？答：當言是麤。

丑二、出難見等

然難見、難了。

子三、第三自性<sup>2</sup>

丑一、舉細麤

問：圓成實自性，當言微細，當言麤耶？答：當言極微細。

丑二、例極難見等

如極微細，極難見、極難了，當知亦爾。

當言極微細者：甚深境界，不可思議故。

癸四、無體等<sup>3</sup>

子一、初自性

問：此三自性，幾是無體，能轉有體？答：一。

子二、第二自性

問：幾是有體，能轉有體、無體？答：一。

子三、第三自性

問：幾是有體，而非能轉？答：一。

此三自性幾是無體等者：遍計所執自性，能生依他起自性，此是無體，能轉有體。依他起自性，能生所有雜染法性，能為遍計所執自性所依，此是有體，能轉有體、無體。圓成實自性，聖智所行、聖智境界、聖智所緣，不為因緣生一切法，此是有體，而非能轉。

癸五、生等<sup>3</sup> 子一、初自性

問：此三自性，幾是不生，能生於生？答：一。

子二、第二自性

問：幾是生，能生生、不生？答：一。

子三、第三自性

問：幾是非生，不能生生及不生？答：一。

此三自性幾是不生等者：如前問答無體、有體，此應準知。

癸六、執無執相<sup>3</sup> 子一、初自性<sup>2</sup> 丑一、問

問：遍計所執自性執、無執相，云何應知？

丑二、答<sup>3</sup> 寅一、標

答：此有二種。

寅二、列

一、彼覺悟執或無執，二、彼隨眠執或無執。

寅三、釋<sup>2</sup> 卯一、覺悟執<sup>2</sup> 辰一、有執

若由言說假立名字，遍計諸法決定自性，當知是名彼覺悟執。

辰二、無執

若善了知唯有名者，知唯名故，非彼諸法有決定性，當知是名於彼無執。

卯二、隨眠執<sup>2</sup> 辰一、有執

若未拔彼習氣隨眠，當知於彼有隨眠執，乃至未捨習氣、麤重。



辰二、無執

若永斷已，當知無執。

子二、第二自性<sup>2</sup> 丑一、問

問：依他起自性執、無執相，云何應知？

丑二、答<sup>2</sup> 寅一、覺悟執<sup>2</sup> 卯一、有執

答：若由遍計所執自性覺悟執故，復遍計彼所成自性，是名初執。

卯二、無執

若善了知唯有眾相，不遍計彼所成自性，是名無執。

寅二、隨眠執<sup>2</sup> 卯一、有執

若於相縛未永拔者，於諸相中有所得時，名第二執。

依他起自性執無執相等者：此中執無執相，應知亦如遍計所執自性有其二種。謂彼覺悟執或無執，及彼隨眠執或無執。此說依他起覺悟執，是名初執；彼隨眠執，名第二執。

卯二、無執

若於相縛已永拔者，於無相界正了知故，於相無得，或於後時如其所有而有所得，當知無執。

或於後時如其所有而有所得者：謂後得智，如實了知諸行如幻，有所得相故。

子三、第三自性<sup>2</sup> 丑一、問

問：圓成實自性執、無執相，云何應知？

丑二、答<sup>2</sup> 寅一、標無執

答：此無有執，此界非執安足處故。

寅二、簡有執

若於此界未得、未觸、未作證中，起得、觸、證增上慢者，當知即是遍計所執，及依他起自性上執。

癸七、了知<sup>3</sup> 子一、遍計所執自性

問：遍計所執自性，當云何知？答：當正了知唯有其名、唯遍計執，無相、無性、無生、無滅、無染、無淨，本來寂靜、自性涅槃，非過去、非未來、非現在，非繫、非離繫，非縛、非解脫，非苦、非樂、非不苦不樂，唯一味，遍一切處皆如虛空。以如是等無量行相，應正了知遍計所執自性。

子二、依他起自性<sup>2</sup> 丑一、問

問：依他起自性，當云何知？

丑二、答<sup>2</sup> 寅一、舉有為事<sup>3</sup> 卯一、標

答：當正了知，一切所詮有為事攝。

卯二、徵

云何一切所詮事耶？

卯三、列

所謂蘊事，界事，處事，緣起事，處非處事，根事，業事，煩惱事，隨煩惱事，生事，惡趣事，善趣事，產生事，色類事，

產生事色類事者：謂於人中，三處現前得入母胎，乃至生位，名產生事。剎帝利等四眾差別，名色類事。

四大王眾天事，乃至他化自在天事，梵眾天事，乃至色究竟天事，空無邊處事，乃至非想非非想處事，隨信行事，隨法行事，順決擇分善根事，見道事，修道事，預流果事，乃至阿羅漢果事，獨覺事，等正覺事，滅想受事，到彼岸事，念住事，乃至道支事，靜慮、無量、無色定事，修想事，修隨念事，解脫、勝處、遍處事，力、無所畏、願智、不護、念住、大悲、永害習氣、諸相隨好、一切種妙智、一切不共佛法事。

寅二、喻有為相

又當了知同於幻、夢、光影、谷響、水月、影像及變化等，猶如聚沫、猶如水泡、猶如陽焰、猶如芭蕉，如狂、如醉、如害、如怨，如飲尿友，喻如假子，喻毒蛇篋，

猶如聚沫等者：攝異門分說：色如聚沫，受喻浮泡，想同陽焰，行類芭

蕉。如彼釋義應知。（陵本八十四卷九頁<sup>6377</sup>）

是空、無願、遠離、無取、虛偽、不堅，如是等類差別無量。

虛偽不堅者：攝異門分說：虛者，空無我故。偽者，不淨故。不堅者，無常故。（陵本八十四卷九頁<sup>6377</sup>）

子三、圓成實自性<sup>2</sup> 丑一、問

問：圓成實自性，當云何知？

丑二、答<sup>2</sup> 寅一、指先所說

答：當正了知，如先所說差別之相，所謂真如、實際、法界，如是等類無量差別。

如先所說差別之相等者：謂如前說：若真如、若實性、若諦性、若無顛倒性、若不顛倒性、若無戲論界、若無相界、若法界、若實際，如是等是真如差別。（陵本七十二卷十頁<sup>5592</sup>）

寅二、辨餘無量

復當了知所餘差別。謂無形色、不可覩見、無所依住、無所攀緣、不可顯現、不可了別、不可施為、不可宣說、離諸戲論、無取無捨，如是等類差別無量。

癸八、染苦<sup>2</sup>

子一、舉染<sup>3</sup>

丑一、初自性

問：此三自性，幾自非染，能令他染？答：一。

丑二、第二自性

問：幾唯自染？答：一。

丑三、第三自性

問：幾自清淨，令他清淨？答：一。

子二、例苦

如染，當知苦亦爾。

此三自性幾自非染等者：如文次第，配屬三種自性應知。遍計所執自性，由相無自性性，說彼非染。餘文易了。

癸九、喻<sup>3</sup> 子一、初自性喻

問：遍計所執自性以何為喻？答：譬如虛空。

子二、第二自性喻

問：依他起自性以何為喻？答：如害如怨。

子三、第三自性喻

問：圓成實自性以何為喻？答：譬如無盡大寶伏藏。

癸十、分別<sup>3</sup> 子一、初自性

問：遍計所執自性由何故遍計？答：由依他起自性故。

子二、第二自性

問：依他起自性由何故依他？答：由因緣故。

子三、第三自性

問：圓成實自性由何故圓成實？答：由一切煩惱眾苦所不雜染故，又由常故。

己三、無分別慧<sup>2</sup> 庚一、問<sup>4</sup> 辛一、指前

問：如說能取真實義慧是無分別，云何應知無分別相？

辛二、詰由

為由不作意故？為由超過彼故？為由無所有故？為由是彼性故？為由於所緣境作加行故？

為由不作意故等者：攝大乘論說：無分別智離五種相以為自性。一、離無作意故；二、離過有尋有伺地故；三、離想受滅寂靜故；四、離色自性故；五、離於真義異計度故。離此五相，應知是名無分別智。（攝大乘論三卷八頁）與此文義大同。世親有釋，隨應當知。（攝論世親釋八卷十頁）

辛三、舉過<sup>5</sup> 壬一、由無作意

若由無作意故者，彼與如理作意相應不應道理，熟眠、狂醉應成此過。

壬二、由超過彼

若由超過彼故者，云何不與聖教相違，如說三界所有諸心心所皆是分別？



壬三、由無所有

若由無所有故者，云何此慧非成非心所？

壬四、由是彼性

若由是彼性故者，云何此慧非成色自性，及非貫達相？

壬五、由作加行

若由於所緣境作加行故者，云何不謗無分別慧離加行性？

辛四、總徵

若如是等皆不應理，云何當知無分別慧？

庚二、答<sup>3</sup> 辛一、標

答：於所緣境離加行故。

辛二、釋<sup>2</sup> 壬一、釋離分別

此所緣境離有無相諸法真如，即此亦是離諸分別。

壬二、釋能照取

由先勢力所引發故，雖離加行，若於真如等持相應妙慧生時，於所緣相能現照取。

辛三、結

是故此慧名無分別。

戊五、威力品<sup>2</sup> 己一、結前

如是已說真實義分決擇。

己二、正釋<sup>3</sup> 庚一、標

由五因緣，當知菩薩所有威德不可思議。

庚二、徵

何等為五？

庚三、列

一者、菩薩所有威德，超過一切尋思境故；二者、菩薩所有威德，世間譬喻不可得故；三者、菩薩所有威德，唯繫屬善磨瑩心故；四者、菩薩所有威

德，與不定地心一向不同分故；五者、菩薩所有威德，一向繫屬定地心故。

戊六、成熟品<sup>3</sup> 己一、舉十法行<sup>3</sup> 庚一、標

復次，於大乘中有十法行，能令菩薩成熟有情。

有十法行等者：如下自釋，一、書持，二、供養，三、施他，四、聽聞，五、玩讀，六、領受，七、諷誦，八、為他開示，九、思量觀察，十、隨入修相。如是十法次第應知。

庚二、徵

何等為十？

庚三、列

謂於大乘相應菩薩藏攝契經等法，書持、供養、惠施於他、若他正說恭敬聽聞、或自玩讀、或復領受、受已廣音而為諷誦、或復為他廣說開示、獨處空閑思量觀察、隨入修相。

己二、問答決擇<sup>3</sup> 庚一、能生福德道

問：如是十種法行，幾是能生廣大福德道？答：一切。

庚二、加行道

問：幾是加行道？答：一。謂第九。

庚三、淨障道

問：幾淨障道？答：一。謂第十。

己三、略不說餘

如是種類餘決擇文，更不復現。

戊七、菩提品<sup>2</sup> 己一、大菩提<sup>2</sup> 庚一、標指

復次，如聞所成地攝大乘中，說大菩提由五種相，應當了知。謂自性故、功能故、方便故、轉故、還故。而未分別，今當解釋。

如聞所成地攝大乘中說大菩提等者：本地分中聞所成地說：復有五相大菩提。謂自性故、功能故、方便故、轉故、還故。（陵本十三卷十六頁<sup>1135</sup>）

庚二、別釋<sup>5</sup> 辛一、自性<sup>2</sup> 壬一、徵

云何大菩提自性？

壬二、釋<sup>2</sup> 癸一、轉依<sup>2</sup> 子一、總標列

謂勝聲聞、獨覺轉依。當知此轉依，復有四種相。一、生轉所依相，二、不生轉所依相，三、善觀察所知果相，四、法界清淨相。

生轉所依相等者：生謂生起，轉謂隨轉。與此相違，名不生轉。大菩提自性，為出世間道生轉所依，為一切煩惱及諸習氣不生轉所依；由善觀察所知為因，而得大菩提自性，故此轉依，是善觀察所知果相。如下自釋，易可了知。

子二、隨別釋<sup>4</sup> 丑一、生轉所依相<sup>2</sup> 寅一、標舉

生轉所依相者，謂佛相續出世間道生轉所依。

寅二、反成

若不爾，不得此轉依，此道應當不生不轉。若遠離彼而有此事，未轉依時先應有此。

丑二、不生轉所依相<sup>2</sup> 寅一、標舉

不生轉所依相者，謂一切煩惱及諸習氣不生轉所依。

寅二、反成

若不爾，不得此轉依，一切煩惱及諸習氣便有眾緣和合，不生不轉應不可得。

丑三、善觀察所知果相<sup>2</sup> 寅一、標舉

善觀察所知果相者，謂此轉依是善通達所知真實、所知真如果。

寅二、反成

若不爾，諸佛自性應更觀察、更有所斷、更有所滅。

丑四、法界清淨相<sup>2</sup> 寅一、標舉

法界清淨相者，謂此轉依已能除遣一切相故，是善清淨法界所顯。

寅二、反成

若不爾，此應無常，應可思議。然此轉依是常住相，不可思議。

癸二、不可思議<sup>2</sup> 子一、五無二相<sup>2</sup> 丑一、總標列

復次，此不可思議說名無二，由五種相應當了知。一、由自性故；二、由處故；三、由住故；四、由一性異性故；五、由成所作故。

丑二、隨別釋<sup>5</sup> 寅一、由自性<sup>2</sup> 卯一、徵

云何由自性故不可思議？

卯二、釋<sup>2</sup> 辰一、即離<sup>3</sup> 巳一、五蘊

謂或即色，或離色，如是不可思議；或即受、想、行、識，或離受、想、行、識，如是不可思議。

巳二、四大

或即地界，或離地界，如是不可思議；或即水界、火界、風界，或離水界、火界、風界，如是不可思議。

巳三、六處

或即眼處，或離眼處，如是不可思議；或即耳、鼻、舌、身、意處，或離耳、鼻、舌、身、意處，如是不可思議。

辰二、有無

或有，或非有，如是不可思議。

寅二、由處<sup>2</sup> 卯一、徵

云何由處故不可思議？

卯二、釋<sup>3</sup> 辰一、界

謂或在欲界，或離欲界，如是不可思議；或在色界、無色界，或離色界、無色界，如是不可思議。

辰二、趣

或在人中，或離人中；或在天上，或離天上；如是不可思議。

辰三、方所

或在東方，或離東方；或在南西北方上下方維，或離南西北方上下方維；如是不可思議。

寅三、由住<sup>2</sup> 卯一、徵



云何由住故不可思議？

卯二、釋<sup>4</sup> 辰一、現法樂住

謂安住如是如是色類樂住，如是不可思議。

辰二、奢摩他住

安住如是如是色類奢摩他住，如是不可思議。

辰三、有心無心住

安住有心住，如是不可思議；安住無心住，如是不可思議。

辰四、聖等三住

安住如是色類聖住，如是不可思議；安住如是色類天住、梵住，如是不可思議。

安住如是如是色類樂住等者：此中色類，顯揚譯為狀貌。謂餘補特伽羅，安住現法樂住諸靜慮中，由善取相，有多狀貌差別可得。如來不爾，非有如是如是狀貌可得，極自在故。

寅四、由一異性

云何一性異性不可思議？謂一切佛同安住一無漏界中，為是一性、為是異性，如是不可思議。

寅五、由成所作

云何成所作故不可思議？謂如是如是如來，同界、同智、勢力、勇猛，住無漏界，依此轉依，能作一切有情義利，如是不可思議。

同界同智等者：諸佛如來其性平等，是名同界。智慧、勢力、威德平等，是名同智、勢力、勇猛。依顯揚文，故作是釋。（顯揚論八卷三頁）

子二、明二因緣<sup>2</sup> 丑一、標

此復二因緣故，當知不可思議。

丑二、釋<sup>2</sup> 寅一、第一因緣

謂離言說義故，及過語言道故，不可思議。

寅二、第二因緣

又出世間故，無有世間能為譬喻，是故不可思議。

辛二、功能<sup>3</sup> 壬一、徵

云何功能？

壬二、釋

謂若略說，有十自在，說名功能。謂壽自在等。

壬三、指

如本地分已說。

謂壽自在等者：此中等言，等取心自在、眾具自在、業自在、生自在、勝解自在、願自在、神力自在、智自在、法自在，是名十種自在。本地分中已說其相應知。（陵本四十八卷十七頁<sup>3867</sup>）

辛三、加行<sup>4</sup> 壬一、徵

云何加行？

壬二、標

謂若略說，有四種化，說名加行。

壬三、列

一、未成熟有情令成熟故，作菩薩行化。二、已成熟有情令解脫故，於三千大千世界百拘胝贍部洲中，同於一時方便攝受如來之化。三、即為彼所化有情作聲聞化。四、即為彼所化有情作獨覺化。

壬四、結

當知一切諸佛世尊，於此四種變化事中，遍十方界功能無礙。

辛四、轉<sup>4</sup> 壬一、徵

云何為轉？

壬二、標

當知此轉略有二種。

壬三、列

一、權時轉，二、畢竟轉。

壬四、釋<sup>2</sup> 癸一、權時轉

權時轉者，謂諸有情乃至未成熟、未解脫來，諸佛世尊有變化轉。

癸二、畢竟轉

畢竟轉者，謂如無盡不可思議諸佛自性大光明轉，如是能作一切有情所作事轉。

辛五、還<sup>4</sup> 壬一、徵

云何為還？

壬二、標

當知此還亦有二種。

壬三、列

一、權時還，二、畢竟還。

壬四、釋<sup>2</sup> 癸一、權時還

權時還者，謂所化有情已成熟、已解脫故，從此無間，諸佛世尊現般涅槃，

非畢竟滅。

癸二、畢竟還

畢竟還者，當知煩惱及諸習氣畢竟盡故，彼所依處眾苦亦盡。

己二、如來<sup>3</sup> 庚一、讚歎饒益<sup>2</sup> 辛一、徵

云何能讚歎者，於如來所能作饒益？

辛二、釋<sup>2</sup> 壬一、總標所以

謂隨所讚歎但行自利，非由讚歎於如來所有異所作，猶如造瓶。何以故？如來隱善，極少欲故。

非由讚歎等者：謂諸如來，不由讚歎而生欣喜，由藏覆善，極少欲故。能讚歎者讚歎如來，但行自利，非如世間造瓶等物，由士夫力而得增益，有異所作，故取為喻。

壬二、釋其差別<sup>2</sup> 癸一、二希奇法<sup>3</sup> 子一、標

復有二種於如來所稱揚讚歎甚希奇法。

子二、列

一、令讚歎者純行自利，生無量福；二、於遠離一切所求諸如來所而作饒益。

子三、釋

謂於如來所如如讚歎，如是如是攝受自利；如如攝受自利，如是如是名以供養攝受如來。由此因緣，生極廣大無盡福聚。

癸二、如來二事

又諸如來有二種事。一、不可意事，二、可意事。

又諸如來有二種事等者：謂諸有情不行自利，是名如來不可意事。若能讚歎攝受自利，是名如來可意事。

庚二、六相功德<sup>3</sup> 辛一、標

復次，由六種相，當知略攝如來功德。

辛二、列

一、圓滿，二、無垢，三、不動，四、無等，五、能作有情利益事業，六、

功能。

辛三、釋<sup>6</sup> 壬一、圓滿

云何圓滿？謂諸如來成就三界及出世間一切功德。彼出世間所有功德，超過一切語言行路，是故如來一切歌詠所不能及。由此因緣，彌應讚歎。

成就三界及出世間一切功德者：攝異門分說：言第一者，於欲行善得圓滿故。所言尊者，於色行善得圓滿故。所言勝者，無色行善得圓滿故。所言上者，超過一切三界世間善圓滿故。言無上者，出世間善得圓滿故。（陵本八十三卷四頁<sup>6285</sup>）由是當知如來一切功德圓滿差別。

壬二、無垢<sup>2</sup> 癸一、徵

云何無垢？

癸二、釋<sup>2</sup> 子一、標無七垢

謂諸功德有七種垢。一、欲，二、見，三、疑，四、慢，五、憍，六、睡眠，七、慳。彼於如來一切永無。



子二、徵釋一一<sup>7</sup> 丑一、無欲

何以故？由諸如來所有功德不求他知，謂欲令他知我成就如是功德。

丑二、無見

又於此德無執著見。

丑三、無疑

又於此德無有疑惑為功德耶？為過失耶？

丑四、無慢

又不以己所有功德與他校量。

丑五、無憍

又不觀己所有功德，憍醉掉舉，生欣生喜。

丑六、無隨眠

非彼功德為諸煩惱之所隨眠，永害煩惱并習氣故。

丑七、無慳

又於功德無慳吝心，謂勿令他同所證得。

壬三、不動

云何不動？謂諸外道不能動故，一切魔軍不能動故，一切盜賊不能奪故，一切親屬不能壞故，一切國王不能壞故，火水風大不能變故，壽命雖盡亦無退故。由諸如來功德無盡，是故不動。

云何不動等者：能摧一切外道異論，能伏諸魔大力軍眾，是即初二不能動義。所餘諸義，為顯功德依內緣生，不為他所劫奪，是故說言一切盜賊不能奪故，乃至火水風大不能變故。又顯如是功德，可從今世持往後世，由是說言壽命雖盡亦無退故。義如本地分中，聖財所生樂釋。（陵本五卷二頁<sup>319</sup>）又復大乘轉依，於一切法轉得內緣自在，由是如來功德無有退義。

壬四、無等

云何無等？謂諸如來所有功德，極廣大故、極尊勝故、極眾多故、大威力故，若淨不淨一切有情無與等者，是故無等。

壬五、作利他事

云何能作有情利益事業？謂捨所得廣大無罪所有安樂，方便示現利他加行，是故能作利益他事。

謂捨所得廣大無罪所有安樂者：義顯不住涅槃應知。

壬六、功能

云何功能？謂於所作利有情事，不待作願而圓證故，彼加行智為親屬故，於彼恆時而專志故。

庚三、料簡歸依<sup>2</sup> 辛一、正簡因緣<sup>2</sup> 壬一、總標列

復次，由五因緣，當知諸天非所歸依。何等為五？一、由形相故；二、由自性故；三、由作業故；四、由法爾故；五、由因果故。

壬二、隨別釋<sup>5</sup> 癸一、由形相<sup>2</sup> 子一、簡諸天

云何諸天由形相故，非所歸依？謂由不現見，無交議故；由形暴惡，有怖畏故；由習放逸，有貪愛故；由捨利他，無悲愍故；由不了知作與不作，於真

實義不通達故。

子二、顯如來<sup>2</sup> 丑一、正辨形相

云何如來由形相故，是真歸依？謂由現見，有交議故；由形憺怕，無怖畏故；由無縱逸，離貪愛故；由常不捨利有情事，有悲愍故；由善了知作與不作，於真實義善通達故。

丑二、別廣五相<sup>3</sup> 寅一、標

復由五相，唯有如來是真歸依。

寅二、徵

何等為五？

寅三、列

一、為利益一切有情取菩提故；二、能善轉正法眼故；

能善轉正法眼故者：謂諸如來善轉法輪，能令所化生聖慧眼故。攝事分中

廣釋其相。（陵本九十五卷十頁<sup>7152</sup>）

三、於恩怨諸有情所等心利故；四、捨一切家宅、親屬攝受貪愛，根寂靜故；五、能善解一切疑故。

癸二、由自性<sup>2</sup> 子一、簡諸天

云何諸天由自性故，非所歸依？謂彼諸天漏所隨故，性非調善，能調御他不應道理。

子二、顯如來

如來永離一切漏故，其性調善，故能調御一切有情。

癸三、由作業<sup>2</sup> 子一、簡諸天

云何諸天由作業故，非所歸依？謂彼諸天受用諸欲安住為業，損害有情惡業可得。

損害有情惡業可得者：謂彼諸天，或時戰諍，或行驅擯，如本地分別釋其相應知。（陵本四卷十三頁<sup>301</sup>）

子二、顯如來

如來廣大無垢靜慮安住為業，能作有情利益為業。

癸四、由法爾<sup>2</sup> 子一、徵

云何諸天由法爾故，非所歸依？

子二、釋<sup>2</sup> 丑一、標依自力

謂諸世間及出世間吉祥盛事，一切皆依自功力故。

丑二、斥非他力

若離功力，雖於諸天極申敬事，亦不能得。雖不敬事，但作功力必能得故。

癸五、由因果<sup>2</sup> 子一、徵

云何諸天由因果故，非所歸依？

子二、釋<sup>2</sup> 丑一、詰由

謂諸天身為由能感天業所得？為由供養諸天故得？為無因得？

丑二、難非<sup>3</sup> 寅一、由天業得

若由能感天業得者，但應歸依自所作業，非彼諸天。

寅二、由無因得

若無因得，應歸無因，不應歸天。

寅三、由供天得<sup>2</sup> 卯一、轉詰

若由供養諸天故得，此諸天身，為當但用供養為因？為天？為俱？

卯二、別非<sup>3</sup> 辰一、唯供養

若唯供養，天應唐捐，隨所供養應感天身。

辰二、但由天

若但由天，供養徒設，雖不供養，天應令彼獲得天身。

辰三、俱由二<sup>2</sup> 巳一、設計

若言俱由，謂以供養攝降諸天，隨所思願皆令果遂。

巳二、出過<sup>2</sup> 午一、標不定

若爾，七種所思果遂不決定故，不應道理。

午二、列七種

謂供養緣於所攝受，諸信解者於信解緣，於信解事，於能往趣最勝天身，於能果遂最勝富樂，於能滅壞阿素洛等所有怨敵，及於徙沒。

七種所思果遂不決定者：顯揚論中，別列七種。一、於供養緣攝受；二、於信解緣攝受；三、於信解彼者，發起信解，能感最勝天神自體；四、於能感最勝所受富樂；五、於摧壞阿素洛等怨敵；六、於出生；七、於終歿。（顯揚論六卷十五頁）此應準釋。謂供養為緣，不定為天所攝受故。信解為緣，不定為天所攝受故。信解彼天，不定能感最勝天神自體故；不定能感最勝所受富樂故；不定摧壞阿素洛等怨敵故；不定出現生天趣故；生彼趣已不定常住，還當終歿故。

辛二、別廣清淨<sup>2</sup> 壬一、標列四種

復次，有四清淨。一、名清淨，二、語清淨，三、自性清淨，四、形相清淨。

壬二、別顯形相

又此形相有大威德，斷諸疑網，能善記別，難化能化，天人所歸，善能誨



導，證出離性，制諸外道。

有四清淨等者：如來略有十種功德名號，當知是名清淨。如來所說十二分教，當知是語清淨。永離諸漏，其性調善，當知是自性清淨。由如前說現見等相，當知是形相清淨。

戊八、力種性品<sup>3</sup>

己一、具多勝解攝<sup>2</sup>

庚一、總辨假實<sup>2</sup>

辛一、辨<sup>2</sup>

壬一、假<sup>2</sup>

癸一、徵

復次，云何當知色等想事、色等施設是假名有，非實物有？

癸二、釋

謂諸名言熏習之想所建立識，緣色等想事計為色等性，此性非實物有，非勝義有。

緣色等想事等者：當知此中，緣色等想事，是依他起自性；計為色等性，是遍計所執自性。

是故如此色等想法非真實有，唯是遍計所執自性，當知假有。

壬二、實

若遣名言熏習之想所建立識，如其色等想事緣離言說性，當知此性是實物有、是勝義有。

辛二、指

此中道理言論成立，如菩薩地應知。

如菩薩地應知者：如本地分廣顯諸法離言自性道理應知。（陵本三十六卷

十四頁<sup>2966</sup>）

庚二、別顯二性<sup>2</sup>

辛一、言說自性<sup>2</sup>

壬一、標無生滅

若諸名言熏習之想所建立識，緣遍計所執自性為境，即說此性非內、非外、非二中間，少有可得，非已生、非當生、非正生，非已滅、非當滅、非正滅，本來寂靜、自性涅槃。

壬二、徵釋所以

何以故？此唯假有，非勝義有故。

辛二、離言法性<sup>2</sup> 壬一、標生滅

若離名言諸法自性，當知此性凡夫所生邪執為緣，已生、當生、正生，已滅、當滅、正滅。

壬二、辨染淨

若未永斷、未遍知，便成雜染；若已永斷、已遍知，乃成清淨。

己二、求聞正法攝<sup>2</sup> 庚一、四法攝<sup>3</sup> 辛一、標

復有四法，能令菩薩攝正多聞。

辛二、列

謂多聞持、多聞證、多聞果、多聞淨。

辛三、配

如其次第，菩提願、事善友、思擇力、住空閑，應知其相。

復有四法等者：此中四法，謂即菩提願、事善友、思擇力、住空閑。如其次第，能令菩薩攝受多聞持、多聞證、多聞果、多聞淨。如是一切，名正

多聞。如所聞法，念無忘失，名多聞持。如所聞法，慧能趣證，名多聞證。如所聞法，能正思惟，名多聞果。如所聞法，隨入修相，名多聞淨。

庚二、問答辨<sup>7</sup> 辛一、意樂界

問：諸菩薩意樂界云何？答：於諸佛法信解有性所顯故。

辛二、增上意樂界

問：諸菩薩增上意樂界云何？答：於諸佛法信解有德所顯故。

辛三、勝解界

問：諸菩薩勝解界云何？答：於諸佛法信解可得所顯故。

諸菩薩意樂界等者：謂於諸佛及所說法實事理中信解實有，當知是名菩薩意樂界。若於諸佛及所說法真實方便信解有德，當知是名菩薩增上意樂界。若於諸佛及所說法深心希望信解可得，當知是名菩薩勝解界。如是三種差別，皆由信增上力之所顯故。

辛四、愍

問：諸菩薩愍云何？答：於苦現前諸有情所隨生愍傷故。

辛五、悲

問：諸菩薩悲云何？答：於苦因現前諸有情所隨生悲哀故。

辛六、慧

問：諸菩薩慧云何？答：於所知境通達如所有性故。

辛七、智

問：諸菩薩智云何？答：於所知境通達盡所有性故。

己三、於法正思攝

復有三種思惟過患。謂不究竟思惟、非處思惟、顛倒思惟。

復有三種思惟過患等者：本地分中，說諸菩薩於法正思有八種相。（陵本三十八卷十八頁<sup>3159</sup>）與彼相違，當知是名思惟過患。今略說三，總攝彼故。

戊九、施等品<sup>2</sup>

己一、廣說施戒<sup>2</sup>

庚一、施<sup>2</sup>

辛一、總標

復次，如諸菩薩所行惠施，當知此施由七種相乃得清淨。謂施物清淨、戒清淨、見清淨、心清淨、語清淨、智清淨、垢清淨。如是清淨，當知一切皆有十相。

辛二、隨釋<sup>7</sup>

壬一、施物清淨

云何施物清淨十相？一、廣大施，謂眾多差別故。

眾多差別故者：謂諸菩薩以一切種一切內外所有施物，施諸眾生故。

二、平等施，謂無增無減故。

無增無減故者：謂諸菩薩其心平等，不墮朋黨，於怨親中悲心等施，由是因緣，彼所施物亦無增減。

三、應時施，謂當彼所樂故。四、上妙施，謂色等具足故。五、清淨施，謂非不淨物所雜穢故。六、如法施，謂無罪相應故。七、隨樂施，謂隨求者所愛樂故。八、利益施，謂隨彼所宜故。九、或頓或漸施，謂觀彼求者故。十、無間施，謂無斷絕故。

壬二、戒清淨

云何戒清淨十相？一、發勤精進所獲財物而用惠施；

發勤精進所獲財物而用惠施者：本地分說：又諸菩薩，若現無有可施財物，先所串習彼彼世間工巧業處作意現前，少用功力，多集財寶，施諸眾生。（陵本三十九卷十一頁<sup>3209</sup>）此應準釋。

二、自手臂力所致財物而用惠施；三、離垢汙物而用惠施；四、如法而施；五、如法所得而用惠施；六、息除諸惡而行惠施；

息除諸惡而行惠施者：本地分說：又諸菩薩不損惱他而行惠施。謂不訶罵、捶打、恐怖、毀辱、縛害、拘禁、斫刺、驅擯於此，而施於彼。（陵本三十九卷八頁<sup>3202</sup>）此應準釋。

七、調伏諸根而行惠施；

調伏諸根而行惠施者：本地分說：調伏慳吝垢而行惠施，調伏積藏垢而行惠施。調伏慳吝垢者，謂捨財物執著。調伏積藏垢者，謂捨受用執著。

(陵本三十九卷十八頁<sup>3228</sup>) 此應準釋。

八、殷重恭敬而行惠施；九、自手而施；十、於己僕從先行恩養，然後惠施他來求者。

壬三、見清淨

云何見清淨十相？一、不計度我能行施、施為我所而行惠施；二、不將己校量於他，謂我是勝、是等、是劣而行惠施；三、不觀他當有反報而行惠施；四、不觀察當來有勝殊妙富樂而行惠施；

不觀察當來有勝殊妙富樂等者：謂諸菩薩不依帝釋、魔王、輪王、自在等果而行惠施故。

五、不觀施全無有果而行惠施；六、不觀施不相似果而行惠施；

五不觀施全無有果等者：本地分說：又諸菩薩，如實了知一切品類所行布施，一切品類施果異熟，深生信解，不由他緣、非他所引而行布施。謂施飲食能感大力，施諸衣服能感妙色，施諸車乘能感快樂，施諸燈明能感淨



眼，如是等類廣說應知。（陵本三十九卷七頁<sup>3199</sup>）此說第五、第六見清淨相，隨其總別配釋應知。

七、不觀施有顛倒果而行惠施；八、不觀殺害為伴侶善而行惠施；九、不觀奇變吉祥之相而行惠施；十、不為世間聲譽稱讚而行惠施。

七不觀施有顛倒果等者：本地分說：又諸菩薩，不由惡見妄有執取而行惠施，謂如廣大暴惡祠祀。不計殺生布施為法，亦不妄取吉祥瑞應相應相狀而行惠施。（陵本三十九卷七頁<sup>3198</sup>）此說第七、第八、第九見清淨相，如次配釋應知。

壬四、心清淨<sup>2</sup> 癸一、徵起

云何心清淨十相？

癸二、列釋<sup>10</sup> 子一、憐愛心

一、憐愛心而行惠施，謂任自性於諸有情。

子二、珍寶心

二、珍寶心而行惠施，謂於施所。

謂於施所者：謂若是處應行惠施，是名施所。於彼施所行惠施時，住福田覺，名珍寶心而行惠施。

子三、平等心

三、平等心而行惠施，謂於怨親及中庸所。

子四、調伏垢心<sup>3</sup> 丑一、標

四、調伏垢心而行惠施。

丑二、釋

謂於慳垢及蓄積垢。

丑三、廣

當知不施於他名為慳垢，自不受用名蓄積垢。

子五、欣樂心<sup>2</sup> 丑一、標

五、欣樂心而行惠施。

丑二、廣

謂由七相。一、於未來求者發喜樂心故；二、於已來求者，初見便生淨信心故；

初見便生淨信心者：暫見彼已，深生信忍，樂行惠施故。

三、於正施時生悅豫心故；四、生靜定心故；

生靜定心故者：謂了知行施，即是離欲清淨資糧故。

五、生無足心故；

生無足心故者：本地分說：又不狹劣而行惠施。謂財雖少，尚廣心施，何況財多。（陵本三十九卷八頁<sup>3201</sup>）此應準釋。

六、生不惱害意趣心故；七、施已無追悔心故。

子六、忍辱心

六、忍辱心而行惠施，謂於求者彊遮障中能堪忍故，及無厭倦故。

忍辱心而行惠施等者：謂若求者於菩薩所為損惱時，此增上力，障自恣

求，菩薩於彼心能堪忍，亦無厭倦而行惠施故。

子七、慈心

七、以慈心而行惠施，謂於惱害者。

子八、悲心

八、以悲心而行惠施，謂於有苦者。

子九、喜心

九、以喜心而行惠施，謂於有功德者。

子十、捨心

十、以捨心而行惠施，謂於親友所。

壬五、語清淨

云何語清淨十相？一、先於施物恣彼乞者。二、彼若至時稱善來進。三、遠離鬻蹙，平面而視，舒顏含笑，先言問訊。四、以柔軟言共申談論，安慰乞者。五、從此無間，言當施汝可愛財物，欣慶斯施。六、正發施言：吾今惠

汝。七、彼若遮障，從容分布不出麤言。八、於乞求者若對、若背，不毀不訾，亦無論說。九、若無施物，正言辭謝，許得隨與。十、於乞求者，終不對面呵責、驅逐、輕笑、戲弄，亦不令其改容懷愧。

壬六、智清淨<sup>3</sup> 癸一、徵

云何智清淨十相？

癸二、列

一、由惠施智清淨，二、由求者智清淨，三、由施物智清淨，四、由施加行智清淨，五、由以施成熟有情智清淨，六、由方便善巧智清淨，七、由諸欲過患智清淨，八、由除垢智清淨，九、由於友遠離攝受智清淨，十、由隱覆六方智清淨。

癸三、釋<sup>10</sup> 子一、由惠施

一、由惠施智清淨者，謂於施異名、於施體相、於施訓辭、於施差別，皆如實知而行惠施。

於施異名等者：本地分說：又諸菩薩於一切施，謂法施、財施、無畏施。若異門、若體相、若釋名、若因果差別，如實了知而行惠施。（陵本三十卷十四頁<sup>3216</sup>）與此義同，前文已釋，此應準知。

子二、由求者<sup>2</sup> 丑一、知所樂

二、由求者智清淨者，謂於一切有情，皆住福田覺而行惠施，於諸勝劣、有得有失、怨恩等所能善了知，隨來求者所樂差別而行施故。

丑二、恣自取

又先以諸所施財物，遍於一切有情之類意樂而捨，若諸求者自然取時，皆生隨喜。

子三、由施物<sup>4</sup> 丑一、由工巧智

三、由施物智清淨者，謂於一切工巧業處智善巧故，速疾能集所有財物而用惠施。

丑二、由善根攝

或由善根之所攝受，謂於前生、或現法受所感財物而用惠施。

丑三、由神通等

或發神通、或由法受所致財物而用惠施。

或由法受所致財物者：謂由手臂力，依自勤劬，受現法苦所致財物故。

丑四、由他積集

或他積集所有財物而用惠施，如勸導他，或任彼務。

如勸導他或任彼務者：為調伏他慳吝種子勸行惠施，名勸導他。他行惠施修福業時，躬詣其所，翹勤無惰，起策具足，深心歡喜，隨力隨能身助、語助，令施求者得善滿足，名任彼務。義如本地分說。（陵本三十九卷十

一頁  
3210

子四、由施加行<sup>2</sup> 丑一、令無勞倦

四、由施加行智清淨者，謂於施加行能善了知，不令求者身心勞倦，自心無染而行惠施。

丑二、善能分布<sup>2</sup> 寅一、舉施所

善能分布施來求者，施貧匱者、施無依者、施惡行者、施妙行者、施自僕從。

寅二、說隨應

謂若貧乏、中財、大財，隨其所應，如軌行施，非不如軌。

子五、由施成熟有情<sup>2</sup> 丑一、其他施

五、由施成熟有情智清淨者，謂善了知施能成熟諸有情已而行惠施，以所施物與諸大眾普共行施，亦令大眾生無量福。

丑二、令他施<sup>2</sup> 寅一、辨差別<sup>3</sup> 卯一、於貧窮樂施者

又於貧窮樂行施者，以己財物分布與之，令其行施。

卯二、於慳吝欲施者

或有不貧，內懷慳吝，雖欲惠施，而不能用自財布施，即以財物與之令施。

卯三、於欲供養三寶者

或於佛法及僧田中欲有所作，便以財物棄捨與之，令彼造作。



寅二、結生福

由此因緣，於二門中生無量福。

於二門中生無量福者：此中二門，謂能成熟自佛法，及能成熟他有情應知。

子六、由方便善巧

六、由方便善巧智清淨者，謂或由教導令行惠施，或彊力逼令行惠施，或領彼恩令行惠施，

或彊力逼令行惠施等者：本地分說：逼迫所生方便善巧、施恩報恩方便善巧。依彼善巧令行惠施故。

或由生故令行惠施，或由神力而行惠施。

或由生故令行惠施者：謂由究竟清淨方便善巧，示現受生，令諸有情歡喜供養故。

子七、由諸欲過患<sup>2</sup>

丑一、總標

七、由諸欲過患智清淨者，謂於諸欲所有過患如實知己而行惠施。

丑二、別列<sup>5</sup> 寅一、二種

謂於苦蘊中，或時了知二種過患。一者、現法，二者、後法。

寅二、五種

或時了知五種過患，謂如五種過患經說。

謂如五種過患經說者：本地分中聲聞地說：如世尊說：習近諸欲有五過患。謂彼諸欲，極少滋味，多諸苦惱、多諸過患。又彼諸欲，於習近時，能令無厭、能令無足、能令無滿。又彼諸欲，常為諸佛及佛弟子，賢善正行、正至善士，以無量門呵責毀訾。又彼諸欲，於習近時，能令諸結積集增長。又彼諸欲，於習近時，我說無有惡不善業而不作者。（陵本三十三卷三頁<sup>2679</sup>）此應準知。

寅三、六種

或時了知六種過患，謂此諸欲是怖增語，如是等類廣說如經。

寅四、七種

或時了知七種過患，謂知諸欲無常、虛偽、不實、妄事法，譬如幻事惑亂愚夫。

寅五、八種

或時了知八種過患，謂知諸欲如朽骸骨，如經廣說，乃至猶如樹端熟果。

或時了知七種過患等者：此中七種、八種諸差別義，如攝異門分別釋應知。（陵本八十四卷一頁<sup>6352</sup>）

子八、由除垢

八、由除垢智清淨者，謂於除遣十四垢業如實知己而行惠施，此如尸佉落迦經說。

子九、由於友遠離攝受

九、由於友遠離攝受智清淨者，謂能善知遠離四種惡友、攝受四種善友而行惠施，此亦如尸佉落迦經說。

子十、由隱覆六方

十、由隱覆六方智清淨者，謂隱覆六方而行惠施，此亦如尸佉落迦經說。

八由除垢智清淨等者：此中第八、第九、第十智清淨中，所說除遣十四垢業，遠四惡友，攝四善友，隱覆六方，具如尸佉落迦經說。本地分中亦有此文。（陵本四十四卷二十頁<sup>3608</sup>）前已引釋，如彼應知。

壬七、垢清淨<sup>2</sup> 癸一、徵起

云何垢清淨十相？

癸二、列釋<sup>10</sup> 子一、遠離懈怠垢

一、遠離懈怠垢而行惠施，謂或內、或外、或近、或遠、或身疲倦、或不疲倦、或身羸劣、或不羸劣而常惠施。

子二、遠離貪垢

二、遠離貪垢而行惠施，謂於財物。

子三、遠離瞋垢

三、遠離瞋垢而行惠施，謂於求者。

子四、遠離癡垢

四、遠離癡垢而行惠施，謂於因果。

子五、遠離障垢<sup>2</sup> 丑一、標

五、遠離障垢而行惠施。

丑二、廣

言障垢者，謂四種障。一、不串習，二、匱乏，三、耽湎，四、觀果。

謂四種障等者：此中四障，本地分中已說其相應知。（陵本三十九卷十四

頁<sup>3218</sup>）

子六、遠離非道理垢

六、善分布而行惠施，此即遠離非道理垢。謂貧乏者，於自僕從；若中財者，即於彼所及貧苦所；若大財者，即於彼所，亦於其餘來求者所。

子七、遠離諸減少垢<sup>3</sup> 丑一、標

七、由圓滿而行惠施，此即遠離諸減少垢。

丑二、釋

謂事圓滿、意樂圓滿。

丑三、廣<sup>2</sup> 寅一、事圓滿

事圓滿者，復有七相。一、施資產事，二、施國土事，三、施有情事，四、施莊嚴事，五、施舍宅事，六、施居處事，七、施內身事。

寅二、意樂圓滿

意樂圓滿者，謂於內身及外財寶，獲得自性無著意樂。

子八、遠離不清淨垢

八、由清淨而行惠施，此即遠離不清淨垢。謂由十種清淨，即無滯無取等，如本地分廣說。

謂由十種清淨等者：本地分說：菩薩清淨施有十種相。一、不留滯施，二、不執取施，三、不積聚施，四、不高舉施，五、無所依施，六、不退

弱施，七、不下劣施，八、不向背施，九、不望報恩施，十、不希異熟施。如彼釋義應知。（陵本三十九卷十八頁<sup>3230</sup>）

子九、遠離惡慧垢<sup>3</sup> 丑一、標

九、善觀察而行惠施，此即遠離惡慧垢。

丑二、釋

謂觀察施物、觀察意樂、觀察其田。

丑三、廣<sup>3</sup> 寅一、觀察施物<sup>3</sup> 卯一、標

觀察施物者，謂觀察受用勝於積聚，觀察惠施勝於受用。

卯二、徵

何以故？

卯三、釋<sup>3</sup> 辰一、觀積聚

若唯積聚，不能自益、不能益他，非現法利、非後法利。

辰二、觀受用

若諸菩薩唯自受用，名自饒益，非饒益他，名現法利，非後法利。

辰三、觀惠施

若諸菩薩能行惠施，便自發生廣大歡喜，名自饒益、名饒益他，名現法利、名後法利。

寅二、觀察意樂<sup>3</sup> 卯一、標

觀察意樂者，當知意樂略有四種。

卯二、列

一、於因中無倒意樂，二、於果中無著意樂，三、於有情悲愍意樂，四、於一切智智圓滿意樂。

卯三、結

由如是等諸意樂故，而行惠施。

寅三、觀察田<sup>2</sup> 卯一、正辨田相<sup>3</sup> 辰一、標

觀察田者，當知略由五相。



辰二、列

一、於是處乞求可得；二、於是處已有乞求，復加貧匱；三、於是處已有貧匱，復無依怙；四、於是處有無依怙，復行惡行；五、於是處雖無此等，而有修行善行可得。

辰三、結

是名為田。

卯二、簡非田相<sup>3</sup> 辰一、標

由七種相，當知非田。

辰二、列

一、乞求者極大暴惡，曾為怨害，歸依怨害而有所求；二、勸為善事終不能得；三、心懷染汙，為染汙事而有乞求；四、為損惱而有乞求；五、乞求者或自是魔，或魔所魅，非處乞求；六、乞求父母，或復隨一非所施物；七、能為無義。

辰三、結

由此等相，當知是名觀察非田。

子十、遠離無方便過失垢<sup>2</sup>

丑一、標具德

十、具方便德而行惠施，此即遠離無方便過失垢。

丑二、釋方便

此中方便者，謂串習施，不顧身命，悲愍有情，真實義智、無上菩提勝解，教導、彊力逼迫、處任恩報、生及神力。

教導彊力逼迫等者：如前方便善巧智清淨中，已說其相應知。

瑜伽師地論科句披尋記卷第七十四

瑜伽師地論科句披尋記卷第七十五

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之四

庚二、戒<sup>3</sup> 辛一、標

復次，當知菩薩毗奈耶略有三聚。

辛二、釋<sup>2</sup> 壬一、別辨<sup>3</sup> 癸一、律儀戒

初律儀戒毗奈耶聚，如薄伽梵為諸聲聞所化有情略說毗奈耶相，當知即此毗奈耶聚。

癸二、攝善法戒<sup>2</sup> 子一、徵

云何攝善法戒毗奈耶聚？

子二、釋<sup>2</sup> 丑一、正善觀察<sup>4</sup> 寅一、標

謂諸菩薩，於攝善法戒勤修習時，略於六心應善觀察。

寅二、徵

何等為六？

寅三、列

一、輕懣心，二、懈怠俱行心，三、有覆蔽心，四、勤勞倦心，五、病隨行心，六、障隨行心。

寅四、釋<sup>2</sup>

卯一、六心<sup>6</sup>

辰一、輕懣心

若諸菩薩，於善法中所有輕心、無勝解心及陵懣心，名輕懣心。

辰二、懈怠俱行心

若有懶惰、憊醉、放逸所纏繞心，名懈怠俱行心。

辰三、有覆蔽心

若貪欲等隨有一蓋，或諸煩惱及隨煩惱所纏繞心，名有覆蔽心。

辰四、勤勞倦心

若住勇猛增上精進，身疲、心倦映蔽其心，名勤勞倦心。

辰五、病隨行心

若有諸病損惱其心，無有力能，不堪修行，名病隨行心。

辰六、障隨行心

若有喜樂談論等障隨逐其心，名障隨行心。

若有喜樂談論等障等者：此中障言，謂障遠離。本地分中，於遠離障說有眾多差別，如彼廣釋應知。（陵本二十五卷十二頁<sup>2117</sup>）

卯二、有罪無罪<sup>2</sup> 辰一、隨觀有無

菩薩於此六種心中，應正觀察：我於如是六種心中，為有隨一現前行耶？為無有耶？

辰二、辨罪無罪<sup>4</sup> 巳一、於前三心

於前三心，菩薩一向不應生起；設已生起，不應忍受。若有忍受而不棄捨，遍於一切皆名有罪。

巳二、勤勞倦心<sup>2</sup> 午一、無罪

勤勞倦心現在前時，由此心故，捨善方便。若為暫息身心疲惱，當於善法多修習者，當知無罪。

午二、有罪

若於一切畢竟捨離，謂我何用精勤修習如是善法，令我現在安住此苦。若如是者，當知有罪。

巳三、病隨行心

病隨行心現在前時，菩薩於此無有自在，不隨所欲修善加行，雖復忍受而無有罪。

巳四、障隨行心<sup>2</sup> 午一、無罪

障隨行心現在前時，若不隨欲墮在其中，或觀此中有大義利，雖復忍受而無有罪。

午二、有罪

若隨所欲故入其中，或觀是中無有義利，或少義利而故忍受，當知有罪。

丑二、總顯略義

如是六心，前三生已而忍受者，一向有罪；病隨行心雖復忍受，一向無罪；餘之二心，若生起已而忍受者，或是有罪、或是無罪。

癸三、饒益有情戒<sup>3</sup> 子一、標

若諸菩薩，於作有情利益戒中勤修習時，當正觀察六處攝行。

子二、列

所謂自、他、財衰、財盛、法衰、法盛，是名六處。

子三、釋<sup>3</sup> 丑一、財法衰盛<sup>2</sup> 寅一、財<sup>2</sup> 卯一、財衰

言財衰者，謂衣食等未得不得，得已斷壞。

卯二、財盛

與此相違，當知財盛。

寅二、法<sup>2</sup> 卯一、法衰<sup>2</sup> 辰一、聞思

言法衰者，謂越所學，於先未聞勝義所攝如來所說微妙法句不得聽聞。如不聽聞先所未聞，如是於先所未思惟不得思惟，有聽聞障、有思惟障，設得聞思，尋復忘失。

辰二、修證

於所未證修所成善而未能證，設證還退。

卯二、法盛

與此相違，當知法盛。

丑二、觀察自他

<sup>3</sup>

寅一、不應為

<sup>2</sup>

卯一、標所作

<sup>2</sup>

辰一、舉令財盛

此中菩薩作自法衰，令他財盛，此不應為。

辰二、例令法盛

如令財盛，法盛亦爾。

卯二、釋法衰

此中義者，越學所攝及能隨順越學所攝，或於證法退失所攝，當知法衰。



越學所攝等者：本地分說：菩薩於純自利利他應知應斷，違越不順菩薩儀故。（陵本三十五卷十七頁<sup>2883</sup>）當知是名越學所攝。彼以懈怠放逸為其因緣，名能隨順越學所攝。

寅二、應為不應為<sup>2</sup> 卯一、舉令財盛

又諸菩薩作自財衰，令他財盛。若此財盛不引法衰，此則應為；若引法衰，此不應為。

卯二、例令法盛

如令財盛，法盛亦爾。

寅三、應為<sup>2</sup> 卯一、作自財盛令財盛等

又諸菩薩作自財盛，令他財盛，此則應為。如令財盛，法盛亦爾。

卯二、作自法盛令財盛等

又諸菩薩作自法盛，令他財盛，此則應為。如令財盛，法盛亦爾。

丑三、辨罪無罪

於如是事，若不修行，名為有罪；若正修行，是名無罪。

壬二、總顯<sup>2</sup> 癸一、結前

如是且說菩薩所受三種律儀略毗奈耶，菩薩於中常應作意思惟修學。

癸二、正釋<sup>3</sup> 子一、明非護等<sup>2</sup> 丑一、總標非護

若有於此三種所受菩薩戒中，隨有所闕，當知非護，當言不護菩薩律儀，不當言護。

丑二、辨護不護<sup>2</sup> 寅一、總辨三戒<sup>2</sup> 卯一、能護

此三種戒，由律儀戒之所攝持，令其和合。若能於此精勤守護，亦能精勤守護餘二。

卯二、非護

若有於此不能守護，亦於餘二不能守護。是故若有毀律儀戒，名毀一切菩薩律儀。

寅二、廣後二戒<sup>2</sup> 卯一、非護

若有為令他了知故，隨順他故，由他勸導受菩薩戒，非自所起增上意樂、隨觀隨察自生淨信、於諸有情住憐愍心、愛樂善法受菩薩戒，當言此非真實防護，亦非圓滿修習善法，亦不能得彼果勝利。

卯二、例護

與此相違，當知乃名真實防護，亦能獲得彼果勝利。

於諸有情住憐愍心等者：義顯饒益有情、攝受善法二種戒相應知。

子二、明不捨等<sup>2</sup> 丑一、標不捨相

復次，若有不捨如是律儀，當知餘生亦得隨轉，非彼捨者。

丑二、釋捨受緣<sup>2</sup> 寅一、捨因緣<sup>3</sup> 卯一、標

又捨因緣略有四種。

卯二、列

一者、決定發起受心不同分心；

決定發起受心不同分心者：初受戒時，善淨意樂，是名受心。與彼相違，

是名不同分心。

二者、若於有所識別大丈夫前，故意發起棄捨語言；三者、總別毀犯四種他所勝法；四者、若以增上品纏，總別毀犯隨順四種他所勝法。

卯三、結

由此因緣，當知棄捨菩薩律儀。

寅二、還受緣

若有還得清淨受心，復應還受。

子三、明無罪等<sup>3</sup>

丑一、於求長物<sup>2</sup>

寅一、施無罪

復次，若有出家菩薩，除三衣外所有長物，佛所聽畜，身所受用順安樂住，若故思擇施來求者，當知無罪。

寅二、不施無罪

若顧善品，非慳貪障而不施者，亦無有罪。

丑二、於求葉紙<sup>3</sup>

寅一、已書正法<sup>2</sup>

卯一、施有罪

諸有葉紙已書正法，有嬰兒慧眾生來乞，若施與之，當知有罪；若勸他施，亦名有罪。

卯二、施無罪

除作是心：我今惠彼，欲試其人於甚深法堪受持不？能信解不？如是無罪。

寅二、書似正法<sup>2</sup> 卯一、授與有罪

若以葉紙書似正法及外道論，或先已書，授彼信解眾生手中，或勸他與，當知有罪。

授彼信解眾生手中者：謂若眾生於似正法及外道論能解了者，名彼信解眾生。於此授與，當知有罪。

卯二、出所應作

菩薩唯應勸彼棄捨手中異論，或令書寫諸佛聖教，或自欲知彼不堅實，不應開示。

或自欲知彼不堅實等者：此中義顯，若以葉紙書寫彼似正法及外道論，為

欲自知義不堅實，當知無罪，然復不應開示於他。

寅三、猶未書寫<sup>2</sup>

卯一、應問彼用<sup>2</sup>

辰一、不與轉賣

或有葉紙猶未書寫，有來求乞，爾時菩薩應問彼言：汝今何用如是物為？彼若答言：我欲轉賣以充食用。若此葉紙為書正法，則不應與。有財物者，應施價直；若無價直，二俱不與，亦無有罪。

辰二、與書正法

彼若答言：我求此物為書正法。即以葉紙應施與之，仍告彼言：隨意受用。

卯二、應觀彼欲<sup>2</sup>

辰一、不與無罪

彼若欲書下劣典籍，不與無罪。如書下劣，書等亦爾。

辰二、不與有罪

若欲書寫最勝經典，不施與者，當知有罪。

彼若欲書下劣典籍藉等者：此中典籍，略有三別。一、劣，二、等，三、勝。欲書劣、等，不與無罪。欲書最勝，不與有罪。

丑三、於諸有情<sup>3</sup> 寅一、有恩所

若諸菩薩，於己有恩諸有情所，隨順恩想，相續發起親友意樂，以有染心，方便攝受欲為朋黨，當知有罪。

寅二、有怨所

或於有怨諸有情所，隨順怨想，相續發起怨讎意樂，有穢濁心，當知有罪。

寅三、中庸所<sup>2</sup> 卯一、放捨有罪

或於無恩無怨諸有情所，相續發起中庸意樂、放捨意樂，當知有罪。

卯二、攝益無罪<sup>2</sup> 辰一、舉出家<sup>2</sup> 巳一、不度出家

若有現前求欲出家，隨順觀察時有過患、劫有過患，不度出家，當知無罪。

巳二、度出家

若有安住憐愍彼心，雖度出家，亦無有罪。

辰二、例受戒等

如說出家，受具足戒、與作依止、攝為徒眾，當知亦爾。

辛三、結

由如是等所有行相，當知菩薩三種戒蘊皆得圓滿。

己二、略說六度<sup>2</sup> 庚一、結前生後

復次，先已廣說施等，

先已廣說施等者：本地分中，施品乃至慧品廣說其相應知。

今當略說。

庚二、別釋其相<sup>2</sup> 辛一、功德<sup>2</sup> 壬一、名到彼岸<sup>2</sup> 癸一、標列

謂諸菩薩所有布施，略與五種功德相應，得入布施到彼岸數。何等為五？一者、無著，二者、無戀，三者、無罪，四、無分別，五者、迴向。如施，戒等當知亦爾。

癸二、隨釋<sup>5</sup> 子一、無著

無著者，謂於一切種施等障法中，無有罣礙。

於一切種施等障法者：如前施品乃至慧品，各別說有一切種相，如是名一



切種施等。能障彼者，名彼障法。

子二、無戀

無戀者，謂於有染及彼果中，心無繫著。

子三、無罪

無罪者，謂遠離一切種施等隨煩惱。

子四、無分別

無分別者，謂於施等不觀遍計所執自性。

子五、迴向

迴向者，謂以一切施等諸行，願得阿耨多羅三藐三菩提果。

一切施等諸行者：此中一切施相乃至一切慧相，如前施品乃至慧品已說其相應知。

壬二、攝受九相

如是菩薩由此五德，攝受一切波羅蜜多，名菩薩施，乃至名菩薩慧；名一切

施，乃至名一切慧；名艱難施，乃至名艱難慧。廣說一切嘔陀南頌，皆隨決了，一切皆如本地分說。

廣說一切嘔陀南頌等者：本地分中，六種波羅蜜多嘔陀南頌，各有九相，今於此中且舉前三，略不說餘，如彼廣說，皆應決了。

辛二、清淨<sup>6</sup> 壬一、施<sup>2</sup> 癸一、標指十種

復次，於施波羅蜜多，由內及外有十隨煩惱，

由內及外有十隨煩惱者：菩薩施物略有二種，謂內及外。以自內身施來求者，是名內所施物；以外施物施諸眾生，是名外所施物。義如本地分說。

（陵本三十九卷二頁<sup>3182</sup>）由是此說依內及外有十隨煩惱。

對治彼故，得施波羅蜜多十種清淨。如菩薩地已說，由增一次第。

如菩薩地已說等者：本地分說：菩薩清淨施有十種相。一、不留滯施，二、不執取施，三、不積聚施，四、不高舉施，五、無所依施，六、不退弱施，七、不下劣施，八、不向背施，九、不望報恩施，十、不希異熟

施。（陵本三十九卷十八頁<sup>3230</sup>）如是十種，本地分中，從初自性施乃至此清淨施，一一分數漸次而說，名由增一次第。

癸二、別列隨惑<sup>2</sup> 子一、依外

依於外門有五隨煩惱。一、遍染惱性，二、不棄捨性，三、持可樂性，四、意望不圓滿性，五、不成熟性。

依於外門有五隨煩惱等者：於外門中，對治遍染惱性故，得無所依施清淨相，不為世間稱頌聲譽遍染惱故。對治不棄捨性故，得不執取施清淨相。對治持可樂性故，得不積聚施清淨相。對治意望不圓滿性故，得不高舉施清淨相。對治不成熟性故，得不留滯施清淨相。由於惠施先未串習，名不成熟；心不趣入，是故留滯。

子二、依內

依於內門有五隨煩惱。一、不出離性，二、雜染惱性，三、下劣薄性，四、現前墮性，五、盡滅法性。

依於內門有五隨煩惱等者：於內門中，對治不出離性故，得不退弱施清淨相。對治雜染惱性故，得不向背施清淨相。對治下劣薄性故，得不下劣施清淨相。對治現前墮性故，得不望報恩施清淨相。對治盡滅法性故，得不希異熟施清淨相。

壬二、戒<sup>2</sup> 癸一、指釋清淨

復次，前戒品中，已說十種尸羅清淨，當知初一是意樂清淨，餘九是加行清淨。

癸二、別廣加行<sup>3</sup> 子一、標

於加行中復有五種。

子二、列

一、無間闕加行，二、遍修治加行，三、迴向加行，四、助伴加行，五、守護加行。

子三、配

第二、第三為初加行，第四為第二加行，第五為第三加行，第六、第七、第八、第九為第四加行，第十為第五加行。

第二第三為初加行等者：謂第二不太沈戒、不太舉戒，第三離懈怠戒，為無間闕加行。第四離諸放逸所攝受戒，為遍修治加行。第五正願戒，為迴向加行。第六軌則具足所攝受戒，第七淨命具足所攝受戒，第八離二邊戒，第九永出離戒，為助伴加行。第十於先所受無損失戒，為守護加行。

壬三、忍<sup>2</sup> 癸一、指釋

復次，忍波羅蜜多十清淨中，當知略有二種清淨。謂前九種，名思擇力清淨；其第十種，名修習力清淨。

癸二、別廣<sup>2</sup> 子一、思擇力<sup>3</sup> 丑一、標

思擇力清淨復有四種。

丑二、列

一、遠離罪生清淨，二、彼不現行清淨，三、無罪生清淨，四、遠離彼因緣

清淨。

丑三、配

一種、二種、三種、三種，如其次第。

子二、不忍因緣

不忍因緣復有三種。一、無慚，二、無愧，三、無哀愍性。

一種二種等者：謂不反報一種，為遠離罪生清淨。不意憤及無怨嫌二種，為彼不現行清淨。恆作饒益、悔謝有怨、速受他謝三種，為無罪生清淨。成就慚愧、成就愛敬、成就哀愍三種，為遠離彼因緣清淨。

壬四、精進

復次，精進波羅蜜多有十清淨。一、安處清淨，二、純熟清淨，三、策發清淨，四、方便清淨，五、不虛時住清淨，六、不艱辛住清淨，七、出離清淨，八、攝受助伴清淨，九、速疾神通清淨，十、無盡性清淨。

精進波羅蜜多有十清淨等者：此十清淨，如次配屬十種精進。謂相稱精

進、串習精進、無緩精進、善攝精進、應時修習精進、通達眾相精進、不退弱精進、不捨軛精進、平等精進、迴向大菩提精進。本地分中別釋其相應知。（陵本四十二卷十九頁<sup>3475</sup>）

壬五、靜慮

復次，靜慮波羅蜜多有十清淨。一、清淨清淨，二、無漏清淨，三、根本方便清淨，四、證得根本清淨，五、自在方便清淨，六、住自在清淨，七、引發神通自在清淨，八、成熟有情自在清淨，九、降伏外道自在清淨，十、無上離繫清淨。

靜慮波羅蜜多有十清淨等者：本地分中說有十種靜慮。（陵本四十三卷四頁<sup>3490</sup>）如次配屬應知。彼說：第七、捨靜慮已，復還證入自在淨，清淨靜慮。即此第七、引發神通自在清淨。謂由證入自在，堪能引發神通故。彼說：第八、神通變現自在淨，清淨靜慮。即此第八、成熟有情自在清淨。謂由神通變現自在，堪能自在調伏有情故。餘如文知。

壬六、慧

復次，慧波羅蜜多有五清淨。一、通達諸相清淨，二、通達緣起清淨，三、通達教導清淨，四、通達士用清淨，五、通達證得清淨。

慧波羅蜜多有五清淨等者：本地分說：菩薩五義十種差別淨慧。（陵本四十三卷八頁<sup>3502</sup>）此五清淨，如次配屬於五義中諸所有慧應知。言五義者，謂真實義、流轉義、執受義、方便義、究竟義。

戊十、菩提分品<sup>2</sup> 己一、釋菩提分<sup>2</sup> 庚一、觀四真如<sup>2</sup> 辛一、於念住<sup>2</sup> 壬一、舉身

復次，云何菩薩於身住循身觀？謂於相身循環觀真如身。

壬二、例受等

如於身，於受、心、法，隨其所應，當知亦爾。

辛二、於正斷<sup>2</sup> 壬一、舉初

云何菩薩為令未生惡不善法得不生故生欲，乃至廣說？謂於真如境繫心令住，為令一切相及麤重未得現前，內未生者得不生故生欲，乃至廣說。



於真如境繫心令住者：謂於身、受、心、法，思惟觀察不淨，及苦、無常、無我故。

壬二、例餘

如令未生得不生故，如是已生已得現前，於內生者為令斷故，於能對治所有善法，未生令生、已生令住，乃至廣說。

庚二、明修次第

當知此中，於念住位，最初繫心置所緣境；次於所緣令心安住，勤修正斷；次得定已，復令此定善圓滿故，於神足中勤修加行；定圓滿已，為令一切相及麤重得離繫故，依信等根修加行道，加行道中，根是下品，力是上品；如是正修加行道已，次得覺支通達實際；達實際已，次修道支；漸漸乃至證得阿耨多羅三藐三菩提，於一切障皆得解脫。

己二、廣辨諸縛<sup>2</sup>

庚一、相麤重縛<sup>2</sup>

辛一、標

復次，相麤重縛，

相羴重縛者：一切愚夫於諸相中，名言所縛故，當知如名如言，於所詮事妄執自性，此由遍計所執自性覺悟執生，是名相縛。若彼遍計所執自性隨眠，名羴重縛。

當知差別有十四種。

辛二、列

一、根縛。二、境縛。三、有情展轉更相愛縛。四、建立縛，謂器世間；諸所有根依之而轉，故名建立。五、於所知境無智縛。六、於能知智無智縛。七、後有愛縛。八、無有愛縛。九、執著不平等因及無因縛。十、證得增上慢縛。十一、執著遍計所執自性縛。十二、執著補特伽羅自性縛。十三、補特伽羅遍知增上慢縛。十四、法遍知增上慢縛。

庚二、想縛<sup>2</sup>

辛一、六種<sup>3</sup>

壬一、標

復次，依空勤修念住菩薩，略於六種妄想縛中，當令其心速得解脫。

壬二、徵

云何名為六種想縛？

壬三、釋<sup>6</sup> 癸一、初想縛

所謂於身乃至於法發起內想，是初想縛。

癸二、第二想縛

即於是中發起外想，是第二想縛。

癸三、第三想縛

即於是中起內外想，是第三想縛。

於身乃至於法發起內想等者：此說境相應想。於內、於外及於內外諸差別義，本地分中聲聞地廣釋其相應知。（陵本二十八卷二十頁<sup>2395</sup>）

癸四、第四想縛

若於十方無數無量諸有情界，願令解脫，修習念住；此中諸想，是第四想縛。

願令解脫修習念住等者：此說念相應想應知。

癸五、第五想縛

若由此故，於身等境循觀而住；此中諸想，是第五想縛。

若由此故等者：謂由念故，能執持慧，於身等境循觀而住。此中諸想，謂慧相應想應知。

癸六、第六想縛

即於身等循觀住者；此中諸想，是第六想縛。

即於身等循觀住者等者：此說補特伽羅相應想應知。

辛二、十一種<sup>4</sup> 壬一、標

即於此中循環觀故，復有十一後後想縛。

壬二、徵

云何十一後後想縛？

壬三、釋<sup>11</sup> 癸一、初縛

謂於身等住循身等觀者，於諸雜染、清淨諦中，所起第一義想，是名初縛。

癸二、第二縛

即於雜染第一義中，所起造作想，是第二縛。

癸三、第三縛

即於清淨第一義中，所起無造作想，是第三縛。

癸四、第四縛

即於無造作第一義中，所起常想，是第四縛。

癸五、第五縛

即於造作雜染中，所起流轉想，是第五縛。

癸六、第六縛

即於常中，所起無變異想，是第六縛。

癸七、第七縛

即於流轉中，由有苦、有變異故，所起苦性想，是第七縛。

癸八、第八縛

即於此中，由生滅住異自相故，自相有變異故，所起彼自相想，是第八縛。

癸九、第九縛

即於無變異及有變異第一義中，所起能攝染汙、清淨一切法想，是第九縛。

癸十、第十縛

即於雜染、清淨一切法中，所有我無染淨想，是第十縛。

癸十一、第十一縛

即於雜染、清淨諸法，所起無自性相想，是第十一縛。

壬四、結

由諸菩薩，於此後後諸行想縛所知境界正觀察故，能依於空善修念住，令心解脫；於此想縛得解脫故，一切想縛皆得解脫。

戊十一、功德品<sup>2</sup>

己一、正廣決擇<sup>2</sup>

庚一、辨眾義<sup>4</sup>

辛一、二諦建立<sup>3</sup>

壬一、舉

彼說

復次，於大乘中，或有一類惡取空故，作如是言：由世俗故，一切皆有；由勝義故，一切皆無。

壬二、問彼義

應告彼言：長老！何者世俗？何者勝義？如是問已，彼若答言：若一切法皆無自性，是名勝義。若於諸法無自性中，自性可得，是名世俗。何以故？無所有中建立世俗，假設名言而起說故。

壬三、隨難破<sup>2</sup> 癸一、難世俗有<sup>2</sup> 子一、徵

應告彼曰：汝何所欲？名言世俗為從因有自性可得？為唯名言世俗說有？

子二、難

若名言世俗從因有者，名言世俗從因而生而非是有，不應道理。若唯名言世俗說有，名言世俗無事而有，不應道理。

癸二、難勝義無<sup>2</sup> 子一、問定

又應告言：長老！何緣諸可得者，此無自性？如是問已，彼若答言：顛倒事故。

子二、徵難<sup>2</sup> 丑一、徵

復應告言：汝何所欲？此顛倒事為有為無？若言有者，說一切法由勝義故，皆無自性，不應道理。

丑二、難

若言無者，顛倒事故，諸可得者，此無自性，不應道理。

辛二、大乘建立<sup>2</sup> 壬一、標

復次，當知由五相故，思擇大乘經起因緣說。

壬二、列

謂為於說者生恭敬故，起第一說；為攝眾故，起第二說；為於正法生尊重故，起第三說；為敘事故，起第四說；為欲宣說真實義故，及多所作故，起第五說。

由五相故思擇大乘經起因緣說等者：謂大乘經是如來說，應由五相思擇大乘起說因緣。要成佛已能說佛教，非未成佛，是為說大乘經第一因緣，由是此說為於說者生恭敬故。餘乘要以大乘為其根本，是為說大乘經第二因



緣，由是此說為攝眾故。大乘正法離言所顯，非諸尋伺境界，是為說大乘經第三因緣，由是此說為於正法生尊重故。如來過去生中，有其種種難行苦行，是為說大乘經第四因緣，由是此說為敘事故。於大乘經，不應如言取義，緣此為境，如理思惟，能為對治一切煩惱，成辦有情諸義利事，是為說大乘經第五因緣，由是此說為欲宣說真實義故，及多所作故。

辛三、四尋思四如實智<sup>2</sup> 壬一、標

復次，依十二處自相、共相觀故，有十種無顛倒道，能證所有不共佛法。當知此中，六種觀自相，四種觀共相。

壬二、釋<sup>2</sup> 癸一、觀自相<sup>2</sup> 子一、釋<sup>3</sup> 丑一、名尋思攝

謂於十二處眼等名言假立相中，能遍了知唯名言相，是名第一無顛倒道，能證所有不共佛法。

能遍了知唯名言相等者：四尋思中名尋思攝。謂諸菩薩，於名唯見名故。

丑二、事尋思攝<sup>4</sup> 寅一、攝受生相

復次，於十二處能遍了知攝受虛妄分別種種生相，是名第二無顛倒道，能證所有不共佛法。

寅二、依因轉相

復次，於十二處能遍了知依因轉相，是名第三無顛倒道，能證所有不共佛法。

寅三、相壞轉相

復次，於十二處能遍了知相壞轉相，是名第四無顛倒道，能證所有不共佛法。

寅四、清淨轉相

<sup>2</sup> 卯一、標

復次，於十二處能遍了知清淨轉相，是名第五無顛倒道，能證所有不共佛法。

攝受虛妄分別種種生相等者：自下事尋思攝。謂諸菩薩，於事唯見事故。此有四別，一、攝受虛妄分別種種生相，二、依因轉相，三、相壞轉相，四、清淨轉相。如文自說。三界心心所法種種生起，由根及境為攝受因，由是故說攝受虛妄分別種種生相。根以業為依因，境以根為依因，由是故說依因轉相。根、境諸行剎那生滅，滅壞無常，由是故說相壞轉相。轉所

依時，轉捨雜染，轉得清淨，由是故說清淨轉相。

卯二、釋

當知此中，依二種業有二清淨。一、生起清淨，二、寂滅清淨。

丑三、自性差別假立尋思攝

復次，於十二處能遍了知所有名言安足處相，是名第六無顛倒道，能證所有不共佛法。

能遍了知所有名言安足處相者：當知此即自性、差別假立尋思所攝。謂諸菩薩，於自性假立唯見自性假立，於差別假立唯見差別假立故。

子二、結

如是六種觀察自相。

癸二、觀共相<sup>2</sup> 子一、釋<sup>4</sup> 丑一、名尋思所引如實智攝

復次，即於如是十二處中，能遍了知共相自性，是名第七無顛倒道，能證所有不共佛法。

能遍了知共相自性者：四如實智中，名尋思所引如實智攝。謂諸菩薩，於名尋思唯有名已，即於此名如實了知。於十二處不執其名，能遍了知一切法無我共相自性故。

丑二、事尋思所引如實智攝

復次，即於如是十二處中，能遍了知共相無分別所行相，是名第八無顛倒道，能證所有不共佛法。

能遍了知共相無分別所行相者：事尋思所引如實智攝。謂諸菩薩，於事尋思唯有事已，觀見一切色等想事性離言說，不可言說。於十二處，能遍了知一切法無我共相性，無分別為所行相故。

丑三、自性假立尋思所引如實智攝

復次，即於如是十二處中，能遍了知共相出世法所行相，是名第九無顛倒道，能證所有不共佛法。

能遍了知共相出世法所行相者：自性假立尋思所引如實智攝。謂諸菩薩，

於自性假立尋思唯有自性假立已，如實通達了知色等想事中，所有自性假立非彼事自性，而似彼事自性顯現。於十二處，能遍了知一切法無我共相，唯出世法所行相故。

丑四、差別假立尋思所引如實智攝

復次，即於如是十二處中，能遍了知共相清淨因相，是名第十無顛倒道，能證所有不共佛法。

能遍了知共相清淨因相者：差別假立尋思所引如實智攝。謂諸菩薩，於差別假立尋思唯有差別假立已，如實通達了知色等想事中，差別假立不二之義。於十二處，了知一切法無我共相，能為證得清淨因故。

子二、結

如是四種觀察共相。

辛四、殊勝<sup>2</sup> 壬一、標

復次，當知由八殊勝，於諸住地後後轉勝。

壬二、列

一、意樂殊勝，二、心清淨殊勝，三、悲殊勝，四、波羅蜜多殊勝，五、成熟有情殊勝，六、見諸佛往趣承事供養殊勝，七、生殊勝，八、神力殊勝。

庚二、舉經說<sup>7</sup>

辛一、勝義諦相<sup>3</sup>

壬一、標

復次，勝義諦有五種相。

壬二、列

一、離名言相，二、無二相，三、超過尋思所行相，四、超過諸法一異性相，五、遍一切一味相。

壬三、釋<sup>4</sup>

癸一、離名言相及無二相<sup>2</sup>

子一、如理請問菩薩問

此勝義諦離名言相及無二相，當知如解深密經中，如理請問菩薩問解甚深義密意菩薩言：最勝子！言一切法無二。一切法無二者，何等一切法？云何為無二？

子二、解甚深密意菩薩答<sup>2</sup>

丑一、長行<sup>3</sup>

寅一、標

解甚深義密意菩薩告如理請問菩薩曰：善男子！一切法者略有二種，一者、有為，二者、無為。是有為非有為、非無為，無為亦非無為、非有為。是中有為非有為非無為等者：有為、無為非無有事，由是故說攝一切法。然事自性不可言說，由是故說有為非有為、非無為，無為亦非無為、非有為。

寅二、徵

最勝子！如何有為非有為、非無為，無為亦非無為、非有為？

寅三、釋<sup>2</sup> 卯一、正顯<sup>2</sup> 辰一、有為<sup>2</sup> 巳一、墮言辭說<sup>3</sup> 午一、非有為

善男子！言有為者，乃是本師假施設句。若是本師假施設句，即是遍計所集言辭所說；若是遍計所集言辭所說，即是究竟；種種遍計言辭所說不成實故，非是有為。

若是遍計所集言辭所說即是究竟等者：義顯遍計所集言辭所說，唯是方便，而非究竟。由假施設不成實故，由是當知非是實有為性。

午二、非無為

善男子！言無為者，亦墮言辭。

午三、非所餘

設離有為、無為，少有所說，其相亦爾。

巳二、離言法性<sup>3</sup> 午一、標

然非無事而有所說。

午二、徵

何等為事？

午三、釋

謂諸聖者，以聖智、聖見離名言故，現等正覺。即於如是離言法性，為欲令他現等覺故，假立名想，謂之有為。

辰二、無為<sup>2</sup> 巳一、墮言辭說<sup>3</sup> 午一、非無為

善男子！言無為者，亦是本師假施設句。若是本師假施設句，即是遍計所集



言辭所說；若是遍計所集言辭所說，即是究竟；種種遍計言辭所說不成實故，非是無為。

午二、非有為

善男子！言有為者，亦墮言辭。

午三、非所餘

設離無為、有為，少有所說，其相亦爾。

巳二、離言法性<sup>3</sup> 午一、標

然非無事而有所說。

午二、徵

何等為事？

午三、釋

謂諸聖者，以聖智、聖見離名言故，現等正覺。即於如是離言法性，為欲令他現等覺故，假立名想，謂之無為。

卯二、喻成<sup>3</sup> 辰一、徵起

最勝子！如何此事彼諸聖者，以聖智、聖見離名言故，現等正覺。即於如是離言法性，為欲令他現等覺故，假立名想，或謂有為、或謂無為？

辰二、譬喻<sup>2</sup> 巳一、舉幻化事

善男子！如善幻師、或彼弟子，住四衢道，積集瓦礫草葉木等，現作種種幻化事業，所謂象身、馬身、車身、步身、末尼、真珠、琉璃、螺貝、璧玉、珊瑚、種種財穀庫藏等身。

巳二、說見聞者<sup>2</sup> 午一、惡慧種類<sup>2</sup> 未一、辨彼相

若諸眾生愚癡、頑鈍、惡慧種類，無所曉知，於瓦礫草葉木等上諸幻化事，見已、聞已，作如是念：此所見者，實有象身，實有馬身、車身、步身、末尼、真珠、琉璃、螺貝、璧玉、珊瑚、種種財穀庫藏等身。如其所見、如其所聞堅固執著，隨起言說：唯此諦實，餘皆愚妄。

未二、斥彼非

彼於後時，應更觀察。

彼於後時應更觀察者：以於幻事如所見聞堅固執著，不稱實故。

午二、善慧種類<sup>2</sup> 未一、辨彼相

若有眾生非愚、非鈍、善慧種類，有所曉知，於瓦礫草葉木等上諸幻化事，見已、聞已，作如是念：此所見者，無實象身，無實馬身、車身、步身、末尼、真珠、琉璃、螺貝、璧玉、珊瑚、種種財穀庫藏等身。然有幻狀迷惑眼事，於中發起大象身想，或大象身差別之想；乃至發起種種財穀庫藏等想，或彼種類差別之想。不如所見、不如所聞堅固執著，隨起言說：唯此諦實，餘皆愚妄。為欲表知如是義故，亦於此中隨起言說。

未二、顯彼正

彼於後時，不須觀察。

彼於後時不須觀察者：以於幻事不如見聞堅固執著，如實知故。

辰三、合法<sup>2</sup> 巳一、異生<sup>2</sup> 午一、辨彼相

如是有眾生是愚夫類，是異生類，未得諸聖出世間慧，於一切法離言法性不能了知，彼於一切有為、無為，見已、聞已，作如是念：此所得者決定實有有為、無為。如其所見、如其所聞堅固執著，隨起言說：唯此諦實，餘皆癡妄。

午二、斥彼非

彼於後時，應更觀察。

已二、聖者<sup>3</sup> 午一、辨彼相

若有眾生非愚夫類，已見聖諦，已得諸聖出世間慧，於一切法離言法性如實了知，彼於一切有為、無為，見已、聞已，作如是念：此所得者決定無實有為、無為，然有分別所起行相，猶如幻事迷惑覺慧，於中發起為無為想，或為無為差別之想。不如所見、不如所聞堅固執著，隨起言說：唯此諦實，餘皆癡妄。為欲表知如是義故，亦於此中隨起言說。

午二、顯彼正

彼於後時，不須觀察。

午三、成前說

如是善男子！彼諸聖者於此事中，以聖智、聖見離名言故，現等正覺。即於是離言法性，為欲令他現等覺故，假立名想，謂之有為、謂之無為。

丑二、重頌

爾時解甚深義密意菩薩欲重宣此義而說頌曰：

佛說離言無二義 甚深非愚之所行

愚夫於此癡所惑 樂著二依言戲論

彼或不定或邪定 流轉極長生死苦

復違如是正智論 當生牛羊等類中

佛說離言無二義者：此頌前說一切法無二，謂有為法，非墮言辭所說有為、無為故；無為法，亦非墮言辭所說無為、有為故。

樂著二依言戲論者：謂於一切有為、無為，如所見聞堅固執著名言相故。

彼或不定或邪定者：謂彼愚夫，或墮不定聚定，或墮邪性聚定故。

癸二、超過尋思所行相<sup>2</sup>

子一、法涌白佛<sup>2</sup>

丑一、舉他諍論

復次，勝義諦超過尋思所行相，當知如解深密經中，法涌菩薩白佛言：世尊！從此東方，過七十二殑伽河沙等世界，有世界名具大名稱，是中如來號廣大名稱。我於先日，從彼佛土發來至此。我於彼佛土，曾見一處，有七萬七千外道，并其師首同一會坐，為思諸法勝義諦相。彼共思議、稱量、觀察、遍推求時，於一切法勝義諦相竟不能得，唯除種種意解、別異意解、變異意解，互相違背，共興諍論，口出矛疇，更相疇己、刺己、惱己、壞己，各各離散。

唯除種種意解等者：謂諸外道，為性尋思，為性觀察，住尋伺地，住自辦地，住異生地，住隨思惟觀察行地，由是故有十六異論差別，是名種種意解。如彼計我論者，或計我是色，或計我非色，或計我亦是色亦非色，是名別異意解。又或計我非色非非色，彼為對治計我亦是色亦非色，由異句

異文而起執故，是名變異意解。如計我是色非色等，有別異意解、變異意解可得，如是於餘一切，皆應準知。

丑二、述自作念

世尊！我於爾時竊作是念：如來出世甚奇希有，由出世故，乃於如是超過一切尋思所行勝義諦相，亦有通達作證可得。

子二、佛告法涌<sup>2</sup> 丑一、長行<sup>2</sup> 寅一、印可彼說

說是語已，爾時世尊告法涌菩薩曰：善男子！如是如是！如汝所說，我於超過一切尋思勝義諦相現等正覺；現等覺已，為他宣說、顯現、開解、施設、照了。

為他宣說等者：攝異門分說：宣說者，謂因他請問而為記別。施設者，謂由語及欲，次第編列名句文身。開示者，謂他展轉所生疑惑皆能除遣。顯發者，謂自通達甚深義句，為他顯示。（陵本八十三卷十二頁<sup>6311</sup>）此中諸相，隨應準知。言照了者，謂由言說能顯實義故。

寅二、釋其所以<sup>2</sup> 卯一、正顯<sup>5</sup> 辰一、由內自證

何以故？我說勝義，是諸聖者內自所證；尋思所行，是諸異生展轉所證。是故法涌！由此道理，當知勝義超過一切尋思境相。

是諸異生展轉所證者：謂所行相不離名言而轉，名所攝受，共所了知故。  
攝釋分說：名身者，謂共知增語。（陵本八十一卷一頁<sup>6165</sup>）由是此說異生展轉所證。

辰二、由無相所行

復次，法涌！我說勝義無相所行，尋思但行有相境界，是故法涌！由此道理，當知勝義超過一切尋思境相。

我說勝義無相所行者：謂勝義諦，唯是離言聖智、聖見所行境界故。

辰三、由不可說

復次，法涌！我說勝義不可言說，尋思但行言說境界，是故法涌！由此道理，當知勝義超過一切尋思境相。



辰四、由絕表示

復次，法涌！我說勝義絕諸表示，尋思但行表示境界，是故法涌！由此道理，當知勝義超過一切尋思境相。

我說勝義絕諸表示者：謂勝義諦，非諸見、聞、覺、知所可表示故。

辰五、由絕諍論

復次，法涌！我說勝義絕諸諍論，尋思但行諍論境界，是故法涌！由此道理，當知勝義超過一切尋思境相。

我說勝義絕諸諍論者：謂勝義諦，無我所、無攝受，不為諍論安足處故。

卯二、喻成<sup>2</sup> 辰一、引喻<sup>5</sup> 巳一、蜜石蜜味喻

法涌當知！譬如有人，盡其壽量習辛苦味，於蜜石蜜上妙美味，不能尋思、不能比度、不能信解。

巳二、妙遠離樂喻

或於長夜由欲貪勝解，諸欲熾火所燒然故，於內除滅一切色聲香味觸相妙遠

離樂，不能尋思、不能比度、不能信解。

已三、聖默然樂喻

或於長夜由言說勝解，樂著世間綺言說故，於內寂靜聖默然樂，不能尋思、不能比度、不能信解。

已四、究竟涅槃樂喻

或於長夜由見、聞、覺、知表示勝解，樂著世間諸表示故，於永除斷一切表示薩迦耶滅究竟涅槃，不能尋思、不能比度、不能信解。

已五、無我所等喻

法涌當知！譬如有人，於其長夜由有種種我所攝受諍論勝解，樂著世間諸諍論故，於北拘盧洲無我所、無攝受、離諍論，不能尋思、不能比度、不能信解。

辰二、合法

如是法涌！諸尋思者，於超一切尋思所行勝義諦相，不能尋思、不能比度、

不能信解。

法涌當知等者：此中五喻，如次喻顯前說五種勝義諦相。謂由蜜石蜜味喻，顯勝義諦內自所證。由妙遠離樂喻，顯勝義諦無相所行。由聖默然樂喻，顯勝義諦不可言說。由究竟涅槃喻，顯勝義諦絕諸表示。由無我所等喻，顯勝義諦絕諸諍論。

丑二、重頌

爾時世尊欲重宣此義而說頌曰：

內證無相之所行 不可言說絕表示

息諸諍論勝義諦 超過一切尋思相

癸三、超過諸法一異性相<sup>2</sup> 子一、善清淨慧白佛<sup>3</sup> 丑一、讚佛善說

復次，勝義諦超過諸法一異性相，當知如解深密經中，善清淨慧菩薩白佛言：世尊甚奇！乃至世尊善說！如世尊言：勝義諦相微細甚深，超過諸法一異性相，難可通達。

丑二、舉他諍論<sup>2</sup> 寅一、出眾會

世尊！我即於此，曾見一處有眾菩薩，等正修行勝解行地，同一會坐，皆共思議勝義諦相與諸行相一異性相。

寅二、舉異論<sup>3</sup> 卯一、或說無異

於此會中，一類菩薩作如是言：勝義諦相與諸行相都無有異。

卯二、或說有異

一類菩薩復作是言：非勝義諦相與諸行相都無有異，然勝義諦相異諸行相。

卯三、或復猶豫

有餘菩薩疑惑猶豫，復作是言：是諸菩薩誰言諦實？誰言虛妄？誰如理行？誰不如理？或唱是言：勝義諦相與諸行相都無有異。或唱是言：勝義諦相異諸行相。

丑三、述自作念

世尊！我見彼已，竊作是念：彼諸善男子愚癡頑鈍，不明、不善、不如理

行，於勝義諦微細甚深超過諸行一異性相，不能解了。

不明不善不如理行者：謂於大乘勝義諦教，義不明了，不善聽聞，不如正理作意思惟故。

子二、佛告善清淨慧<sup>2</sup>

丑一、長行<sup>3</sup>

寅一、印可彼說

說是語已，爾時世尊告善清淨慧菩薩曰：善男子！如是如是！如汝所說，彼諸善男子愚癡頑鈍，不明、不善、不如理行，於勝義諦微細甚深超過諸行一異性相，不能解了。

寅二、釋其所以<sup>3</sup>

卯一、標

何以故？善清淨慧！非於諸行如是行時，名能通達勝義諦相，或於勝義諦而得作證。

卯二、徵

何以故？

卯三、釋<sup>2</sup>

辰一、正顯<sup>3</sup>

巳一、依失壞真實方便辨<sup>2</sup>

午一、出過<sup>2</sup>

未一、斥都無異

善清淨慧！若勝義諦相與諸行相都無異者，應於今時一切異生皆已見諦。又諸異生皆應已得無上方便安隱涅槃，或應已證阿耨多羅三藐三菩提。

已得無上方便安隱涅槃等者：謂依大乘畢竟離垢，一切煩惱不隨縛故，是名已得無上方便安隱涅槃。又於一切所知無礙無障，是名已證阿耨多羅三藐三菩提。

未二、斥一向異

若勝義諦相與諸行相一向異者，已見諦者於諸行相應不除遣；若不除遣諸行相者，應於相縛不得解脫；此見諦者於諸相縛不解脫故，於麤重縛亦應不脫；由於二縛不解脫故，已見諦者應不能得無上方便安隱涅槃，或不應證阿耨多羅三藐三菩提。

午二、結非<sup>2</sup> 未一、非都無異

善清淨慧！由於今時非諸異生皆已見諦，非諸異生已能獲得無上方便安隱涅槃，亦非已證阿耨多羅三藐三菩提，是故勝義諦相與諸行相都無異相，不應

道理。若於此中作如是言：勝義諦相與諸行相都無異者。由此道理，當知一切非如理行，不如正理。

未二、非一向異

善清淨慧！由於今時非見諦者於諸行相不能除遣，然能除遣；非見諦者於諸相縛不能解脫，然能解脫；非見諦者於麤重縛不能解脫，然能解脫；以於二障能解脫故，亦能獲得無上方便安隱涅槃，或有能證阿耨多羅三藐三菩提，是故勝義諦相與諸行相一向異相，不應道理。若於此中作如是言：勝義諦相與諸行相一向異者。由此道理，當知一切非如理行，不如正理。

已二、依失壞法性辨<sup>2</sup> 午一、出過<sup>2</sup> 未一、斥都無異

復次，善清淨慧！若勝義諦相與諸行相都無異者，如諸行相墮雜染相，此勝義諦相亦應如是墮雜染相。

未二、斥一向異

善清淨慧！若勝義諦相與諸行相一向異者，應非一切行相共相名勝義諦相。

午二、結非

善清淨慧！由於今時勝義諦相非墮雜染相，諸行共相名勝義諦相，是故勝義諦相與諸行相都無異相，不應道理；勝義諦相與諸行相一向異相，不應道理。若於此中作如是言：勝義諦相與諸行相都無有異，或勝義諦相與諸行相一向異者。由此道理，當知一切非如理行，不如正理。

巳三、依失壞法相辨<sup>2</sup>

午一、出過<sup>2</sup>

未一、斥都無異

復次，善清淨慧！若勝義諦相與諸行相都無異者，如勝義諦相於諸行相無有差別，一切行相亦應如是無有差別。修觀行者，於諸行中如其所見、如其所聞、如其所覺、如其所知，不應後時更求勝義。

未二、斥一向異

若勝義諦相與諸行相一向異者，應非諸行唯無我性、唯無自性之所顯現是勝義相。又應俱時別相成立，謂雜染相及清淨相。

午二、結非



善清淨慧！由於今時一切行相皆有差別，非無差別。修觀行者，於諸行中如其所見、如其所聞、如其所覺、如其所知，復於後時更求勝義。又即諸行唯無我性、唯無自性之所顯現名勝義相，又非俱時染淨二相別相成立，是故勝義諦相與諸行相都無有異，或一向異，不應道理。若於此中作如是言：勝義諦相與諸行相都無有異，或一向異者。由此道理，當知一切非如理行，不如正理。

辰二、喻成<sup>2</sup>

巳一、引喻<sup>8</sup>

午一、螺貝色喻<sup>2</sup>

未一、舉螺貝

善清淨慧！如螺貝上鮮白色性，不易施設與彼螺貝一相、異相。

未二、例金色

如螺貝上鮮白色性，金上黃色亦復如是。

午二、筌篴聲喻

如筌篴聲上美妙曲性，不易施設與筌篴聲一相、異相。

午三、黑沈香喻

如黑沈上有妙香性，不易施設與彼黑沈一相、異相。

午四、胡椒等性喻<sup>2</sup> 未一、舉胡椒

如胡椒上辛猛利性，不易施設與彼胡椒一相、異相。

未二、例訶梨

如胡椒上辛猛利性，訶梨淡性亦復如是。

午五、蠹羅綿性喻

如蠹羅綿上有柔軟性，不易施設與蠹羅綿一相、異相。

午六、熟酥醍醐喻

如熟酥上所有醍醐，不易施設與彼熟酥一相、異相。

午七、行無常等喻

又如一切行上無常性，一切有漏法上苦性，一切法上補特伽羅無我性，不易施設與彼行等一相、異相。

午八、貪不寂靜等喻<sup>2</sup>

未一、舉貪

又如貪上不寂靜相及雜染相，不易施設此與彼貪一相、異相。

未二、例瞋等

如於貪上，於瞋、癡上，當知亦爾。

已二、合法

如是善清淨慧！勝義諦相不可施設與諸行相一相、異相。

寅三、結甚深細

善清淨慧！我於如是微細、極微細、甚深、極甚深、難通達、極難通達，超過諸法一異性相勝義諦相現正等覺。

微細極微細等者：謂勝義諦超過諸法一異性相，非尋思行，唯聖能證，是名微細、極微細。諸法自性皆絕戲論、過語言道，然由言說為依止故，方乃可取、可觀、可覺。是故當知，一切諸法甚深難見。今此勝義諦相超過尋思所行境界，不由言說可取、可觀、可覺，是故說名甚深、極甚深、難通達、極難通達。義如思所成慧地決擇中說。（陵本六十六卷十八頁<sup>5309</sup>）

現等覺已，為他宣說、顯示、開解、施設、照了。

丑二、重頌

爾時世尊欲重宣此義而說頌曰：

行相勝義相 離一異性相 若分別一異 彼非如理行  
眾生為相縛 及為麤重縛 要勤修止觀 爾乃得解脫

癸四、遍一切一味相<sup>3</sup> 子一、佛問善現

復次，勝義諦遍一切一味相，當知如解深密經中，世尊告長老善現曰：善現！汝於有情界中，知幾有情懷增上慢，為增上慢所執持故，記別所解？汝於有情界中，知幾有情離增上慢，記別所解？

子二、善現白佛<sup>2</sup> 丑一、舉他記別<sup>2</sup> 寅一、總說所知

長老善現白佛言：世尊！我知有情界中，少分有情離增上慢，記別所解。世尊！我知有情界中，有無量無數不可說有情懷增上慢，為增上慢所執持故，記別所解。

寅二、別陳所見<sup>2</sup> 卯一、總標

世尊！我於一時住阿練若大樹林中，時有眾多苾芻，亦於此林依近我住。我見彼諸苾芻，於日後分展轉聚集，依有所得現觀，各說種種相法，記別所解。

依有所得現觀者：聲聞現觀，於一切法未能證得離言法性，名有所得。

卯二、別顯<sup>6</sup> 辰一、由蘊現觀等<sup>2</sup> 巳一、舉蘊

於中一類，由得蘊故，得蘊相故，得蘊起故，得蘊盡故，得蘊滅故，得蘊滅作證故，記別所解。

巳二、例處緣起

如此一類由得蘊故，復有一類由得處故，復有一類得緣起故，當知亦爾。

辰二、由食現觀

復有一類，由得食故，得食相故，得食起故，得食盡故，得食滅故，得食滅作證故，記別所解。

由得食故等者：食謂四食。成唯識說：一者、段食，變壞為相。二者、觸食，觸境為相。三者、意思食，希望為相。四者、識食，執持為相。（成唯識論四卷一頁）是名食相。如是四食，於其後有未能斷者，能攝後有、遍攝後有、隨攝後有，是名食起。若能審正觀察四食過患；審觀為依，能於現法永斷諸食；食永斷故，得至當來後有苦際，是名食盡食滅。

辰三、由諦現觀

復有一類，由得諦故，得諦相故，得諦遍知故，得諦永斷故，得諦作證故，得諦修習故，記別所解。

辰四、由界現觀

復有一類，由得界故，得界相故，得界種種性故，得界非一性故，得界滅故，得界滅作證故，記別所解。

辰五、由念住等現觀<sup>2</sup> 已一、舉念住

復有一類，由得念住故，得念住相故，得念住能治、所治故，得念住修故，

得念住未生令生故，得念住生已堅住、不忘、倍修、增廣故，記別所解。

巳二、例正斷等

如有一類得念住故，復有一類得正斷故、得神足故、得諸根故、得諸力故、得覺支故，當知亦爾。

辰六、由八支聖道現觀

復有一類，得八支聖道故，得八支聖道相故，得八支聖道能治、所治故，得八支聖道修故，得八支聖道未生令生故，得八支聖道生已堅住、不忘、倍修、增廣故，記別所解。

丑二、述自作念<sup>3</sup> 寅一、記諸苾芻

世尊！我見彼已，竊作是念：此諸長老，依有所得現觀，各說種種相法，記別所解；當知彼諸長老，一切皆懷增上慢，為增上慢所執持故，於勝義諦遍一切一味相，不能解了。

寅二、讚佛世尊

是故世尊甚奇！乃至世尊善說！如世尊言：勝義諦相微細、最微細、甚深、最甚深、難通達、最難通達，遍一切一味相。

寅三、斥諸外道

世尊！此聖教中修行苾芻，於勝義諦遍一切一味相尚難通達，況諸外道。

子三、佛告善現<sup>2</sup>

丑一、長行<sup>2</sup>

寅一、印可彼說

爾時世尊告長老善現曰：如是如是！善現！我於微細、最微細、甚深、最甚深、難通達、最難通達，遍一切一味相勝義諦現正等覺；現等覺已，為他宣說、顯示、開解、施設、照了。

寅二、釋其所以<sup>2</sup>

卯一、正顯<sup>3</sup>

辰一、清淨所緣<sup>3</sup>

巳一、舉於一切

何以故？善現！我已顯示於一切蘊中，清淨所緣是勝義諦；我已顯示於一切處、緣起、食、諦、界、念住、正斷、神足、根、力、覺支、道支中，清淨所緣是勝義諦。

清淨所緣是勝義諦者：諸法真如，名勝義諦。唯是無漏正智境界，由此說



彼清淨所緣。

巳二、明一味相<sup>2</sup>

午一、舉一切蘊

此清淨所緣，於一切蘊中是一味相，無別異相。

午二、例餘處等

如於蘊中，如是於一切處中乃至一切道支中是一味相，無別異相。

巳三、結成遍義

是故善現！由此道理，當知勝義諦是遍一切一味相。

辰二、諸法無我<sup>3</sup>

巳一、隨一通達

復次，善現！修觀行苾芻，通達一蘊真如勝義法無我性已，更不尋求各別餘蘊、諸處、緣起、食、諦、界、念住、正斷、神足、根、力、覺支、道支真如勝義法無我性。

巳二、趣證一切

唯即隨此真如勝義無二智為依止故，於遍一切一味相勝義諦審察趣證。

已三、結成遍義

是故善現！由此道理，當知勝義諦是遍一切一味相。

辰三、簡非有為<sup>3</sup> 已一、詰非

復次，善現！如彼諸蘊展轉異相，如彼諸處、緣起、食、諦、界、念住、正斷、神足、根、力、覺支、道支展轉異相。若一切法真如勝義法無我性亦異相者，是則真如勝義法無我性亦應有因，從因所生；若從因生，應是有為；若是有為，應非勝義；若非勝義，應更尋求餘勝義諦。

已二、顯正

善現！由此真如勝義法無我性不名有因，非因所生，亦非有為，是勝義諦。得此勝義，更不尋求餘勝義諦，唯有常常時、恆恆時，如來出世，若不出世，諸法法性安立、法界安住。

諸法法性安立等者：無始時來理成就性，是名法性。如其法性安立諸法，由是說言法性安立。又此諸法以彼法性為因，性無顛倒，由此說言法界安

住。

已三、結成

是故善現！由此道理，當知勝義諦是遍一切一味相。

卯二、喻成

善現！譬如種種非一品類異相色中，虛空無相、無分別、無變異、遍一切一味相；如是異性、異相一切法中，勝義諦遍一切一味相，當知亦然。

丑二、重頌

爾時世尊欲重宣此義而說頌曰：

此遍一切一味相 勝義諸佛說無異

若有於中異分別 彼定愚癡依上慢

瑜伽師地論科句披尋記卷第七十五



瑜伽師地論科句披尋記卷第七十六

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之五

辛二、心意識相<sup>2</sup> 壬一、廣慧問佛

復次，心、意、識相，當知如解深密經中，廣慧菩薩請問佛言：如世尊說：於心、意、識祕密善巧菩薩。於心、意、識祕密善巧菩薩者，齊何名為於心、意、識祕密善巧菩薩？如來齊何施設彼為於心、意、識祕密善巧菩薩？

壬二、佛告廣慧<sup>2</sup> 癸一、長行<sup>2</sup> 子一、讚許為說

說是語已，爾時世尊告廣慧菩薩曰：善哉！善哉！廣慧！汝今乃能請問如來如是深義，汝今為欲利益安樂無量眾生，哀愍世間及諸天人、阿素洛等，為令獲得義利安樂，故發斯問。汝應諦聽！吾當為汝說心、意、識祕密義。

子二、正辨彼相<sup>2</sup>

丑一、明生起<sup>2</sup>

寅一、出心異名<sup>4</sup>

卯一、一切種子識<sup>3</sup> 辰一、

總標

廣慧當知！於六趣生死彼彼有情，墮彼彼有情眾中，或在卵生、或在胎生、或在濕生、或在化生身分生起，於中最初一切種子心識成熟，展轉和合增長廣大。

展轉和合增長廣大者：本地分說：由一切種子識功能力故，有餘微細根及大種和合而生，乃至廣說。由彼諸根及所依處具足生故，名得圓滿依止成就。（陵本一卷十九頁<sup>96</sup>）此應準釋。然彼唯說胎生，此通四生，是其差別，隨應當知。

依二執受。

辰二、別列

一者、有色諸根及所依執受，二者、相、名、分別言說戲論習氣執受。

辰三、料簡

有色界中具二執受，無色界中不具二種。

依二執受等者：五識身相應地意地決擇中說：阿賴耶識了別內執受者，謂能了別遍計所執自性妄執習氣，及諸色根根所依處。此於有色界。若在無色，唯有習氣執受了別。（陵本五十一卷四頁<sup>4072</sup>）與此義同。

卯二、阿陀那識

復次，廣慧！此識亦名阿陀那識。何以故？由此識於身隨逐執持故。

卯三、阿賴耶識

亦名阿賴耶識。何以故？由此識於身攝受藏隱同安危義故。

攝受藏隱同安危義者：阿賴耶識，先世所造業行為因，無覆無記異熟所攝，一類相續執受所依，行相微細難可了知，由是說言攝受藏隱。本地分說：羯羅藍色，與心心法安危共同，故名依託。由心心法依託力故，色不爛壞；色損益故，彼亦損益；是故說彼安危共同。（陵本一卷十九頁<sup>99</sup>）此同安危，準彼應釋。

卯四、心

亦名為心。何以故？由此識色聲香味觸等積集、滋長故。

寅二、辨識俱轉<sup>3</sup> 卯一、辨相<sup>3</sup> 辰一、標

復次，廣慧！阿陀那識為依止、為建立故，六識身轉。

辰二、列

謂眼識，耳、鼻、舌、身、意識。

辰三、辨<sup>2</sup> 巳一、俱轉

此中有識，眼及色為緣，生眼識；與眼識俱隨行，同時、同境有分別意識轉。有識，耳、鼻、舌、身及聲、香、味、觸為緣，生耳、鼻、舌、身識；與耳、鼻、舌、身識俱隨行，同時、同境有分別意識轉。

與眼識俱隨行等者：分別意識緣現在色，眼識俱轉，是名與眼識俱。或復眼識無間，意識生起，於彼色境或尋求、或決定，是名隨行。如說與眼識俱隨行，如是與餘識俱隨行，隨應當知。



已二、多少

廣慧！若於爾時一眼識轉，即於此時唯有一分別意識，與眼識同所行轉；若於爾時二、三、四、五諸識身轉，即於此時唯有一分別意識，與五識身同所行轉。

卯二、舉喻<sup>2</sup> 辰一、水浪喻

廣慧！譬如大暴水流，若有一浪生緣現前，唯一浪轉；若二、若多浪生緣現前，有多浪轉。然此暴水自類恆流，無斷無盡。

然此暴水自類恆流等者：由此喻顯阿陀那識別有自性，不同五識身或轉不轉。由阿陀那識從無始來唯先業引，恆時流轉為自性故。

辰二、鏡影喻

又如善淨鏡面，若有一影生緣現前，唯一影起；若二、若多影生緣現前，有多影起。非此鏡面轉變為影，亦無受用滅盡可得。

非此鏡面轉變為影等者：由此喻顯阿陀那識無轉變義，非彼轉變五識身

故。由彼執受五識身種，生死流轉相續不絕，是故亦無受用滅盡可得。

卯三、合法

如是廣慧！由似暴流阿陀那識為依止、為建立故，若於爾時有一眼識生緣現前，即於此時一眼識轉；若於爾時乃至有五識身生緣現前，即於此時五識身轉。

丑二、辨施設<sup>2</sup>

寅一、簡非

廣慧！如是菩薩雖由法住智為依止、為建立故，於心、意、識祕密善巧；然諸如來不齊於此施設彼為於心、意、識一切祕密善巧菩薩。

由法住智者：如佛施設開示無倒而知，名法住智。

寅二、顯正

廣慧！若諸菩薩，於內各別如實不見阿陀那，不見阿陀那識，不見阿賴耶，不見阿賴耶識，不見積集，不見心，不見眼色及眼識，不見耳聲及耳識，不見鼻香及鼻識，不見舌味及舌識，不見身觸及身識，不見意法及意識，是名

勝義善巧菩薩，如來施設彼為勝義善巧菩薩。廣慧！齊此名為於心、意、識一切祕密善巧菩薩，如來齊此施設於心、意、識一切祕密善巧菩薩。

於內各別等者：前說由法住智，此說由真實智。唯內自證，觀甚深義，是故說言如實不見阿陀那，乃至不見意法及意識，不如名言起執著故。

癸二、重頌

爾時世尊欲重宣此義而說頌曰：

阿陀那識甚深細 一切種子如暴流

我於凡愚不開演 恐彼分別執為我

辛三、一切法相 <sup>2</sup> 壬一、德本問佛

復次，一切法相，當知如解深密經中，德本菩薩請問佛言：世尊！如世尊說：於諸法相善巧菩薩。於諸法相善巧菩薩者，齊何名為於諸法相善巧菩薩？如來齊何施設彼為於諸法相善巧菩薩？

壬二、佛告德本 <sup>2</sup> 癸一、長行 <sup>2</sup> 子一、讚許為說

說是語已，爾時世尊告德本菩薩曰：善哉！善哉！德本！汝今乃能請問如來如是深義，汝今為欲利益安樂無量眾生，哀愍世間及諸天人、阿素洛等，為令獲得義利安樂，故發斯問。汝應諦聽！吾當為汝說諸法相。

子二、正辨彼相<sup>3</sup>

丑一、明諸法相<sup>2</sup>

寅一、辨相<sup>4</sup>

卯一、標

謂諸法相略有三種。

卯二、徵

何等為三？

卯三、列

一者、遍計所執相，二者、依他起相，三者、圓成實相。

卯四、釋<sup>3</sup>

辰一、遍計所執相

云何諸法遍計所執相？謂一切法名假安立自性差別，乃至為令隨起言說。

謂一切法名假安立等者：本地分說：謂如是名為如是義，於事假立，為令世間起想、起見、起言說故。若於一切色等想事，不假建立色等名者，無

有能於色等想事起色等想；若無有想，則無有能起增益執；若無有執，則無言說。（陵本三十六卷二十三頁<sup>3002</sup>）此應準知。

辰二、依他起相

云何諸法依他起相？謂一切法緣生自性，則此有故彼有，此生故彼生。謂無明緣行，乃至招集純大苦蘊。

辰三、圓成實相

云何諸法圓成實相？謂一切法平等真如。於此真如，諸菩薩眾勇猛精進為因緣故，如理作意無倒思惟為因緣故，乃能通達；於此通達漸漸修集，乃至無上正等菩提方證圓滿。

寅二、喻成<sup>2</sup> 卯一、眩翳喻<sup>3</sup> 辰一、遍計所執相

復次，德本！如眩翳人眼中所有眩翳過患，遍計所執相當知亦爾。

辰二、依他起相

如眩翳人眩翳眾相，或髮毛輪、蜂蠅、荳勝，或復青黃赤白等相差別現前，

依他起相當知亦爾。

辰三、圓成實相

如淨眼人遠離眼中眩翳過患，即此淨眼本性所行無亂境界，圓成實相當知亦爾。

卯二、頗胝迦寶喻<sup>2</sup> 辰一、舉喻<sup>4</sup> 巳一、青合

復次，德本！譬如清淨頗胝迦寶，若與青染色合，則似帝青、大青末尼寶像。由邪執取帝青、大青末尼寶故，惑亂有情。

巳二、赤合

若與赤染色合，則似琥珀末尼寶像。由邪執取琥珀末尼寶故，惑亂有情。

巳三、綠合

若與綠染色合，則似末羅羯多末尼寶像。由邪執取末羅羯多末尼寶故，惑亂有情。

巳四、黃合

若與黃染色合，則似金像。由邪執取真金像故，惑亂有情。

辰二、合法<sup>3</sup> 巳一、遍計所執相<sup>2</sup> 午一、言說習氣

如是德本！如彼清淨頗胝迦上所有染色相應，依他起相上遍計所執相言說習氣，當知亦爾。

午二、邪取執著

如彼清淨頗胝迦上所有帝青、大青、琥珀、末羅羯多、金等邪執，依他起相上遍計所執相執，當知亦爾。

巳二、依他起相

如彼清淨頗胝迦寶，依他起相當知亦爾。

巳三、圓成實相

如彼清淨頗胝迦上所有帝青、大青、琥珀、末羅羯多、真金等相，於常常時、於恆恆時，無有真實，無自性性；即依他起相上由遍計所執相，於常常時、於恆恆時，無有真實，無自性性，圓成實相當知亦爾。

丑二、明得善巧<sup>3</sup> 寅一、於所知相<sup>3</sup> 卯一、遍計所執相

復次，德本！相名相應以為緣故，遍計所執相而可了知。

卯二、依他起相

依他起相上遍計所執相執以為緣故，依他起相而可了知。

卯三、圓成實相

依他起相上遍計所執相無執以為緣故，圓成實相而可了知。

相名相應以為緣故等者：如前已說，遍計所執自性，緣於相、名相屬應知。依他起自性，緣遍計所執自性執應知。圓成實自性，緣遍計所執自性於依他起自性中畢竟不實應知。（陵本七十三卷十三頁<sup>5655</sup>）與此義同，釋如前知。

寅二、於所知法<sup>3</sup> 卯一、無相法

復次，德本！若諸菩薩能於諸法依他起相上，如實了知遍計所執相，即能如實了知一切無相之法。



卯二、雜染相法

若諸菩薩如實了知依他起相，即能如實了知一切雜染相法。

卯三、清淨相法

若諸菩薩如實了知圓成實相，即能如實了知一切清淨相法。

如實了知一切無相之法者：此中無相，謂無自相。如下說言：相無自性，所謂諸法遍計所執相。其義應知。

寅三、於所斷證

復次，德本！若諸菩薩能於依他起相上，如實了知無相之法，即能斷滅雜染相法；若能斷滅雜染相法，即能證得清淨相法。

丑三、明齊施設

如是德本！由諸菩薩如實了知遍計所執相、依他起相、圓成實相故，如實了知諸無相法、雜染相法、清淨相法。如實了知無相法故，斷滅一切雜染相法；斷滅一切雜染相法故，證得一切清淨相法。齊此名為於諸法相善巧菩薩。

薩，如來齊此施設彼為於諸法相善巧菩薩。

癸二、重頌

爾時世尊欲重宣此義而說頌曰：

若不了知無相法 雜染相法不能斷

不斷雜染相法故 壞證微妙淨相法

不觀諸行眾過失 放逸過失害眾生

懈怠住法動法中 無有失壞可憐愍

懈怠住法動法中者：謂若不能精勤修習善法，由是不能於離貪等安住其心，是名懈怠住法。心不安住離貪等故，由是流散馳騁有貪等中，名動法中。五識身相應地意地決擇中，廣釋其相應知。（陵本五十一卷十二頁<sub>4106</sub>）

無有失壞可憐愍者：本地分說：有二種人，於佛所說法毗奈耶，俱為失壞。一者、於色等法、於色等事，謂有假說自性自相，於實無事起增益執。二者、於假說相處、於假說相依離言自性勝義法性，謂一切種皆無所

有，於實有事起損減執。（陵本三十六卷十五頁<sup>2972</sup>）此應準釋。謂若執無執有，皆為失壞法毗奈耶故。

辛四、諸法無自性相<sup>3</sup>

壬一、問解密意<sup>2</sup>

癸一、勝義生白佛<sup>2</sup>

子一、舉有相教

復次，諸法無自性相，當知如解深密經中，勝義生菩薩白佛言：世尊！我曾獨在靜處，心生如是尋思：世尊以無量門曾說諸蘊所有自相、生相、滅相、永斷、遍知。如說諸蘊，諸處、緣起、諸食亦爾。以無量門曾說諸諦所有自相、遍知、永斷、作證、修習。以無量門曾說諸界所有自相、種種界性、非一界性、永斷、遍知。以無量門曾說念住所有自相、能治、所治，及以修習，未生令生，生已堅住、不忘、倍修、增長、廣大。如說念住，正斷、神足、根、力、覺支，亦復如是。以無量門曾說八支聖道所有自相、能治、所治，及以修習，未生令生，生已堅住、不忘、倍修、增長、廣大。

子二、問無性義

世尊復說一切諸法皆無自性、無生無滅、本來寂靜、自性涅槃。未審世尊依

何密意作如是說：一切諸法皆無自性、無生無滅、本來寂靜、自性涅槃？我今請問如來斯義，唯願如來哀愍解釋說一切法皆無自性、無生無滅、本來寂靜、自性涅槃所有密意。

癸二、佛告勝義生<sup>2</sup>

子一、長行<sup>2</sup>

丑一、讚許為說

說是語已，

世尊復說一切諸法等者：此中間意，為欲解釋語相違難。世尊曾以無量門宣說諸蘊所有自相、生相、滅相、永斷、遍知，乃至廣說八支聖道所有自相、能治、所治，及以修習，未生令生，生已堅住、不忘、倍修、增長、廣大。是則諸法非無自性，非無生滅，非是本來寂靜、自性涅槃。何故世尊今所說異？謂一切法皆無自性、無生無滅、本來寂靜、自性涅槃。未審世尊有何密意，故舉為問。

爾時世尊告勝義生菩薩曰：善哉！善哉！勝義生！汝所尋思甚為如理。善哉！善哉！善男子！汝今乃能請問如來如是深義，汝今為欲利益安樂無量眾

生，哀愍世間及諸天人、阿素洛等，為令獲得義利安樂，故發斯問。汝應諦聽！吾當為汝解釋所說一切諸法皆無自性、無生無滅、本來寂靜、自性涅槃所有密意。

丑二、正廣開示<sup>3</sup> 寅一、顯密意依<sup>2</sup> 卯一、說一切法皆無自性<sup>4</sup> 辰一、標

勝義生！當知我依三種無自性性，密意說言一切諸法皆無自性。

辰二、列

謂相無自性性、生無自性性、勝義無自性性。

辰三、釋<sup>2</sup> 巳一、辨相<sup>3</sup> 午一、相無自性性<sup>2</sup> 未一、出體

善男子！云何諸法相無自性性？所謂諸法遍計所執相。

未二、釋義

何以故？此由假名安立為相，非由自相安立為相，是故說名相無自性性。

午二、生無自性性<sup>2</sup> 未一、出體

云何諸法生無自性性？所謂諸法依他起相。

未二、釋義

何以故？此由依他緣力故有，非自然有，是故說名生無自性性。

午三、勝義無自性性<sup>2</sup> 未一、徵

云何諸法勝義無自性性？

未二、釋<sup>2</sup> 申一、於依他起<sup>2</sup> 酉一、出體

所謂諸法由生無自性性故，說名無自性性，即緣生法亦名勝義無自性性。

酉二、釋義

何以故？於諸法中，若是清淨所緣境界，我顯示彼以為勝義無自性性。依他起相非是清淨所緣境界，是故亦說名為勝義無自性性。

申二、於圓成實<sup>2</sup> 酉一、出體

復有諸法圓成實相，亦名勝義無自性性。

酉二、釋義

何以故？一切諸法法無我性名為勝義，亦得名為無自性性，以是諸法勝義諦

故，無自性性之所顯故。由此因緣，名為勝義無自性性。

相無自性性等者：此中三種無自性性，如前已說。（陵本七十四卷二頁<sup>5674</sup>）

與此義同。謂遍計所執相唯假施設，無自性相，由是說言相無自性性。依他起相非自然生，由是說言生無自性性。勝義無自性性有二差別，一、謂依他起法，二、謂圓成實法。依他起法非勝義性，不為清淨所緣境界，由是說彼勝義無自性性。圓成實法是勝義性，亦一切法無自性性之所顯故，由是亦說勝義無自性性。依此三種無自性性，密意說彼遍計所執、依他起、圓成實一切諸法皆無自性。若復說言：一切諸法無生無滅、本來寂靜、自性涅槃。當知唯依遍計所執相無自性性，及圓成實勝義無自性性，不依依他起生無自性性、或勝義無自性性，由是不與前說諸蘊，乃至八支聖道無量門義相違。如文廣說，其相易知。

已二、喻成<sup>3</sup> 午一、空華喻

善男子！譬如空華，相無自性性當知亦爾。

午二、幻像喻

譬如幻像，生無自性性當知亦爾，一分勝義無自性性當知亦爾。

午三、虛空喻

譬如虛空唯是眾色無性所顯，遍一切處，一分勝義無自性性當知亦爾。法無我性之所顯故，遍一切故。

辰四、結

善男子！我依如是三種無自性性，密意說言一切諸法皆無自性。

卯二、說一切法無生滅等<sup>2</sup> 辰一、依相無自性性<sup>4</sup> 巳一、標

勝義生！當知我依相無自性性，密意說言一切諸法無生無滅、本來寂靜、自性涅槃。

巳二、徵

何以故？

巳三、釋



若法自相都無所有，則無有生；若無有生，則無有滅；若無生無滅，則本來寂靜；若本來寂靜，則自性涅槃，於中都無少分所有，更可令其般涅槃故。

巳四、結

是故我依相無自性性，密意說言一切諸法無生無滅、本來寂靜、自性涅槃。

辰二、依勝義無自性性<sup>4</sup> 巳一、標

善男子！我亦依法無我性所顯勝義無自性性，密意說言一切諸法無生無滅、本來寂靜、自性涅槃。

巳二、徵

何以故？

巳三、釋

法無我性所顯勝義無自性性，於常常時、於恆恆時，諸法法性安住無為，一切雜染不相應故；於常常時、於恆恆時，諸法法性安住故無為。由無為故，無生無滅；一切雜染不相應故，本來寂靜、自性涅槃。

巳四、結

是故我依法無我性所顯勝義無自性性，密意說言一切諸法無生無滅、本來寂靜、自性涅槃。

寅二、釋三建立<sup>2</sup> 卯一、總標簡

復次，勝義生！非由有情界中諸有情類，別觀遍計所執自性為自性故，亦非由彼別觀依他起自性及圓成實自性為自性故，我立三種無自性性。然由有情於依他起自性及圓成實自性上，增益遍計所執自性故，我立三種無自性性。

卯二、別辨相<sup>2</sup> 辰一、黑品攝<sup>2</sup> 巳一、由遍計所執自性<sup>3</sup> 午一、依相起說

由遍計所執自性相故，彼諸有情，於依他起自性及圓成實自性中，隨起言說。

午二、依說起執

如如隨起言說，如是如是由言說熏習心故，或由言說隨覺故，或由言說隨眠故，於依他起自性及圓成實自性中，執著遍計所執自性相。

午三、依執計性

如如執著，如是如是於依他起自性及圓成實自性上，執著遍計所執自性。

巳二、生依他起自性

由是因緣，生當來世依他起自性。由此因緣，或為煩惱雜染所染，或為業雜染所染，或為生雜染所染，於生死中長時馳騁、長時流轉，無有休息；或在那落迦、或在傍生、或在餓鬼、或在天上、或在阿素洛、或在人中，受諸苦惱。

辰二、白品攝<sup>2</sup>

巳一、說三無自性性<sup>2</sup>

午一、生無自性性<sup>2</sup>

未一、標為彼說

復次，勝義生！若諸有情從本已來，未種善根，未清淨障，

未清淨障者：障謂五蓋。不能從彼淨修其心，名未清淨。或復有三種障，

能障正道令不升起，是名未清淨障。何等為三？謂業障、煩惱障、異熟

障。本地分中聲聞地釋應知。（陵本二十九卷十五頁<sup>2452</sup>）

未成熟相續，未多修勝解，

未多修勝解者：本地分說：若諸菩薩欲於菩薩所應學處精勤修學，最初定

應具多勝解。謂於八種勝解依處，具足成就淨信為先決定喜樂。（陵本三十八卷七頁<sup>3117</sup>）與彼相違，名未多修勝解應知。

未能積集福德、智慧二種資糧，我為彼故，依生無自性性宣說諸法。

未二、令得義利

彼聞是已，能於一切緣生行中，隨分解了無常、無恆，是不安隱、變壞法已，於一切行心生怖畏，深起厭患；心生怖畏，深厭患已，遮止諸惡，於諸惡法能不造作，於諸善法能勤修習；習善因故，未種善根能種善根，未清淨障能令清淨，未熟相續能令成熟；由此因緣，多修勝解，亦多積集福德、智慧二種資糧。

午二、相無自性性等<sup>2</sup> 未一、標為彼說

彼雖如是種諸善根，乃至積集福德、智慧二種資糧，然於生無自性性中，未能如實了知相無自性性及二種勝義無自性性，於一切行未能正厭，未正離欲，未正解脫，未遍解脫煩惱雜染，未遍解脫諸業雜染，未遍解脫諸生雜

染。如來為彼更說法要，謂相無自性性及勝義無自性性，為欲令其於一切行能正厭故，正離欲故，正解脫故，超過一切煩惱雜染故，超過一切業雜染故，超過一切生雜染故。

未二、令得義利<sup>4</sup> 申一、能正信解

彼聞如是所說法已，於生無自性性中，能正信解相無自性性及勝義無自性性，簡擇思惟，如實通達。

申二、能不執著

於依他起自性中，能不執著遍計所執自性相。

申三、能滅依他

由言說不熏習智故，由言說不隨覺智故，由言說離隨眠智故，能滅依他起相。

申四、能脫雜染

於現法中智力所持，能永斷滅當來世因。由此因緣，於一切行能正厭患，能正離欲，能正解脫，能遍解脫煩惱、業、生三種雜染。

已二、說三乘道及與種性<sup>2</sup> 午一、明道共<sup>2</sup> 未一、所證

復次，勝義生！諸聲聞乘種性有情，亦由此道、此行跡故，證得無上安隱涅槃；諸獨覺乘種性有情、諸如來乘種性有情，亦由此道、此行跡故，證得無上安隱涅槃。

未二、能證

一切聲聞、獨覺、菩薩皆共此一妙清淨道，皆同此一究竟清淨，更無第二。亦由此道此行跡故者：謂八支聖道應知。緣起聖道經說：何等名為舊道、舊經、舊所行跡，古昔諸仙嘗所遊履？當知即是八聖道支。謂初正見，次正思惟、正語、正業、正命、正勤、正念、正定，唯至第八，如是名為舊道、舊經、舊所行跡，古昔諸仙嘗所遊履。

我依此故，密意說言唯有一乘。

午二、明類別<sup>2</sup> 未一、總標

非於一切有情界中，無有種種有情種性，或鈍根性、或中根性、或利根性有

情差別。

未二、別釋<sup>2</sup>

申一、一向趣寂聲聞<sup>3</sup>

酉一、標

善男子！若一向趣寂聲聞種性補特伽羅，雖蒙諸佛施設種種勇猛加行方便化導，終不能令當坐道場，證得無上正等菩提。

酉二、徵

何以故？

酉三、釋

由彼本來唯下劣種性故，一向慈悲薄弱故，一向怖畏眾苦故。由彼一向慈悲薄弱，是故一向棄背利益諸眾生事；由彼一向怖畏眾苦，是故一向棄背發起諸行所作。我終不說一向棄背利益眾生事者、一向棄背發起諸行所作者，當坐道場，能得無上正等菩提，是故說彼名為一向趣寂聲聞。

申二、迴向菩提聲聞<sup>3</sup>

酉一、標

若迴向菩提聲聞種性補特伽羅，我亦異門說為菩薩。

酉二、徵

何以故？

酉三、釋<sup>2</sup> 戌一、釋能迴向

彼既解脫煩惱障已，若蒙諸佛等覺悟時，於所知障，其心亦可當得解脫。

戌二、釋名聲聞

由彼最初為自利益修行加行，脫煩惱障，是故如來施設彼為聲聞種性。

寅三、明意解別<sup>3</sup> 卯一、略說<sup>2</sup> 辰一、標有情別

復次，勝義生！如是於我善說、善制法毗奈耶，最極清淨意樂所說善教法中，諸有情類意解種種差別可得。

辰二、顯為密說

善男子！如來但依如是三種無自性性，由深密意，於所宣說不了義經，以隱密相說諸法要，謂一切法皆無自性、無生無滅、本來寂靜、自性涅槃。

卯二、廣顯<sup>4</sup> 辰一、於法深信於義通達者<sup>2</sup> 巳一、標彼相



於是經中，若諸有情已種上品善根，已清淨諸障，已成熟相續，已多修勝解，已能積集上品福德、智慧資糧，彼若聽聞如是法已，於我甚深密意言說如實解了，於如是法深生信解，於如是義以無倒慧如實通達。

已二、顯勝利

依此通達善修習故，速疾能證最極究竟，亦於我所深生淨信，知是如來應正等覺，於一切法現正等覺。

辰二、於法淨信於義未達者<sup>2</sup>

已一、標彼相<sup>2</sup>

午一、信解甚深

若諸有情已種上品善根，已清淨諸障，已成熟相續，已多修勝解，未能積集上品福德、智慧資糧，其性質直，是質直類。

其性質直是質直類者：謂如聖教而正修行，其見正直，是正直類故。

雖無力能思擇廢立，而不住自見取中。彼若聽聞如是法已，於我甚深祕密言說，雖無力能如實解了，然於此法能生勝解，發清淨信，信此經典是如來說，是其甚深、顯現甚深，空性相應，難見難悟，不可尋思，非諸尋思所行

境界、微細詳審聰明智者之所解了。

午二、自輕而住

於此經典所說義中，自輕而住，作如是言：諸佛菩提為最甚深，諸法法性亦最甚深，唯佛如來能善了達，非是我等所能解了。諸佛如來為彼種種勝解有情轉正法教，諸佛如來無邊智見，我等智見猶如牛跡。

巳二、顯失德

於此經典，雖能恭敬為他宣說、書寫護持、披閱流布、殷重供養、受誦溫習，然猶未能以其修相發起加行，

未能以其修相發起加行者：謂未修習所知事同分三摩地所行影像令現在前故。

是故於我甚深密意所說言辭不能通達。由此因緣，彼諸有情，亦能增長福德、智慧二種資糧，於後相續未成熟者，亦能成熟。

辰三、於法信解於義執著者<sup>2</sup>

巳一、標彼相<sup>3</sup>

午一、自起無相見者<sup>3</sup>

未一、隨言執著

若諸有情，廣說乃至未能積集上品福德、智慧資糧，性非質直，非質直類。

若諸有情廣說者：謂彼有情未種上品善根，未清淨諸障，未成熟相續，未多修勝解，是名廣說應知。

雖有力能思擇廢立，而復安住自見取中。彼若聽聞如是法已，於我甚深密意言說，無有力能如實解了，於如是法雖生信解，然於其義隨言執著，謂一切法決定皆無自性，決定不生不滅，決定本來寂靜，決定自性涅槃。

未二、起見誹撥<sup>3</sup> 申一、標

由此因緣，於一切法獲得無見及無相見。由得無見、無相見故，撥一切相皆是無相，誹撥諸法遍計所執相、依他起相、圓成實相。

申二、徵

何以故？

申三、釋

由有依他起相及圓成實相故，遍計所執相方可施設。若於依他起相及圓成實

相見為無相，彼亦誹撥遍計所執相，是故說彼誹撥三相。

彼亦誹撥遍計所執相者：顯揚論說：不應宣說諸法唯是假有。何以故？假法必有所依因故，非無實物假法成立。若異此者，無實物故，假亦是無，即應破壞二法。（顯揚論十六卷十頁）由是當知此所說義。

未三、明其德失

雖於我法起於法想，而非義中起於義想；由於我法起法想故，及非義中起義想故，於是法中持為是法，於非義中持為是義。彼雖於法起信解故，福德增長，然於非義起執著故，退失智慧；智慧退故，退失廣大無量善法。

退失廣大無量善法者：此說退失，謂未得退應知。於諸廣大無量善法不能展轉勝進，名為退故。

午二、從聞隨見者<sup>2</sup> 未一、標執

復有有情從彼聽聞，謂法為法、非義為義。若隨其見，彼即於法起於法想，於非義中起於義想，執法為法，非義為義。

未二、例失

由此因緣，當知同彼退失善法。

午三、從聞不隨見者<sup>2</sup> 未一、謗非佛說

若有有情不隨其見，從彼欸聞一切諸法皆無自性、無生無滅、本來寂靜、自性涅槃，便生恐怖，生恐怖已，作如是言：此非佛語，是魔所說。作此解已，於是經典誹謗毀罵。

未二、顯其罪障

由此因緣，獲大衰損，觸大業障。

巳二、結為障

由是因緣，我說若有於一切相起無相見，於非義中宣說為義，是起廣大業障方便，由彼陷墜無量眾生，令其獲得大業障故。

辰四、於是法義執非法義者<sup>2</sup> 巳一、標彼相

善男子！若諸有情未種善根，未清淨障，未熟相續，無多勝解，未集福德、

智慧資糧，性非質直，非質直類。雖有力能思擇廢立，而常安住自見取中。彼若聽聞如是法已，不能如實解我甚深密意言說，故於此法不生信解，於是法中起非法想，於是義中起非義想，於是法中執為非法，於是義中執為非義。唱如是言：此非佛語，是魔所說。作此解已，於是經典誹謗毀謗，撥為虛偽，以無量門毀滅摧伏如是經典，於諸信解此經典者，起怨家想。

已二、出業障

彼先為諸業障所障，由此因緣，復為如是業障所障。如是業障初易施設，乃至齊於百千俱胝那庾多劫無有出期。

彼先為諸業障所障等者：謂先為諸業障所障，故於此法不生信解。由此因緣，於是經典誹謗毀謗，復為如是誹謗毀謗業障所障故。

卯三、總結

善男子！如是於我善說、善制法毗奈耶最極清淨意樂所說善教法中，有如是等諸有情類意解種種差別可得。

子二、重頌

爾時世尊欲重宣此義而說頌曰：

一切諸法皆無性 無生無滅本來寂  
諸法自性恆涅槃 誰有智言無密意  
相生勝義無自性 如是我皆已顯示  
若不知佛此密意 失壞正道不能往  
依諸淨道清淨者 唯依此一無第二  
故於其中立一乘 非有情性無差別  
眾生界中無量生 唯度一身趣寂滅  
大悲勇猛證涅槃 不捨眾生甚難得  
微妙難思無漏界 於中解脫等無差  
一切義成離惑苦 二種異說謂常樂

一切義成離惑苦等者：成辦自義、成辦他義，是名一切義成。煩惱寂靜及

苦寂靜，名離惑苦。由彼離惑，亦說為常，煩惱諸行永寂靜故。由彼離苦，亦說為樂，諸後有苦不更生故。當知常、樂，唯離惑、苦二種異說，不應如言起執著故。

壬二、解喻說義<sup>2</sup> 癸一、勝義生白佛<sup>2</sup> 子一、讚佛善說

爾時勝義生菩薩復白佛言：世尊！諸佛如來密意語言甚奇希有，乃至微妙、最微妙、甚深、最甚深、難通達、最難通達。

子二、述自解喻<sup>2</sup> 丑一、領解<sup>2</sup> 寅一、依蘊等辨<sup>2</sup> 卯一、舉色蘊<sup>3</sup> 辰一、遍計所執相<sup>2</sup> 巳一、得名分齊

如是我今領解世尊所說義者，若於分別所行遍計所執相所依行相中，假名安立以為色蘊，或自性相、或差別相；假名安立為色蘊生、為色蘊滅，及為色蘊永斷、遍知，或自性相、或差別相；是名遍計所執相。

巳二、施設無性

世尊依此施設諸法相無自性性。



辰二、依他起相<sup>2</sup> 巳一、得名分齊

若即分別所行遍計所執相所依行相，是名依他起相。

巳二、施設無性

世尊依此施設諸法生無自性性，及一分勝義無自性性。

辰三、圓成實相<sup>2</sup> 巳一、得名分齊

如是我今領解世尊所說義者，若即於此分別所行遍計所執相所依行相中，由遍計所執相不成實故，即此自性無自性性法無我真如清淨所緣，是名圓成實相。

巳二、施設無性

世尊依此施設一分勝義無自性性。

卯二、例餘蘊等

如於色蘊，如是於餘蘊皆應廣說。如於諸蘊，如是於十二處，一一處中皆應廣說；於十二有支，一一支中皆應廣說；於四種食，一一食中皆應廣說；於

六界、十八界，一一界中皆應廣說。

寅二、依諦等辨<sup>3</sup> 卯一、明初苦諦<sup>3</sup> 辰一、遍計所執相<sup>2</sup> 巳一、得名分齊

如是我今領解世尊所說義者，若於分別所行遍計所執相所依行相中，假名安立以為苦諦、苦諦遍知，或自性相、或差別相，是名遍計所執相。

巳二、施設無性

世尊依此施設諸法相無自性性。

辰二、依他起相<sup>2</sup> 巳一、得名分齊

若即分別所行遍計所執相所依行相，是名依他起相。

巳二、施設無性

世尊依此施設諸法生無自性性，及一分勝義無自性性。

辰三、圓成實相<sup>2</sup> 巳一、得名分齊

如是我今領解世尊所說義者，若即於此分別所行遍計所執相所依行相中，由遍計所執相不成實故，即此自性無自性性法無我真如清淨所緣，是名圓成實

相。

巳二、施設無性

世尊依此施設一分勝義無自性性。

卯二、例餘諦等

如於苦諦，如是於餘諦皆應廣說。如於聖諦，如是於諸念住、正斷、神足、根、力、覺支、道支中，一一皆應廣說。

卯三、明後正定<sup>3</sup>

辰一、遍計所執相<sup>2</sup>

巳一、得名分齊

如是我今領解世尊所說義者，若於分別所行遍計所執相所依行相中，假名安立以為正定，及為正定能治、所治，若正定修，未生令生，生已堅住、不忘、倍修、增長、廣大，或自性相、或差別相，是名遍計所執相。

巳二、施設無性

世尊依此施設諸法相無自性性。

辰二、依他起相<sup>2</sup>

巳一、得名分齊

若即分別所行遍計所執相所依行相，是名依他起相。

巳二、施設無性

世尊依此施設諸法生無自性性，及一分勝義無自性性。

辰三、圓成實相<sup>2</sup> 巳一、得名分齊

如是我今領解世尊所說義者，若即於此分別所行遍計所執相所依行相中，由遍計所執相不成實故，即此自性無自性性法無我真如清淨所緣，是名圓成實相。

巳二、施設無性

世尊依此施設諸法一分勝義無自性性。

丑二、譬喻<sup>4</sup> 寅一、毗濕縛藥喻

世尊！譬如毗濕縛藥，一切散藥、仙藥方中皆應安處。如是世尊！依此諸法皆無自性、無生無滅、本來寂靜、自性涅槃無自性性了義言教，遍於一切不了義經皆應安處。

寅二、雜彩畫地喻

世尊！如彩畫地，遍於一切彩畫事業皆同一味，或青、或黃、或赤、或白，復能顯發彩畫事業。如是世尊！依此諸法皆無自性，廣說乃至自性涅槃無自性了義言教，遍於一切不了義經皆同一味，復能顯發彼諸經中所不了義。

寅三、熟酥喻

世尊！譬如一切成熟珍羞諸餅果內，投之熟酥，更生勝味。如是世尊！依此諸法皆無自性，廣說乃至自性涅槃無自性了義言教，置於一切不了義經，生勝歡喜。

寅四、虛空喻

世尊！譬如虛空遍一切處皆同一味，不障一切所作事業。如是世尊！依此諸法皆無自性，廣說乃至自性涅槃無自性了義言教，遍於一切不了義經皆同一味，不障一切聲聞、獨覺及諸大乘所修事業。

癸二、佛歎勝義生

說是語已，爾時世尊歎勝義生菩薩曰：善哉！善哉！善男子！汝今乃能善解如來所說甚深密意義，復於此義善作譬喻，所謂世間毗濕縛藥、雜彩畫地、熟酥、虛空。勝義生！如是如是！更無有異。如是如是！汝應受持。

壬三、名了義教<sup>2</sup>

癸一、教相殊勝<sup>3</sup>

子一、教時差別<sup>3</sup>

丑一、第一時教

勝義生菩薩復白佛言：世尊！初於一時，在婆羅痾斯仙人墮處施鹿林中，唯為發趣聲聞乘者，以四諦相轉正法輪，雖是甚奇、甚為希有，一切世間諸天人等，先無有能如法轉者，

一切世間諸天人等者：天謂魔、梵。人謂沙門、婆羅門。等言，等取所餘天人諸眾生類。攝異門分說：并諸天人眾生者，謂於天中，除魔及梵；於其中，除沙門、婆羅門。（陵本八十三卷十七頁<sup>6328</sup>）此應準知。此中一切世間，唯說天人，非餘種類，由能了義修正行故。為顯四諦法輪甚奇希有，故作是釋：一切世間諸天人等，先無有能如法轉者。

而於彼時所轉法輪，有上、有容，是未了義，是諸諍論安足處所。

丑二、第二時教

世尊在昔第二時中，唯為發趣修大乘者，依一切法皆無自性、無生無滅、本來寂靜、自性涅槃，以隱密相轉正法輪，雖更甚奇、甚為希有，而於彼時所轉法輪，亦是有上、有所容受，猶未了義，是諸諍論安足處所。

丑三、第三時教

世尊於今第三時中，普為發趣一切乘者，依一切法皆無自性、無生無滅、本來寂靜、自性涅槃無自性性，以顯了相轉正法輪，第一甚奇最為希有，於今世尊所轉法輪，無上、無容，是真了義，非諸諍論安足處所。

子二、教所生福<sup>2</sup>

丑一、勝義生問佛

世尊！若善男子、或善女人，於此如來依一切法皆無自性、無生無滅、本來寂靜、自性涅槃所說甚深了義言教，聞已信解、書寫護持、供養流布、受誦溫習、如理思惟、以其修相發起加行，生幾所福？

丑二、佛告勝義生

說是語已，爾時世尊告勝義生菩薩曰：勝義生！是善男子、或善女人，其所生福無量無數，難可喻知，吾今為汝略說少分。如爪上土比大地土，百分不及一，千分不及一，百千分不及一，數算計喻鄔波尼殺曇分亦不及一。或如牛跡中水比四大海水，百分不及一，廣說乃至鄔波尼殺曇分亦不及一。如是於諸不了義經聞已信解，廣說乃至以其修相發起加行所獲功德，比此所說了義經教聞已信解所集功德，廣說乃至以其修相發起加行所集功德，百分不及一，廣說乃至鄔波尼殺曇分亦不及一。

子三、奉持名字<sup>2</sup>

丑一、勝義生問佛

說是語已，勝義生菩薩復白佛言：世尊！於是解深密法門中，當何名此教？我當云何奉持？

丑二、佛告勝義生

佛告勝義生菩薩曰：善男子！此名勝義了義之教，於此勝義了義之教，汝當奉持。



癸二、說果勝利

說此勝義了義教時，於大會中，有六百千眾生發阿耨多羅三藐三菩提心；三百千聲聞遠塵離垢，於諸法中得法眼淨；

遠塵離垢等者：攝異門分說：塵謂已生未究竟智，能障現觀有間、無間我慢現轉；垢謂彼品及見斷品所有麤重。今永無故，名遠塵離垢。又復塵者，所謂我慢，及見所斷一切煩惱；垢謂二品所有麤重。於諸法中者，謂於自相、共相所住法中。言法眼者，謂如實現證唯有法慧。（陵本八十三卷十四頁<sup>6316</sup>）此應準釋。

一百五十千聲聞永盡諸漏，心得解脫；七十五千菩薩得無生法忍。

瑜伽師地論科句披尋記卷第七十六



瑜伽師地論科句披尋記卷第七十七

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之六

辛五、分別瑜伽止觀<sup>3</sup>

壬一、正廣分別<sup>2</sup>

癸一、長行<sup>2</sup>

子一、問答辨<sup>26</sup>

丑一、依

住門<sup>2</sup>

寅一、慈氏問

復次，依法假安立，分別解說瑜伽所攝奢摩他、毗鉢舍那道，

依法假安立者：此中菩薩修習止觀，為欲證得諸法離言自性故，以法假安立為所依止。本地分說：此中菩薩即於諸法無所分別，當知名止。若於諸法勝義理趣如實真智，及於無量安立理趣世俗妙智，當知名觀。乃至廣說。（陵本四十五卷四頁<sup>3623</sup>）其義應知。

當知如解深密經中，慈氏菩薩白佛言：世尊！菩薩何依、何住，於大乘中修

奢摩他、毗鉢舍那？

寅二、世尊告

佛告慈氏菩薩曰：善男子！當知菩薩法假安立，及不捨無上正等覺願為依、為住，於大乘中修奢摩他、毗鉢舍那。

為依為住者：如次配釋法假安立，及不捨無上正等覺願應知。由法假安立為依，能求奢摩他，能善毗鉢舍那故。由不捨無上正等覺願為住，能令大乘相應作意無散動故。

丑二、所緣門<sup>2</sup> 寅一、慈氏問

世尊！如說四種所緣境事，一、有分別影像所緣境事，二、無分別影像所緣境事，三、事邊際所緣境事，四、所作成辦所緣境事。於此四中，幾是奢摩他所緣境事？幾是毗鉢舍那所緣境事？幾是俱所緣境事？

如說四種所緣境事等者：聲聞地中別辯其相應知。（陵本二十六卷十三

寅二、世尊告

善男子！一是奢摩他所緣境事，謂無分別影像；一是毗鉢舍那所緣境事，謂有分別影像；二是俱所緣境事，謂事邊際、所作成辦。

丑三、求善止觀門<sup>2</sup> 寅一、慈氏問

世尊！云何菩薩依此四種奢摩他、毗鉢舍那所緣境事，能求奢摩他，能善毗鉢舍那？

寅二、世尊告<sup>2</sup> 卯一、能求奢摩他<sup>2</sup> 辰一、釋<sup>2</sup> 巳一、於法正思

善男子！如我為諸菩薩所說法假安立，所謂契經、應頌、記別、諷誦、自說、因緣、譬喻、本事、本生、方廣、希法、論議。菩薩於此善聽、善受，言善通利、意善尋思、見善通達，即於如所善思惟法，獨處空閑，作意思惟。

善聽善受等者：無倒聽聞，是名善聽。無倒受持，是名善受。以大音聲而為讀誦，是名言善通利。如理作意，是名意善尋思。如實了知，是名見善

通達。

已二、令心相續

復即於此能思惟心，內心相續作意思惟，如是正行多安住故，起身輕安及心輕安，是名奢摩他。

復即於此能思惟心等者：九種心住中，說有內住、等住、安住、近住初四種相，皆此作意思惟所攝。如聲聞地別釋應知。（陵本三十卷九頁<sup>2511</sup>）

辰二、結

如是菩薩能求奢摩他。

卯二、能善毗鉢舍那<sup>2</sup>

辰一、釋<sup>2</sup>

已一、觀察影像

彼由獲得身心輕安為所依故，即於如所善思惟法內三摩地所行影像，觀察、勝解、捨離心相。

觀察勝解捨離心相者：如下說言：三摩地所行有分別影像，毗鉢舍那所緣。是名觀察。又言：通達三摩地所行影像唯是其識。是名勝解。又言：

或通達此已，復思惟如性。是名捨離心相。如是次第配釋應知。

巳二、思擇差別

即於如是三摩地影像所知義中，能正思擇、最極思擇、周遍尋思、周遍伺察。

能正思擇等者：此即四種毗鉢舍那。聲聞地中別釋其相應知。（陵本三十

卷十一頁<sup>2518</sup>）

若忍、若樂、若慧、若見、若觀，是名毗鉢舍那。

辰二、結

如是菩薩能善毗鉢舍那。

若忍若樂等者：於所知義深生信解，是名為忍。為得未得，深生希望，是名為樂。各品差別能了知故，是名為慧。審諦推求，是名為見。現前決了，是名為觀。

丑四、隨順作意門<sup>2</sup> 寅一、隨順奢摩他<sup>2</sup> 卯一、慈氏問

世尊！若諸菩薩緣心為境，內思惟心，乃至未得身心輕安所有作意，當名何

等？

卯二、世尊告

善男子！非奢摩他作意，是隨順奢摩他勝解相應作意。

乃至未得身心輕安所有作意者：聲聞地說：身心輕安，名有作意。由此最初獲得色界定地所攝少分微妙正作意故。（陵本三十二卷二十頁<sup>2666</sup>）當知即是得初靜慮近分，未至位所攝。此位以前所有作意，非定地攝。此即七作意中前五作意，謂了相作意、勝解作意、遠離作意、攝樂作意、觀察作意。今總攝彼，說乃至言。

寅二、隨順毗鉢舍那<sup>2</sup> 卯一、慈氏問

世尊！若諸菩薩乃至未得身心輕安，於如所思所有諸法內三摩地所緣影像，作意思惟，如是作意當名何等？

卯二、世尊告

善男子！非毗鉢舍那作意，是隨順毗鉢舍那勝解相應作意。



丑五、一異門<sup>2</sup> 寅一、二道一異<sup>2</sup> 卯一、慈氏問

世尊！奢摩他道與毗鉢舍那道，當言有異？當言無異？

卯二、世尊告<sup>2</sup> 辰一、標

善男子！當言非有異、非無異。

辰二、釋

何故非有異？以毗鉢舍那所緣境心為所緣故。何故非無異？有分別影像非所緣故。

以毗鉢舍那所緣境心為所緣故者：起自心相為所緣境，是名毗鉢舍那所緣境心。奢摩他道亦以此心為所緣境，由是當言非有異。聲聞地說：由隨相行、隨尋思行、隨伺察行毗鉢舍那，行彼境界，而非一向精勤修習毗鉢舍那。還捨觀相，復於所緣思惟止行。由是因緣，彼於爾時，於所緣境不捨、不取。由於所緣止行轉故，不名為捨；即於所緣不作相故，無分別故，不名為取。（陵本三十一卷十一頁<sup>2583</sup>）其義應知。

寅二、見相一異<sup>6</sup> 卯一、慈氏問

世尊！諸毗鉢舍那三摩地所行影像，彼與此心當言有異？當言無異？

卯二、世尊告<sup>3</sup> 辰一、標

善男子！當言無異。

辰二、徵

何以故？

辰三、釋

由彼影像唯是識故。善男子！我說識所緣，唯識所現故。

卯三、慈氏設難

世尊！若彼所行影像，即與此心無有異者，云何此心還見此心？

若彼所行影像等者：此中難意，謂彼所行影像應是所取，行影像心應是能取，若無有異，云何此心還見此心？

卯四、世尊正釋<sup>2</sup> 辰一、標相

善男子！此中無有少法能見少法，然即此心如生時，即有如是影像顯現。

辰二、喻成

善男子！如依善瑩清淨鏡面，以質為緣還見本質，而謂我今見於影像，及謂離質別有所行影像顯現。如是此心生時，相似有異三摩地所行影像顯現。

相似有異三摩地所行影像顯現者：謂彼影像唯識所現，故言相似。然是所行，故言有異。如前鏡喻道理應知。

卯五、慈氏轉難

世尊！若諸有情自性而住，緣色等心所行影像，彼與此心亦無異耶？

卯六、世尊理例

善男子！亦無有異。而諸愚夫由顛倒覺，於諸影像不能如實知唯是識，作顛倒解。

丑六、一向俱轉門<sup>2</sup> 寅一、正辨<sup>3</sup> 卯一、一向修毗鉢舍那<sup>2</sup> 辰一、慈氏問

世尊！齊何當言菩薩一向修毗鉢舍那？

辰二、世尊告

善男子！若相續作意，唯思惟心相。

卯二、一向修奢摩他<sup>2</sup> 辰一、慈氏問

世尊！齊何當言菩薩一向修奢摩他？

辰二、世尊告

善男子！若相續作意，唯思惟無間心。

卯三、和合俱轉<sup>2</sup> 辰一、慈氏問

世尊！齊何當言菩薩奢摩他、毗鉢舍那和合俱轉？

辰二、世尊告

善男子！若正思惟心一境性。

寅二、隨釋<sup>3</sup> 卯一、心相<sup>2</sup> 辰一、慈氏問

世尊！云何心相？

辰二、世尊告

善男子！謂三摩地所行有分別影像，毗鉢舍那所緣。

卯二、無間心<sup>2</sup> 辰一、慈氏問

世尊！云何無間心？

辰二、世尊告

善男子！謂緣彼影像心，奢摩他所緣。

緣彼影像心者：此即前說毗鉢舍那所緣境心，然非毗鉢舍那所行影像，彼有分別，此無分別故。聲聞地說：云何無分別影像？謂修觀行者，受取如是影像相已，不復觀察揀擇、極揀擇、遍尋思、遍伺察。然即於此所緣影像，以奢摩他行寂靜其心，乃至廣說。彼於爾時，成無分別影像所緣。

（陵本二十六卷十四頁<sup>2213</sup>）由是當知此所說義。

卯三、心一境性<sup>2</sup> 辰一、慈氏問

世尊！云何心一境性？

辰二、世尊告

善男子！謂通達三摩地所行影像唯是其識；或通達此已，復思惟如性。

丑七、種別門<sup>2</sup> 寅一、毗鉢舍那<sup>2</sup> 卯一、慈氏問

世尊！毗鉢舍那凡有幾種？

卯二、世尊告<sup>3</sup> 辰一、標

善男子！略有三種。

辰二、列

一者、有相毗鉢舍那，二者、尋求毗鉢舍那，三者、伺察毗鉢舍那。

辰三、釋<sup>3</sup> 巳一、有相毗鉢舍那

云何有相毗鉢舍那？謂純思惟三摩地所行有分別影像毗鉢舍那。

巳二、尋求毗鉢舍那

云何尋求毗鉢舍那？謂由慧故，遍於彼彼未善解了一切法中，為善了故，作意思惟毗鉢舍那。

遍於彼彼未善解了一切法中者：謂於彼彼所知事中，彼所依法未生勝解作

意故。聲聞地說：所知事者，謂或不淨，或慈愍，或緣性緣起，或界差別，或阿那波那念，或蘊善巧，或界善巧，或處善巧，或緣起善巧，或處非處善巧，或下地麤性、上地靜性，或苦諦、集諦、滅諦、道諦，是名所知事。此所知事，或依教授教誡、或聽聞正法為所依止，令三摩呬多地作意現前，即於彼法而起勝解，即於彼所知事而起勝解。（陵本二十六卷十四頁<sup>2210</sup>）其義應知。

已三、伺察毗鉢舍那

云何伺察毗鉢舍那？謂由慧故，遍於彼彼已善解了一切法中，為善證得極解脫故，作意思惟毗鉢舍那。

為善證得極解脫故者：所作成辦，名極解脫。聲聞地說：云何所作成辦？謂修觀行者，於奢摩他、毗鉢舍那，若修、若習、若多修習為因緣故，諸緣影像所有作意皆得圓滿。此圓滿故，便得轉依，一切麤重悉皆息滅。得轉依故，超過影像，即於所知事，有無分別現量智見生。（陵本二十六卷

十五頁<sup>2216</sup>）其義應知。

寅二、奢摩他<sup>2</sup> 卯一、慈氏問

世尊！是奢摩他凡有幾種？

卯二、世尊告<sup>3</sup> 辰一、三種

善男子！即由隨彼無間心故，當知此中亦有三種。

辰二、八種

復有八種。謂初靜慮乃至非想非非想處，各有一種奢摩他故。

辰三、四種

復有四種。謂慈悲喜捨四無量中，各有一種奢摩他故。

即由隨彼無間心故者：謂隨毗鉢舍那所緣有分別影像無間，無分別影像為奢摩他所緣，名隨彼無間心。義如前知。

丑八、依法不依法門<sup>2</sup> 寅一、慈氏問

世尊！如說依法奢摩他、毗鉢舍那，復說不依法奢摩他、毗鉢舍那，云何名



依法？云何復名不依法？

寅二、世尊告<sup>2</sup>

卯一、正辨差別<sup>2</sup>

辰一、依法

善男子！若隨所受、所思法相，而於其義得奢摩他、毗鉢舍那，名依法。

辰二、不依法

若不待於所受、所思所有法相，但依止他教誡教授，而於其義得奢摩他、毗鉢舍那，謂觀青瘀及膿爛等，或一切行皆是無常，或諸行苦，或一切法皆無有我，或復涅槃畢竟寂靜，如是等類奢摩他、毗鉢舍那，名不依法。

卯二、隨應施設

由依止法得奢摩他、毗鉢舍那，故我施設隨法行菩薩是利根性；

施設隨法行菩薩是利根性者：聲聞地說：云何隨法行補特伽羅？謂有補特伽羅，如其所聞、所受、所究竟、所思、所量、所觀察法，自有功能、自有勢力隨法修行；不從他求教授教誡，修證果行。是名隨法行補特伽羅。

（陵本二十六卷四頁<sup>2180</sup>）當知如是補特伽羅是利根性。

由不依法得奢摩他、毗鉢舍那，故我施設隨信行菩薩是鈍根性。

施設隨信行菩薩是鈍根性者：聲聞地說：云何隨信行補特伽羅？謂有補特伽羅，從他求請教授教誡，由此力故，修證果行。非如所聞、所受、所究竟、所思、所量、所觀察法，自有功能、自有勢力隨法修行；唯由隨他補特伽羅，信而修行。是名隨信行補特伽羅。（陵本二十六卷四頁<sup>2179</sup>）當知如是補特伽羅是鈍根性。

丑九、緣法別總門<sup>3</sup> 寅一、別總施設<sup>2</sup> 卯一、慈氏問

世尊！如說緣別法奢摩他、毗鉢舍那，復說緣總法奢摩他、毗鉢舍那。云何名緣別法奢摩他、毗鉢舍那？云何復名緣總法奢摩他、毗鉢舍那？

卯二、世尊告<sup>2</sup> 辰一、緣別法奢摩他毗鉢舍那

善男子！若諸菩薩緣於各別契經等法，於如所受、所思惟法，修奢摩他、毗鉢舍那，是名緣別法奢摩他、毗鉢舍那。

緣於各別契經等法者：契經等十二分教，諸所有法行相非一，是名各別。

謂或諸蘊相應，或諸界相應，或諸處相應，或緣起相應，或處非處相應，或念住相應，如是等類應知。

辰二、緣總法奢摩他毗鉢舍那

若諸菩薩即緣一切契經等法，集為一團、一積、一分、一聚，作意思惟，此一切法隨順真如、趣向真如、臨入真如，隨順菩提、隨順涅槃、隨順轉依，及趣向彼、若臨入彼，此一切法宣說無量無數善法。如是思惟修奢摩他、毗鉢舍那，是名緣總法奢摩他、毗鉢舍那。

集為一團一積一分一聚等者：五識身相應地意地決擇中說：修觀行者，以阿賴耶識是一切戲論所攝諸行界故，略彼諸行，於阿賴耶識中，總為一團、一積、一聚。為一聚已，由緣真如境智修習、多修習故，而得轉依。

（陵本五十一卷十頁<sup>4095</sup>）又聲聞地決擇中說：由諸有學已見跡者，先由法智、類智，於現不現一切行中起現觀已，後於修道攝一切行，總為一團、一分、一聚，以無常等行次第觀察，而不分別此是欲行、此是色行、此無

色行、此是現見、此非現見。（陵本六十八卷四頁<sup>5385</sup>）今此中說一團、一積、一分、一聚，文雖有別，其義正同。謂緣一切契經等法，更不分別若色、若心諸差別義，是名一團；更不分別諸蘊差別，是名一積；更不分別下上分結，是名一分；更不分別色無色聚，是名一聚。唯是無常、苦、空、無我共相之所顯故，唯依薩迦耶聚之所攝故。

寅二、名小大等<sup>2</sup> 卯一、慈氏問

世尊！如說緣小總法奢摩他、毗鉢舍那，復說緣大總法奢摩他、毗鉢舍那，又說緣無量總法奢摩他、毗鉢舍那。云何名緣小總法奢摩他、毗鉢舍那？云何名緣大總法奢摩他、毗鉢舍那？云何復名緣無量總法奢摩他、毗鉢舍那？

卯二、世尊告<sup>3</sup> 辰一、緣小總法奢摩他毗鉢舍那

善男子！若緣各別契經，乃至各別論議，為一團等作意思惟，當知是名緣小總法奢摩他、毗鉢舍那。

辰二、緣大總法奢摩他毗鉢舍那

若緣乃至所受、所思契經等法，為一團等作意思惟，非緣各別，當知是名緣大總法奢摩他、毗鉢舍那。

辰三、緣無量總法奢摩他毗鉢舍那

若緣無量如來法教、無量法句文字、無量後後慧所照了，為一團等作意思惟，非緣乃至所受、所思，當知是名緣無量總法奢摩他、毗鉢舍那。

寅三、名得通達<sup>2</sup> 卯一、辨得相<sup>2</sup> 辰一、慈氏問

世尊！菩薩齊何名得緣總法奢摩他、毗鉢舍那？

辰二、世尊告<sup>2</sup> 巳一、標

善男子！由五緣故，當知名得。

巳二、列

一者、於思惟時，剎那剎那融消一切麤重所依；二者、離種種想得樂法樂；三者、解了十方無差別相無量法光；四者、所作成滿相應淨分無分別相恆現在前；五者、為令法身得成滿故，攝受後後轉勝妙因。

由五緣故當知名得等者：此中五緣總名為得，然非無別。當知前二是通達相，初極喜地及離垢地之所顯故。第三是其得相，發光地之所顯故。第四是其得已離加行相，不動地之所顯故。第五是其得已攝受因相，善慧地之所顯故。

卯二、辨通達<sup>2</sup>

辰一、慈氏問

世尊！此緣總法奢摩他、毗鉢舍那，當知從何名為通達？從何名得？

辰二、世尊告<sup>2</sup>

巳一、簡差別

善男子！從初極喜地名為通達，從第三發光地乃名為得。

巳二、勵隨學

善男子！初業菩薩亦於是中隨學作意，雖未可歎，不應懈廢。

丑十、三地門<sup>2</sup>

寅一、慈氏問

世尊！是奢摩他、毗鉢舍那，云何名有尋有伺三摩地？云何名無尋唯伺三摩地？云何名無尋無伺三摩地？

寅二、世尊告<sup>2</sup> 卯一、第一釋<sup>3</sup> 辰一、有尋有伺三摩地

善男子！於如所取尋伺法相，若有麤顯領受觀察諸奢摩他、毗鉢舍那，是名有尋有伺三摩地。

領受觀察者：此中領受，是奢摩他相。觀察，是毗鉢舍那相。如文次第配釋應知。

辰二、無尋唯伺三摩地

若於彼相雖無麤顯領受觀察，而有微細彼光明念領受觀察諸奢摩他、毗鉢舍那，是名無尋唯伺三摩地。

而有微細彼光明念者：光明想俱諸所有念，名光明念。本地分說：真實能令心闇昧者，謂方便修止觀品時，於諸法中所有忘念。與此相違，當知即是光明。（陵本二十卷九頁<sup>1737</sup>）

辰三、無尋無伺三摩地

若即於彼一切法相，都無作意領受觀察諸奢摩他、毗鉢舍那，是名無尋無伺

### 三摩地。

卯二、第二釋<sup>3</sup> 辰一、有尋有伺三摩地

復次，善男子！若有尋求奢摩他、毗鉢舍那，是名有尋有伺三摩地。

辰二、無尋唯伺三摩地

若有伺察奢摩他、毗鉢舍那，是名無尋唯伺三摩地。

辰三、無尋無伺三摩地

若緣總法奢摩他、毗鉢舍那，是名無尋無伺三摩地。

丑十一、三相門<sup>2</sup> 寅一、慈氏問

世尊！云何止相？云何舉相？云何捨相？

寅二、世尊告<sup>3</sup> 卯一、止相

善男子！若心掉舉，或恐掉舉時，諸可厭法作意及彼無間心作意，是名止相。

諸可厭法作意等者：取過患相，名可厭法，是即止因緣相。彼無間心如前

已釋，是即止所緣相。



卯二、舉相

若心沈沒，或恐沈沒時，諸可欣法作意及彼心相作意，是名舉相。

諸可欣法作意等者：緣淨妙相，名可欣法，是即舉因緣相。分別影像名彼心相，是即舉所緣相。

卯三、捨相

若於一向止道、或於一向觀道、或於雙運轉道，二隨煩惱所染汙時，諸無功用作意及心任運轉中所有作意，是名捨相。

二隨煩惱所染汙時等者：若心掉舉，或心沈沒，是名二隨煩惱所染汙時。即於是時修對治已，捨離功用，任運而轉，是名捨相。此亦二相，謂因緣相及所緣相，如次配屬應知。

丑十二、知法知義門<sup>2</sup> 寅一、慈氏問

世尊！修奢摩他、毗鉢舍那諸菩薩眾，知法、知義，云何知法？云何知義？

寅二、世尊告<sup>2</sup> 卯一、知法<sup>4</sup> 辰一、標

善男子！彼諸菩薩，由五種相了知於法。

辰二、列

一者、知名，二者、知句，三者、知文，四者、知別，五者、知總。

辰三、釋<sup>5</sup> 巳一、名

云何為名？謂於一切染淨法中，所立自性想假施設。

云何為名等者：攝釋分說：名身者，謂共知增語。（陵本八十一卷二頁<sup>6165</sup>）

此即於相所有增語，由是說言想假施設。

巳二、句

云何為句？謂即於彼名聚集中，能隨宣說諸染淨義依持建立。

云何為句等者：攝釋分說：攝受諸名，究竟顯了不現見義，故名為句。

（陵本八十一卷三頁<sup>6170</sup>）由是當知，諸染淨義，句為能詮，令無失壞，是名依持；由句無倒，義無增減，故名建立。

巳三、文

云何為文？謂即彼二所依止字。

巳四、知別

云何於彼各別了知？謂由各別所緣作意。

謂由各別所緣作意者：由是能了諸法自相故。

巳五、知總

云何於彼總合了知？謂由總合所緣作意。

謂由總合所緣作意者：由是能了諸法共相故。

辰四、結

如是一切總略為一，名為知法。如是名為菩薩知法。

卯二、知義<sup>4</sup> 辰一、十義<sup>4</sup> 巳一、標

善男子！彼諸菩薩，由十種相了知於義。

巳二、列

一者、知盡所有性，二者、知如所有性，三者、知能取義，四者、知所取

義，五者、知建立義，六者、知受用義，七者、知顛倒義，八者、知無倒義，九者、知雜染義，十者、知清淨義。

已三、釋<sup>10</sup>

午一、盡所有性<sup>2</sup> 未一、略攝

善男子！盡所有性者，謂諸雜染、清淨法中所有的一切品別邊際，是名此中盡所有性。

未二、舉例

如五數蘊、六數內處、六數外處，如是一切。

午二、如所有性<sup>2</sup> 未一、略釋

如所有性者，謂即一切染淨法中所有真如，是名此中如所有性。

未二、廣辨<sup>2</sup> 申一、釋七種<sup>2</sup> 酉一、總標

此復七種。

酉二、列釋

一者、流轉真如，謂一切行無先後性。

謂一切行無先後性者：諸有情類無始時來生死流轉，乃至盡未來際無有窮盡，當知唯是諸行因果展轉相續，由是故說無先後性。

二者、相真如，謂一切法補特伽羅無我性及法無我性。三者、了別真如，謂一切行唯是識性。

謂一切行唯是識性者：識所緣境，唯識所現，非一切行離識別有，由是說言唯是識性。

四者、安立真如，謂我所說諸苦聖諦。

安立真如等者：本地分說：一切所依自體，麤重所隨故，麤重所生故，麤重自性故，諸佛如來安立為苦，所謂由行苦故。（陵本二卷二頁<sup>113</sup>）由是道理，諸苦聖諦名安立真如。

五者、邪行真如，謂我所說諸集聖諦。

邪行真如等者：此中邪行，謂諸煩惱，及煩惱增上所生諸業應知。

六者、清淨真如，謂我所說諸滅聖諦。七者、正行真如，謂我所說諸道聖諦。

申二、總料簡

當知此中，由流轉真如、安立真如、邪行真如故，一切有情平等平等。

由流轉真如等者：此中義顯有情業果相續，說名平等平等。

由相真如、了別真如故，一切諸法平等平等。

由相真如等者：此中義顯諸法不二，說名平等平等。

由清淨真如故，一切聲聞菩提、獨覺菩提、阿耨多羅三藐三菩提平等平等。

由清淨真如等者：此中義顯諸解脫身清淨無二，說名平等平等。

由正行真如故，聽聞正法，緣總境界勝奢摩他、毗鉢舍那所攝受慧平等平等。

正行真如等者：此中義顯聽聞正法，緣總境界，如次能生法住正智及真實智，說名平等平等。

午三、能取義

能取義者，謂內五色處，若心、意、識及諸心法。

午四、所取義

所取義者，謂外六處。又能取義亦所取義。

又能取義亦所取義者：謂如前說內五色處，若心、意、識及諸心法，亦為所取義故。

午五、建立義<sup>2</sup> 未一、標

建立義者，謂器世界。於中可得建立一切諸有情界。

可得建立一切諸有情界者：謂器世界是諸有情生所依處故。

未二、釋

謂一村田，若百村田，若千村田，若百千村田；或一大地至海邊際，此百此千，若此百千；或一瞻部洲，此百此千，若此百千；或一四大洲，此百此千，若此百千；或一小千世界，此百此千，若此百千；或一中千世界，此百此千，若此百千；或一三千大千世界，此百此千，若此百千；或此拘胝，此百拘胝，此千拘胝，此百千拘胝；或此無數，此百無數，此千無數，此百千無數；或三千大千世界無數百千微塵量等，於十方面無量無數諸器世界。

午六、受用義

受用義者，謂我所說諸有情類，為受用故，攝受資具。

午七、顛倒義

顛倒義者，謂即於彼能取等義，無常計常，想倒、心倒、見倒；苦計為樂、不淨計淨、無我計我，想倒、心倒、見倒。

午八、無倒義

無倒義者，與上相違，能對治彼，應知其相。

午九、雜染義

雜染義者，謂三界中三種雜染。一者、煩惱雜染，二者、業雜染，三者、生雜染。

午十、清淨義

清淨義者，謂即如是三種雜染所有離繫菩提分法。

所有離繫菩提分法者：由念住等一切菩提分法，能令三種雜染究竟離繫，



由是說言離繫菩提分法。

巳四、結

善男子！如是十種，當知普攝一切諸義。

辰二、五義<sup>5</sup> 巳一、標

復次，善男子！彼諸菩薩，由能了知五種義故，名為知義。

巳二、徵

何等五義？

巳三、列

一者、遍知事，二者、遍知義，三者、遍知因，四者、得遍知果，五者、於此覺了。

巳四、釋<sup>5</sup> 午一、遍知事<sup>2</sup> 未一、標

善男子！遍知事者，當知即是一切所知。

未二、列

謂或諸蘊，或諸內處，或諸外處，如是一切。

午二、遍知義<sup>2</sup> 未一、釋

遍知義者，乃至所有品類差別所應知境，或世俗故，或勝義故，或功德故，或過失故，緣故，世故，或生、或住、或壞相故，

緣故世故等者：緣謂四緣，一、因緣，二、等無間緣，三、所緣緣，四、增上緣。世謂三世，一、過去，二、未來，三、現在。諸有為法，先時未生，今最初生，是名生相。今既生已，唯生剎那隨轉，是名住相。生剎那後，剎那不住，是名壞相。

或如病等故，或苦集等故，或真如、實際、法界等故，或廣略故，或一向記故，或分別記故，或反問記故，或置記故，或隱密故，或顯了故。

未二、結

如是等類，當知一切名遍知義。

或一向記故等者：本地分說：又有四種請問記論，能斷所疑，能悟未悟，

又能任持勝決擇力。謂於法實相應一向記，於諸有情業果異熟應分別記，於隱密說非一向問應詰問記，於不如理應當置記。於此問中，云何名記？謂記彼問，言佛世尊於斯不記。（陵本十四卷十頁<sup>1215</sup>）此應準知。

午三、遍知因<sup>2</sup> 未一、標

言遍知因者，當知即是能取前二菩提分法。

未二、列

謂諸念住或正斷等。

能取前二菩提分法者：謂念住等菩提分法，於前所說遍知事及遍知義為能取故。

午四、得遍知果

得遍知果者，謂貪恚癡斷毗奈耶，及貪恚癡一切永斷諸沙門果，及我所說聲聞、如來，若共不共、世出世間所有功德，於彼作證。

貪恚癡斷毗奈耶等者：貪瞋癡法諸纏斷故，說名為斷。由能調伏，名毗奈

耶。若隨眠斷，說名永斷，由是能證諸沙門果。

午五、於此覺了

於此覺了者，謂即於此作證法中諸解脫智，廣為他說宣揚開示。

巳五、結

善男子！如是五義，當知普攝一切諸義。

諸解脫智等者：解脫知見，名解脫智。由此能為他說宣揚開示諸解脫道，令覺了故。

辰三、四義<sup>4</sup> 巳一、標

復次，善男子！彼諸菩薩，由能了知四種義故，名為知義。

巳二、徵

何等四義？

巳三、列

一者、心執受義，二者、領納義，三者、了別義，四者、雜染、清淨義。

巳四、結

善男子！如是四義，當知普攝一切諸義。

何等四義等者：此中四義，如次配釋身、受、心、法應知。

辰四、三義<sup>5</sup> 巳一、標

復次，善男子！彼諸菩薩，由能了知三種義故，名為知義。

巳二、徵

何等三義？

巳三、列

一者、文義，二者、義義，三者、界義。

巳四、釋<sup>3</sup> 午一、文義

善男子！言文義者，謂名身等。

午二、義義<sup>2</sup> 未一、標

義義者，當知復有十種。

未二、列

一者、真實相，

真實相者：諸佛說法唯依二諦，謂世俗諦及勝義諦。如是二諦名真實相。

二者、遍知相，三者、永斷相，四者、作證相，五者、修習相，

遍知相等者：如前已說遍知苦諦、永斷集諦、觸證滅諦、修習道諦。（陵

本五十五卷十六頁<sup>4453</sup>）其義應知。

六者、即彼真實相等品差別相，

即彼真實相等品差別相者：謂彼二諦，四諦所攝，諸法有多品類差別故。

七者、所依、能依相屬相，

所依能依相屬相者：謂所依身與能依法更相繫屬。若未轉依，繫屬雜染；若已轉依，繫屬清淨。

八者、即遍知等障礙法相，九者、即彼隨順法相，十者、不遍知等及遍知等過患、功德相。

午三、界義<sup>2</sup> 未一、標

言界義者，謂五種界。

未二、列

一者、器世界，二者、有情界，三者、法界，四者、所調伏界，五者、調伏加行界。

已五、結

善男子！如是三義，當知普攝一切諸義。

謂五種界等者：本地分說：又諸菩薩，於五無量能起一切善巧作用。（陵本四十六卷十五頁<sup>3715</sup>）此五種界，如彼別釋應知。

丑十三、知義差別門<sup>2</sup> 寅一、慈氏問

世尊！若聞所成慧了知其義，若思所成慧了知其義，若奢摩他、毗鉢舍那修所成慧了知其義，此何差別？

寅二、世尊告<sup>2</sup> 卯一、釋<sup>3</sup> 辰一、聞所成慧

善男子！聞所成慧依止於文，但如其說，未善意趣，未現在前，

未現在前者：唯緣名境，不了實義，名未現前，無所知事同分三摩地所行影像現前故。

隨順解脫，未能領受成解脫義。

未能領受成解脫義者：謂於解脫能得、能成決定實義，未能信解領受彼相故。

辰二、思所成慧

思所成慧亦依於文，不唯如說，亦善意趣，未現在前，轉順解脫，未能領受成解脫義。

辰三、修所成慧

若諸菩薩修所成慧，亦依於文，亦不依文，亦如其說，亦不如說，能善意趣，所知事同分三摩地所行影像現前，極順解脫，已能領受成解脫義。

卯二、結



善男子！是名三種知義差別。

丑十四、智見差別門<sup>2</sup> 寅一、慈氏問

世尊！修奢摩他、毗鉢舍那諸菩薩眾，知法、知義，云何為智？云何為見？

寅二、世尊告<sup>2</sup> 卯一、標許為說

善男子！我無量門宣說智、見二種差別，今當為汝略說其相。

卯二、別釋智見

若緣總法修奢摩他、毗鉢舍那所有妙慧，是名為智；若緣別法修奢摩他、毗鉢舍那所有妙慧，是名為見。

我無量門宣說智見二種差別者：智、見差別有多種類，如攝事分廣釋應知。（陵本八十六卷九頁<sup>6512</sup>）

丑十五、除遣諸相門<sup>3</sup> 寅一、總辨除遣<sup>2</sup> 卯一、慈氏問

世尊！修奢摩他、毗鉢舍那諸菩薩眾，由何作意，何等云何除遣諸相？

卯二、世尊告<sup>2</sup> 辰一、答初二問

善男子！由真如作意除遣法相及與義相。

辰二、答第三問<sup>2</sup> 巳一、舉於名相

若於其名及名自性無所得時，亦不觀彼所依之相，如是除遣。

亦不觀彼所依之相等者：色等想事名所依相。本地分說：若於彼事起能增益有體自性執，名增益想；起能損減唯事勝義執，名損減想。彼於此想能正除遣，能斷、能捨，故名除遣。（陵本三十六卷十九頁<sup>2990</sup>）其義應知。

巳二、例於句等

如於其名，於句、於文、於一切義，當知亦爾。乃至於界及界自性無所得時，亦不觀彼所依之相，如是除遣。

乃至於界等者：前說知法、知義中，名句文等為初，界義為後。今於此中，不具一一，置乃至言。

寅二、簡真如相<sup>2</sup> 卯一、慈氏問

世尊！諸所了知真如義相，此真如相亦可遣不？

卯二、世尊告<sup>2</sup> 辰一、無相可遣

善男子！於所了知真如義中都無有相，亦無所得，當何所遣。

辰二、非餘能伏

善男子！我說了知真如義時，能伏一切法義之相，非此了達餘所能伏。

寅三、出能觀心<sup>2</sup> 卯一、慈氏問<sup>2</sup> 辰一、引教

世尊！如世尊說濁水器喻、不淨鏡喻、撓泉池喻，不任觀察自面影相。若堪任者，與上相違。如是若有不善修心，則不堪任如實觀察所有真如；若善修心，堪任觀察。

辰二、舉問

此說何等能觀察心？依何真如而作是說？

卯二、世尊告<sup>2</sup> 辰一、答初問

善男子！此說三種能觀察心，謂聞所成能觀察心、若思所成能觀察心、若修所成能觀察心。

辰二、答後問

依了別真如作如是說。

丑十六、依空遣相門<sup>2</sup> 寅一、別遣諸相<sup>2</sup> 卯一、慈氏問

世尊！如是了知法義菩薩，為遣諸相勤修加行，有幾種相難可除遣？誰能除遣？

卯二、世尊告<sup>2</sup> 辰一、舉能遣空<sup>3</sup> 巳一、標

善男子！有十種相，空能除遣。

巳二、徵

何等為十？

巳三、釋<sup>10</sup> 午一、一切法空

一者、了知法義故，有種種文字相，此由一切法空能正除遣。

午二、相空及無先後空

二者、了知安立真如義故，有生滅住異性相續隨轉相，此由相空及無先後空

能正除遣。

午三、內空及無所得空

三者、了知能取義故，有顧戀身相及我慢相，此由內空及無所得空能正除遣。

午四、外空

四者、了知所取義故，有顧戀財相，此由外空能正除遣。

午五、內外空及本性空

五者、了知受用義，男女承事資具相應故，有內安樂相、外淨妙相，此由內外空及本性空能正除遣。

午六、大空

六者、了知建立義故，有無量相，此由大空能正除遣。

午七、有為空

七者、了知無色故，有內寂靜解脫相，此由有為空能正除遣。

午八、畢竟空無性空無性自性空及勝義空

八者、了知相真如義故，有補特伽羅無我相、法無我相、若唯識相及勝義相，此由畢竟空、無性空、無性自性空及勝義空能正除遣。

午九、無為空及無變異空

九者、了知清淨真如義故，有無為相、無變異相，此由無為空、無變異空能正除遣。

午十、空空

十者、即於彼相對治空性作意思惟故，有空性相，此由空空能正除遣。

有十種相空能除遣者：相有十種，如文可知。由十七空，能正除遣。謂一切法空、相空、無先後空、內空、無所得空、外空、內外空、本性空、大空、有為空、畢竟空、無性空、無性自性空、勝義空、無為空、無變異空、空空。辯中邊論說有十六，謂內空、外空、內外空、大空、空空、勝義空、有為空、無為空、畢竟空、無際空、無散空、本性空、相空、一切法空、無性空、無性自性空。名少分別，義亦不同，不應準釋。今此略

義，謂一切法性離言說，是名一切法空，由是能正除遣種種文字相、諸有為相。性非勝義，是名相空，由是能正除遣生滅住異性相。諸行流轉無先後性，是名無先後空，由是能正除遣相續隨轉相。內無色處，若心、意識及諸心法，待所取故，假名能取，非離所取有能取性，是名內空，由是能正除遣顧戀身相。唯有諸行，都無有我，是名無所得空，由是能正除遣我慢相。色等外處，觀待能取，假名所取，非離能取有所取相，是名外空，由是能正除遣顧戀財相。根境和合，能為受用，然實非有彼和合性，名內外空，由是能正除遣內安樂相。又彼男女承事資具貪相應故，淨妙相現，性非淨妙，名本性空，由是能正除遣外淨妙相。諸器世間住相寬廣，假名為大，色非有故，此亦非有，是名大空，由是能正除遣無量相。入無餘依涅槃界位，一切相滅，名有為空，由是能正除遣內寂靜解脫相。我及有情唯假安立，名畢竟空；諸法自性非如言有，名無性空；諸識所緣，唯識所現，即以外境無性為其自性，不應執有唯識相性，是名無性自性空；

真如能伏一切義相，名勝義空；此四種空，如其次第，能正除遣補特伽羅無我相、法無我相、若唯識相及勝義相。無為無相，名無為空；待有為法，說無變異，唯自內證，非如言有，是名無變異空；如次能正除遣無為相及無變異相。能對治相空智空故，說名空空，由是能正除遣空性相。

辰二、釋所遣相<sup>2</sup> 巳一、慈氏問

世尊！除遣如是十種相時，除遣何等？從何等相而得解脫？

巳二、世尊告<sup>2</sup> 午一、答前問

善男子！除遣三摩地所行影像相，從雜染縛相而得解脫，彼亦除遣。

彼亦除遣者：謂彼雜染縛相亦除遣故。

午二、明說相<sup>3</sup> 未一、標

善男子！當知就勝，說如是空治如是相，非不一一治一切相。

未二、喻

譬如無明，非不能生乃至老死諸雜染法，就勝但說能生於行，由是諸行親近



緣故。

未三、例

此中道理，當知亦爾。

寅二、總空性相<sup>2</sup> 卯一、慈氏問

世尊！此中何等空是總空性相？若諸菩薩了知是已，無有失壞，於空性相離增上慢。

卯二、世尊告<sup>2</sup> 辰一、歎許為說

爾時世尊歎慈氏菩薩曰：善哉！善哉！善男子！汝今乃能請問如來如是深義，令諸菩薩於空性相無有失壞。何以故？善男子！若諸菩薩於空性相有失壞者，便為失壞一切大乘。是故汝應諦聽諦聽，當為汝說總空性相。

辰二、正顯彼相

善男子！若於依他起相及圓成實相中，一切品類雜染、清淨遍計所執相畢竟遠離性，及於此中都無所得，如是名為於大乘中總空性相。

及於此中都無所得者：顯揚論說：無所得者，推求諸法，不見自性。非一切種都無所得，然於遍計所執自性無所得時，亦不觀彼依他自相。（顯揚論二十卷五頁）其義應知。

丑十七、能攝門<sup>2</sup> 寅一、慈氏問

世尊！此奢摩他、毗鉢舍那，能攝幾種勝三摩地？

寅二、世尊告

善男子！如我所說，無量聲聞、菩薩、如來有無量種勝三摩地，當知一切皆此所攝。

丑十八、因果門<sup>2</sup> 寅一、因<sup>2</sup> 卯一、慈氏問

世尊！此奢摩他、毗鉢舍那，以何為因？

卯二、世尊告

善男子！清淨尸羅、清淨聞思所成正見以為其因。

寅二、果<sup>2</sup> 卯一、慈氏問

世尊！此奢摩他、毗鉢舍那，以何為果？

卯二、世尊告<sup>2</sup> 辰一、心慧清淨

善男子！善清淨心、善清淨慧以為其果。

善清淨心善清淨慧者：謂諸無學貪愛永滅，證心解脫，是名善清淨心。永離無明，證慧解脫，是名善清淨慧。

辰二、世出世善

復次，善男子！一切聲聞及如來等所有世間及出世間一切善法，當知皆是此奢摩他、毗鉢舍那所得之果。

丑十九、作業門<sup>2</sup> 寅一、慈氏問

世尊！此奢摩他、毗鉢舍那，能作何業？

寅二、世尊告

善男子！此能解脫二縛為業，所謂相縛及麤重縛。

丑二十、能障門<sup>2</sup> 寅一、五繫攝<sup>2</sup> 卯一、慈氏問

世尊！如佛所說五種繫中，幾是奢摩他障？幾是毗鉢舍那障？幾是俱障？

卯二、世尊告<sup>3</sup> 辰一、奢摩他障

善男子！顧戀身財，是奢摩他障。

辰二、毗鉢舍那障

於諸聖教不得隨欲，是毗鉢舍那障。

辰三、俱障<sup>2</sup> 巳一、標

樂相雜住、於少喜足，當知俱障。

巳二、釋

由第一故，不能造修；由第二故，所修加行不到究竟。

如佛所說五種繫者：本地分中煩惱差別，說有五種拘礙。一、顧戀其身，二、顧戀諸欲，三、樂相雜住，四、闕隨順教，五、得微少善便生喜足。  
(陵本八卷七頁<sup>574</sup>)此五種繫，即彼異名應知。

寅二、五蓋攝<sup>2</sup> 卯一、慈氏問

世尊！於五蓋中，幾是奢摩他障？幾是毗鉢舍那障？幾是俱障？

卯二、世尊告

善男子！掉舉惡作，是奢摩他障；惛沈睡眠、疑，是毗鉢舍那障；貪欲、瞋恚，當知俱障。

丑二十一、圓滿清淨門<sup>2</sup>

寅一、奢摩他道<sup>2</sup>

卯一、慈氏問

世尊！齊何名得奢摩他道圓滿清淨？

卯二、世尊告

善男子！乃至所有惛沈睡眠正善除遣，齊是名得奢摩他道圓滿清淨。

乃至所有惛沈睡眠正善除遣者：謂修瑜伽行者，為欲對治惛沈睡眠，應時時間修習觀相，策舉其心。從是以後，心住正捨，不為惛沈睡眠之所纏擾，是名惛沈睡眠正善除遣。

寅二、毗鉢舍那道<sup>2</sup>

卯一、慈氏問

世尊！齊何名得毗鉢舍那道圓滿清淨？

卯二、世尊告

善男子！乃至所有掉舉惡作正善除遣，齊是名得毗鉢舍那道圓滿清淨。

乃至所有掉舉惡作正善除遣者：謂修瑜伽行者，為欲對治掉舉惡作，應時時間修習止相，寂靜其心。從是以後，心住正捨，不為掉舉惡作之所纏擾，是名掉舉惡作正善除遣。

丑二十二、散動門<sup>2</sup> 寅一、慈氏問

世尊！若諸菩薩，於奢摩他、毗鉢舍那現在前時，應知幾種心散動法？

寅二、世尊告<sup>3</sup> 卯一、標

善男子！應知五種。

卯二、列

一者、作意散動，二者、外心散動，三者、內心散動，四者、相散動，五者、麤重散動。

卯三、釋<sup>5</sup> 辰一、作意散動

善男子！若諸菩薩捨於大乘相應作意，墮在聲聞、獨覺相應諸作意中，當知是名作意散動。

辰二、外心散動

若於其外五種妙欲諸雜亂相所有尋思、隨煩惱中，及於其外所緣境中，縱心流散，當知是名外心散動。

若於其外五種妙欲等者：此中二義，釋名外心散動。五種妙欲諸雜亂相，說名為外。以此為緣，起欲、恚、害等諸惡尋思，及貪欲蓋等諸隨煩惱，令心散動，是為初義。或復於外五種妙欲所緣境中，縱心流散，令心散動，是第二義。

辰三、內心散動

若由惛沈及以睡眠，或由沈沒，

或由沈沒者：謂不守根門、食不知量、初夜後夜不常惺寤勤修觀行、不正知住，乃至廣說其心惛闇，於勝境界不樂攀緣，是名沈相。義如本地分

說。（陵本十一卷十九頁<sup>936</sup>）

或由愛味三摩鉢底，或由隨一三摩鉢底諸隨煩惱之所染汙，當知是名內心散動。

或由隨一三摩鉢底諸隨煩惱之所染汙者：本地分說：有四得靜慮者，一、愛上靜慮者，二、見上靜慮者，三、慢上靜慮者，四、疑上靜慮者。（陵本十二卷二頁<sup>964</sup>）此說隨一三摩鉢底諸隨煩惱，如彼釋義應知。

辰四、相散動

若依外相，於內等持所行諸相作意思惟，名相散動。

若依外相等者：辯中邊說：矯現相已，修定加行，名相散亂。此應準釋。矯現相者，謂為誑他，矯詐示現諸根無掉、諸根無動、諸根寂靜故。

辰五、麤重散動

若內作意為緣生起所有諸受，由麤重身計我起慢，當知是名麤重散動。

若內作意為緣等者：定地作意，名內作意。以此為緣，能生定地喜、樂、



捨受。於此所依羸重受中不了知故，計我起慢，是名羸重散動。

丑二十三、治障門<sup>2</sup> 寅一、慈氏問

世尊！此奢摩他、毗鉢舍那，從初菩薩地乃至如來地，能對治何障？

寅二、世尊告<sup>2</sup> 卯一、菩薩地<sup>10</sup> 辰一、初地障

善男子！此奢摩他、毗鉢舍那，於初地中，對治惡趣煩惱、業、生雜染障。

於初地中對治惡趣等者：由能對治惡趣所攝煩惱、業、生三種雜染為因緣故，彼地菩薩不墮惡趣，名已證入正性離生。

辰二、第二地障

第二地中，對治微細誤犯現行障。

辰三、第三地障

第三地中，對治欲貪障。

第三地中對治欲貪障者：由能對治欲貪為因緣故，彼地菩薩名增上心清淨攝。

辰四、第四地障

**第四地中，對治定愛及法愛障。**

對治定愛等者：由能對治定愛及與法愛為因緣故，彼地菩薩名增上慧清淨攝。言定愛者，謂於已得世間圓滿等持、等至起味著故。言法愛者，謂於已得圓滿聞持陀羅尼起染著故。

辰五、第五地障

**第五地中，對治生死涅槃一向背趣障。**

辰六、第六地障

**第六地中，對治相多現行障。**

辰七、第七地障

**第七地中，對治細相現行障。**

辰八、第八地障

**第八地中，對治於無相作功用及於有相不得自在障。**

辰九、第九地障

第九地中，對治於一切種善巧言辭不得自在障。

辰十、第十地障

第十地中，對治不得圓滿法身證得障。

卯二、如來地<sup>2</sup> 辰一、對治最極微細二障

善男子！此奢摩他、毗鉢舍那，於如來地，對治極微細、最極微細煩惱障及所知障。

辰二、建立最極清淨法身

由能永害如是障故，究竟證得無著無礙一切智見，依於所作成滿所緣，建立最極清淨法身。

依於所作成滿所緣等者：前說四種所緣境事，一、有分別影像所緣境事，二、無分別影像所緣境事，三、事邊際所緣境事，四、所作成辦所緣境事。今此所作成滿所緣，即其第四。如下又說：永害一切相、麤重故，漸

次於彼後後地中，如鍊金法陶鍊其心，乃至證得阿耨多羅三藐三菩提，又得所作成滿所緣。由是依此建立最極清淨法身。

丑二十四、修證菩提門<sup>2</sup> 寅一、慈氏問

世尊！云何菩薩依奢摩他、毗鉢舍那勤修行故，證得阿耨多羅三藐三菩提？

寅二、世尊告<sup>2</sup> 卯一、釋<sup>3</sup> 辰一、加行位<sup>2</sup> 巳一、出依真如

善男子！若諸菩薩已得奢摩他、毗鉢舍那，依七真如，於如所聞、所思法中，由勝定心，於善審定、於善思量、於善安立真如性中內正思惟。

於善審定等者：由隨尋思行毗鉢舍那，於真如性如理作意，思量推察，名善審定及善思量。由隨伺察行毗鉢舍那，如所安立復審觀察，名善安立。

巳二、明捨細相<sup>2</sup> 午一、標

彼於真如正思惟故，心於一切細相現行尚能棄捨，何況麤相。

午二、釋

善男子！言細相者，謂心所執受相，或領納相，或了別相，或雜染、清淨相，

心所執受相等者：身、受、心、法，如次配釋應知。

或內相，或外相，或內外相，或謂我當修行一切利有情相，或正智相，或真如相，或苦集滅道相，或有為相，或無為相，或有常相，或無常相，或苦有變異性相，或苦無變異性相，

苦有變異性相等者：苦苦、壞苦境界緣生，名有變異。行苦異熟所引，名無變異。

或有為異相相，或有為同相相，

有為異相相等者：諸有為法前後變異，不相似生，是名異相。若前後生相似相續，是名同相。

或知一切是一切已有一切相，

或知一切等者：攝事分說：略有二種一切。一、少分一切，二、一切一切。如說一切皆無常者，當知此依少分一切；唯一切行，非無為故。言一切法皆無我者，當知此依一切一切。（陵本八十九卷二頁<sup>6722</sup>）此應準釋。

或補特伽羅無我相，或法無我相。於彼現行心能棄捨。

辰二、見道位<sup>3</sup> 巳一、善修通達

彼既多住如是行故，於時時間，從其一切繫、蓋、散動善修治心。

從其一切繫蓋散動者：如前說有五繫、五蓋及五散動，此應準知。

從是已後，於七真如，有七各別自內所證通達智生，名為見道。

巳二、證入初地

由得此故，名入菩薩正性離生，生如來家，證得初地。又能受用此地勝德。

巳三、證三所緣

彼於先時，由得奢摩他、毗鉢舍那故，已得二種所緣，謂有分別影像所緣，及無分別影像所緣。彼於今時得見道故，更證得事邊際所緣。

更證得事邊際所緣者：本地分中聲聞地說：云何事邊際性？謂若所緣盡所有性、如所有性，乃至廣說。（陵本二十六卷十五頁<sup>2214</sup>）此應準釋。

辰三、修道位<sup>3</sup> 巳一、進趣思惟

復於後後一切地中，進趣修道，即於如是三種所緣作意思惟。

已二、遣相麤重

譬如有人以其細楔出於麤楔，如是菩薩依此以楔出楔方便遣內相故，一切隨順雜染分相皆悉除遣；相除遣故，麤重亦遣。

已三、具證所緣

永害一切相、麤重故，漸次於彼後後地中，如鍊金法陶鍊其心，乃至證得阿耨多羅三藐三菩提，又得所作成滿所緣。

又得所作成滿所緣者：本地分中聲聞地說：云何所作成辦？謂修觀行者，於奢摩他、毗鉢舍那，若修、若習、若多修習為因緣故，諸緣影像所有作意皆得圓滿。此圓滿故，使得轉依，一切麤重悉皆息滅。得轉依故，超過影像。（陵本二十六卷十五頁<sup>2216</sup>）此應準釋。

卯二、結

善男子！如是菩薩於內止觀正修行故，證得阿耨多羅三藐三菩提。

丑二十五、引發威德門<sup>2</sup> 寅一、慈氏問

世尊！云何修行引發菩薩廣大威德？

寅二、世尊告<sup>4</sup> 卯一、標

善男子！若諸菩薩善知六處，便能引發菩薩所有廣大威德。

卯二、列

一者、善知心生，二者、善知心住，三者、善知心出，四者、善知心增，五者、善知心減，六者、善知方便。

卯三、釋<sup>6</sup> 辰一、善知心生<sup>3</sup> 巳一、徵

云何善知心生？

巳二、釋

謂如實知十六行心生起差別，是名善知心生。

巳三、廣

十六行心生起差別者。一者、不可覺知堅住器識生，謂阿陀那識。



不可覺知堅住器識等者：阿陀那識甚深細故，依彼所變器世間相，相續久住，難可了知，由是名為不可覺知堅住器識。

二者、種種行相所緣識生，謂頓取一切色等境界分別意識，及頓取內外境界覺受，或頓於一念瞬息須臾現入多定、見多佛土、見多如來分別意識。

頓取內外境界覺受者：謂於定非定地現所受境，分別意識於彼一切明了而轉，能頓取故。

三者、小相所緣識生，謂欲界繫識。四者、大相所緣識生，謂色界繫識。五者、無量相所緣識生，謂空、識無邊處繫識。六者、微細相所緣識生，謂無所有處繫識。七者、邊際相所緣識生，謂非想非非想處繫識。八者、無相識生，謂出世識及緣滅識。九者、苦俱行識生，謂那落迦識。十者、雜受俱行識生，謂欲行識。十一、喜俱行識生，謂初二靜慮識。十二、樂俱行識生，謂第三靜慮識。十三、不苦不樂俱行識生，謂從第四靜慮乃至非想非非想處識。十四、染汙俱行識生，謂諸煩惱及隨煩惱相應識。十五、善俱行識生，

謂信等相應識。十六、無記俱行識生，謂彼俱不相應識。

辰二、善知心住

云何善知心住？謂如實知了別真如。

謂如實知了別真如者：謂一切行唯是識性，是名了別真如。住勝定心，通達如是心一境性，是故說名善知心住。

辰三、善知心出

云何善知心出？謂如實知出二種縛，所謂相縛及麤重縛。此能善知，應令其心從如是出。

辰四、善知心增

云何善知心增？謂如實知能治相縛、麤重縛心，彼增長時、彼積集時，亦得增長、亦得積集，名善知增。

云何善知心增等者：謂彼相縛及麤重縛。能對治道現行增長時，種子積集時，心相應故，亦得增長、亦得積集。此如實知，名善知增。

辰五、善知心滅

云何善知心滅？謂如實知彼所對治相及麤重所雜染心，彼衰退時、彼損滅時，此亦衰退、此亦損滅，名善知滅。

云何善知心滅等者：謂彼所對治。能雜染心相衰退時，麤重損滅時，心亦衰退、損滅。此如實知，名善知滅。

辰六、善知加行

云何善知加行？謂如實知解脫、勝處及與遍處，或修、或遣。

卯四、結

善男子！如是菩薩於諸菩薩廣大威德，或已引發、或當引發、或現引發。

丑二十六、涅槃受滅門<sup>2</sup> 寅一、慈氏問

世尊！如世尊說：於無餘依涅槃界中，一切諸受無餘永滅。何等諸受於此永滅？

寅二、世尊告<sup>5</sup> 卯一、標

善男子！以要言之，有二種受無餘永滅。

卯二、徵

何等為二？

卯三、列

一者、所依麤重受，二者、彼果境界受。

所依麤重受等者：所依自體，不苦不樂受所隨逐，名所依麤重受，諸行麤重之所攝故。境界緣生苦受、樂受，名彼果境界受，自增上果為境界故。

卯四、廣<sup>2</sup> 辰一、所依麤重受<sup>3</sup> 巳一、標

所依麤重受，當知有四種。

巳二、列

一者、有色所依受，二者、無色所依受，三者、果已成滿麤重受，四者、果未成滿麤重受。

巳三、釋

果已成滿受者，謂現在受。果未成滿受者，謂未來因受。

辰二、彼果境界受<sup>2</sup> 巳一、標

彼果境界受，亦有四種。

巳二、列

一者、依持受，二者、資具受，三者、受用受，四者、顧戀受。

依持受等者：此說依持，略有六種。一、建立依持，二、藏覆依持，三、豐稔依持，四、安隱依持，五、日月依持，六、食依持。本地分中別釋其相應知。（陵本二卷十六頁<sup>163</sup>）受用此六依持為境界故，名依持受。資具有十，一、食，二、飲，三、乘，四、衣，五、莊嚴具，六、歌笑舞樂，七、香鬘塗末，八、什物之具，九、照明，十、男女受行。如本地分說應知。（陵本二卷十七頁<sup>165</sup>）受用十種資具為境界故，名資具受。諸有情類，受用所感異熟苦樂差別為境界故，名受用受；顧戀身財為境界故，名顧戀受。

卯五、辨<sup>2</sup> 辰一、於有餘依<sup>2</sup> 巳一、一受滅

於有餘依涅槃界中，果未成滿受一切已滅，領彼對治明觸生受領受共有，或復彼果已成滿受。

巳二、二受滅

又二種受一切已滅，唯現領受明觸生受。

辰二、於無餘依<sup>2</sup> 巳一、明觸生受滅

於無餘依涅槃界中，般涅槃時，此亦永滅。

巳二、結名無餘滅

是故說言於無餘依涅槃界中，一切諸受無餘永滅。

領彼對治明觸生受等者：明觸為緣之所生受，不為愛緣，能對治愛，是名對治明觸生受。器世間相共分別起，是名共有。如前已說：相等諸物，或由不共分別為因，或復由共分別為因。若由不共分別所起，無分別者，彼亦隨滅。若共分別之所起者，分別雖無，由他分別所任持故，而不永滅。

若不爾者，他之分別應無其果。彼雖不滅，得清淨者於彼事中正見清淨。

（陵本七十三卷四頁<sup>5630</sup>）此說領受共有，準彼當知。

子二、結讚勵

爾時世尊說是語已，告慈氏菩薩曰：善哉！善哉！善男子！汝今善能依止圓滿最極清淨妙瑜伽道請問如來。汝於瑜伽已得決定最極善巧，吾已為汝宣說圓滿最極清淨妙瑜伽道，所有一切過去、未來正等覺者，已說、當說皆亦是。諸善男子、若善女人，皆應依此勇猛精進，當正修學。

癸二、重頌

爾時世尊欲重宣此義而說頌曰：

於法假立瑜伽中 若行放逸失大義

依止此法及瑜伽 若正修行得大覺

見有所得求免難 若謂此見為得法

慈氏彼去瑜伽遠 譬如大地與虛空

利生堅固而不作 悟已勤修利有情

智者作此窮劫量 便得最上離染喜

若人為欲而說法 彼名捨欲還取欲

愚癡得法無價寶 反更遊行而乞丐

於諍誼雜戲論著 應捨發起上精進

為度諸天及世間 於此瑜伽汝當學

若行放逸失大義者：成就前際俱行、後際俱行、中際俱行、先時所作，及俱隨行所有放逸，名行放逸。不能成辦自義、他義，名失大義。

見有所得求免難者：謂於依他起相及圓成實相中，見有所得，而欲希求解脫彼彼品類雜染、清淨遍計所執相，此甚為難。或復於名、於句、於文、於一切義乃至於界，及彼自性見有所得，而欲除遣法相及與義相，亦甚為難，義相違故。

利生堅固而不作者：此中堅固，謂彼愚癡。決擇分說：堅固愚癡者，謂如



有一，畢竟無有般涅槃法，所有愚癡自性堅固，乃至諸佛亦不能拔。（陵本六十卷十七頁<sup>4895</sup>）由彼類人畢竟不能作利生事，是故此中作如是說。

便得最上離染喜者：攝大乘論有二頌云：諸佛證得五性喜，皆由等證自界故。離喜都由不證此，故求喜者應等證。由能無量及事成，法味義德俱圓滿，得喜最勝無過失，諸佛見常無盡故。（攝大乘論三卷十六頁）此應準釋。

於諍誼雜戲論著應捨者：謂於諍論誼眾雜住及與戲論，若有樂著，能障遠離，應棄捨故。

壬二、結名法門

爾時慈氏菩薩復白佛言：世尊！於是解深密法門中，當何名此教？我當云何奉持？佛告慈氏：此名瑜伽了義之教，於此瑜伽了義之教，汝當奉持。

壬三、說果勝利

說此瑜伽了義教時，於大會中，有六百千眾生發阿耨多羅三藐三菩提心；三

百千聲聞遠塵離垢，於諸法中得法眼淨；一百五十千聲聞諸漏永盡，心得解脫；七十五千菩薩獲得廣大瑜伽作意。

瑜伽師地論科句披尋記卷第七十七

瑜伽師地論科句披尋記卷第七十八

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之七

辛六、分別地波羅蜜多<sup>3</sup>

壬一、正廣分別<sup>2</sup>

癸一、長行<sup>8</sup>

子一、辨地攝<sup>2</sup>

丑一、

觀自在問

復次，依乘假立，分別解說如實大乘，當知如解深密經中，觀自在菩薩白佛言：世尊！如佛所說菩薩十地，所謂極喜地、離垢地、發光地、焰慧地、極難勝地、現前地、遠行地、不動地、善慧地、法雲地，復說佛地為第十一。如是諸地，幾種清淨？幾分所攝？

丑二、佛告<sup>2</sup>

寅一、總標

佛告觀自在菩薩曰：善男子！當知諸地，四種清淨，十一分攝。

寅二、別釋<sup>2</sup> 卯一、四清淨攝<sup>3</sup> 辰一、徵

云何四種清淨能攝諸地？

辰二、列

謂增上意樂清淨，攝於初地；增上戒清淨，攝第二地；增上心清淨，攝第三地；增上慧清淨，於後後地轉勝妙故，當知能攝從第四地乃至佛地。

辰三、結

善男子！當知如是四種清淨普攝諸地。

卯二、十一分攝<sup>3</sup> 辰一、徵

云何十一種分能攝諸地？

辰二、釋<sup>11</sup> 巳一、極喜地<sup>2</sup> 午一、已圓滿

謂諸菩薩先於勝解行地，依十法行極善修習勝解忍故，超過彼地，證入菩薩正性離生。彼諸菩薩由是因緣，此分圓滿。

午二、未圓滿

而未能於微細毀犯誤現行中正知而住。由是因緣，於此分中猶未圓滿。

巳二、離垢地<sup>2</sup> 午一、已圓滿

為令此分得圓滿故，精勤修習便能證得。彼諸菩薩由是因緣，此分圓滿。

午二、未圓滿

而未能得世間圓滿等持、等至，及圓滿聞持陀羅尼。由是因緣，於此分中猶未圓滿。

巳三、發光地<sup>2</sup> 午一、已圓滿

為令此分得圓滿故，精勤修習便能證得。

圓滿聞持陀羅尼者：此即菩薩法陀羅尼應知。謂諸菩薩獲得如是念慧力持，由此力持，聞未曾聞，言未溫習、未善通利，名句文身之所攝錄，次第錯綜、次第結集無量經典，經無量時能持不忘。是名菩薩法陀羅尼。義如本地分說。（陵本四十五卷十四頁<sup>3650</sup>）

彼諸菩薩由是因緣，此分圓滿。

午二、未圓滿

而未能令隨所獲得菩提分法多修習住，心未能捨諸等至愛及與法愛。由是因緣，於此分中猶未圓滿。

巳四、焰慧地<sup>2</sup> 午一、已圓滿

為令此分得圓滿故，精勤修習便能證得。彼諸菩薩由是因緣，此分圓滿。

午二、未圓滿

而未能於諸諦道理如實觀察，又未能於生死涅槃棄捨一向背趣作意，又未能修方便所攝菩提分法。由是因緣，於此分中猶未圓滿。

巳五、極難勝地<sup>2</sup> 午一、已圓滿

為令此分得圓滿故，精勤修習便能證得。

方便所攝菩提分法者：本地分說：菩薩修習學道所攝最勝空性勝解，名為能證如來妙智廣大方便。（陵本三十六卷十二頁<sup>2950</sup>）如彼釋相應知。

彼諸菩薩由是因緣，此分圓滿。

午二、未圓滿

而未能於生死流轉如實觀察，又由於彼多生厭故，未能多住無相作意。由是因緣，於此分中猶未圓滿。

已六、現前地<sup>2</sup> 午一、已圓滿

為令此分得圓滿故，精勤修習便能證得。彼諸菩薩由是因緣，此分圓滿。

午二、未圓滿

而未能令無相作意無闕無間多修習住。由是因緣，於此分中猶未圓滿。

已七、遠行地<sup>2</sup> 午一、已圓滿

為令此分得圓滿故，精勤修習便能證得。彼諸菩薩由是因緣，此分圓滿。

午二、未圓滿

而未能於無相住中捨離功用，又未能得於相自在。由是因緣，於此分中猶未圓滿。

已八、不動地<sup>2</sup> 午一、已圓滿

為令此分得圓滿故，精勤修習便能證得。彼諸菩薩由是因緣，此分圓滿。

午二、未圓滿

而未能於異名、眾相、訓詞、差別，一切品類宣說法中得大自在。由是因緣，於此分中猶未圓滿。

巳九、善慧地<sup>2</sup> 午一、已圓滿

為令此分得圓滿故，精勤修習便能證得。

異名眾相訓詞差別者：如次配釋四無礙解。一、法無礙解，二、義無礙解，三、辭無礙解，四、辯無礙解。本地分中別釋其相應知。（陵本四十

五卷二頁<sup>3617</sup>）

彼諸菩薩由是因緣，此分圓滿。

午二、未圓滿

而未能得圓滿法身現前證受。由是因緣，於此分中猶未圓滿。

巳十、法雲地<sup>2</sup> 午一、已圓滿



為令此分得圓滿故，精勤修習便能證得。彼諸菩薩由是因緣，此分圓滿。

午二、未圓滿

而未能得遍於一切所知境界無著無礙妙智妙見。由是因緣，於此分中猶未圓滿。

巳十一、如來地

為令此分得圓滿故，精勤修習便能證得。由是因緣，此分圓滿；此分滿故，於一切分皆得圓滿。

辰三、總結

善男子！當知如是十一種分普攝諸地。

子二、辨地想<sup>2</sup> 丑一、觀自在問

世尊！何緣最初名極喜地？乃至何緣說名佛地？

丑二、佛告<sup>11</sup> 寅一、極喜地

善男子！成就大義，得未曾得出世間心，生大歡喜，是故最初名極喜地。

寅二、離垢地

遠離一切微細犯戒，是故第二名離垢地。

寅三、發光地

由彼所得三摩地及聞持陀羅尼能為無量智光依止，是故第三名發光地。

寅四、焰慧地

由彼所得菩提分法，燒諸煩惱智如火焰，是故第四名焰慧地。

寅五、極難勝地

由即於彼菩提分法方便修習，最極艱難方得自在，是故第五名極難勝地。

於彼菩提分法方便修習等者：依彼所得菩提分法修空勝解，名即於彼方便修習。由是修習最極艱難，是故此地名為極難。得自在故，復名為勝。

寅六、現前地

現前觀察諸行流轉，又於無相多修作意方現在前，是故第六名現前地。

寅七、遠行地

能遠證入無闕無間無相作意，與清淨地共相鄰接，是故第七名遠行地。

寅八、不動地

由於無相得無功用，於諸相中不為現行煩惱所動，是故第八名不動地。

寅九、善慧地

於一切種說法自在，獲得無量廣大智慧，是故第九名善慧地。

寅十、法雲地

麤重之身廣如虛空，法身圓滿，譬如大雲皆能遍覆，是故第十名法雲地。

寅十一、佛地

永斷最極微細煩惱及所知障，無著無礙，於一切種所知境界現正等覺，故第十一說名佛地。

子三、辨所對治<sup>3</sup> 丑一、觀自在問

世尊！於此諸地，有幾愚癡、有幾麤重為所對治？

丑二、佛告<sup>3</sup> 寅一、總標

善男子！此諸地中，有二十二種愚癡、十一種麤重為所對治。

寅二、別列<sup>11</sup> 卯一、初地

謂於初地有二愚癡，一者、執著補特伽羅及法愚癡，二者、惡趣雜染愚癡，及彼麤重為所對治。

卯二、第二地

於第二地有二愚癡，一者、微細誤犯愚癡，二者、種種業趣愚癡，及彼麤重為所對治。

種種業趣愚癡者：本地分說：增上戒住菩薩性戒具足，能以妙慧，於染不染、惡趣善趣，及諸乘中諸業現行、若因若果、修證安立，如實了知。於異熟果及等流果如是諸業，如實了知。（陵本四十八卷一頁<sup>3817</sup>）彼如實知是能對治，此說愚癡是所對治，義無差別，應可準釋。

卯三、第三地

於第三地有二愚癡，一者、欲貪愚癡，二者、圓滿間持陀羅尼愚癡，及彼麤

重為所對治。

卯四、第四地

於第四地有二愚癡，一者、等至愛愚癡，二者、法愛愚癡，及彼麤重為所對治。

卯五、第五地

於第五地有二愚癡，一者、一向作意棄背生死愚癡，二者、一向作意趣向涅槃愚癡，及彼麤重為所對治。

卯六、第六地

於第六地有二愚癡，一者、現前觀察諸行流轉愚癡，二者、相多現行愚癡，及彼麤重為所對治。

卯七、第七地

於第七地有二愚癡，一者、微細相現行愚癡，二者、一向無相作意方便愚癡，及彼麤重為所對治。

卯八、第八地

於第八地有二愚癡，一者、於無相作功用愚癡，二者、於相自在愚癡，及彼麤重為所對治。

卯九、第九地

於第九地有二愚癡，一者、於無量說法、無量法句文字、後後慧辯陀羅尼自在愚癡，二者、辯才自在愚癡，及彼麤重為所對治。

卯十、第十地

於第十地有二愚癡，一者、大神通愚癡，二者、悟入微細祕密愚癡，及彼麤重為所對治。

卯十一、如來地

於如來地有二愚癡，一者、於一切所知境界極微細著愚癡，二者、極微細礙愚癡，及彼麤重為所對治。

極微細著愚癡等者：於所知境暫作意時智速疾轉，是名無著。於一切界、

一切事、一切品、一切時智無礙轉，是名無礙。與此相違，名有著礙，故差別說。

寅三、總結

善男子！由此二十二種愚癡及十一種麤重故，安立諸地，而阿耨多羅三藐三菩提離彼繫縛。

丑三、觀自在讚果勝利

世尊！阿耨多羅三藐三菩提甚奇希有，乃至成就大利大果，令諸菩薩能破如是大愚癡羅網，能越如是大麤重稠林，現前證得阿耨多羅三藐三菩提。

子四、辨地殊勝<sup>2</sup> 丑一、觀自在問

世尊！如是諸地，幾種殊勝之所安立？

丑二、佛告<sup>3</sup> 寅一、總標

善男子！略有八種。

寅二、別列

一者、增上意樂清淨，二者、心清淨，三者、悲清淨，四者、到彼岸清淨，五者、見佛供養承事清淨，六者、成熟有情清淨，七者、生清淨，八者、威德清淨。

寅三、料簡<sup>2</sup>

卯一、清淨殊勝

善男子！於初地中所有增上意樂清淨乃至威德清淨，後後諸地乃至佛地所有增上意樂清淨乃至威德清淨，當知彼諸清淨展轉增勝，唯於佛地除生清淨。

卯二、功德殊勝

又初地中所有功德，於上諸地平等皆有，當知自地功德殊勝。

當知自地功德殊勝者：謂即八種殊勝功德，後後諸地展轉增勝，前已說故。（陵本七十五卷十一頁<sup>5779</sup>）

一切菩薩十地功德皆是有上，佛地功德當知無上。

子五、辨生殊勝<sup>2</sup>

丑一、觀自在問

世尊！何因緣故，說菩薩生於諸有生最為殊勝？



丑二、佛告<sup>2</sup> 寅一、標

善男子！四因緣故。

寅二、列

一者、極淨善根所集起故；二者、故意思擇力所取故；

故意思擇力所取故者：謂諸菩薩以大願力得自在力，捨靜慮樂，還生欲界故。

三者、悲愍濟度諸眾生故；四者、自能無染，除他染故。

子六、辨大願等<sup>2</sup> 丑一、觀自在問

世尊！何因緣故，說諸菩薩行廣大願、妙願、勝願？

丑二、佛告<sup>3</sup> 寅一、標

善男子！四因緣故。

寅二、釋

謂諸菩薩能善了知涅槃樂住，堪能速證；而復棄捨速證樂住；無緣無待發大

願心；為欲利益諸有情故，處多種種長時大苦。

寅三、結

是故我說彼諸菩薩行廣大願、妙願、勝願。

子七、辨諸學事<sup>2</sup> 丑一、總舉六度<sup>2</sup> 寅一、觀自在問

世尊！是諸菩薩凡有幾種所應學事？

寅二、佛告<sup>2</sup> 卯一、標

善男子！菩薩學事略有六種。

卯二、列

所謂布施、持戒、忍辱、精進、靜慮、慧到彼岸。

丑二、別辨六度<sup>17</sup> 寅一、三學攝<sup>2</sup> 卯一、觀自在問

世尊！如是六種所應學事，幾是增上戒學所攝？幾是增上心學所攝？幾是增上慧學所攝？

卯二、佛告

善男子！當知初三但是增上戒學所攝，靜慮一種但是增上心學所攝，慧是增上慧學所攝，我說精進遍於一切。

寅二、二資糧攝<sup>2</sup>

卯一、觀自在問

世尊！如是六種所應學事，幾是福德資糧所攝？幾是智慧資糧所攝？

卯二、佛告

善男子！若增上戒學所攝者，是名福德資糧所攝；若增上慧學所攝者，是名智慧資糧所攝；我說精進、靜慮二種遍於一切。

精進靜慮二種遍於一切者：本地分說：精進、靜慮波羅蜜多，應知通二分。一者、福分，二者、智分。乃至廣說。（陵本三十六卷五頁<sup>2916</sup>）此應準知。

寅三、明修相<sup>2</sup>

卯一、觀自在問

世尊！於此六種所學事中，菩薩云何應當修學？

卯二、佛告<sup>2</sup>

辰一、標

善男子！由五種相應當修學。

辰二、列

一者、最初於菩薩藏波羅蜜多相應微妙正法教中，猛利信解；二者、次於十種法行，以聞思修所成妙智，精進修行；三者、隨護菩提之心；四者、親近真善知識；五者、無間勤修善品。

寅四、施設六數<sup>2</sup>

卯一、觀自在問

世尊！何因緣故，施設如是所應學事但有六數？

卯二、佛告<sup>4</sup>

辰一、標

善男子！二因緣故。

辰二、列

一者、饒益諸有情故；二者、對治諸煩惱故。

辰三、配

當知前三饒益有情，後三對治一切煩惱。

辰四、釋<sup>2</sup> 巳一、初因緣攝

前三饒益諸有情者，謂諸菩薩由布施故，攝受資具，饒益有情；由持戒故，不行損害逼迫惱亂，饒益有情；由忍辱故，於彼損害逼迫惱亂堪能忍受，饒益有情。

巳二、次因緣攝

後三對治諸煩惱者，謂諸菩薩由精進故，雖未永伏一切煩惱，亦未永害一切隨眠，而能勇猛修諸善品，彼諸煩惱不能傾動善品加行；由靜慮故，永伏煩惱；由般若故，永害隨眠。

寅五、明餘四數<sup>2</sup> 卯一、觀自在問

世尊！何因緣故，施設所餘波羅蜜多但有四數？

卯二、佛告<sup>2</sup> 辰一、總標

善男子！與前六種波羅蜜多為助伴故。

辰二、別釋<sup>4</sup> 巳一、方便善巧波羅蜜多<sup>2</sup> 午一、釋得名

謂諸菩薩，於前三種波羅蜜多所攝有情，以諸攝事方便善巧而攝受之，安置善品。

午二、明助伴

是故我說方便善巧波羅蜜多，與前三種而為助伴。

巳二、願波羅蜜多<sup>2</sup> 午一、釋得名

若諸菩薩，於現法中煩惱多故，於修無間無有堪能，羸劣意樂故，下界勝解故。

下界勝解者：謂於欲貪分別忍可樂欲故。

於內心住無有堪能，於菩薩藏不能聞緣善修習故，所有靜慮不能引發出世間慧，彼便攝受少分狹劣福德資糧。為未來世煩惱輕微，心生正願，如是名願波羅蜜多。

午二、明助伴

由此願故，煩惱微薄，能修精進。是故我說願波羅蜜多，與精進波羅蜜多而

為助伴。

所有靜慮不能引發出世間慧等者：謂依靜慮，不能修習種種善巧，是故不能引發出世間慧。唯能修習慈等四種無量，說彼攝受少分狹劣福德資糧。

巳三、力波羅蜜多<sup>2</sup> 午一、釋得名

若諸菩薩，親近善士、聽聞正法、如理作意為因緣故，轉劣意樂成勝意樂，亦能獲得上界勝解，如是名力波羅蜜多。

午二、明助伴

由此力故，於內心住有所堪能。是故我說力波羅蜜多，與靜慮波羅蜜多而為助伴。

巳四、智波羅蜜多<sup>2</sup> 午一、釋得名

若諸菩薩，於菩薩藏已能聞緣善修習故，能發靜慮，如是名智波羅蜜多。

午二、明助伴

由此智故，堪能引發出世間慧。是故我說智波羅蜜多，與慧波羅蜜多而為助

伴。

寅六、明說次第<sup>2</sup> 卯一、觀自在問

世尊！何因緣故，宣說六種波羅蜜多如是次第？

卯二、佛告<sup>3</sup> 辰一、標

善男子！能為後後引發依故。

辰二、釋

謂諸菩薩，若於身財無所顧吝，便能受持清淨禁戒；為護禁戒，便修忍辱；修忍辱已，能發精進；發精進已，能辦靜慮；具靜慮已，便能獲得出世間慧。

辰三、結

是故我說波羅蜜多如是次第。

寅七、明品類別<sup>2</sup> 卯一、觀自在問

世尊！如是六種波羅蜜多，各有幾種品類差別？



卯二、佛告<sup>2</sup> 辰一、總標

善男子！各有三種。

辰二、別列<sup>6</sup> 巳一、施

施三種者，一者、法施，二者、財施，三者、無畏施。

巳二、戒

戒三種者，一者、轉捨不善戒，二者、轉生善戒，三者、轉生饒益有情戒。

巳三、忍

忍三種者，一者、耐怨害忍，二者、安受苦忍，三者、諦察法忍。

巳四、精進

精進三種者，一者、被甲精進，二者、轉生善法加行精進，三者、饒益有情加行精進。

轉生善法加行精進者：謂諸菩薩所有精進，能為施、戒、忍、精進、靜慮波羅蜜多加行，能成辦施、戒、忍、精進、靜慮波羅蜜多。如本地分說應

知。(陵本四十二卷十六頁<sup>3461</sup>)

巳五、靜慮

靜慮三種者，一者、無分別、寂靜、極寂靜，無罪故，對治煩惱眾苦樂住靜慮；二者、引發功德靜慮；三者、引發饒益有情靜慮。

靜慮三種等者：本地分中別釋其相應知。(陵本四十三卷一頁<sup>3483</sup>)

巳六、慧

慧三種者，一者、緣世俗諦慧，二者、緣勝義諦慧，三者、緣饒益有情慧。

緣世俗諦慧等者：此中緣世俗諦慧，謂於五明處。緣勝義諦慧，謂於七真如。義如下說應知。

寅八、名到彼岸<sup>2</sup> 卯一、標釋因緣<sup>2</sup> 辰一、觀自在問

世尊！何因緣故，波羅蜜多說名波羅蜜多？

辰二、佛告<sup>3</sup> 巳一、標

善男子！五因緣故。

已二、列

一者、無染著故；二者、無顧戀故；三者、無罪過故；四者、無分別故；五者、正迴向故。

已三、釋<sup>5</sup> 午一、無染著

無染著者，謂不染著波羅蜜多諸相違事。

午二、無顧戀

無顧戀者，謂於一切波羅蜜多諸果異熟及報恩中，心無繫縛。

午三、無罪過

無罪過者，謂於如是波羅蜜多，無間雜染法，離非方便行。

午四、無分別

無分別者，謂於如是波羅蜜多，不如言辭執著自相。

午五、正迴向

正迴向者，謂以如是所作所集波羅蜜多，迴求無上大菩提果。

卯二、隨難更廣<sup>4</sup> 辰一、諸相違事<sup>2</sup> 巳一、觀自在問

世尊！何等名為波羅蜜多諸相違事？

巳二、佛告<sup>2</sup> 午一、標

善男子！當知此事略有六種。

午二、列

一者、於喜樂欲財富自在諸欲樂中，深見功德及與勝利；二者、於隨所樂縱身語意而現行中，深見功德及與勝利；三者、於他輕懷不堪忍中，深見功德及與勝利；四者、於不勤修著欲樂中，深見功德及與勝利；五者、於處憤鬧世雜亂行，深見功德及與勝利；六者、於見聞覺知言說戲論，深見功德及與勝利。

當知此事略有六種等者：此中六種，如次與施波羅蜜多相違，乃至與慧波羅蜜多相違應知。言喜樂欲者，謂於眼所識色等中，可喜、可樂、可意、可愛，能引起欲，深可染著故。餘文易知。

辰二、諸果異熟<sup>2</sup> 巳一、觀自在問

世尊！如是一切波羅蜜多，何果異熟？

巳二、佛告<sup>2</sup> 午一、標

善男子！當知此亦略有六種。

午二、列

一者、得大財富；二者、往生善趣；三者、無怨無壞，多諸喜樂；四者、為眾生主；五者、身無惱害；六者、有大宗葉。

當知此亦略有六種等者：此中六種，如次是施波羅蜜多果異熟，乃至是慧波羅蜜多果異熟應知。

辰三、間雜染法<sup>2</sup> 巳一、觀自在問

世尊！何等名為波羅蜜多間雜染法？

巳二、佛告<sup>2</sup> 午一、總標列

善男子！當知略由四種加行。一者、無悲加行故；二者、不如理加行故；三

者、不常加行故；四者、不殷重加行故。

午二、隨難釋

不如理加行者，謂修行餘波羅蜜多時，於餘波羅蜜多遠離失壞。

辰四、非方便行<sup>2</sup> 巳一、觀自在問

世尊！何等名為非方便行？

巳二、佛告<sup>3</sup> 午一、標

善男子！若諸菩薩，以波羅蜜多饒益眾生時，但攝財物饒益眾生便為喜足，而不令其出不善處，安置善處，如是名為非方便行。

午二、徵

何以故？

午三、釋<sup>2</sup> 未一、標相

善男子！非於眾生唯作此事名實饒益。

未二、喻成<sup>2</sup> 申一、引喻

譬如糞穢，若多、若少，終無有能令成香潔。

申二、合法

如是眾生由行苦故，其性是苦，無有方便但以財物暫相饒益可令成樂。唯有安處妙善法中，方可得名第一饒益。

寅九、總別清淨<sup>2</sup> 卯一、觀自在問

世尊！如是一切波羅蜜多，有幾清淨？

卯二、佛告<sup>2</sup> 辰一、略標

善男子！我終不說波羅蜜多除上五相有餘清淨，

除上五相等者：前說無染著、無顧戀、無罪過、無分別、正迴向五因緣相，即是波羅蜜多諸清淨相，除此更無說有餘清淨故。

然我即依如是諸事，總別當說波羅蜜多清淨之相。

辰二、廣釋<sup>2</sup> 巳一、總說<sup>3</sup> 午一、標

總說一切波羅蜜多清淨相者，當知七種。

午二、徵

何等為七？

午三、列

一者、菩薩於此諸法不求他知；二者、於此諸法見已不生執著；三者、即於如是諸法不生疑惑，謂為能得大菩提不；四者、終不自讚毀他，有所輕懾；五者、終不憍傲放逸；六者、終不少有所得便生喜足；七者、終不由此諸法，於他發起嫉妒慳吝。

巳二、別說<sup>3</sup> 午一、標

別說一切波羅蜜多清淨相者，亦有七種。

午二、徵

何等為七？

午三、釋<sup>6</sup> 未一、施清淨相<sup>3</sup> 申一、標

謂諸菩薩，如我所說七種布施清淨之相，隨順修行。



申二、列

一者、由施物清淨，行清淨施；二者、由戒清淨，行清淨施；三者、由見清淨，行清淨施；四者、由心清淨，行清淨施；五者、由語清淨，行清淨施；六者、由智清淨，行清淨施；七者、由垢清淨，行清淨施。

申三、結

是名七種施清淨相。

由垢清淨行清淨施者：垢有二種，一、慳吝垢，二、積藏垢。慳吝垢者，謂於財物執著。積藏垢者，謂於受用執著。於此二種能棄捨故，名垢清淨。

未二、戒清淨相

又諸菩薩，能善了知制立律儀一切學處，能善了知出離所犯，具常尸羅，堅固尸羅，常作尸羅，常轉尸羅，受學一切所有學處，是名七種戒清淨相。

具常尸羅等者：攝釋分說：云何常守尸羅？謂不棄捨學處故。云何堅守尸

羅？謂不毀犯學處故。云何常作？謂於學處無穿穴故。云何常轉？謂穿穴已，復還淨故。云何受學學處？謂具隨學諸學處故。（陵本八十二卷十四頁<sup>6264</sup>）此應準釋。

未三、忍清淨相

若諸菩薩，於自所有業果異熟深生依信，一切所有不饒益事現在前時，不生憤發，亦不反罵，不瞋、不打、不恐、不弄；不以種種不饒益事反相加害；不懷怨結；若諫誨時不令恚惱；亦復不待他來諫誨；不由恐怖有染愛心而行忍辱；不以作恩而便放捨。是名七種忍清淨相。

不以作恩而便放捨者：謂恆現前，欲作饒益，先後無異，非一益已捨而不益故。本地分中清淨忍相作如是說。（陵本四十二卷十四頁<sup>3456</sup>）此應準釋。

未四、精進清淨相

若諸菩薩，通達精進平等之性，不由勇猛勤精進故自舉凌他，

通達精進平等之性者：本地分說：若諸菩薩發勤精進，不緩不急，平等雙運；普於一切應作事中，亦能平等殷重修作。是名菩薩平等精進。（陵本四十二卷二十頁<sup>3479</sup>）此應準知。

具大勢力，具大精進，有所堪能，堅固，勇猛，於諸善法終不捨輒，如是名為七種精進清淨之相。

具大勢力等者：經說有勢、有勤、勇猛、堅固、於諸善法不捨其輒五精進相，如次配釋應知。

未五、靜慮清淨相

若諸菩薩，有善通達相三摩地靜慮，

有善通達相三摩地靜慮者：此說相清淨應知。謂諸菩薩，於其種種止、舉、捨相，入、住、出相，能善通達故。

有圓滿三摩地靜慮，

有圓滿三摩地靜慮者：此說得根本淨應知。已得加行究竟果作意，名圓滿

三摩地故。

有俱分三摩地靜慮，

有俱分三摩地靜慮者：此說修相清淨應知。謂於三摩地中，亦了光明、亦見眾色，名俱分故。本地分說具分修三摩地，其義應知。（陵本十二卷十

三頁<sup>1020</sup>）

有運轉三摩地靜慮，

有運轉三摩地靜慮者：此說方便清淨應知。止觀二道任運轉故。

有無所依三摩地靜慮，

有無所依三摩地靜慮者：此說離諸見趣清淨應知。空、無相、無願三三摩地，名無所依故。

有善修治三摩地靜慮，

有善修治三摩地靜慮者：此說定障清淨應知。由於所緣修習解脫、勝處、遍處，名善修治故。

有於菩薩藏聞緣修習無量三摩地靜慮，如是名為七種靜慮清淨之相。

未六、慧清淨相<sup>2</sup> 申一、釋<sup>7</sup> 酉一、遠離增減二邊

若諸菩薩，遠離增益、損減二邊，行於中道，是名為慧。

酉二、了知解脫門義

由此慧故，如實了知解脫門義，謂空、無願、無相三解脫門。

酉三、了知有自性義

如實了知有自性義，謂遍計所執、若依他起、若圓成實三種自性。

酉四、了知無自性義

如實了知無自性義，謂相、生、勝義三種無自性性。

酉五、了知世俗諦義

如實了知世俗諦義，謂於五明處。

酉六、了知勝義諦義

如實了知勝義諦義，謂於七真如。

酉七、能善成辦諸行

又無分別、離諸戲論、純一理趣多所住故，無量總法為所緣故，及毗鉢舍那故，能善成辦法隨法行。

申二、結

是名七種慧清淨相。

寅十、明作業<sup>2</sup> 卯一、觀自在問

世尊！如是五相，各有何業？

卯二、佛告<sup>2</sup> 辰一、標

善男子！當知彼相有五種業。

辰二、釋<sup>5</sup> 巳一、由無染著

謂諸菩薩無染著故，於現法中，於所修習波羅蜜多，恆常殷重勤修加行，無有放逸。

巳二、由無顧戀

無顧戀故，攝受當來不放逸因。

巳三、由無罪過

無罪過故，能正修習極善圓滿、極善清淨、極善鮮白波羅蜜多。

巳四、由無分別

無分別故，方便善巧波羅蜜多速得圓滿。

巳五、由正迴向

正迴向故，一切生處波羅蜜多，及彼可愛諸果異熟皆得無盡，乃至無上正等菩提。

寅十一、明最廣等<sup>2</sup> 卯一、觀自在問

世尊！如是所說波羅蜜多，何者最廣大？何者無染汙？何者最明盛？何者不可動？何者最清淨？

卯二、佛告<sup>5</sup> 辰一、最廣大

善男子！無染著性、無顧戀性、正迴向性，最為廣大。

辰二、無染汙

無罪過性、無分別性，無有染汙。

辰三、最明盛

思擇所作，最為明盛。

辰四、不可動

已入無退轉法地者，名不可動。

辰五、最清淨

若十地攝、佛地攝者，名最清淨。

寅十二、明常無盡<sup>2</sup> 卯一、觀自在問

世尊！何因緣故，菩薩所得波羅蜜多諸可愛果，及諸異熟常無有盡，波羅蜜多亦無有盡？

諸可愛果及諸異熟者：生人天趣，名可愛果。異熟有八。一者、壽量具足，二者、形色具足，三者、族姓具足，四者、自在具足，五者、信言具



足，六者、大勢具足，七者、人性具足，八者、大力具足。本地分中別釋其相應知。（陵本三十六卷一頁<sup>2901</sup>）

卯二、佛告

**善男子！展轉相依，生起、修習無間斷故。**

展轉相依生起修習者：生起，謂彼諸可愛果及諸異熟。修習，謂彼波羅蜜多。菩薩安住諸可愛果及異熟中，能正修習波羅蜜多以為因故，復感當來可愛異熟，如是二種展轉相依，無有間斷。本地分說：一切有情所處空無義利無始生死，菩薩處之，能令不空，有大義利。（陵本三十六卷五頁<sup>2915</sup>）即顯此義。

寅十三、明信樂因<sup>2</sup> 卯一、觀自在問

**世尊！何因緣故，是諸菩薩深信愛樂波羅蜜多，非於如是波羅蜜多所得可愛諸果異熟？**

卯二、佛告<sup>2</sup> 辰一、標

善男子！五因緣故。

辰二、列

一者、波羅蜜多是最增上喜樂因故；

是最增上喜樂因故者：謂此為因，能入最初極歡喜地，受用法樂故。

二者、波羅蜜多是其究竟饒益一切自他因故；三者、波羅蜜多是當來世彼可愛果異熟因故；四者、波羅蜜多非諸雜染所依事故；

非諸雜染所依事故者：謂如下說：波羅蜜多正修行時，能捨慳吝、犯戒、心憤、懈怠、散亂、見趣所治故。

五者、波羅蜜多非是畢竟變壞法故。

非是畢竟變壞法故者：謂證大乘大般涅槃，於一切法轉得內緣自在，常作有情義利事故。

寅十四、明勝威德<sup>2</sup> 卯一、觀自在問

世尊！如是一切波羅蜜多，各有幾種最勝威德？

卯二、佛告<sup>2</sup> 辰一、標

善男子！當知一切波羅蜜多，各有四種最勝威德。

辰二、列

一者、於此波羅蜜多正修行時，能捨慳吝、犯戒、心憤、懈怠、散亂、見趣所治；二者、於此正修行時，能為無上正等菩提真實資糧；三者、於此正修行時，於現法中，能自攝受、饒益有情；四者、於此正修行時，於未來世能得廣大無盡可愛諸果異熟。

寅十五、明因果等<sup>2</sup> 卯一、正辨相<sup>2</sup> 辰一、觀自在問

世尊！如是一切波羅蜜多，何因？何果？有何義利？

辰二、佛告

善男子！當知一切波羅蜜多，大悲為因，微妙可愛諸果異熟饒益一切有情為果，圓滿無上廣大菩提為大義利。

卯二、隨難釋<sup>2</sup> 辰一、觀自在問

世尊！若諸菩薩具足一切無盡財寶，成就大悲，何緣世間現有眾生貧窮可得？

辰二、佛告<sup>2</sup> 巳一、理釋

善男子！是諸眾生自業過失。若不爾者，菩薩常懷饒益他心，又常具足無盡財寶，若諸眾生無自惡業能為障礙，何有世間貧苦可得。

巳二、喻成<sup>2</sup> 午一、引喻

譬如餓鬼，為大熱渴逼迫其身，見大海水悉皆涸竭，非大海過，是諸餓鬼自業過耳。

午二、合法

如是菩薩所施財寶，猶如大海，無有過失，是諸眾生自業過耳，猶如餓鬼自惡業力，令無有果。

寅十六、明取無性<sup>2</sup> 卯一、正顯<sup>2</sup> 辰一、觀自在問

世尊！菩薩以何等波羅蜜多取一切法無自性性？

辰二、佛告

善男子！以般若波羅蜜多能取諸法無自性性。

卯二、釋難<sup>2</sup> 辰一、觀自在問

世尊！若般若波羅蜜多能取諸法無自性性，何故不取有自性性？

辰二、佛告

善男子！我終不說以無自性性取無自性性，然無自性性離諸文字自內所證，不可捨於言說文字而能宣說，是故我說般若波羅蜜多能取諸法無自性性。

我終不說以無自性性等者：此中義顯，般若波羅蜜多與法真如平等平等，亦無自性性之所顯故，性離言說，非實能取、所取可得。是故實義為論，我終不說以無自性性取無自性性，但為他說令他了知，不可捨於言說文字方便，是故假說般若波羅蜜多能取諸法無自性性。由是當知，若許亦取有自性性，是則不成般若波羅蜜多。何以故？有分別故。由是道理，故不應說。

寅十七、明位差別<sup>2</sup> 卯一、舉說能治<sup>2</sup> 辰一、觀自在問

世尊！如佛所說波羅蜜多、近波羅蜜多、大波羅蜜多，云何波羅蜜多？云何近波羅蜜多？云何大波羅蜜多？

辰二、佛告<sup>3</sup> 巳一、波羅蜜多

善男子！若諸菩薩，經無量時修行施等，成就善法，而諸煩惱猶故現行，未能制伏，然為彼伏。謂於勝解行地軟中勝解轉時，是名波羅蜜多。

謂於勝解行地軟中勝解轉時者：本地分說：勝解行住菩薩，有下中上三品忍轉。今於此中，唯取軟品、中品，由說煩惱現行未能制伏，為彼伏故。上忍轉時，煩惱微薄，故此不說。

巳二、近波羅蜜多

復於無量時修行施等，漸復增上成就善法，而諸煩惱猶故現行，然能制伏，非彼所伏。謂從初地已上，是名近波羅蜜多。

巳三、大波羅蜜多

復於無量時修行施等，轉復增上成就善法，一切煩惱皆不現行。謂從八地已

上，是名大波羅蜜多。

卯二、別廣所治<sup>4</sup> 辰一、辨隨眠<sup>2</sup> 巳一、觀自在問

世尊！此諸地中，煩惱隨眠可有幾種？

巳二、佛告<sup>2</sup> 午一、標數

善男子！略有三種。

午二、列釋<sup>3</sup> 未一、害伴隨眠

一者、害伴隨眠，謂於前五地。何以故？善男子！諸不俱生現行煩惱，是俱生煩惱現行助伴，彼於爾時永無復有，是故說名害伴隨眠。

未二、羸劣隨眠

二者、羸劣隨眠，謂於第六、第七地中，微細現行，若修所伏，不現行故。

未三、微細隨眠

三者、微細隨眠，謂於第八地已上。從此已去，一切煩惱不復現行，唯有所知障為依止故。

辰二、辨麤重<sup>2</sup> 巳一、觀自在問

世尊！此諸隨眠，幾種麤重斷所顯示？

巳二、佛告<sup>2</sup> 午一、菩薩地<sup>2</sup> 未一、標

善男子！但由二種。

未二、釋

謂由在皮麤重斷故，顯彼初二；復由在膚麤重斷故，顯彼第三。

午二、佛地

若在於骨麤重斷者，我說永離一切隨眠，位在佛地。

辰三、辨劫數<sup>2</sup> 巳一、觀自在問

世尊！經幾不可數劫，能斷如是麤重？

巳二、佛告<sup>2</sup> 午一、標

善男子！經於三大不可數劫，或無量劫。

午二、釋



所謂年、月、半月、晝夜、一時、半時、須臾、瞬息、剎那量劫不可數故。

辰四、辨相失德<sup>3</sup> 巳一、觀自在問

世尊！是諸菩薩，於諸地中所生煩惱，當知何相？何失？何德？

巳二、佛告<sup>2</sup> 午一、辨煩惱相<sup>3</sup> 未一、標

善男子！無染汙相。

未二、徵

何以故？

未三、釋

是諸菩薩於初地中，定於一切諸法法界已善通達。由此因緣，菩薩要知方起煩惱，非為不知，是故說名無染汙相。

午二、辨其失德

於自身中不能生苦，故無過失。菩薩生起如是煩惱，於有情界能斷苦因，是故彼有無量功德。

已三、觀自在讚

甚奇世尊！無上菩提乃有如是大功德利，令諸菩薩生起煩惱，尚勝一切有情、聲聞、獨覺善根，何況其餘無量功德。

子八、辨乘密意<sup>2</sup> 丑一、觀自在問

世尊！如佛所說：若聲聞乘、若復大乘唯是一乘。此何密意？

丑二、佛告<sup>2</sup> 寅一、釋<sup>2</sup> 卯一、宣說別<sup>2</sup> 辰一、聲聞乘

善男子！如我於彼聲聞乘中，宣說種種諸法自性，所謂五蘊、或內六處、或外六處，如是等類。

辰二、大乘

於大乘中，即說彼法同一法界、同一理趣，故我不說乘差別性。

卯二、意解別<sup>2</sup> 辰一、增減失

於中或有如言於義妄起分別，一類增益、一類損減。

辰二、乖諍失

又於諸乘差別道理，謂互相違，如是展轉遞興諍論。

寅二、結

如是名為此中密意。

癸二、重頌

爾時世尊欲重宣此義而說頌曰：

諸地攝想所對治 殊勝生願及諸學

由依佛說是大乘 於此善修成大覺

宣說諸法種種性 復說皆同一理趣

謂於下乘或上乘 故我說乘無異性

如言於義妄分別 或有增益或損減

謂此二種互相違 愚癡意解成乖諍

壬二、結名法門<sup>2</sup> 癸一、觀自在問

世尊！於是解深密法門中，此名何教？我當云何奉持？

瑜伽師地論科句披尋記卷第七十八

癸二、佛告

善男子！此名諸地波羅蜜多了義之教，於此諸地波羅蜜多了義之教，汝當奉持。

壬三、說果勝利

說此諸地波羅蜜多了義教時，於大會中，有七十五千菩薩，皆得菩薩大乘光明三摩地。

辛七、分別成所作事<sup>3</sup>

壬一、正廣分別<sup>10</sup>

癸一、辨法身相<sup>2</sup>

子一、顯如來<sup>2</sup>

丑

一、曼殊室利問

復次，即依乘假安立，分別如來成所作事，當知如解深密經中，曼殊室利菩薩摩訶薩請問佛言：世尊！如佛所說如來法身，如來法身有何等相？

丑二、佛告<sup>2</sup>

寅一、略標其相

佛告曼殊室利菩薩：善男子！若於諸地波羅蜜多善修出離，轉依成滿，是名如來法身之相。

寅二、釋不思議

當知此相，二因緣故不可思議，無戲論故，無所為故。而諸眾生計著戲論，有所為故。

子二、簡二乘<sup>2</sup> 丑一、釋得名<sup>2</sup> 寅一、不名法身

世尊！聲聞、獨覺所得轉依，名法身不？善男子！不名法身。

寅二、名解脫身

世尊！當名何身？善男子！名解脫身。

丑二、顯等別<sup>2</sup> 寅一、平等

由解脫身故，說一切聲聞、獨覺，與諸如來平等平等。

寅二、有別

由法身故，說有差別。如來法身有差別故，無量功德最勝差別，算數譬喻所不能及。

癸二、辨生起相<sup>2</sup> 子一、化身作業<sup>2</sup> 丑一、曼殊室利問

世尊！我當云何應知如來生起之相？

丑二、佛告<sup>2</sup> 寅一、辨相

善男子！一切如來化身作業，如世界起一切種類，如來功德眾所莊嚴住持為相。

寅二、料簡

當知化身相有生起，法身之相無有生起。

一切如來化身作業等者：由諸如來成所作智，示現一切化身作業。此有三種，一者、身化，二者、語化，三者、意化。第一身化復有三種，一、現神通化，二、現受生化，三、現業果化。第二語化亦有三種，一、慶慰語化，二、方便語化，三、辯揚語化。第三意化復有四種，一、決擇意化，二、造作意化，三、發起意化，四、受領意化。由是一切，如諸世間有情種種所作，而能現起彼彼化業，是故說言如世界起一切種類。佛地經說：如諸眾生勤勵身業，由是眾生趣求種種徇利、務農、勤王等事，如是如來

成所作智勤身化業，由是如來示現種種工巧等處，摧伏諸伎傲慢眾生，以是善巧方便力故，引諸眾生令入聖教成熟解脫。乃至廣說又如眾生受領意業，由是眾生受領苦樂，如是如來成所作智受意化業，由是如來於定、不定、反問、置記為記別故，隨其所應，受領去來現在等義，以是善巧方便力故，引諸眾生令入聖教成熟解脫。此應準知。

子二、示現善巧<sup>2</sup> 丑一、曼殊室利問

世尊！云何應知示現化身方便善巧？

丑二、佛告

善男子！遍於一切三千大千佛國土中，或眾推許增上王家，或眾推許大福田家，同時入胎、誕生、長大受欲、出家、示行苦行、捨苦行已成等正覺次第示現，是名如來示現化身方便善巧。

癸三、言音差別<sup>2</sup> 子一、廣辨如來三種言音<sup>4</sup> 丑一、曼殊室利問

世尊！凡有幾種一切如來身所住持言音差別，由此言音，所化有情未成熟

者，令其成熟；已成熟者，緣此為境速得解脫？

丑二、佛告

善男子！如來言音略有三種。一者、契經，二者、調伏，三者、本母。

丑三、重問

世尊！云何契經？云何調伏？云何本母？

丑四、別顯<sup>3</sup>

寅一、契經<sup>2</sup>

卯一、標依事

善男子！若於是處，我依攝事顯示諸法，是名契經。謂依四事，或依九事，或復依於二十九事。

卯二、列種種<sup>3</sup>

辰一、四事

云何四事？一者、聽聞事，二者、歸趣事，三者、修學事，四者、菩提事。

辰二、九事

云何九事？一者、施設有情事，二者、彼所受用事，三者、彼生起事，四者、彼生已住事，五者、彼染淨事，六者、彼差別事，七者、能宣說事，八



者、所宣說事，九者、諸眾會事。

云何九事等者：本地分說：有情事者，謂五取蘊。受用事者，謂十二處。生起事者，謂十二分緣起及緣生。安住事者，謂四食。染淨事者，謂四聖諦。差別事者，謂無量界。說者事者，謂佛及彼弟子。所說事者，謂四念住等菩提分法。眾會事者，所謂八眾。一、剎帝利眾，二、婆羅門眾，三、長者眾，四、沙門眾，五、四大天王眾，六、三十三天眾，七、焰摩天眾，八、梵天眾。（陵本三卷十六頁<sup>259</sup>）此應準知。

辰三、二十九事<sup>2</sup> 已一、徵列事

云何名為二十九事？謂依雜染品，有攝諸行事；彼次第隨轉事；即於是中，作補特伽羅想已，於當來世流轉因事；作法想已，於當來世流轉因事。依清淨品，有繫念於所緣事；即於是中，勤精進事；心安住事；現法樂住事；超一切苦緣方便事；彼遍知事，此復三種，顛倒遍知所依處故，依有情想外有情中邪行遍知所依處故，內離增上慢遍知所依處故；修依處事；作證事；修

習事；令彼堅固事；彼行相事；彼所緣事；已斷、未斷觀察善巧事；彼散亂事；彼不散亂事；不散亂依處事；不棄修習劬勞加行事；修習勝利事；彼堅牢事；攝聖行事；攝聖行眷屬事；通達真實事；證得涅槃事；於善說法毗奈耶中，世間正見超昇一切外道所得正見頂事；及即於此不修退事。

已二、隨難釋

於善說法毗奈耶中，不修習故說名為退，非見過失故名為退。

寅二、調伏<sup>2</sup> 卯一、標名

曼殊室利！若於是處，我依聲聞及諸菩薩，顯示別解脫及別解脫相應之法，是名調伏。

顯示別解脫等者：謂律儀戒，名別解脫。若攝善法戒、利有情戒，名別解脫相應之法。如前已說：菩薩所受三種律儀，若能守護別解脫戒，亦能精勤守護餘二。由律儀戒之所攝持，令和合故。（陵本七十五卷三頁<sup>5752</sup>）是故菩薩說有三種毗奈耶聚。

卯二、辨相<sup>2</sup> 辰一、曼殊室利問

世尊！菩薩別解脫幾相所攝？

辰二、佛告

善男子！當知七相。一者、宣說受軌則事故；

宣說受軌則事故者：安住具戒，是名受事。軌則圓滿，名軌則事。

二者、宣說隨順他勝事故；三者、宣說隨順毀犯事故；四者、宣說有犯自性故；五者、宣說無犯自性故；六者、宣說出所犯故；七者、宣說捨律儀故。

寅三、本母<sup>2</sup> 卯一、標名

曼殊室利！若於是處，我以十一種相，決了分別顯示諸法，是名本母。

卯二、辨相<sup>3</sup> 辰一、徵

何等名為十一種相？

辰二、列

一者、世俗相，二者、勝義相，三者、菩提分法所緣相，四者、行相，五

者、自性相，六者、彼果相，七者、彼領受開示相，八者、彼障礙法相，九者、彼隨順法相，十者、彼過患相，十一者、彼勝利相。

辰三、釋<sup>11</sup> 巳一、世俗相

世俗相者，當知三種。一者、宣說補特伽羅故；二者、宣說遍計所執自性故；三者、宣說諸法作用事業故。

巳二、勝義相

勝義相者，當知宣說七種真如故。

巳三、菩提分法所緣相

菩提分法所緣相者，當知宣說遍一切種所知事故。

遍一切種所知事故者：謂或不淨、或慈愍、或緣性緣起、或界差別、或阿那波那念、或蘊善巧、或界善巧、或處善巧、或緣起善巧、或處非處善巧，如是等類，名一切種所知事。

巳四、行相<sup>4</sup> 午一、標

行相者，當知宣說八行觀故。

午二、徵

云何名為八行觀耶？

午三、列

一者、諦實故；

諦實故者：此中諦實，非安立諦應知。

二者、安立故；三者、過失故；四者、功德故；五者、理趣故；六者、流轉故；七者、道理故；八者、總別故。

午四、釋<sup>8</sup> 未一、諦實

諦實者，謂諸法真如。

未二、安立

安立者，謂或安立補特伽羅，或復安立諸法遍計所執自性，或復安立一向、分別、反問、置記，或復安立隱密、顯了記別差別。

未三、過失

過失者，謂我宣說諸雜染法，有無量門差別過患。

未四、功德

功德者，謂我宣說諸清淨法，有無量門差別勝利。

未五、理趣

理趣者，當知六種。一者、真義理趣，二者、證得理趣，三者、教導理趣，四者、遠離二邊理趣，五者、不可思議理趣，六者、意趣理趣。

真義理趣等者：聞所成地決擇中說：諸佛聖教若欲略釋，由六種理門應隨決了。如彼釋相應知。（陵本六十四卷四頁<sup>5085</sup>）

未六、流轉

流轉者，所謂三世三有為相及四種緣。

所謂三世三有為相等者：本地分中，建立三世，生、老、住、無常，及與四緣。如彼釋相應知。（陵本三卷七頁<sup>221</sup>）諸有為法三世所顯，是故亦說

三有為相。從未來世本無而生，是故世尊由未來世，於有為法說生有為相。彼既生已落謝過去，是故世尊由過去世，於有為法說滅有為相。現在世法二相所顯，謂住及異。所以者何？唯現在時有住可得，前後變異亦唯現在。是故世尊由現在世，於有為法總說住、異為一有為相。義如五識身相應地意地決擇中說。（陵本五十二卷五頁<sup>4159</sup>）

未七、道理<sup>3</sup> 申一、標

道理者，當知四種。

申二、列

一者、觀待道理，二者、作用道理，三者、證成道理，四者、法爾道理。

申三、釋<sup>4</sup> 酉一、觀待道理

觀待道理者，謂若因、若緣能生諸行，及起隨說，如是名為觀待道理。

若因若緣能生諸行等者：本地分說：自種子為先。除種子依，所餘若有色、若無色依及業為建立。助伴、所緣為和合故。隨其所應，欲繫、色

繫、無色繫及不繫諸法生。（陵本五卷八頁<sup>347</sup>）此說生起觀待。由是當知若因、若緣能生諸行。又說：由於欲界繫法，色無色界繫法，及不繫法，施設名為先故想轉，想為先故語轉，由語故，隨見、聞、覺、知起諸言說。是故依語依處，施設隨說因。（陵本五卷九頁<sup>355</sup>）此說施設觀待。由是當知及起隨說。

酉二、作用道理

**作用道理者，謂若因、若緣能得諸法，或能成辦，或復生已作諸業用，如是名為作用道理。**

若因若緣能得諸法等者：本地分說：由此為先，此為建立，此和合故，彼法生，或得、或成、或辦、或用，說此為彼因。（陵本五卷八頁<sup>347</sup>）彼法生相，已於觀待道理中說。今此作用道理，說彼諸法或得、或成、或辦、或用，如本地分一一釋相應知。



證成道理者，謂若因、若緣，能令所立、所說、所標義得成立，令正覺悟，如是名為證成道理。

所立所說所標義得成立者：所立宗義，名所立義。所說法義，名所說義。所標句義，名所標義。

戌二、廣<sup>2</sup> 亥一、標差別

又此道理略有二種。一者、清淨，二者、不清淨。由五種相名為清淨，由七種相名不清淨。

亥二、釋彼相<sup>2</sup> 天一、清淨<sup>2</sup> 地一、釋<sup>2</sup> 玄一、辨五種相<sup>4</sup> 黃一、徵

云何由五種相名為清淨？

黃二、列

一者、現見所得相，二者、依止現見所得相，三者、自類譬喻所引相，四者、圓成實相，五者、善清淨言教相。

黃三、釋<sup>5</sup> 宇一、現見所得相

現見所得相者，謂一切行皆無常性，一切行皆是苦性，一切法皆無我性，此為世間現量所得。如是等類，是名現見所得相。

字二、依止現見所得相<sup>3</sup> 宙一、列

依止現見所得相者，謂一切行皆剎那性，他世有性，淨不淨業無失壞性。

謂一切行皆剎那性等者：此中三性，如次配釋現在、未來、過去應知。剎那生滅不久住故。此有故彼有，此生故彼生故。眾緣過去而不捨離，依自相續而得生起故。

宙二、釋

由彼能依麤無常性現可得故；由諸有情種種差別，依種種業現可得故；由諸有情若樂、若苦，淨不淨業以為依止現可得故。由此因緣，於不現見可為比度。

宙三、結

如是等類，是名依止現見所得相。

由彼能依麤無常性者：世間現見滅壞無常，是名麤無常性。當知此由諸行剎那生滅前後變異，方有最後滅壞可得，是故麤無常性說名能依，彼以剎那變異細無常性為依止故。

字三、自類譬喻所引相

自類譬喻所引相者，謂於內外諸行聚中，引諸世間共所了知所得生死以為譬喻，引諸世間共所了知所得生等種種苦相以為譬喻，引諸世間共所了知所得不自在相以為譬喻；又復於外，引諸世間共所了知所得衰盛以為譬喻。如是等類，當知是名自類譬喻所引相。

自類譬喻所引相等者：於內外行，引有四喻。初生死喻，譬一切行皆無常性。次生等苦喻，譬一切行皆是苦性。次不自在喻，譬一切法皆無我性。後衰盛喻，譬彼外行無常應知。

字四、圓成實相

圓成實相者，謂即如是現見所得相，若依止現見所得相，若自類譬喻所得

相，於所成立決定能成，當知是名圓成實相。

當知是名圓成實相者：圓謂圓滿，義無闕損故。成謂成就，義無違失故。實謂真實，義無虛妄故。

字五、善清淨言教相

善清淨言教相者，謂一切智者之所宣說，如言涅槃究竟寂靜。如是等類，當知是名善清淨言教相。

黃四、結

善男子！是故由此五種相故，名善觀察清淨道理；由清淨故，應可修習。

玄二、廣一切智者相<sup>2</sup> 黃一、曼殊室利問

世尊！一切智者相，當知有幾種？

黃二、佛告<sup>2</sup> 字一、標列相

善男子！略有五種。一者、若有出現世間，一切智聲無不普聞；二者、成就三十二種大丈夫相；三者、具足十力，能斷一切眾生一切疑惑；四者、具足

四無所畏，宣說正法，不為一切他論所伏，而能摧伏一切邪論；五者、於善說法毗奈耶中，八支聖道、四沙門等皆現可得。

宇二、結略義

如是生故、相故、斷疑網故、非他所伏能伏他故、聖道沙門現可得故，如是五種，當知名為一切智相。

八支聖道四沙門等皆現可得者：本地分中說有四種沙門。一、勝道沙門，二、說道沙門，三、活道沙門，四、壞道沙門。當知諸善逝，名勝道沙門；諸說正法者，名說道沙門；諸修善行者，名活道沙門；諸行邪行者，名壞道沙門。又說：此初沙門，廣說乃至第四沙門，於外沙門、婆羅門教空無所有。若於是處，八支聖道安立可得；即於是處有初沙門，廣說乃至第四沙門。（陵本二十九卷十八頁<sup>2464</sup>）如彼應釋。

地二、結

善男子！如是證成道理，由現量故、由比量故、由聖教量故、由譬喻故、由

圓成實故，由五種相名為清淨。

天二、不清淨<sup>3</sup> 地一、徵

云何由七種相名不清淨？

地二、列

一者、此餘同類可得相，二者、此餘異類可得相，

此餘同類可得相等者：謂此所立同類因相，於餘相違所立亦為同類，是名此餘同類可得相。又此所立異類因相，於餘相違亦為異類，是名此餘異類可得相。由是因緣，此同類相於所成立義不決定，此異類相簡濫不盡，是故成過，名不清淨。當知此與下說一切有別，少分非遍，名為餘故。

三者、一切同類可得相，四者、一切異類可得相，五者、異類譬喻所引相，六者、非圓成實相，七者、非善清淨言教相。

異類譬喻所引相等者：如前說有自類譬喻所引相、圓成實相、善清淨言教相，翻彼應釋。

地三、釋<sup>2</sup> 玄一、別釋二相<sup>2</sup> 黃一、一切同類可得相

若一切法意識所識性，是名一切同類可得相。

黃二、一切異類可得相

若一切法相、性、業、法、因果異相，由隨如是一一異相，決定展轉各各異相，是名一切異類可得相。

相性業法因果異相等者：本地分說比量有五，一、相比量，二、體比量，三、業比量，四、法比量，五、因果比量。如彼一一釋相應知。（陵本十五卷十一頁<sup>1316</sup>）若所有法望所立法，於此一一都無展轉少分相似之相，是名一切異類可得相。由是因緣，彼所立法無同類喻，比量不成，故不清淨。

玄二、總釋不淨<sup>2</sup> 黃一、道理不淨<sup>2</sup> 宇一、辨非圓成實相<sup>2</sup> 宙一、於餘同類可得等

善男子！若於此餘同類可得相及譬喻中，有一切異類相者，由此因緣，於所成立非決定故，是名非圓成實相。

宙二、於餘異類可得等

又於此餘異類可得相及譬喻中，有一切同類相者，由此因緣，於所成立不決定故，亦名非圓成實相。

字二、結遮不應修習

非圓成實故，非善觀察清淨道理；不清淨故，不應修習。

黃二、體性不淨

若異類譬喻所引相、若非善清淨言教相，當知體性皆不清淨。

酉四、法爾道理

法爾道理者，謂如來出世、若不出世，法性安住，法住法界，是名法爾道理。

法性安住法住法界者：謂彼諸法無始時來理成就性，是名法性。如成就性，以無顛倒文句安立，是名法住。由此法住，以彼法性為因，是故說彼名為法界。義如本地分說。（陵本十卷十七頁<sup>817</sup>）

未八、總別



總別者，謂先總說一句法已，後後諸句差別分別究竟顯了。

已五、自性相

自性相者，謂我所說有行、有緣所有能取菩提分法，謂念住等，如是名為彼自性相。

已六、彼果相

彼果相者，謂若世間、若出世間諸煩惱斷，及所引發世出世間諸果功德，如是名為得彼果相。

已七、彼領受開示相

彼領受開示相者，謂即於彼以解脫智而領受之，及廣為他宣說開示，如是名為彼領受開示相。

已八、彼障礙法相

彼障礙法相者，謂即於修菩提分法，能隨障礙諸染汙法，是名彼障礙法相。

已九、彼隨順法相

彼隨順法相者，謂即於彼多所作法，是名彼隨順法相。

已十、彼過患相

彼過患相者，當知即彼諸障礙法所有過失，是名彼過患相。

已十一、彼勝利相

彼勝利相者，當知即彼諸隨順法所有功德，是名彼勝利相。

子二、不共外道陀羅尼義<sup>2</sup>

丑一、曼殊室利問

曼殊室利菩薩復白佛言：唯願世尊為諸菩薩略說契經、調伏、本母不共外道陀羅尼義，由此不共陀羅尼義，令諸菩薩得入如來所說諸法甚深密意。

丑二、佛告<sup>2</sup>

寅一、長行<sup>2</sup>

卯一、許為略說

佛告曼殊室利菩薩曰：善男子！汝今諦聽！吾當為汝略說不共陀羅尼義，令諸菩薩於我所說密意言辭能善悟入。

卯二、明不共義<sup>2</sup>

辰一、釋<sup>3</sup>

巳一、標義

善男子！若雜染法、若清淨法，我說一切皆無作用，亦都無有補特伽羅。以

一切種離所為故，非雜染法先染後淨，非清淨法後淨先染。

巳二、遮妄

凡夫異生於麤重身執著諸法補特伽羅自性、差別，隨眠妄見以為緣故，計我所，由此妄謂我見、我聞、我嗅、我嘗、我觸、我知、我食、我作、我染、我淨，如是等類邪加行轉。

巳三、顯正

若有如實知如是者，便能永斷麤重之身，獲得一切煩惱不住，最極清淨，離諸戲論，無為依止，無有加行。

無為依止者：謂圓成實勝義無自性性為所依止故。

辰二、結

善男子！當知是名略說不共陀羅尼義。

寅二、重頌

爾時世尊欲重宣此義而說頌曰：

一切雜染清淨法 皆無作用數取趣  
由我宣說離所為 染汙清淨非先後  
於麤重身隨眠見 為緣計我及我所  
由此妄謂我見等 我食我為我染淨  
若如實知如是者 乃能永斷麤重身  
得無染淨無戲論 無為依止無加行

癸四、辨心起相<sup>2</sup> 子一、總說<sup>2</sup> 丑一、曼殊室利問

爾時曼殊室利菩薩復白佛言：世尊！云何應知諸如來心生起之相？

丑二、佛告

佛告曼殊室利菩薩曰：善男子！夫如來者，非心、意、識生起所顯，然諸如來有無加行心法生起，當知此事猶如變化。

子二、別辨<sup>2</sup> 丑一、法身<sup>2</sup> 寅一、曼殊室利問

世尊！若諸如來法身遠離一切加行，既無加行，云何而有心法生起？

寅二、佛告<sup>2</sup> 卯一、正顯

善男子！先所修習方便般若加行力故，有心生起。

卯二、喻成<sup>2</sup> 辰一、引喻

善男子！譬如正入無心睡眠，非於覺悟而作加行，由先所作加行勢力，而復覺悟。又如正在滅盡定中，非於起定而作加行，由先所作加行勢力，還從定起。

辰二、合法

如從睡眠及滅盡定心更生起，如是如來由先修習方便般若加行力故，當知復有心法生起。

丑二、化身<sup>2</sup> 寅一、曼殊室利問

世尊！如來化身當言有心，為無心耶？

寅二、佛告

善男子！非是有心，亦非無心。何以故？無自依心故，有依他心故。

無自依心故等者：謂如前說：夫如來者，非心、意、識生起所顯。是名無自依心，自無異熟為所依故。又說：如來有無加行心法生起，當知此事猶如變化。是名有依他心，常住大悲，不捨有情故。

癸五、所行境界<sup>2</sup> 子一、曼殊室利問

世尊！如來所行、如來境界，此之二種有何差別？

子二、佛告<sup>2</sup> 丑一、釋<sup>2</sup> 寅一、所行

善男子！如來所行，謂一切種如來共有、不可思議、無量功德眾所莊嚴清淨佛土。

寅二、境界

如來境界，謂一切種五界差別。何等為五？一者、有情界，二者、世界，三者、法界，四者、調伏界，五者、調伏方便界。

丑二、結

如是名為二種差別。

癸六、現覺等相<sup>2</sup> 子一、曼殊室利問

世尊！如來成等正覺、轉正法輪、入大涅槃，如是三種當知何相？

子二、佛告<sup>2</sup> 丑一、顯無二相

善男子！當知此三皆無二相。謂非成等正覺，非不成等正覺；非轉正法輪，非不轉正法輪；非入大涅槃，非不入大涅槃。

丑二、釋其所以

何以故？如來法身究竟淨故，如來化身常示現故。

如來法身究竟淨故等者：大乘轉依，獲得煩惱習氣最極清淨，離諸戲論，無為依止，無有加行，如是如來法身名究竟淨。由是應說非成等正覺、非轉正法輪、非入大涅槃。然為能作一切有情義利，諸佛世尊有變化轉，如是如來化身名常示現。由是應說非不成等正覺、非不轉正法輪、非不入大涅槃。

癸七、生福因緣<sup>2</sup> 子一、曼殊室利問

世尊！諸有情類但於化身見聞奉事生諸功德，如來於彼有何因緣？

子二、佛告

善男子！如來是彼增上所緣之因緣故，又彼化身是如來力所住持故。

癸八、法身解脫身別<sup>2</sup> 子一、曼殊室利問

世尊！等無加行，何因緣故，如來法身為諸有情放大智光，及出無量化身影像，聲聞、獨覺解脫之身無如是事？

子二、佛告<sup>2</sup> 丑一、引喻<sup>2</sup> 寅一、日月輪喻

善男子！譬如等無加行，從日月輪水火二種頗胝迦寶放大光明，非餘水火頗胝迦寶。謂大威德有情所住持故，諸有情業增上力故。

寅二、雕飾寶喻

又如從彼善工業者之所雕飾末尼寶珠出印文像，不從所餘不雕飾者。

丑二、合法

如是緣於無量法界方便般若極善修習磨瑩集成如來法身，從是能放大智光



明，及出種種化身影像，非唯從彼解脫之身有如斯事。

癸九、威德住持<sup>2</sup> 子一、曼殊室利問

世尊！如世尊說：如來菩薩威德住持，令諸眾生於欲界中，生剎帝利、婆羅門等大富貴家，人身財寶無不圓滿；或欲界天、色無色界一切身財圓滿可得。世尊！此中有何密意？

子二、佛告<sup>2</sup> 丑一、釋密意<sup>2</sup> 寅一、正成

善男子！如來菩薩威德住持，若道、若行，於一切處能令眾生獲得身財皆圓滿者，即隨所應，為彼宣說此道、此行。若有能於此道、此行正修行者，於一切處所獲身財無不圓滿。

寅二、反顯

若有眾生於此道、此行違背輕毀，又於我所起損惱心及瞋恚心，命終已後，於一切處所得身財無不下劣。

丑二、結差別

善男子！由是因緣，當知如來及諸菩薩威德住持，非但能令身財圓滿；如來菩薩住持威德，亦令眾生身財下劣。

癸十、淨穢土別<sup>2</sup> 子一、曼殊室利問

世尊！諸穢土中何事易得，何事難得？諸淨土中何事易得，何事難得？

子二、佛告<sup>2</sup> 丑一、穢土<sup>2</sup> 寅一、標

善男子！諸穢土中，八事易得，二事難得。

寅二、釋<sup>2</sup> 卯一、八事易得

何等名為八事易得？一者、外道，二者、有苦眾生，三者、種姓家世興衰差別，四者、行諸惡行，五者、毀犯尸羅，六者、惡趣，七者、下乘，八者、下劣意樂加行菩薩。

卯二、二事難得

何等名為二事難得？一者、增上意樂加行菩薩之所遊集，二者、如來出現於世。

丑二、淨土

善男子！諸淨土中與上相違，當知八事甚為難得，二事易得。

壬二、結名法門<sup>2</sup> 癸一、曼殊室利問

世尊！於此解深密法門中，此名何教？我當云何奉持？

癸二、佛告

善男子！此名如來成所作事了義之教，於此如來成所作事了義之教，汝當奉持。

壬三、說果勝利

說是如來成所作事了義教時，於大會中，有七十五千菩薩摩訶薩，皆得圓滿法身證覺。

瑜伽師地論科句披尋記卷第七十八



瑜伽師地論科句披尋記卷第七十九

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之八

己二、料簡世界<sup>2</sup> 庚一、結前

如是已說功德品決擇。

庚二、正辨<sup>2</sup> 辛一、淨穢差別<sup>2</sup> 壬一、問

問：如說五種無量，謂有情界無量等。彼一切世界，當言平等平等，為有差別？

壬二、答<sup>2</sup> 癸一、總標二種

答：當言有差別。彼復有二種，一者、清淨，二者、不清淨。

癸二、別釋清淨<sup>2</sup> 子一、得清淨名

於清淨世界中，無那落迦、傍生、餓鬼可得，亦無欲界、色無色界，亦無苦受可得，純菩薩僧於中止住，是故說名清淨世界。

子二、舉受生者

已入第三地菩薩，由願自在力故，於彼受生，無有異生，及非異生聲聞、獨覺，若異生菩薩得生於彼。

辛二、會釋密意<sup>2</sup> 壬一、問

問：若無異生菩薩，及非異生聲聞、獨覺得生彼者，何因緣故，菩薩教中作如是說：若菩薩等意願於彼，如是一切皆當往生？

壬二、答<sup>3</sup> 癸一、標

答：為化懈怠種類、未集善根所化眾生故，密意作如是說。

癸二、徵

所以者何？

癸三、釋

彼由如是蒙勸勵時，便捨懈怠，於善法中勤修加行，從此漸漸堪於彼生當得法性。應知是名此中密意。

為化懈怠種類等者：攝大乘說：由唯發願，便得往生極樂世界，是為別時意趣。（攝論二卷十二頁）由是此說為化懈怠種類，令於善法勤修加行，從此漸漸堪於彼生，其義正同。

戊十二、住品<sup>2</sup> 己一、辨住種別<sup>4</sup> 庚一、標

復次，菩薩依四種住能成四事。

庚二、徵

云何四住？

庚三、列

一者、極歡喜住，二者、增上戒住，三者、增上心住，四者、增上慧住。

庚四、釋<sup>2</sup> 辛一、別釋四住<sup>4</sup> 壬一、極歡喜住

云何極歡喜住？謂諸菩薩，隨所安住，已入清淨增上意樂地故，乃至當坐妙

菩提座，於三寶所不藉他緣，意樂清淨。

壬二、增上戒住

云何增上戒住？謂諸菩薩，即依如是極歡喜住，從此已上，隨所安住，具性尸羅，遠離一切慳吝犯戒，即以如是圓滿戒捨迴向無上正等菩提。

壬三、增上心住

云何增上心住？謂諸菩薩，即依如是增上戒住，從此已上，隨所安住，離欲界貪，獲得靜慮及諸等至，安住慈悲，於諸眾生隨能、隨力如實正行。

壬四、增上慧住<sup>2</sup> 癸一、徵

云何增上慧住？

癸二、釋<sup>2</sup> 子一、總出體

謂諸菩薩，即依如是增上心住，從此已上，隨所安住，漸能獲得菩提分法善巧、諸諦善巧、緣起善巧、不共法安立智善巧，出過一切聲聞、獨覺共所證智。



緣起善巧者：本地分說：緣起流轉止息相應增上慧住。謂諸菩薩如實了知能觀真實、所觀真實，及於真實諸有情類，由無智故眾苦流轉，由有智故眾苦止息。（陵本四十七卷十四頁<sup>3773</sup>）此應準知。

子二、隨難釋<sup>2</sup>

丑一、不共法安立智

即於此中，不共法安立智者，謂於菩薩藏中密意言辭智、非安立諦智，及安立諦智。

丑二、共所得智

即於此中，共所得智者，謂依緣起所得證智。

辛二、依成四事<sup>2</sup>

壬一、徵

云何依此四住能成四事？

壬二、釋<sup>4</sup>

癸一、依初住

謂諸菩薩，依止初住，乃至當坐妙菩提座，終不棄捨大菩提心。

癸二、依第二住

依第二住，乃至當坐妙菩提座，當來自身財寶善品運運增長。

癸三、依第三住

依第三住，為欲利益諸有情故，轉諸靜慮，以大願力還生欲界，而不為彼欲纏煩惱之所染汙。

癸四、依第四住

依第四住，於一切法安立通達而得善巧，為度眾生，故發誓願受於生死，因此誓願，便能積集廣大資糧。則由此住清淨為因，不待餘住，亦不由他教誡教授，速能證得如來妙智。

己二、辨苦樂等<sup>4</sup> 庚一、苦

問：菩薩當言以何為苦？答：眾生損惱為苦。

庚二、樂

問：菩薩當言以何為樂？答：眾生饒益為樂。

庚三、作意

問：菩薩當言以何作意？答：悟入所知境界邊際，及作一切利眾生事以為作意。

庚四、住

問：菩薩當言以何為住？答：以無分別為住。

戊十三、地品<sup>5</sup>

己一、障治<sup>2</sup>

庚一、所治障<sup>3</sup>

辛一、標

復次，菩薩略有四上品障，若不淨除，終不堪能入菩薩地及地漸次。

辛二、徵

何等為四？

辛三、列

一者、於諸菩薩毗奈耶中起染汙犯；二者、毀謗大乘相應妙法；三者、未積集善根；四者、有染愛心。

有染愛心者：謂於一切波羅蜜多諸果異熟及報恩中，心有繫縛故。

庚二、能治法<sup>3</sup>

辛一、標

為欲對治如是四障，復有四種淨除障法。

辛二、徵

何等為四？

辛三、列

一者、遍於十方諸如來所，深心懇責，發露悔過；二者、遍為利益一切十方諸有情類，勸請一切如來說法；三者、遍於十方一切有情所作功德，皆生隨喜；四者、凡所生起一切善根，皆悉迴向阿耨多羅三藐三菩提。

己二、隨惑<sup>2</sup>

庚一、總標列

復次，已入大地菩薩，有四微細難可遍知、難可除斷諸隨煩惱，彼諸菩薩應遍了知，當正除斷。何等為四？一者、法愛，二者、聲聞、獨覺相應作意，三者、味著等至，四者、眾魔事業。

庚二、隨難釋

於諸相中，所有一切心動流散，當知皆是眾魔事業。

於諸相中所有一切心動流散者：乃至未得無相無功用住，於諸相中，猶為現行煩惱所動故。

己三、相位<sup>2</sup> 庚一、已入地相<sup>11</sup> 辛一、初地相

問：已入初地菩薩，當言何相？答：當言超過諸異生地，已入菩薩正性離生；由已入故，不名異生。超過一切所有怖畏，得未曾得無上法故，常能安住極歡喜住。

超過一切所有怖畏者：本地分說：極歡喜住菩薩已能發起善決定心，於五怖畏皆悉除斷。謂不活畏、惡名畏、死畏、惡趣畏、處眾怯畏，名五怖畏。如彼別釋其相應知。（陵本四十七卷二十一頁<sup>3800</sup>）

辛二、第二地相

問：已入第二地菩薩，當言何相？答：當言於毗奈耶中，法爾獲得止息一切聲聞所學自性，能於身語意業清淨現行，故能遠離諸犯戒垢。

法爾獲得止息一切聲聞所學自性者：謂增上戒住菩薩性戒具足，如是性戒

與聲聞共，由是說言一切聲聞所學自性。

辛三、第三地相

問：已入第三地菩薩，當言何相？答：當言於內獲得彊盛奢摩他道，由此證得爾焰光明。

由此證得爾焰光明者：謂能證得彼智光明故。由彼所得三摩地，能為無量智光依止，故作是說。

辛四、第四地相

問：已入第四地菩薩，當言何相？答：當言於內獲得彊盛毗鉢舍那道故，建立能燒煩惱智焰，由此能於如其所證一切所有菩提分法安立善巧。

辛五、第五地相

問：已入第五地菩薩，當言何相？答：當言超過一切世間智故，超過一切聲聞、獨覺智故，能昇悟入不思議諦極難勝道。

辛六、第六地相

問：已入第六地菩薩，當言何相？答：當言悟入甚深緣起道理故，於一切行住厭背想，於無相界多住趣向作意思惟。

辛七、第七地相

問：已入第七地菩薩，當言何相？答：當言於有加行無間闕無相界作意能極遠入，於加行道已到究竟。

辛八、第八地相

問：已入第八地菩薩，當言何相？答：當言於無加行無功用無相界作意得任運故，無有動搖，於一切相得自在故，住清淨地。

辛九、第九地相

問：已入第九地菩薩，當言何相？答：當言於名身、句身、文身得自在故，又得無罪無量廣大慧故，又得廣大無礙解故，能悅一切眾生心故，名大法師。

辛十、第十地相

問：已入第十地菩薩，當言何相？答：當言已得一切如來同大灑故，已得如雲大法身故，已得一切大神通故，亦名如來。

辛十一、如來地相

問：入如來地菩薩，當言何相？答：當言即此所得法身更善清淨極成滿故，於一切種煩惱障及所知障，得永遠離清淨智見。

庚二、明修位等<sup>4</sup> 辛一、造修

問：於此諸地云何造修？答：若諸菩薩住勝解行地，依於十地修十法行。

依於十地修十法行者：前說：於大乘中有十法行，能令菩薩成熟有情。

如彼別列其相應知。（陵本七十四卷八頁<sup>5697</sup>）本地分說：若諸菩薩勝解行

住，普於一切餘菩薩住及如來住，皆名發趣，未得、未淨。（陵本四十七卷十五頁<sup>3776</sup>）由是此說依於十地修十法行。

辛二、證得

問：於此諸地云何而得？答：若諸菩薩證入菩薩正性離生，又復證得清淨意



樂，爾時頓得一切諸地。

爾時頓得一切諸地者：本地分說：後後住中支分功德，非前前住一切都無。（陵本四十八卷二十頁<sup>3880</sup>）由是此說頓得一切諸地。由從最初清淨勝意樂地，一切所有菩提資糧無差別故。

辛三、等流

問：何等名為諸地等流？答：一切地中證得已後，所有威德諸加行道。

辛四、成滿

問：於此諸地云何成滿？答：若諸菩薩，於彼諸地一一地中，經於無量百千大劫，隨所稱讚諸地威德，於此威德任運能證。

己四、料簡<sup>2</sup> 庚一、問

問：如說五種入正性離生，此中聲聞入正性離生，若諸菩薩入正性離生，等於法界如實通達。此二差別云何應知？

庚二、答<sup>2</sup> 辛一、略說法界<sup>3</sup> 壬一、標

答：略說法界有二種相。

壬二、列

一者、差別相，二者、自相。

壬三、釋<sup>2</sup> 癸一、差別相<sup>2</sup> 子一、牒列

差別相者，謂常住相及寂靜相。

子二、隨釋<sup>2</sup> 丑一、常住相

常住相者，謂本來無生法性及無盡法性。

丑二、寂靜相

寂靜相者，謂煩惱苦離繫法性。

癸二、自相

言自相者，謂於相、名、分別、真如、正智所攝一切法中，由遍計所執自性故，自性不成實法無我性。

辛二、能入差別<sup>2</sup> 壬一、辨<sup>2</sup> 癸一、聲聞<sup>2</sup> 子一、通達作意別<sup>2</sup> 丑一、通達<sup>2</sup>

寅一、標

此中聲聞，由差別相通達法界，入正性離生，不由自相。

寅二、釋

以通達彼故，由無沒想及安隱想，於法界中得寂靜想，於一切行一向發起厭背之想。

由無沒想及安隱想者：此中無沒及與安隱，當知皆是寂滅異門施設安立。不沒欲、色、無色三愛中故，名無沒想。離怖畏住所依處故，名安隱想。

丑二、作意

又復不能於彼相等所攝諸法性不成實法無我性如實了知，唯即於此法界定中，由緣法界差別作意，無相心轉，非由緣彼自相作意。

子二、迴向趣寂別<sup>2</sup> 丑一、迴向

或復因他為其宣說法界自相，聞已一分迴向菩提聲聞，極大艱辛，然後悟入；既得入已，精勤修習。

丑二、趣寂

一分一向趣寂聲聞，極大艱辛，少能悟入；而不入已，精勤修習。

癸二、菩薩<sup>2</sup>

子一、總顯通達作意差別<sup>2</sup>

丑一、通達

若諸菩薩，俱由二相通達法界，入於菩薩正性離生。

丑二、作意

入離生已，多分安住緣於法界自相作意。

子二、別釋通達作意差別<sup>2</sup>

丑一、徵

何以故？

丑二、釋

由於法界緣差別相多作意時，速趣涅槃；故多住彼，於阿耨多羅三藐三菩提非正方便。

壬二、結

當知雖等通達法界，由此因緣而有差別。

己五、釋名三世三輪清淨

問：如說三世三輪清淨，云何三世三輪清淨？答：由遍計所執自性故，於過去、未來、現在諸法，平等平等以如實慧正觀察時，於過去、未來、現在法中，無有顧戀、希望、染著，是名三世三輪清淨。

戊十四、建立品<sup>2</sup>

己一、不共佛法<sup>2</sup>

庚一、問

問：如先所說百四十不共佛法，餘經復說十八不共佛法，如是佛法云何安立？幾種所攝？

十八不共佛法者：顯揚論中一一別列。一、如來無誤失業，二、無卒暴音，三、無忘失念，四、無不定心，五、無種種想，六、無不擇已捨。七、欲無退；如欲無退如是，八、正勤無退，九、念無退，十、等持無退，十一、慧無退，十二、解脫、解脫知見無退應知。十三、於過去世無著無礙智；如於過去如是，十四、於未來，十五、於現在無著無礙智應知。十六、如來一切身業，智為導首，隨智而行；如身業如是，十七、語

業，十八、意業應知。（顯揚論四卷十頁）下答文中，依此次第，一一別釋其相易了。

庚二、答<sup>2</sup> 辛一、安立<sup>2</sup> 壬一、釋<sup>4</sup> 癸一、三業清淨<sup>3</sup> 子一、身業無誤<sup>2</sup> 丑一、簡聲聞

答：謂阿羅漢苾芻諸漏永盡，方入聚落遊行乞食；或於一時，與諸惡象、惡馬、惡牛及惡狗等共路而行；或入稠林履踐棘園；或齊雙足踰越坑塹；或入如是非法舍宅，為諸母邑非理招引；

或入如是非法舍宅等者：謂若如來所制非所行處諸婬女家，如是名為非法舍宅。

或阿練若棄捨正道，行邪惡徑；

棄捨正道行邪惡徑者：本地分說：若往、若還正知而往。往所應往，非非所往，還所應還，非非所還。（陵本二十四卷十頁<sup>2034</sup>）與是相違，當知是名棄捨正道，行邪惡徑。

或與盜賊、師子、猛獸、豺狼、豹等共路而遊。

丑二、顯如來

如是等類，諸阿羅漢所有誤失，如來於此一切永無。

子二、語業無誤<sup>2</sup> 丑一、簡聲聞

又阿羅漢，或於一時，遊阿練若大樹林中，迷失道路；或入空宅揚聲大叫，呼噪遠聞；或復因於習氣過失，無染汙心驚唇露齒，追爾而笑。

丑二、顯如來

如是等類，諸阿羅漢所有暴音，如來於此永無所有。

子三、意業無誤<sup>4</sup> 丑一、無忘失念<sup>2</sup> 寅一、簡聲聞

又阿羅漢，或於一時由忘念故，於所作事而有喪失。

寅二、顯如來

如來於此永無所有。

丑二、無種種想<sup>2</sup> 寅一、簡聲聞

又阿羅漢，於有餘依生死界中，一向發起厭背之想；於無餘依涅槃界中，一向發起寂靜之想。

寅二、顯如來

如來於彼有依涅槃無差別想，安住第一平等捨故。

丑三、無不定心<sup>2</sup> 寅一、簡聲聞

又阿羅漢，若入等至即名為定，若出等至即不名定。

寅二、顯如來

如來遍於一切位中無不定心。

丑四、無不擇捨<sup>2</sup> 寅一、簡聲聞

又阿羅漢，不善思擇而便棄捨利眾生事。

寅二、顯如來

如是等類，如來於此不善思擇而便棄捨永無所有。

癸二、未得不退<sup>2</sup> 子一、簡聲聞



又阿羅漢，依所知障淨，由未得退，退失於欲、精進、念、定、慧及解脫、解脫知見。

子二、顯如來

如是六種退失之法，如來永無。

癸三、不共現行<sup>2</sup> 子一、簡聲聞<sup>2</sup> 丑一、舉身業

又阿羅漢，或於一時善身業轉，或於一時無記業轉。

丑二、例語意

如於身業，語業、意業，當知亦爾。

子二、顯如來<sup>2</sup> 丑一、標所由

如來三業智前行故、智隨轉故，無無記業。

丑二、釋差別

智所起故，名智前行；智俱行故，名智隨轉。

癸四、不共智住<sup>2</sup> 子一、簡聲聞

又阿羅漢，遍於三世所知事中，不能率爾作意便解，是故智見說名有著；不能一切無餘正解，是故智見說名有礙。

子二、顯如來

如來遍於三世境界，率爾作意，便能正解一切所知境事差別。

壬二、結

是故說此十八種名不共佛法。

辛二、所攝

此中初四是無忘失法，及拔除習氣所攝；次一是大悲所攝；所餘當知是一切種妙智所攝。

己二、隨好<sup>2</sup>

庚一、舉異說

又復世尊於餘經中所說隨好，為令所化生淨信故，顯示於彼，然不立相。

庚二、指前釋

安立諸相，如建立品已廣顯示。從此隨好，當知分出彼諸隨好。

安立諸相等者：建立品中，廣說如來三十二種大丈夫相，及與八十隨好。

（陵本四十九卷七頁<sup>3928</sup>）從此八十隨好，當知分出餘經所說彼諸隨好。

戊十五、行品<sup>2</sup> 己一、略舉教授

復次，菩薩邪行應當了知；菩薩正行應當了知；菩薩正行勝利應當了知；菩薩於正行中，安立法行、平等行、善行、法住行相應當了知；菩薩能生淨信譬喻應當了知；菩薩於正行中，安立所學應當了知；於諸聲聞所學、菩薩所學，殊勝差別應當了知；於諸菩薩應所學中，善學菩薩所有世間、出世間智，利益他事應當了知；即於菩薩所教授中，聲聞所學應當了知；非善學沙門應當了知；善學沙門應當了知；住世俗律儀者應當了知；住勝義律儀者應當了知；於諸如來調伏方便應當了知；於密意語應當了知；於菩薩藏所教授中，勝解勝利應當了知。如是略舉菩薩藏中所有教授。

菩薩邪行等者：此中諸相，如下一一別釋應知。

己二、廣釋差別<sup>15</sup> 庚一、邪行<sup>4</sup> 辛一、徵

云何邪行？

辛二、標

當知略說後後引發，有八種相。

辛三、列

一者、能退智資糧邪行；二者、退智資糧故，能令忘念邪行；三者、由忘念故，能壞白法邪行；四者、白法壞故，能令非菩薩儀惡意現行邪行；五者、惡意現行故，能令難可調伏邪行；六者、難調伏故，能令行於非道邪行；七者、行非道故，能令親近不賢良邪行；八者、親近不賢良故，能令菩薩不如其義邪行。

云何邪行等者：謂諸菩薩不作應作，作不應作，是名邪行。今此略說前前為緣能引後後，如是次第有八種相。

辛四、廣<sup>8</sup>

壬一、能退智資糧邪行<sup>2</sup>

癸一、舉退因緣

復次，菩提以慧為體，慧能引發所餘一切波羅蜜多；是故於慧起邪行時，當

知菩薩於彼菩提及能引發菩提諸法皆起邪行。

是故於慧起邪行時者：謂若依止增上慧學起諸邪行，是名於慧起邪行時。

此復云何？謂如有一，離近賢聖，依近惡友，聞不正法勝解為因，不如正理思擇諸法。於諸惡欲及諸惡見喜樂受行，或於廣大所學、所得微妙法中，而自輕憊。如是名為依止增上慧學起諸邪行。如攝事分說應知。（陵

本九十四卷六頁<sup>7075</sup>）

癸二、辨四退法<sup>2</sup> 子一、出能退法<sup>3</sup> 丑一、略標列

有四種法，能令菩薩智資糧退。何等為四？一者、自不聽聞，二者、不令他聞，三者、為聽聞障，四者、顛倒執著而有聽聞。

丑二、廣相違<sup>4</sup> 寅一、標

依此能令智資糧退四種法故，於現法中、或於後法，復生四種智相違法。

寅二、徵

何等為四？

寅三、列

一者、無所了知，二者、眾緣闕乏，三者、能生感癡非福，

能生感癡非福者：能生後法無明為緣非福行故。

四者、顛倒。

寅四、釋

自不聽聞為依止故，於現法中無所了知；不令他聞為依止故，於後法中眾緣闕乏；為聽聞障為依止故，能生後法感癡非福；顛倒執著而有聽聞為依止故，於後法中更增顛倒。

丑三、隨別釋<sup>4</sup> 寅一、自不聽聞

自不聽聞者，憎背法故，憎背補特伽羅故，俱憎背故。

寅二、不令他聞

不令他聞者，恐他智勝故，有憍傲故，怖他輕毀故。

不令他聞等者：謂或不施其法，或不為說，是名不令他聞。如應配釋三種

因緣應知。

寅三、為聽聞障

為聽聞障者，誹毀於法及補特伽羅故，惡作矯亂相牽引故，

惡作矯亂相牽引故者：謂若非處惡作，障自聽聞；以言矯亂，障他聽聞故。

不令啟請及開許故，方便毀訾能聽者故。

寅四、顛倒執著而有聽聞

顛倒執著而聽聞者，依自惡通達領解宣說，執著善通達領解宣說故；依他善通達領解宣說，執著惡通達領解宣說故。

子二、配失三慧

此中若自不聽聞、若不令他聞、若為聽聞障，如是三法，多分能令退失聞所成智資糧；顛倒執著而有聽聞，多分能令退失思修所成智資糧。

壬二、能令忘念邪行<sup>3</sup> 癸一、標

復次，有四種法，能令菩薩忘失正念。

癸二、徵

何等為四？

癸三、釋<sup>2</sup> 子一、標

謂於四種補特伽羅四處迷亂。

子二、列<sup>2</sup> 丑一、四種補特伽羅

一、於舉罪補特伽羅，二、於教導補特伽羅，三、於欲作利益補特伽羅，  
四、於有德補特伽羅。

丑二、四種迷亂

謂於同梵行所迷亂自過；於學現前迷亂學處；

於學現前等者：謂於大乘所應學處現前教導時，不如法義而聽受故。

於彼大乘欲勝解者、欲正行者，顯無差別、標舉分別諸過失故，發起迷亂勝解、正行；



顯無差別等者：不為顯示大乘廣大甚深道理，超諸一切聲聞、獨覺，是名顯無差別，由是迷亂大乘勝解。或復誹撥大乘法，標舉分別彼彼過失，由是迷亂大乘正行。此中大乘勝解及與正行，如本地分力種性品廣說應知。（陵本三十八卷七頁<sup>3117</sup>）

於能說法補特伽羅迷亂顯彼所有密處。

迷亂顯彼所有密處者：謂顯示彼或有破戒，不住律儀故。

壬三、能壞白法邪行<sup>2</sup> 癸一、標

復次，有四種法，能令菩薩壞鮮白法。

癸二、釋<sup>2</sup> 子一、由起非處加行

謂與他競增上力故，起諸白法非處加行。

子二、由有加行過失<sup>3</sup> 丑一、標

雖起白法處所加行，然有三種邪行過失。

丑二、列

一者、染著過失，二者、惡見過失，三者、受持過失。

丑三、釋<sup>3</sup> 寅一、染著過失

由二因緣，應知染著過失。一者、邪受用故；二者、多雜處故。

邪受用故等者：由邪受用，應知染著財物過失。由多雜處，應知染著居家過失。

寅二、惡見過失

由二因緣，應知惡見過失。一者、誹撥正法補特伽羅故；二者、於不正法顯示執著為正法故。

寅三、受持過失

由二因緣，應知受持過失。一者、受持狹小唯不了義經故；二者、於所未聞、未曾領受諸了義經懸誹撥故。

壬四、能令惡意現行邪行<sup>3</sup> 癸一、標

復次，菩薩有四種非菩薩儀惡意現行。

癸二、列

一者、於大師所生不信順，敬學相違惡意現行；

敬學相違惡意現行者：謂不恭敬所學故。

二者、於同梵行攝受舉罪能教誡者，如實發露已過相違惡意現行；三者、於大智福諸善法中，精進相違惡意現行；四者、於廣大甚深勝解中，能令自障清淨相違惡意現行。

癸三、廣3 子一、不信大師

由三種相，應知於大師所生不信順，謂於有體、尊勝、得智。

謂於有體尊勝得智者：大乘轉依，是名有體。恆作他義，是名尊勝。證大菩提，是名得智。於此一切不生敬信，是名於大師所生不信順。

子二、覆藏已過

由三種相，應知不如實發露已過。一者、於彼攝受諸有情所，邪妄顯示已為尊勝，因此發起憍舉心故；二者、於能舉罪諸有情所覆所犯故；三者、於能

教誡諸有情所，因彼驅擯增上力故，發穢濁心作損惱故。

子三、退失精進

由二種相，應知退失於諸善法發起精進。謂於大智福諸有情所，愛著利養恭敬故，及欣樂彼故。

壬五、能令難可調伏邪行<sup>2</sup> 癸一、標

復次，有四種法，能令菩薩難可調伏。

癸二、釋<sup>3</sup> 子一、總舉

謂於正修有四種障。

子二、別列

一、於聽聞執為究竟；二、於教授左謬領解；三、於尸羅不正安住，多諸惡作；四、於自見安住見取。

子三、理釋<sup>4</sup> 丑一、第一障

謂但聽聞心不寂靜，故於聽聞執為究竟。

丑二、第二障

由於教誡顛倒分別，故於教授左謬領解。

丑三、第三障

由於尸羅多作闕犯而受信施，故有惡作。

丑四、第四障<sup>2</sup> 寅一、標所由

與勝有情共興諍競，故於自見多住見取。

寅二、隨難釋

勝有情者，謂根調伏勝及斷滅勝。

壬六、能令行於非道邪行<sup>2</sup> 癸一、總標列

復次，菩薩有四種於諸有情行於非道。一者、於未安立淨信有情而不為說；二者、於下乘希求大乘諸有情所，不隨所宜而有所說；三者、於大乘希求下乘諸有情所，不順其義而有所說；

不順其義而有所說者：謂若違越菩薩法教，宣說一向厭離生死、棄捨利益

諸有情事，由是因緣，令彼有情捨勝取劣，說名行於非道。

四者、於住禁戒、不住禁戒貪愛朋黨，不平等說。

癸二、隨難釋<sup>2</sup> 子一、安住禁戒

由三種相，當知是名安住禁戒。一者、事業無愆故；

事業無愆故者：本地分中聲聞地說：軌則圓滿，謂如有一，或於威儀路，或於所作事，或於善品加行處所，成就軌則。隨順世間，不越世間；隨順毗奈耶，不越毗奈耶。（陵本二十二卷三頁<sup>1895</sup>）此應準釋。

二者、尸羅無闕故；三者、恭敬所學故。

子二、不住禁戒

由二種相，當知是名不住禁戒。一者、尸羅闕故；二者、不恭敬所學故。

壬七、能令親近不賢良邪行

復次，菩薩由親近不賢良故，退失四事。一者、退失於乘；

退失於乘者：本地分說：諸菩薩乘與七大性共相應故，說名大乘。（陵本

四十六卷十八頁<sup>3724</sup>）彼不相應，說名退失。

二者、退失利益有情加行；三者、退失聖教；四者、退失無間修諸善法。

壬八、能令不如其義邪行<sup>3</sup> 癸一、標

復次，有四種菩薩不如其義。

癸二、列

一者、任持正法，二者、住阿練若，三者、勤修福業，四者、管御大眾。

癸三、釋<sup>4</sup> 子一、欲求信伏

謂諸菩薩欲令信伏，雖任持正法，亦不如義，非如其義。

子二、為求聲譽

若諸菩薩為求聲譽，雖住阿練若，亦不如義，非如其義。

子三、欲求染果

若諸菩薩心專繫著有染之果，雖勤修福業，亦不如義，非如其義。

子四、欲求供事名稱

若諸菩薩心專繫著供事名稱，雖管御大眾，亦不如義，非如其義。

庚二、正行<sup>3</sup> 辛一、徵

復次，云何正行？

辛二、標

謂與上相違，離別過失宣說對治。

與上相違等者：謂與上說邪行相違，是名正行。由此宣說邪行過失因緣，能正對治別別過失故。

當知後後之所引發八種行相，是名正行。

辛三、釋<sup>8</sup> 壬一、宣說令智退失因緣<sup>4</sup> 癸一、自不聽聞

謂說由自不聞令智退失，此何因緣？由於正法補特伽羅不恭敬所顯故。由此毀犯；設不毀犯，亦無勝解，是故退失。

由此毀犯等者：謂不恭敬正法補特伽羅，由此毀犯菩薩所應學處，是名由此毀犯。設不毀犯，由自不聞，亦於現法無所了知，名無勝解。



癸二、不令他聞

又說由不令聞令智退失，此何因緣？由欲令他信伏所顯故。由此毀犯；設不毀犯，迴向邪法，是故退失。

迴向邪法者：謂由不令他聞，不作有情一切義利，違越菩薩最初發心，是名迴向邪法。

癸三、為聽聞障

又說由為聞障令智退失，此何因緣？由不欲、不聞、不持所顯故。由此毀犯；設不毀犯，懈怠懶惰，是故退失。

癸四、顛倒執著而有聽聞

又說由邪執著而有聽聞令智退失，此何因緣？由於修行不見功德，但聞言說為究竟所顯故。由此毀犯；設不毀犯，智不成實，是故退失。

壬二、宣說令念忘失因緣<sup>4</sup>

癸一、迷亂自過

復說由於舉罪者所迷亂自過，令念忘失，此何因緣？由於重事中怖畏衰損，

於輕事中怖畏訶責，而設妄語所顯故。由此毀犯，由業障故有所忘失；設不毀犯，由犯障故而有忘失。

由業障故有所忘失等者：故思所造諸尤重業，能障正道，令不生起，是名業障。由是因緣，令於多聞思修所集成念不能防守，故有忘失。無此業障，名不毀犯，但由妄語有愆犯故，說名犯障。

癸二、迷亂學處

又說由迷亂學處，令念忘失，此何因緣？由非自性隨轉虛妄見曲所顯故。由此毀犯，由業障故有所忘失；設不毀犯，由犯障故而有忘失。

由非自性隨轉等者：謂於教導補特伽羅，不如法義隨自在轉，名非自性隨轉；由邪解行住自見取，是名虛妄見曲所顯。

癸三、迷亂大乘勝解正行

又說由於大乘迷亂勝解、正行，令念忘失，此何因緣？由於菩薩不生恭敬，隱覆實德所顯故。由此毀犯，由業障故有所忘失；設不毀犯，由犯障故而有

忘失。

癸四、迷亂顯隱密處

又說由迷亂顯隱密處，令念忘失，此何因緣？由欲令於大乘不生樂欲所顯故。由此毀犯，由業障故而有忘失；設不毀犯，由犯障故而有忘失。

壬三、宣說壞鮮白法因緣<sup>4</sup>

癸一、由非處加行

復說由非處加行壞鮮白法，此何因緣？由樂己利狹小，不轉下乘聽聞，心不謙下所顯故。由此毀犯，由不能得所未獲得諸鮮白法，於所聽受生賒緩故，於已得退。

不轉下乘聽聞者：謂不轉捨聽聞餘乘下劣法故。

癸二、由愛染過失

又說由染愛過失壞鮮白法，此何因緣？由於正在家所得利養不生喜足，矯誑等法有希望所顯故。

矯誑等法有希望所顯故者：由於所得利養不生喜足，或復求多，或求精

妙，名有希望。由是有矯、有誑、有諂、有詐，多隨煩惱染汙相續，不能正證心一境性。義如三摩呬多地決擇中說。（陵本六十二卷一頁<sup>4965</sup>）

由此毀犯，由不聽聞所未聞法，多諸事業輕躁散亂，於三摩地不能證得。

由不聽聞所未聞法等者：前說：由二因緣，應知染著過失。謂邪受用及多雜處，如次配釋二句應知。謂邪受用外欲塵故，於受用法無有堪能，是故此說不聞所未聞法。由多雜處，是故此說多諸事業輕躁散亂。

癸三、由惡見過失

又說由惡見過失壞鮮白法，此何因緣？由懷惡意瞻視於他，於諸聲聞、大乘所學其心顛倒所顯故。由此毀犯，由不正行獲得衰損，由誑惑他獲得衰損。

由懷惡意瞻視於他者：前說：由二因緣，應知惡見過失。一者、誑撥正法補特伽羅故；二者、於不正法顯示執著為正法故。如次配釋二句應知。

癸四、由受持過失

又說由受持過失壞鮮白法，此何因緣？由於如來智意趣中起等覺慢所顯故。

由於如來智意趣中等者：謂於如來妙智所說了義、不了義經差別意趣不如實知，起等覺慢故。於有差別執無差別，名等覺慢。

由此毀犯，由謗正法獲得衰損，由於如來智意趣中邪稱量故，獲得衰損。

由謗正法獲得衰損等者：前說：由二因緣，應知受持過失。一者、受持狹小唯不了義經故；二者、於所未聞、未曾領受諸了義經懸誹撥故。逆次配釋二句應知。

壬四、宣說惡意現行因緣<sup>4</sup>

癸一、由不敬學

復說由於所學不甚恭敬故，惡意現行，此何因緣？由於所犯不發露、不陳悔、不除惡作所顯故。由此現行，由於所緣有散亂故，行不明了。

由於所緣有散亂故等者：謂諸菩薩所應學處，此名所緣。心不安住，名有散亂。由是因緣，行彼境界意識不明了轉，是名行不明了。

癸二、由覆己過

又說由不如實顯己過故，惡意現行，此何因緣？由於身財有所顧戀，樂非諦

語所顯故。

樂非諦語所顯故者：謂若宣說不虛妄義，唯一諦，是名諦語。與此相違，名非諦語。

由此現行，由於聖教有散亂故，行不明了。

由於聖教有散亂故者：此說聖教，謂即諦語。樂非諦語，名有散亂。

癸三、由不精進

又說由於精進懈怠因緣，惡意現行，此何因緣？由無堪忍所顯故。由此現行，由於眾苦不能堪忍，於諸善法有散亂故，行不明了。

癸四、由障不淨

又說由障淨因緣，惡意現行，此何因緣？由於大乘無增上意樂勝解所顯故。由此現行，於廣大乘有散亂故，行不明了。

於廣大乘有散亂故者：前說：若諸菩薩捨於大乘相應作意，墮在聲聞、獨覺相應諸作意中，當知是名作意散動。（陵本七十七卷十五頁<sup>5909</sup>）此應準

釋。

壬五、宣說難可調伏因緣<sup>4</sup> 癸一、執唯聽聞

復說由唯聽聞究竟修障，難可調伏，此何因緣？由唯觀見免脫難論勝利聽聞所顯故。由此毀犯，矯誑顯示持法善友。

癸二、謬解教授

又說由於教授左解修障，難可調伏，此何因緣？由不堪受教，堅持所犯，不敬教授所顯故。由此毀犯，矯誑顯示住阿練若善友。

癸三、不住尸羅

又說由於尸羅不堅安住惡作修障，難可調伏，此何因緣？由於所學不甚恭敬，虛受信施所顯故。由此毀犯，矯誑顯示勤修福業善友。

癸四、住自見取

又說由於自見安住見取修障，難可調伏，此何因緣？由於清淨波羅蜜多諸菩薩所不生恭敬、不欲瞻仰、不欲親近、不欲聽聞、不隨法行所顯故。由此毀

犯，矯誑顯示御眾善友。

壬六、宣說行於非道因緣

復說由不宣說、不隨宣說、不順義說、不平等說行於非道，

由不宣說等者：前說：菩薩有四種於諸有情行於非道。此說四義，如次配屬應知。

此何因緣？由前後宣說厭倦不平等心，於所宣說不知方便，下乘勝解有染愛心，教誡徒眾加行所顯故。

前後宣說厭倦不平等心等者：此說因緣亦有四種，如次配屬前說四種行於非道應知。

由此毀犯，由善根不圓滿故，由不攝受廣大善根故，由棄捨廣大善根故，生非福故，誑惑所化諸有情類。

由此毀犯等者：此說毀犯亦有四種，如次配屬前說四種行於非道，是彼果故。



壬七、宣說退失四事因緣

復說由四種親近不賢良故，退失四事，此何因緣？由慳吝、少聞、不善入聖教、於佛語言不聽聞所顯故。

由慳吝少聞等者：辯中邊說，不慳有三障。一、不尊重正法，二、尊重名譽利養恭敬，三、於諸有情心無悲愍。由是當知此慳吝義。餘少聞等，其義易了。

由此毀犯，不修善根故，怖畏生死苦故，於利他事不能作故，狹小善根故，於諸法中有疑惑故，而有退失。

由此毀犯等者：此說毀犯，略有五義。初義是總，謂由慳吝、少聞等為因緣，總說不修善根。餘義是別，如次配釋前說退失四事。謂退失於乘，退失利益有情加行，退失聖教，退失無間修諸善法應知。

壬八、宣說不如其義因緣

復說由於四種菩薩欲求信伏、欲求聲譽、欲求染果、欲求供養承事名稱，是

諸菩薩不如其義，此何因緣？由與我愛俱，於微細罪不見怖畏；與其無我非勝解俱，不顧他利，於生死涅槃一向觀見過失功德；於現法中樂相雜住；於當來世欣樂富貴，攝受財法所顯故。由此毀犯，矯現自身能正持法乃至御眾。

由與我愛俱等者：此說因緣，略有四種。一、由與我愛俱，於微細罪不見怖畏，此配屬前欲求信伏。二、與其無我非勝解俱，不顧他利，於生死涅槃一向觀見過失功德，此配屬前欲求聲譽。三、於現法中樂相雜住，此配屬前欲求供養承事名稱。四、於當來世欣樂富貴，攝受財法，此配屬前欲求染果。與其無我非勝解俱者，謂與大乘法無我理無勝解故。餘文易知。

庚三、正行勝利<sup>4</sup> 辛一、徵

復次，云何正行勝利？

辛二、標

此亦四種，後後應知。

辛三、列

如是正行菩薩，能積集福智資糧故；以此為依，障清淨故；以此為依，於一切門集成白法故；以此為依，起一切種利益有情加行故，又能生長無量福故。

此亦四種後後應知等者：後後勝利，前前為依，如是次第說有四種，如文可知。

辛四、廣<sup>4</sup> 壬一、能集資糧

復有四法，能令積集福智資糧。一者、依此正行供養承事諸佛如來；二者、聞清淨；三者、思清淨；四者、修清淨。

依此正行供養等者：此中正行供養，如本地分供養品說。（陵本四十四卷五頁<sup>3557</sup>）聞清淨等，如本地分力種性品中，說有求聞正法、於法正思、於法正修，其相應知。（陵本三十八卷十四頁<sup>3142</sup>）

壬二、能令障淨

復有四法，能令障淨。一者、於乘自然無動；二者、於諸有情遠離不行因緣；三者、遠離邪行因緣；四者、遠離不圓滿正行因緣。

復有四法能令障淨等者：謂諸菩薩，不捨無上正等覺願為依、為住，於大乘中修奢摩他、毗鉢舍那，是名於乘自然無動。住一切種饒益有情戒，是名於諸有情遠離不行因緣。住律儀戒，是名遠離邪行因緣。住攝善法戒，是名遠離不圓滿正行因緣。

壬三、能集白法

復有四法，能令一切門集成白法。一者、修修所成，二者、成熟有情即彼所成，三者、堪忍難事即彼所成，四者、聞思無厭即彼所成。

能令一切門集成白法者：此中白法，謂即六種波羅蜜多。本地分中，說有一切門戒，乃至一切門慧，由是當知一切門義。修習靜慮，是名為修。靜慮波羅蜜多，名修所成。成熟有情，施、戒所攝，彼二波羅蜜多，名彼所成。堪忍難事，難行忍攝，即忍波羅蜜多，名彼所成。聞思無厭，慧資糧

攝，即慧波羅蜜多，名彼所成。

壬四、能利有情

復有四法，能令作一切種利有情事。謂於四處濟拔有情。一者、於疑惑猶豫處，二者、於極穢惡趣顛墜處，三者、於下乘信解處，四者、於憎背聖教瞋恚心處。

庚四、正行行相<sup>3</sup> 辛一、徵

復次，云何菩薩於正行中現在轉時，猶得如是功德勝利？

辛二、列

謂具法行、平等行、善行、法住行相。

辛三、釋<sup>4</sup> 壬一、具足法行<sup>2</sup> 癸一、徵

云何菩薩具於法行？此何行相？

癸二、釋<sup>2</sup> 子一、釋得名

謂諸菩薩，凡所修行不越正法，是故名為具足法行。

子二、釋行相

當知此行有五行相。一者、於不饒益樂行惡行諸有情所，欲令入善攝受哀愍故；

於不饒益樂行惡行等者：彼諸有情樂行惡行，由是因緣，當墮惡趣，生大憂苦，名不饒益。菩薩於彼應發大心，攝彼一切皆為眷屬，作一切種利益安樂饒益之事，是名攝受哀愍，為欲令彼出不善處，安置善處故。

二者、於住種姓外緣闕乏諸有情所，勸令發起菩提心故；三者、於波羅蜜多殊勝中，自了知故；

於波羅蜜多殊勝者：謂彼波羅蜜多所有善法，由二因緣說名殊勝。一者、廣大，二者、無染。如本地分釋相應知。（陵本四十三卷十九頁<sup>3538</sup>）

四者、於尊重處，發起恭敬禮拜加行故；五者、於諸外道怨敵有情，安住聖教無傾動故。

安住聖教無傾動故者：謂於大乘所得勝利不可引奪，由是不為外道之所傾

動；及於有情平等大悲，由是不為怨敵之所傾動。

壬二、具平等行<sup>2</sup> 癸一、徵

云何菩薩具平等行？此何行相？

癸二、釋<sup>2</sup> 子一、釋得名

謂諸菩薩，遍於一切利眾生事平等修行，是故說名具平等行。

子二、釋行相

當知此行有八行相。一者、於諸有情平等親愛故；二者、於諸有情以無染汙、無差別身、無差別世、無差別求親愛之心，平等慰喻故；

於諸有情以無染汙等者：由於有情平等親愛，是名於彼心無染汙。於諸有情，不分別彼怨親中品，是名無差別身。不分別彼去來今世，是名無差別世。不分別彼欲求、有求及梵行求，是名無差別求。菩薩恆時遠離顰蹙，先發善言，舒顏平視，含笑為先，或問安隱吉祥，或問諸界調適，或問晝夜怡樂，或命前進善來，以是等相慰問有情，隨世儀轉，等無差別，是名

平等慰喻。

三者、捨諸憤鬧，舒顏和悅，於已受擔平等能運故；

於已受擔平等能運者：謂諸菩薩如法御眾，方便饒益故。

四者、於未受擔平等能取故；

於未受擔平等能取者：謂諸菩薩性好攝受諸有情類故。

五者、於一切苦平等堪忍故；六者、於無量調伏方便平等能求故；七者、展

轉更互平等正語堪忍語故；

展轉更互平等正語堪忍語故者：此說菩薩一切愛語，名堪忍語。於諸有情欲作饒益展轉更互等無差別，常樂宣說悅可意語、諦語、法語、引攝義語故。

八者、一切善根平等迴向大菩提故。

壬三、具於善行<sup>2</sup> 癸一、徵

云何菩薩具於善行？此何行相？



癸二、釋<sup>2</sup> 子一、釋得名

謂諸菩薩，於內成熟諸佛法故，於外成熟諸有情故，修行善行，是故說名具於善行。

子二、釋行相

當知此行有七行相。一者、無所依止而惠施故；二者、無所依止而持戒故；三者、由哀愍心而修忍故；四者、非於少分修精進故；

非於少分修精進故者：謂諸菩薩，於內成熟自諸佛法，不於所有少分下劣差別證中而生喜足，不求上進故。

五者、為作利益諸有情處修靜慮故；六者、見不相應修妙慧故；七者、成熟方便善巧故。

成熟方便善巧故者：前六行相，謂六波羅蜜多。今此第七，謂四攝事。總名成熟方便善巧。

壬四、具於法住<sup>2</sup> 癸一、徵

云何菩薩具於法住？此何行相？

癸二、釋<sup>2</sup> 子一、釋得名

謂諸菩薩，非但追求以為究竟，非但讀誦以為究竟，非但宣說以為究竟，非但尋思以為究竟，而於內心勝奢摩他正修習中，發勤方便，平等修習，是故說名具於法住。

非但追求以為究竟等者：本地分說：菩薩應求正法，應說正法，應修正行法隨法行。（陵本三十八卷七頁<sup>3117</sup>）如彼廣釋應知。此說追求乃至正修習義。

子二、釋行相<sup>3</sup> 丑一、標

當知此住有十二行相。

丑二、列<sup>2</sup> 寅一、具八功德

一者、於住禁戒、不住禁戒能教授中，無分別故；

於住禁戒不住禁戒能教授中者：本地分說：菩薩欲從善友聽聞法時，於說

法師壞戒不作異意。謂不作心：此是破戒，不住律儀，我今不應從彼聽法。（陵本四十四卷九頁<sup>3570</sup>）由是應知此所說義。

二者、以此為依，恭敬領受所教授故；三者、以此為依，身遠離故；四者、以此為依，心遠離故；五者、以此為依，越聲聞乘相應作意，大乘相應作意思惟故；六者、以此為依，不捨遠離軛，與諸有情共止住故，及與所餘共止住故；

不捨遠離軛等者：此顯菩薩二種攝受。一、於有情攝取攝受，二、於有情增上攝受。攝取攝受者，謂諸菩薩正御徒眾，由是此說不捨遠離軛，與諸有情同共止住。增上攝受者，謂諸菩薩或為家主，攝受父母、妻子、奴婢、僮僕、作使；或為國王，攝受一切所統僚庶；由是此說及與所餘同共止住。

七者、以此為依，領受清淨世間智大福資糧威德修果故；

領受清淨世間智等者：此顯菩薩法威力應知。本地分說：云何法威力？謂

布施威力乃至般若威力。此布施等諸法威力，應知一一略有四相。一者、斷所對治相，二者、資糧成熟相，三者、饒益自他相，四者、與當來果相。（陵本三十七卷十四頁<sup>3054</sup>）由是此說智福資糧威德修果。一一差別，隨應當悉。

八者、於世間智不知喜足，尋求修治出世智故。

寅二、斷四過失

又清淨智者，斷四種過失，管御大眾故。一者、不能堪忍觸惱過失；

不能堪忍觸惱過失者：謂不堪忍問難，而生憤發故。

二者、不決定說教授過失；

不決定說教授過失者：謂於義未解了者，不能開悟令解故；已解了者，不能轉令明淨故；生起疑惑者，不能隨為除斷故。

三者、不如其言所作過失；

不如其言所作過失者：謂自以善殷勤勸導，數數教授教誡於他，而自於善

不能受學故。

四者、有染愛心過失。

有染愛心過失者：謂於徒眾希求承事恭敬供養故。

丑三、結

如是四種及前八種，合有十二行相。

庚五、生信譬喻<sup>3</sup> 辛一、徵

復次，云何菩薩能生淨信所有譬喻？

辛二、喻<sup>19</sup> 壬一、大地喻<sup>2</sup> 癸一、簡取

謂諸菩薩，從初發心初中後時，作諸眾生引發善根所依止故，普於一切若怨、若恩，心無所著，猶如大地。

癸二、遮非

而諸菩薩非如大地中庸而轉，眾生依之自施功力，方得存活。

壬二、大水喻<sup>2</sup> 癸一、簡取

然諸菩薩生長善根，淨信歡喜，能滋潤故，猶如大水。

癸二、遮非

而諸菩薩非如大水，與諸稼穡成熟相違。

壬三、大火喻<sup>2</sup>

癸一、簡取

然諸菩薩為欲成熟諸善根故，於可厭法深生厭患，能燒煉故，猶如大火。

癸二、遮非

而諸菩薩非如大火，與諸佛土集會相違。

非如大火與諸佛土集會相違者：謂彼火災壞世間時，無有如來於中現成正覺故。

壬四、大風喻<sup>2</sup>

癸一、簡取

然諸菩薩能令善根已成熟者，引發、聚集、解脫、觸得，由能發起正教授故，譬如大風。

癸二、遮非

而諸菩薩非如大風，能引發已終歸滅盡。

引發聚集解脫觸得者：令發阿耨多羅三藐三菩提心，是名引發。令無量眾皆來集會，是名聚集。當知此二意說菩薩。令漏永盡，是名解脫。令證現觀，是名觸得。當知此二意說聲聞。

壬五、朗月喻<sup>2</sup> 癸一、簡取

然諸菩薩令自白法轉增盛故，猶如朗月。

癸二、遮非

而諸菩薩非如朗月，但於白分光明照耀，非於黑分。

壬六、日輪喻<sup>2</sup> 癸一、簡取

然諸菩薩其相平等，於黑白分一切法中，智普照故，猶如日輪。

癸二、遮非

而諸菩薩非如日輪，怖羅怛捉即便旋轉。

壬七、師子喻<sup>2</sup> 癸一、簡取

然諸菩薩一切趣中，終不怖畏煩惱所執而旋轉故，譬如師子。

癸二、遮非

而諸菩薩非如師子，怯於大擔。

壬八、調龍喻<sup>2</sup> 癸一、簡取

然諸菩薩能擔一切大苦擔故，如善調龍。

癸二、遮非

而諸菩薩非如龍象，若遭利衰、軟非軟語、若樂若苦，則為愛恚之所塗染。

若遭利衰等者：當知此顯善調龍象方便差別。而諸菩薩不為世間八法所染，與彼有別，故遮非之。

壬九、紅蓮喻<sup>2</sup> 癸一、簡取

然諸菩薩於諸世法，不為愛恚所塗染故，如紅蓮華。

癸二、遮非

而諸菩薩非如紅蓮，斷其莖已不復生長。



壬十、大樹喻<sup>2</sup> 癸一、簡取

然諸菩薩雖伏煩惱，由善根力之所任持，於生死中復生長故，猶如大樹根未損壞。

癸二、遮非

而諸菩薩非如大樹，其根後時定當損壞。

壬十一、大海喻<sup>2</sup> 癸一、簡取

然諸菩薩所有善根，迴向涅槃大菩提故，譬如眾流趣入大海。

癸二、遮非

而諸菩薩非如眾流，趣入大海即成海性。

非如眾流趣入大海即成海性者：義顯菩薩所證大乘轉依不可思議，有無、一異不可記別故。

壬十二、蘇迷喻<sup>2</sup> 癸一、簡取

然諸菩薩依止涅槃及大菩提諸善根力而遊戲故，猶如諸天依蘇迷住。

癸二、遮非

而諸菩薩非如諸天住蘇迷盧，於自事中專行放逸，多受快樂。

壬十三、大王喻<sup>2</sup> 癸一、簡取

然諸菩薩方便般若所攝持故，成辦一切佛所作故，譬如群臣所輔大王。

癸二、遮非

而諸菩薩非如群臣所輔大王，為自利益守護國人。

壬十四、大雲喻<sup>2</sup> 癸一、簡取

然諸菩薩不顧己利攝護眾生，猶如大雲。

癸二、遮非

而諸菩薩非如大雲，不能畢竟成辦稼穡。

壬十五、輪王喻<sup>2</sup> 癸一、簡取

然諸菩薩畢竟生長菩提分法，如轉輪王出現於世。

癸二、遮非

而諸菩薩非如輪王，無有第二大丈夫眾。

如轉輪王出現於世者：謂如輪王出現世時，餘一切眾皆順化故。

壬十六、末尼喻<sup>2</sup> 癸一、簡取

然諸菩薩解脫平等，善根所生多同出現，如末尼寶。

癸二、遮非

而諸菩薩非如末尼寶珠，與迦理沙般拏極不相似。

壬十七、諸天喻<sup>2</sup> 癸一、簡取

然諸菩薩入無漏界，所作平等、受樂等故，譬如已入雜林諸天。

癸二、遮非

而諸菩薩非如已入雜林諸天，煩惱增長，當來顛墜。

壬十八、伏毒喻<sup>2</sup> 癸一、簡取

然諸菩薩伏諸煩惱，無顛墜故，所有煩惱如呪術等所伏諸毒。

癸二、遮非

而諸菩薩所有煩惱，非如呪等所伏諸毒，唯不為害，更無餘德。

壬十九、冀穢喻

然諸菩薩由自煩惱，能作一切眾生利益，故此煩惱如大城中諸冀穢聚。

然諸菩薩由自煩惱等者：謂諸菩薩由伏煩惱，不斷彼種，不捨生死，能作一切眾生利益故。

辛三、結

如是菩薩所有功德，麤同世間共所知事，故得為喻；而此功德由殊勝故，無有譬喻。是故當知，菩薩功德，一切譬喻所不能及。

瑜伽師地論科句披尋記卷第七十九

瑜伽師地論科句披尋記卷第八十

彌勒菩薩說

唐三藏沙門玄奘奉詔譯

韓清淨科記

攝決擇分中菩薩地之九

庚六、安立所學<sup>2</sup> 辛一、徵

復次，云何菩薩於正行中安立所學？

辛二、釋<sup>2</sup> 壬一、標中道行<sup>2</sup> 癸一、出學處

謂諸菩薩具足法住，於依世俗諦道理所說不了義非所依聲聞乘相應經典，已作依持、已作善巧，而復超度於大乘相應、甚深空性相應，依世俗、勝義諦道理所說了義可依經典勤修學時，名為如理正勤修學。

癸二、釋得名

如是如理勤修學時，名正修行中道勝行。

於依世俗諦道理等者：謂聲聞乘相應經典，說我、說法及說作用，名依世俗諦道理。說我者，謂說有情、命者、生者、補特伽羅、人天、男女、佛友、法友，如是等。說法者，謂說色、受，如是等。說作用者，謂說能見、能聞、能生、能滅，如是等。唯宣說此，不更顯示諸法無我及無作用甚深相應道理，是故聲聞乘相應經典，名不了義。大乘不爾，為欲隨順勝義諦故，亦復宣說諸世俗諦，然非究竟，是故大乘相應經典具依二諦，名為了義。由是菩薩，於此經典名是可依，於聲聞乘名非所依。然非不應聽聞受持、精勤修學，由是因緣，此說於彼已作依持、已作善巧。此未了義有上有容，無上無容唯真了義，如前已說。（陵本七十六卷十八頁<sup>5852</sup>）由是發趣修習大乘真了義者，名為超度。

所以者何？由此正法貫穿十三中道行故。

壬二、隨標列釋<sup>2</sup> 癸一、列

一者、貫穿補特伽羅空性；二者、貫穿補特伽羅無我性；三者、貫穿法空

性；四者、貫穿法無我性；五者、貫穿增益邊；六者、貫穿損減邊；七者、貫穿法現觀；八者、貫穿法現觀迴向大菩提性；九者、貫穿如是行者煩惱眾苦不纏繞心性；十者、貫穿二無我勝解差別；十一者、貫穿前無我性是後因性；十二者、貫穿到邊際空性；十三者、貫穿即彼威德。

癸二、釋<sup>13</sup>

子一、貫穿補特伽羅空性<sup>3</sup>

丑一、徵

云何貫穿補特伽羅空性？

丑二、標

謂由一種相，不可得所顯故。

丑三、釋

此中不可得者，謂於三種事。一者、有情事；二者、彼差別事；三者、彼受用事，若內、若外、若二中間，愚夫遍計所執實我都不可得。

謂於三種事等者：五有取蘊，名有情事。六十二諸有情眾，名彼差別事。如本地分意地中說。（陵本二卷十八頁<sup>169</sup>）內外諸處，名彼受用事。

子二、貫穿補特伽羅無我性<sup>3</sup> 丑一、徵

云何貫穿補特伽羅無我性？

丑二、標

謂由唯一相，可得所顯故。

丑三、釋

此中可得者，謂即於彼三事，愚夫所遍計緣生諸法中，常住實性不可得故，愚夫所計我異相性道理可得。

子三、貫穿法空性<sup>3</sup> 丑一、徵

云何貫穿法空性？

丑二、標

謂唯由一相，不可得所顯故。

丑三、釋

此中不可得者，即於彼事所取無常性，若內、若外、若二中間，愚夫遍計所



執言說自性都不可得。

即於彼事所取無常性者：常非有故，說名無常，是此中義。

子四、貫穿法無我性<sup>3</sup> 丑一、徵

云何貫穿法無我性？

丑二、標

謂唯由一相，可得所顯故。

丑三、釋<sup>3</sup> 寅一、道理可得

此中可得者，謂即於彼事道理可得，聖智所行。

寅二、內證可得

又即於彼自內所證，不可以言為他宣說。

寅三、言說異相可得<sup>3</sup> 卯一、標

彼由六相，於諸凡愚遍計所執言說自性、異相可得。

卯二、徵

何等六相？

卯三、列

一者、不可自尋思，二者、不可說示他，三者、超過色根所行，四者、超過一切相，五者、超過識所行，六者、超過煩惱所行。

子五、貫穿增益邊<sup>4</sup>

丑一、徵

云何貫穿增益邊？

丑二、標

謂由二種相。

丑三、列

一者、差別增益所顯故；二者、自性增益所顯故。

丑四、釋<sup>2</sup>

寅一、差別增益<sup>2</sup>

卯一、辨相<sup>4</sup>

辰一、徵

何等名為差別增益？

辰二、標

謂由後後展轉八相。

辰三、列<sup>8</sup> 巳一、執常

一者、即於彼事執常增益。

巳二、執無常

二者、執無常增益。

巳三、執我

三者、執常增益為所依止，執我增益。

巳四、執無我

四者、執無常增益為所依止，執無我增益。

巳五、執真實心

五者、執無我增益為所依止，執真實心增益。

巳六、執不真實心<sup>2</sup> 午一、標

六者、執我增益為所依止，執不真實心增益。

午二、廣<sup>2</sup> 未一、列二種

此復二種。一者、決定，二者、尋求。

未二、隨難釋<sup>2</sup> 申一、於雜染法

尋求者，謂遍計所依及遍計相應，

遍計所依及遍計相應者：名、義、自性、差別，名遍計所依。遍計所執自性加行執，名遍計相應。此有五種。一、貪愛加行，二、瞋恚加行，三、合會加行，四、別離加行，五、捨隨與加行。如前已說應知。（陵本七十卷十五頁<sup>5664</sup>）

於所對治雜染法中，由五過失，謂顛倒過失、戲論過失、發起惡行過失、麤重過失、無常性過失。

申二、於清淨法

及於彼能對治清淨法中。

及於彼能對治清淨法中者：前說雜染是所對治，起尋求執，謂由遍計所

依、遍計相應。此說清淨是能對治，若起尋求，亦由遍計所依及遍計相應。隨應亦爾，故作是說。

巳七、執善等及執清淨

七者、執真實心增益為所依止，執善等增益，乃至執清淨增益。

巳八、執不善等及執雜染

八者、執不真實心增益為所依止，執不善等增益，乃至執雜染增益。

辰四、結

是名八種差別增益。

卯二、結非

此中菩薩，於彼增益都不執著，不勸他執，亦不讚美。

寅二、自性增益

何等名為自性增益？謂差別增益為所依止，由諸愚夫遍計所執所有言說自性增益，即於彼事增益為有。

子六、貫穿損減邊<sup>3</sup>

丑一、徵

云何貫穿損減邊？

丑二、標

謂由一相，損減實事所顯故。

丑三、釋

此中損減實事者，謂即於彼邪法無我性起於勝解，執著一切種、一切法相都無所有。

子七、貫穿法現觀<sup>4</sup>

丑一、徵

云何貫穿法現觀？

丑二、標

謂由三種相。

丑三、列

一者、即於彼事及第四生事，所治、能治、有為、無為安立中，自性不可得

所顯故；

即於彼事及第四生事者：前說三事，謂有情事、彼差別事、彼受用事。今於此中總名彼事，更增生事以為第四。言生事者，謂十二分緣起及緣生。

二者、彼差別不可得所顯故；三者、即彼串習故，如實通達智所顯故。

丑四、釋<sup>3</sup> 寅一、自性不可得

此中自性不可得者，謂諸愚夫遍計所執自性。

寅二、差別不可得

此中差別不可得者，謂即彼自性滅、生、集、成二分不可得。

滅生集成二分不可得者：滅謂所治，生謂能治，集謂有為，成謂無為。觀待施設，說有所治、能治、有為、無為，然彼實無雜染、清淨二分差別，故不可得。

寅三、智通達

此中智通達者，謂即彼自性相不作意、不思擇加行自內所證智通達。

子八、貫穿法現觀迴向大菩提性<sup>3</sup> 丑一、徵

云何貫穿法現觀迴向大菩提性？

丑二、標

謂由一種相，思擇所得能治、所治不斷故。

思擇所得能治所治等者：如下釋言，空、無願、無相是名能治，生死流轉是名所治。於空、無願、無相中，依聞思修所生世出世慧，是名所得能治。故起思擇，不捨生死，是名所治不斷。

丑三、釋<sup>2</sup> 寅一、能治所治<sup>3</sup> 卯一、第一義

此中能治、所治者，謂空是煩惱對治，無願是有願對治，無相是諸相對治，如是一切名無造作。

卯二、第二義

此復是後有業對治，亦是生身流轉、剎那生流轉對治，名滅涅槃行無自性。

此復是後有業對治等者：由空是煩惱對治，當知亦是後有業對治。無願是



有願對治，當知亦是生身流轉對治。無相是諸相對治，當知亦是剎那生流轉對治。如是空、無願、無相行，亦名滅涅槃行。此能對治遍計所執自性有故，名無自性。

卯三、第三義

此復以生死流轉為所對治。

寅二、思擇不斷

若諸菩薩由此對治，故起思擇，不斷所治，此由悲愍諸眾生故，希求大菩提。

子九、貫穿煩惱眾苦不纏繞心<sup>3</sup> 丑一、徵

云何貫穿如是行者煩惱眾苦不纏繞心？

丑二、標

謂由一種相，雖不永斷所對治法，而能如實通達故。

丑三、釋

此中如實通達者，謂即於彼法，由法無我加行，觀彼自性無染無苦。

子十、貫穿差別<sup>4</sup> 丑一、徵

云何貫穿差別？

丑二、標

謂由四種相。

丑三、列

一者、見差別所顯故；二者、即此極遠損減差別所顯故；三者、於斷迷失差別所顯故；四者、於心迷失差別所顯故。

丑四、釋<sup>4</sup> 寅一、見差別<sup>2</sup> 卯一、辨相<sup>2</sup> 辰一、由增上慢

此中見差別者，謂住補特伽羅無我及涅槃，於當來身起斷滅增上慢。

辰二、由執著法

又於所取觀察故，於能取言說自性畢竟遠離、空性所攝不觀察故，名不善觀察所知境界。由執著諸法故，求煩惱斷。

卯二、結非

而諸菩薩則不如是。

寅二、極遠損減差別<sup>2</sup>

卯一、辨相

此中極遠損減差別者，謂住補特伽羅無我，於我見異生下中更下，由二因緣，謂苦不解脫故、安住苦故，前後二種執著失壞故。

卯二、結非

而諸菩薩則不如是。

此中極遠損減差別等者：謂如一類大乘惡取空者，謂一切種皆無所有，是名極遠損減差別。此於我見異生下劣類中，更為下劣。由是世尊作如是言：寧如一類起我見者，不如一類惡取空者。本地分中已釋其相。（陵本三十六卷十六頁<sup>2978</sup>）是故此說苦不解脫及安住苦。由彼執著補特伽羅無我及法無我，能自敗壞，亦壞世間隨彼見者，是名前後二種執著失壞。

寅三、於斷迷失差別<sup>2</sup>

卯一、辨相

此中於斷迷失差別者，謂住補特伽羅無我，執法無我無自性故，便生驚怖，

謂無言說自性追求斷滅。

卯二、結非

而諸菩薩則不如是。

寅四、於心迷失差別<sup>2</sup>

卯一、辨相

此中於心迷失差別者，謂如是於斷迷失住補特伽羅無我，於自遍計所起境界中，為想顛倒等之所顛倒。

卯二、結非

而諸菩薩則不如是。

子十一、貫穿因性<sup>4</sup>

丑一、徵

云何貫穿因性？

丑二、標

謂由二種相。

丑三、列

一者、觀察能取所顯故；二者、彼如實通達所顯故。

丑四、釋<sup>2</sup> 寅一、觀察能取

此中觀察能取者，謂即觀察此無我智，遠離言說自性故，遠離彼分別故，應捨相故，有剎那故。

有剎那故者：謂無我智非實能取，唯一剎那無作用故。

寅二、如實通達

此中彼如實通達者，謂觀察所取、能取二種，如理作意思惟為因，各別內證決定智生。

子十二、貫穿到邊際空性<sup>3</sup> 丑一、徵

云何貫穿到邊際空性？

丑二、標

謂由一種相，即彼法無我智如實顯現故。

丑三、釋

此中如實顯現者，謂顯現業、煩惱相似相故，不可言說法故，離言說自性故，如是不執著故，有剎那故。

顯現業煩惱相似相故者：謂由法無我智，不住涅槃，有變化身，示同凡夫生死轉故。

子十三、貫穿即彼空性威德<sup>3</sup> 丑一、徵

云何貫穿即彼空性威德？

丑二、標

謂由一種相，業、煩惱斷對治所顯故。

丑三、釋

此中斷者，謂彼剎那光明想生，能斷無始時來所集一切諸業、煩惱。

庚七、聲聞菩薩所學差別<sup>2</sup> 辛一、略標問答

復次，有幾種聲聞？聲聞所學、菩薩所學有何差別？謂有四種聲聞。聲聞所學、菩薩所學，當知差別有十三種。

辛二、隨標廣釋<sup>2</sup> 壬一、釋聲聞別<sup>3</sup> 癸一、徵

云何名為四種聲聞？

癸二、列

一者、變化聲聞，二者、增上慢聲聞，三者、迴向菩提聲聞，四者、一向趣寂聲聞。

增上慢聲聞等者：謂如前說：住補特伽羅無我及涅槃，於當來身起斷滅增上慢。當知但由補特伽羅無我智，計為清淨。又如前說：於彼邪法無我性起於勝解，執著一切種、一切法相都無所有。當知此由執著邪法無我智，計為清淨。

癸三、釋<sup>4</sup> 子一、變化聲聞

變化聲聞者，為欲化度由彼所化諸有情故，或諸菩薩、或諸如來化作聲聞。

子二、增上慢聲聞

增上慢聲聞者，謂但由補特伽羅無我智，及執著邪法無我智，計為清淨。

子三、迴向菩提聲聞<sup>3</sup> 丑一、明重修

迴向菩提聲聞者，謂從本來是極微劣慈悲種姓，由親近如來住故，於廣大佛法中，起大功德想，熏修相續。

丑二、明覺悟

雖到究竟住無漏界，而蒙諸佛覺悟引入方便開導，由此因故，便能發趣廣大菩提。

丑三、明加行

彼於如是廣大菩提雖能發趣，由樂寂故，於此加行極成遲鈍，不如初始發心有佛種性者。

子四、一向趣寂聲聞<sup>2</sup> 丑一、明意樂

一向趣寂聲聞者，謂從本來是最極微劣慈悲種性故，一向棄背利益眾生事故，於生死苦極怖畏故，唯有安住涅槃意樂，畢竟不能趣大菩提。

丑二、顯差別<sup>2</sup> 寅一、舉喻



如二王子相似處生，平等平等受王快樂，一於王政討論工巧處等皆悉善知，第二王子則不如是。彼二但由此分差別，非由受用王之快樂。

寅二、合法

如是於無漏界中，諸菩薩眾與一向趣寂聲聞，當知差別。

壬二、釋所學別<sup>3</sup> 癸一、標

應知彼二復有差別。

癸二、列

謂意樂故、白法集成故、智集成故、種類故、種性故、持種加行故、威德故、正行故、福田故、殊勝差別故、因果故、生依止故。

癸三、釋<sup>12</sup> 子一、意樂差別

一向趣寂聲聞，棄背諸行雜染利益有情事故，一向安住寂靜意樂；菩薩雖有垢染，而與彼相違。

子二、白法集成差別

又彼聲聞，唯為自身得增長故，白法狹小；菩薩為欲增長一切有情樂故，白法無量。

子三、智集成差別

又彼聲聞，由無為智，但為除遣自身煩惱；菩薩普為一切十方諸有情類。

由無為智等者：謂緣補特伽羅無我及法無我實相真如所生之慧，名無為智。聲聞唯由補特伽羅無我智集成故，說但為除遣自身煩惱。菩薩由二無我智集成故，說普為一切十方諸有情類。

子四、種類差別

又彼聲聞，雖緣最勝解脫法境作意集成，而非佛子；菩薩雖緣下劣諸行有情法境作意集成，而是佛子。

雖緣最勝解脫法境等者：此中最勝解脫法境，謂於涅槃。下劣諸行有情法境，謂於生死。如是差別應知。

子五、種性差別

又彼聲聞，雖勤精進，於諦善巧心善安定，不成就佛種性相故，諸佛世尊不堪攝受；而諸菩薩與彼相違。

諸佛世尊不堪攝受者：謂無堪能生如來家，成佛真子故。

子六、持種加行差別

又彼聲聞，到究竟故，根雖成熟，於當來世而不能作佛所作事；菩薩初心剎那生已，便能造作。

菩薩初心者：謂諸菩薩，於其無上正等菩提最初發心故。

子七、威德差別

又彼聲聞，雖到究竟，而不為彼諸天人等供養讚歎，如住始業修行菩薩；而諸菩薩雖復未到究竟之位，然其威德及與智慧，映蔽一切聲聞、獨覺。

子八、正行差別

又彼聲聞，療煩惱病智慧良藥雖復成滿，而不能治一切眾生諸煩惱病；而諸菩薩與彼相違，由能修行利益他事勝義行故。

子九、福田差別

又彼聲聞，雖到究竟，於諸有情智光明照，然非諸天及餘世間真實福田，如諸菩薩未盡煩惱。

子十、殊勝差別<sup>2</sup> 丑一、標菩薩勝

又於聲聞一切時中，如來最勝；於最勝中，諸菩薩眾彌復最勝；彼由於此所集成故。

彼由於此所集成故者：彼謂如來，此謂菩薩。如來最勝大菩提果，皆由菩薩最勝自他利行所集成故。

丑二、釋由二緣<sup>2</sup> 寅一、正顯

又由二緣應知彼勝，彼能成熟諸有情故，亦能成熟諸佛法故。由此因緣感菩提果，隨所成熟諸有情類，能令解脫。

寅二、喻成

譬如有人，能辦能熟覺慧希奇，非彼端然而食用者。此中道理，當知亦爾。

此中道理當知亦爾者：謂諸菩薩，非自解脫以為究竟，如彼端然而食用者，更能成熟餘有情類令解脫故。

子十一、因果差別

又彼聲聞，雖復一向受學修行清淨法因，亦為無量善友攝受，而不能引大菩提果；諸菩薩眾與彼相違，而能引發。

子十二、生依止差別

又諸聲聞依菩薩生，非諸菩薩依彼聲聞。

庚八、世出世智作利他事<sup>2</sup>

辛一、略標問答

復次，云何由世間、出世間智，能作利益他事？謂諸菩薩遍於十方，或遊歷世界，或遊歷國土，或遊歷生，或勸請他，為大良醫，善能療治煩惱鬼魅所著有情；

為大良醫等者：此顯由世間智，能作利益他事。謂於麤品、中品雜染，能令對治故。

為無有上，宣說三學清淨之道。

為無有上等等者：此顯由出世智，能作利益他事。謂於微細隨眠所有雜染，能令對治故。

辛二、隨標別釋<sup>2</sup>

壬一、世間智<sup>4</sup>

癸一、徵

云何世間智？

癸二、標

謂於麤品所有雜染，能為止息對治；於中品者，能為制伏對治。

癸三、釋<sup>2</sup>

子一、麤品雜染

云何名為麤品雜染？謂在家者貪瞋癡行性；諸出家者見依止性；及彼所依不正作意依止性；後有願依止性；

見依止性等者：依止薩迦耶見、邊執見、見取、戒禁取及與邪見，是名見依止性。如是諸見，以不如理作意為因，名彼所依不正作意依止性。希求後有、愛樂後有，名後有願依止性。

由總別四顛倒故，於非解脫執為解脫依止性。

由總別四顛倒故者：謂於一切無常常倒、於苦樂倒、於不淨淨倒、於無我我倒，是名總四顛倒。若於身、受、心、法，妄執為淨、為樂、為常、為我，是名別四顛倒。

子二、中品雜染<sup>2</sup> 丑一、徵

云何中品雜染？

丑二、釋<sup>2</sup> 寅一、出體性

謂已止息麤品雜染，別別對治為依止故，於諸境界貪瞋癡纏依止性。

寅二、明對治<sup>2</sup> 卯一、所治漸次<sup>2</sup> 辰一、標

於其所緣正繫念故，令不定者心得安定，精勤修習菩提分法，方能制伏。

辰二、釋

不依此修而自恃舉，

不依此修而自恃舉者：謂得少分下劣智見安住，便自高舉而生喜足，更不

上求故，由是能障毗鉢舍那。如本地分聲聞地說應知。（陵本二十五卷十三頁<sup>2123</sup>）

故於所緣繫心令住，勇猛精進，從此於住能正攝受；攝受住故，於積聚中，由一念執中煩惱轉，便能制伏。

於積聚中等者：純大苦蘊，說名積聚。緣此為境，若有中品煩惱貪瞋癡纏一剎那轉，速能對治令不更起，名能制伏。

卯二、能治漸次

從此為斷出世間法所對治故，依止對治即令堅住。

依止對治即令堅住者：已生對治，令無退失，名令堅住。

從此能伏諸緣起愚、補特伽羅無我性愚及法無我性愚，從此能於邪道、正道皆得決定。

癸四、結

由如是相，應知麤品、中品雜染止息制伏能對治智，是名世間智。



壬二、出世間智<sup>2</sup> 癸一、徵

云何出世間智？

癸二、釋<sup>2</sup> 子一、能對治<sup>2</sup> 丑一、出體性

謂如是制伏貪瞋癡纏諸雜染已，復能對治微細隨眠所有雜染，此真實智名出世智。

丑二、廣依處

此復云何？謂即依彼制伏對治三處善巧。謂緣起善巧、補特伽羅無我勝解善巧、法無我勝解善巧。

子二、所對治<sup>3</sup> 丑一、標

為欲超度無餘雜染，對治四種無智故，不待他教，於內精勤觀察自心。

為欲超度無餘雜染者：謂於微細隨眠所有雜染，更欲超度令無餘故。

丑二、列

四無智者，一、於共相無智，二、於自相無智，三、於雜染相無智，四、於

清淨相無智。

丑三、釋<sup>4</sup> 寅一、共相

由三種相，應知心共相。一、於緣生者不現在前無作用故；二、於現在者唯一剎那無作用故；三、於貪等自緣所生非心作故。

於緣生者等者：心具四緣，所謂因緣、等無間緣、所緣緣、增上緣。若彼緣闕，不現在前，心不生起，故無作用。

寅二、自相

由三種相，應知心自相。一者、如前言說自性不可得故；二者、如前由六種相如實可得故；三者、一切聖者無差別智之所得故。

如前由六種相等者：前說六相。一者、不可自尋思，二者、不可說示他，三者、超過色根所行，四者、超過一切相，五者、超過識所行，六者、超過煩惱所行。

寅三、雜染相<sup>3</sup> 卯一、標

由三種相，應知心雜染相。

卯二、列

一者、生故；二者、轉故；三者、行故。

卯三、釋<sup>3</sup> 辰一、雜染生

於諸趣中，種種自體生故，名雜染生。

辰二、雜染轉

即於此中，生者自然剎那有流轉故，一切所緣難伏轉故，貪愛勢力之所轉故，名雜染轉。

自然剎那有流轉故者：由於雜染長夜愛樂，心隨於彼勢力自在而轉。義如五識身相應地意地決擇中說。（陵本五十一卷十二頁<sup>4106</sup>）

辰三、雜染行<sup>2</sup> 巳一、標

若於彼行、若如是行，名雜染行。

巳二、釋<sup>2</sup> 午一、若於彼行<sup>3</sup> 未一、於善等中

謂於一時行於善中，或於一時行不善中，或於一時行境界中，或於一時行造業中，或於一時行煩惱中。

未二、於行無定

又於煩惱行貪、瞋等無決定行，非即於此行有貪已復行無貪，行無貪已復行有貪，如是等。

行貪瞋等無決定行者：此說無決定行，義顯心無實隨轉性。本地分說：若心與彼諸行相應，或不相應；非此與彼或時不相應，或時非不相應。又非一切心或相應，或不相應。（陵本十六卷十三頁<sup>1411</sup>）其義應知。

未三、於受增上

又於隨順樂等法中，得為增上現行。

又於隨順樂等法中者：諸根境界及觸，隨順若樂、若苦、若非苦樂生故，是名隨順樂等諸法。

午二、若如是行<sup>4</sup> 未一、顛倒引苦

又生自苦斷壞眾樂，不由執著故，但由顛倒故。由此引發自身眾苦，無有厭足。

不由執著等者：有作是說：樂俱行業，還能感得樂俱行異熟；苦俱行業，還能感得苦俱行異熟；不苦不樂俱行業，還能感得不苦不樂俱行異熟；是名執著。然無是事，是故此說不由執著。由樂俱行業，順樂受者，還受樂異熟；順苦受者，還受苦異熟；順不苦不樂受者，還受不苦不樂異熟。苦俱行業，順樂受者，還受樂異熟；順苦受者，還受苦異熟；順不苦不樂受者，還受不苦不樂異熟。不苦不樂俱行業，順樂受者，還受樂異熟；順苦受者，還受苦異熟；順不苦不樂受者，還受不苦不樂異熟。若作是說，是為正說。由隨如是如是順所受業，還受如是如是順所受異熟故。依此堪能修習清淨梵行，又亦可知正盡諸苦，作苦邊際。與此相違，便無堪能，是故此說但由顛倒。義如集論中說應知。（五卷六頁）

未二、求善瑕除

或於善中而安置時，即便棄捨思求瑕隙。為令不善現前行故，於其瑕隙及衰盛中，為諸愛恚之所損惱。

未三、放逸損善

又隨放逸勢力，一切所作諸善根本皆令損壞。

未四、樂著色等<sup>2</sup>

申一、辨行相

又極樂著色等境故，雖於極利益甘露界中數數思擇，而難可安立。

申二、指譬喻

於此義中，示現假合所設譬喻其事應知。

示現假合所設譬喻其事應知者：此中譬喻，當知喻彼色等，非餘。如說色如聚沫，受喻浮泡，想同陽焰，行類芭蕉，識如幻事。如是譬喻，喻彼色等相似顯現，假合而有，故作是說。

寅四、清淨相<sup>3</sup>

卯一、略標列

由三種相，應知心清淨相。

卯二、簡能證

一者、不得相故；二者、無為相故；三者、種性相故。

卯三、釋三種<sup>3</sup> 辰一、不得相

若由別異如理勤修，求心清淨不能證得。若由如是如理勤修，便能證得。又不觀見言說自性，見真如相。

又不觀見言說自性等者：此釋前說由不得相，應知心清淨相。

辰二、無為相

此由九種相，當觀無為相。一者、不行世故。

不行世故者：諸有為法，有去來今三世差別。無為不爾，無三世別，名不行世，無生滅故。

二者、非如在滅盡定，言說自性不可得故，真如相可得故，是無二相。

非如在滅盡定等者：在滅盡定，唯是無相。無為不爾，離有無相。言說自性不可得故，真如相可得故，如其次第，離有離無，名無二相。

三者、非生身相故。四者、超過生身因自性相故。五者、超過當來生故。六者、超過死沒故。七者、超過剎那展轉不遠離故。

超過剎那展轉不遠離故者：諸有為法剎那相續，名不遠離剎那展轉。無為不爾，超彼相故。

八者、超過趣轉易故。

超過趣轉易故者：五趣流轉，名趣轉易應知。

九者、超過業煩惱行故。

辰三、種性相<sup>2</sup> 巳一、無學界相<sup>2</sup> 午一、標

此中種性相，當知是無學界相。

當知是無學界相者：謂有餘依、無餘依般涅槃界，當知是名無學界相。由是下說現法、後法二位差別。

午二、釋<sup>2</sup> 未一、現超五事

於現法中，超過五事。一者、超過所作；二者、超過非所作；三者、超過所



作加行；四者、超過所作非加行；五者、超過非所作加行。

超過所作等者：此中所作，謂所應作。非所應作，名非所作。由諸無學所作已辦，無復所作，由是說言超過所作。又諸無學諸漏永盡，不能習近五種處所。一者、不能故思殺害諸眾生命，二者、不能不與而取，三者、不能行非梵行習婬欲法，四者、不能知而妄語，五者、不能貯畜受用諸欲資具。如本地分聲聞地說。（陵本三十四卷二十六頁<sup>2813</sup>）由是說言超過非所作。

未二、後超六事

於後法中，超過六事。一者、超過能發起後有行；二者、超過彼行；三者、超過彼果生；四者、超過依彼衰盛；五者、超過於彼所依一切無記動搖中，修學期願受用；六者、超過彼所依自體差別。

於後法中超過六事等者：緣起支中，初無明支為緣生行，名能發起後有行。即行支中福、非福、不動業，說名彼行。當來生支，有識、名色、六

處、觸、受自體得生，名彼果生。依彼自體，復有族姓、色力、壽量等勝劣差別，是名依彼衰盛。三界自體唯是業果異熟，說名一切無記。若彼異熟成所依身，能障修學，是名動搖，則便於彼應生厭離，如生無想天等；若順修學，則便於彼期願受用；如是總說於彼所依一切無記動搖中，修學期願受用。欲、色、無色三界自體，是名所依自體差別。

巳二、四位九相<sup>2</sup> 午一、標

復由四位、九相，應知種姓相。

午二、釋<sup>2</sup> 未一、四位

何等四位？一、不清淨位，二、清淨位，三、通達位，四、究竟位。

未二、九相<sup>2</sup> 申一、徵

云何九相？

申二、釋<sup>4</sup> 酉一、不清淨位

謂不清淨位，於一切相等隨行故，譬如虛空。

酉二、清淨位

若清淨位，平等一味，及身心遠離。

酉三、通達位

若通達位，隨順趣究竟。由一切煩惱自性離繫離垢故，超過薩迦耶見，及超過彼為根本諸惡見趣。

酉四、究竟位<sup>2</sup> 戌一、標四相

若究竟位，安樂成滿，及超過三種變壞。

戌二、隨難釋

何等名為三種變壞？一者、老死等變壞，二者、顛倒處變壞，三者、清淨退失變壞。

云何九相等者：不清淨位有一相，謂一切相等隨行。清淨位有三相，謂平等一味，及身心遠離。通達位有一相，謂隨順趣究竟。究竟位有四相，謂安樂成滿，及超過三種變壞。言一切相等隨行者，謂色、聲、香、味、

觸、貪、瞋、癡、男、女，如是十相令心散亂故。言平等一味者，謂三摩地任運相續無散亂轉故。言身心遠離者，謂不與在家及出家眾共相雜住。獨一無侶，名身遠離；遠離一切染汙、無記所有作意，名心遠離。言超過顛倒處變壞者，謂於是中，常、樂、我、淨不生顛倒故。言超過清淨退失變壞者，謂證轉依，究竟解脫，終無退轉故。

庚九、教授聲聞<sup>2</sup> 辛一、徵

復次，云何於菩薩教授中聲聞所學？

辛二、釋<sup>3</sup> 壬一、出修學<sup>2</sup> 癸一、略辨相

謂諸貪、憂毗奈耶故，是增上戒學加行；厭患作意故，是增上心學加行；補特伽羅無我性故，或法無我性故，是增上慧學加行。

癸二、隨難釋

此中貪、憂，是能發起所有毀犯。

壬二、明除遣<sup>3</sup> 癸一、標應知

又如正不除遣、如已不除遣、如正除遣、如已除遣，由此四相，應知自心不如理作意所起貪欲、薩迦耶見及與瞋恚。

癸二、隨別釋<sup>4</sup> 子一、正不除遣

若由境界，或復由他而起妄計，如是名正不除遣。

子二、已不除遣

若由境界，或由他不饒益加行之所引奪，如是名已不除遣。

子三、隨一不除遣

由隨一不除遣故，當知隨一亦不除遣。

子四、隨一除遣

由隨一除遣故，當知隨一亦復除遣。

由隨一不除遣故者：謂於前說貪欲、薩迦耶見及與瞋恚隨一煩惱，或不除遣、或除遣應知。

癸三、簡過患<sup>3</sup> 子一、戒學攝

又若不除遣，雖住律儀，於增上戒尚名毀犯，何況安住不律儀者。

子二、心學攝

又增上心學，於所緣境散亂錯誤，是能障礙。

子三、慧學攝<sup>2</sup>

丑一、障補特伽羅無我

依補特伽羅無我修增上慧者，薩迦耶見是能障礙。

丑二、障法無我

依法無我修增上慧者，自性、差別分別計縛是能障礙。

壬三、辨違順<sup>3</sup>

癸一、標

於此三學正修遣中，有八種違逆學法，有八種隨順學法。

癸二、徵

何等為八？

癸三、列<sup>2</sup>

子一、舉違逆

一者、唐捐耽著；二者、耽著故縛；三者、縛故障礙；四者、障礙故垢；五

者、垢故災雹；六者、雹故瘡皰；七者、瘡皰故熱惱；八者、熱惱故諸煩惱病難可療治。

垢故災雹等者：言災雹者，喻為損害故。言瘡皰者，喻為苦依故。

子二、例隨順

與此相違，當知即是八種隨順學法。

庚十、不善學沙門等<sup>2</sup>

辛一、正辨相<sup>2</sup>

壬一、不善學沙門<sup>4</sup>

癸一、徵

復次，云何不善學沙門？

癸二、標

謂三種應知。

癸三、列

一者、不顧沙門；二者、形相同分；三者、軌則、正命、受用、加行、戒見、意樂皆不同分。

癸四、釋<sup>2</sup>

子一、迴向資具

若迴向資具，是增上戒形相同分，是增上心及增上慧形相同分，是彼行意樂不同分。

子二、迴向聲譽

若迴向聲譽，是奢摩他支同分，是毗鉢舍那支同分，是俱修支同分，是俱資糧支同分，是意樂不同分。

壬二、善學沙門<sup>4</sup> 癸一、徵

復次，云何善學沙門？

癸二、標

當知由四種相。

癸三、列

一者、加行故；二者、意樂故；三者、通達故；四者、趣究竟故。

癸四、釋<sup>4</sup> 子一、加行

於現法中，由厭患加行故；於前生中，由相續成熟加行故；當知加行圓滿。



子二、意樂

由法無我勝解意樂故；若所應得、若能應得，於此二言說自性無執著故；

若所應得若能應得者：大菩提果名所應得，菩提分法名能應得。

於意趣義正尋求故；不但隨順言辭故；當知意樂圓滿。

子三、通達

若於法真如，以不緣他智通達自性無雜染故；於世俗寶，及世俗生死、涅槃、解脫、繫縛自性無所得故；當知通達圓滿。

於世俗寶等者：言辭所說佛法僧寶，及與生死、涅槃、解脫、繫縛，如是一切，唯是遍計所執自性，皆名世俗。

子四、趣究竟

已善修習一切雜染對治故，又於真如無斷壞故，及能勝伏故，當知趣究竟圓滿。

又於真如無斷壞故等者：謂得自在有變化轉，名無斷壞。能伏一切分別之

相，不可思議，名能勝伏。

辛二、簡差別<sup>2</sup>

壬一、不善學沙門<sup>3</sup>

癸一、標

復次，不善學沙門，由三種相，當知彼名不如其義。

癸二、列

一者、意樂衰損，加行具足；二者、意樂具足，加行衰損；三者、意樂衰損、加行衰損。

癸三、廣

此中意樂衰損，加行具足，復有三種。一者、能聽唯此喜足；二者、能說唯此喜足；三者、能證世間三摩地而生愛味唯此喜足。

壬二、善學沙門

若善學沙門，唯由一相，當知意樂具足、加行具足。

此中意樂衰損等者：謂唯能聽、能說、能證而生喜足，不以涅槃為上首故。

庚十一、住世俗律儀<sup>3</sup> 辛一、徵

復次，云何住世俗律儀？

辛二、標

當知有四種相。

辛三、列<sup>4</sup> 壬一、第一相<sup>2</sup> 癸一、標

謂雖成就六支尸羅，而為二種損害損害尸羅。

癸二、釋

謂由薩迦耶見纏故，及於毀犯出離不了知故。

謂雖成就六支尸羅者：戒律儀相，略有六種。一、安住具戒，二、善能守護別解律儀，三、軌則圓滿，四、所行圓滿，五、於微細罪見大怖畏，六、受學學處，是名六支尸羅。如本地分聲聞地中廣釋其相應知。（陵本二十二卷二頁<sup>1893</sup>）

壬二、第二相

雖遠離此二種過失，而未得世間清淨律儀，不能制伏薩迦耶見。

壬三、第三相

雖已得世間清淨律儀，已制伏薩迦耶見，而不損減串習法無我性怖畏，損壞尸羅。

串習法無我性怖畏者：謂於法無我性修習清淨道中，生驚怖故，怖一切種無所有故。

壬四、第四相

雖遠離一切所餘過失，而為邪法無我勝解及增上慢損壞尸羅。

庚十二、住勝義律儀<sup>2</sup> 辛一、徵

復次，云何住勝義律儀？

辛二、釋<sup>3</sup> 壬一、能治有漏

謂所成就世間一切煩惱不相應，能對治三界尸羅。

壬二、能寂戲論<sup>3</sup> 癸一、標

又於四種住律儀中，諸戲論法現所得，若能寂靜彼相，當知是名無漏尸羅。

癸二、釋<sup>2</sup> 子一、徵戲論

云何名為諸戲論法？

子二、別列相<sup>4</sup> 丑一、於最初住

謂於初住律儀中，我執可得，若我所執，若作毀犯，若不作彼，若故思所作加行，若非彼加行，若正知而行，若彼不行，若失念而行，若彼不行。

丑二、於第二住

於第二住律儀中，薩迦耶見品麤重隨行，

薩迦耶見品麤重隨行者：彼品種子隨逐自體，說名麤重隨行。

若名可得，若色可得，

若名可得若色可得者：名、色種子能為當來生身之因，是名可得。

若當來生相，若今時無相，

若當來生相若今時無相者：當來異熟，種生現行，是名當來生相。今未受

果，相不可得，是名今時無相。

若纏寂靜，若隨眠故彼不寂靜，若補特伽羅無我執，若補特伽羅執棄捨，

若補特伽羅無我執等者：謂於補特伽羅無我未能通達，故不離執。若生勝解，厭逆彼執，故能棄捨。

若即於彼補特伽羅無我執中所執性，若非所執性，

補特伽羅無我執中所執性等者：緣見為境能起執著，名所執性。言說自性唯假施設，是名非所執性。

若由此故於色等中有情執，若彼假設讚善執，若能假設心語假設讚善執。

於色等中有情執等者：色等五蘊是有情事，即於其中彼見現行，名有情執。執彼賢聖實有自性，名彼假設讚善執。執假施設彼彼賢聖差別，名能假設心語假設讚善執。

丑三、於第三住

於第三住律儀中，若生上故世間，若捨下故非世間，

若生上故世間等者：謂生上地，亦墮攝界，故名世間。捨下地生，非此世間，名非世間。

若三摩地依止，若諸欲依止，若恃舉自尸羅，若輕憊他尸羅。

丑四、於第四住

於第四住律儀中，若計我尸羅清淨，若由自性、差別分別故分別尸羅。

癸三、結

如是等諸戲論法，於無漏戒中皆悉寂靜。

壬三、能備資糧<sup>2</sup>

癸一、標說義

又即與此義相應，依清淨三學，應知所說伽陀。

應知所說伽陀者：本地分中說有趣義伽陀，於中廣說三學究竟清淨。  
（陵本十六卷十五頁<sup>1423</sup>）今指彼義，故作是說。當知初二住中諸戲論相，增上戒學所攝。第三住中諸戲論相，增上心學所攝。第四住中諸戲論相，增上慧學所攝。

當知為令福德資糧塵垢微薄，攝受善士，無失壞故；智慧資糧，於甚深處起勝解故。

癸二、隨難釋

由二因緣，入如來教。一者、由法住智深了別故；二者、由真實智善決定故。

庚十三、如來調伏方便<sup>2</sup> 辛一、徵

復次，云何如來調伏方便？

辛二、釋<sup>2</sup> 壬一、示現同分<sup>3</sup> 癸一、標

當知此有二種。

癸二、列

謂自體同分故，及勝解同分故。

自體同分等者：互相相似性，說名同分。同界趣生，是名自體同分。同共了知功德過失，是名勝解同分。

癸三、釋



又現同分，為令安住受教心故，及依教授而出離故。

壬二、教導教授<sup>2</sup> 癸一、總標列

又正清淨加行教導教授，當知復有四種。一者、於雜染、清淨驚怖轉依教導；於雜染清淨驚怖轉依教導者：謂於轉捨雜染、轉得清淨生驚怖者，而為教導故。

二者、遠離雜染因緣教導；三者、遠離於清淨驚怖因緣教導；四者、第一現法樂住加行教導。

第一現法樂住加行教導者：滅盡等至，於諸等至最為殊勝，是名第一現法樂住。

癸二、隨難釋<sup>4</sup> 子一、雜染因緣

此中雜染因緣有二種。一者、由世俗言說，自性雜染自性執分別故；二者、由彼功德、過失差別執分別故。

雜染因緣有二種等者：謂由世俗言說，自性雜染自性執而起分別，是為第

一雜染因緣。又由世俗言說，雜染功德、過失差別執而起分別，是為第二雜染因緣。

子二、於清淨道驚怖因緣

由二種相，應知於清淨道驚怖因緣。一者、由於前後清淨道雜染分別故；二者、由雜染遠離分別故。

由二種相應知於清淨道驚怖因緣等者：由於前後清淨道次第方便，不如正理而起分別，是為於清淨道第一驚怖因緣。或復於諸雜染，不分別彼實有過患，是為於清淨道第二驚怖因緣。

子三、於涅槃清淨驚怖因緣

由二種相，應知於涅槃清淨驚怖因緣。一者、由世俗言說自性執故；二者、於涅槃增語想中，作心所有想故。

於涅槃增語想中等者：涅槃自性唯內所證，離諸戲論，由假施設，名增語想。若於是中，執異不異、死後當有或當無等，如是便成有戲論攝，是名

心所有想。由是因緣，故生驚怖。

子四、第一住加行教導

又於寂靜心所有想、若增語想遍了知故，

又於寂靜心所有想等者：等持等至諸所有相，是名寂靜心所有想。等持等至諸差別名，名增語想。

於彼二因緣俱遠離故，當知是第一住加行教導。

庚十四、密意語言<sup>2</sup> 辛一、徵

復次，云何名為密意語言？

辛二、釋<sup>2</sup> 壬一、明能悟入<sup>4</sup> 癸一、標

謂無二相智，是能悟入一切密意語言相。

謂無二相智者：本地分說：有及非有二俱遠離，法相所攝真實性事，是名無二。由無二故，說名中道，遠離二邊，亦名無上。（陵本三十六卷十

頁<sup>2943</sup>）此應準釋。

癸二、徵

云何無二相？

癸三、釋<sup>2</sup> 子一、第一義<sup>2</sup> 丑一、名無二

謂諸名言安足處事，由彼自性無所有故，非名言熏習想所行自性有故，說為無二。

謂諸名言安足處事等者：有為、無為，一切皆為言辭所說，名諸名言安足處事。名言自性都無所有，然非無事而有所說，即彼名言熏習想所行境，唯是遍計所執自性，此非是有。由是道理，事有非有，遠離二邊，說為無二。

丑二、辨染淨

於此無二若起二執，名為雜染；若無二執，名為清淨。

子二、第二義<sup>2</sup> 丑一、名無二

又非一切名言安足處事，由彼世俗言說熏習想所行自性無所有故，非彼熏習

智所行自性有故，說為無二。

又非一切名言安足處事等者：凡識所行，世俗言說熏習所成，如彼言說自性非有，非彼所依雜染事無。聖智所行，離彼熏習，彼雜染事因之非有。由是道理，染有非有，遠離二邊，說為無二。

丑二、辨染淨

於此無二若起二執，名為雜染；若無二執，名為清淨。

癸四、結

由此無二相，應知悟入如來一切密意語言。

壬二、明為所依<sup>2</sup> 癸一、標

此中由五種相名論圓滿；即於教授中，由五種相名果圓滿，由五種相名果勝利圓滿；當知皆依密意語言。

癸二、釋<sup>3</sup> 子一、論圓滿

云何由五種相名論圓滿？謂若由此相宣說、若是宣說、若所宣說、若如是宣

說、若彼宣說，如是圓滿。

若由此相宣說等者：趣涅槃宮為先首故，名由此相宣說。美妙等語，名是宣說。名句文身及與行相，名所宣說。了義可依經典，名如是宣說。不了義非所依經典，名彼宣說。

子二、果圓滿

云何由五種相名果圓滿？謂無餘依涅槃界、若有餘依涅槃界、若聖道圓滿、若勝內怨、若勝外怨，如是圓滿。

若勝內怨等者：一切煩惱無餘永斷，名勝內怨。能伏諸魔大力軍眾，名勝外怨。

子三、果勝利圓滿

云何由五種相名果勝利圓滿？謂即是供養大師；報信施恩；越生死苦；於福田性無有退轉；從法化生名如來子，依止如來。

庚十五、於所教授勝解勝利<sup>5</sup>

辛一、徵

復次，云何於菩薩藏教授中，勝解勝利？

辛二、標

當知由五種相。

辛三、列

一者、建立因時即能映蔽感大富貴增上因故；二者、由轉依故；三者、即於是處作說器故；四者、作說者器故；五者、於捨身時，得見業清淨故。

辛四、釋<sup>5</sup>

壬一、第一相<sup>2</sup>

癸一、標

由五種相，當知映蔽感大富貴增上之因。

癸二、列

所謂此因能引有量、無量果故，有盡、無盡法故，感非廣大、廣大樂故，是智資糧、智自性故，由此能引彼故。

由此能引彼故者：此謂勝解，彼謂智資糧等。勝解為先，引發後後殊勝差別，名智資糧及智自性，由是故說此能引彼。如是次第，一一向前說有五

相，如文可知。依世出世差別，說名有量、無量，有盡、無盡，及非廣大、廣大。人天業感，名有量果；如來變化，名無量果。業感有盡，變化無盡。餘易可了。

壬二、第二相<sup>2</sup> 癸一、標身行

又由遠離六種過失，應知身行。

癸二、釋過失

何等名為六種過失？一者、愁憂相過失；二者、不了知數習過失；三者、由二種相，威儀過失；

由二種相威儀過失者：謂由放逸，或由懈怠，不能如所應行、如所應住故。

四者、由三種相，怖畏相過失；

由三種相怖畏相過失者：謂於老病及死生怖畏故。

五者、由二種相，過履瑟吒過失；六者、身不調柔過失。



壬三、第三相<sup>2</sup> 癸一、標語行

又於相慶慰時，遠離五種過失，應知語行。

癸二、釋過失

何等名為五種過失？一者、怯怖過失；二者、麤獷過失；三者、棄捨佛語，作不相應戲論過失；四者、不讚歎如來過失；五者、於同法者不施諫誨過失。

壬四、第四相<sup>2</sup> 癸一、標語行

又於記別所解了時，遠離五種過失，應知語行。

癸二、釋過失

何等名為五種過失？一者、於所證得忘念過失；二者、前後語言相違過失；三者、道理相違過失；四者、敬信聖教諸天訶責過失；五者、如來訶責過失。

壬五、第五相<sup>2</sup> 癸一、標意行

又由遠離五種過失，應知意行。

癸二、釋過失<sup>2</sup> 子一、出五種

謂依現法義，有前四種；依後法義，有第五種。

子二、釋一一<sup>2</sup> 丑一、徵

何等名為五種過失？

丑二、列<sup>5</sup> 寅一、不忍

一者、不忍過失。不能忍受現在、過去不饒益事故。

寅二、覆藏

二者、覆藏過失。由覆藏故，惡作燒惱故。

寅三、貪染

三者、貪染過失。希求諸欲及受用故，希求出離怨故。

希求出離怨故者：謂由天魔，發起種種擾亂事業，能障出離，名出離怨應知。

寅四、忘念

四者、忘念過失。攝受不正見故，於斷、心迷亂故。

於斷心迷亂故者：前說於斷、於心二種迷失差別。（陵本八十卷四頁<sub>6088</sub>）此應準釋。

寅五、期願

五者、期願過失。由自輕賤，遠離廣大諸佛菩薩之所加被諸佛國土微妙願故；由微細意樂引發諸佛法故；於一切法殊勝世間興盛差別起憍慢故；及願彼故。

辛五、指

於分別菩薩藏教授勝解勝利無量標釋中，當知有無量無數勝解勝利。

丁三、略不說餘

於此地中餘決擇文，更不復現。

攝決擇分中有餘依及無餘依二地

丙十二、有餘依及無餘依二地<sup>3</sup> 丁一、結前生後

如是已說菩薩地決擇。有餘依、無餘依二地決擇，我今當說。

丁二、正廣決擇<sup>2</sup> 戊一、喩柁南標

喩柁南曰：

離繫與壽行 轉依住差別 有常樂殊勝 異性自在等

戊二、長行釋<sup>12</sup> 己一、離繫<sup>2</sup> 庚一、煩惱

問：於有餘依涅槃界中現在轉時，一切煩惱當言離繫耶？當言不離繫耶？

答：當言離繫。

庚二、苦<sup>2</sup> 辛一、問

問：於一切苦當言離繫耶？當言不離繫耶？

辛二、答<sup>3</sup> 壬一、標

答：當言亦離繫，亦不離繫。

壬二、徵

所以者何？

壬三、釋<sup>2</sup> 癸一、離繫

若未來生所有眾苦，當言離繫；若現在生心所有苦，亦當言離繫。

癸二、不離繫

若現身中饑苦、渴苦、界不平苦、時節變苦，及餘所有逼迫等苦，當言不離繫。此由現前行故，非諸煩惱所繫縛故。

己二、壽行<sup>2</sup> 庚一、問

問：若一切阿羅漢皆得心自在，何因緣故，不捨壽行入般涅槃，雖苦所逼而久住耶？

庚二、答<sup>3</sup> 辛一、標

答：功能有差別故。

辛二、徵

所以者何？

辛三、釋

有一分阿羅漢能捨壽行，一分不能；有一分阿羅漢能增壽行，一分不能故。

己三、轉依<sup>2</sup>

庚一、問<sup>2</sup>

辛一、有異

問：若阿羅漢，如先所有六處生起，即如是住相續不滅，無有變異，更有何等異轉依性，而非六處相續而轉？

辛二、無異

若更無有異轉依者，何因緣故，前後二種依止相似，而今後時煩惱不轉，聖道轉耶？

庚二、答<sup>4</sup>

辛一、理釋<sup>2</sup>

壬一、非異不異<sup>5</sup>

癸一、標

答：諸阿羅漢實有轉依，而此轉依與其六處異不異性俱不可說。

癸二、徵

何以故？

癸三、釋

由此轉依真如清淨所顯，真如種性、真如種子、真如集成，而彼真如與其六處異不異性俱不可說。

癸四、指

不可說義，如前已辯。

不可說義如前已辯者：謂彼種性自性，非於六處有別異相，即於如是種類、分位、六處殊勝。義如本地分聲聞地說。（陵本二十一卷二頁<sup>1814</sup>）又菩薩地決擇中說：大菩提自性，或即眼處，或離眼處，如是不可思議；或即耳、鼻、舌、身、意處，或離耳、鼻、舌、身、意處，如是不可思議。

（陵本七十四卷九頁<sup>5701</sup>）由是當知不可說義。

癸五、結

是故若問所得轉依與其六處為異不異，非如理問。

壬二、有轉依性

若此轉依無有體者，應有如前所說過失。

應有如前所說過失者：菩薩地決擇中說：大菩提自性轉依，有生轉所依相及不生轉所依相可得，是故轉依非無有體。生轉所依相者，謂佛相續出世間道生轉所依。若不爾，不得此轉依，此道應當不生不轉。若遠離彼而有此事，未轉依時先應有此。不生轉所依相者，謂一切煩惱及諸習氣不生轉所依。若不爾，不得此轉依，一切煩惱及諸習氣便有眾緣和合，不生不轉應不可得。（陵本七十四卷九頁<sup>5699</sup>）今指彼義，故作是說。

謂阿羅漢煩惱應行，道應不行。是故當知有轉依性。

辛二、教證

世尊依此轉依體性，密意說言：

遍計自性中	由有執無執	二種習氣故	成雜染清淨
是即有漏界	是即無漏界	是即為轉依	清淨無有上

辛三、喻成<sup>2</sup>

壬一、引喻



如屠牛師，或彼弟子，以利牛刀殺害牛已，於內一切斫刺椎剖，骨肉筋脈皆悉斷絕。復以其皮張而蔽之，當言此牛與皮非離、非合。

壬二、合法

如是諸阿羅漢既得轉依，由慧利刀，斷截一切結、縛、隨眠、隨煩惱、纏已，當言與六處皮非離、非合。

辛四、事例

又已轉依諸觀行者，雖取眾相，當知與昔所取差別。此所取相，猶如真如自內所證，不可以言說示於他：我所觀相如是如是。

己四、住<sup>2</sup> 庚一、問

問：諸阿羅漢住有餘依涅槃界中，住何等心，於無餘依般涅槃界當般涅槃？

庚二、答<sup>2</sup> 辛一、住無相界<sup>2</sup> 壬一、明漸次

答：於一切相不復思惟，唯正思惟真無相界，漸入滅定滅轉識等，次異熟識捨所依止。

壬二、明無取

由異熟識無有取故，諸轉識等不復得生，唯餘清淨無為離垢真法界在。

辛二、不墮眾數<sup>2</sup> 壬一、非趣攝

於此界中般涅槃已，不復墮於天、龍、藥叉、若健達縛、若緊捺洛、若阿素洛、若人等數。

壬二、非想攝<sup>3</sup> 癸一、標

以要言之，所有有情假想施設，遍於十方一切界、一切趣、一切生、一切生類、一切得身、一切勝生、一切地中，

一切生類等者：同、界、趣、生，各復有多種類差別，是名一切生類。自身世間差別，是名一切得身。勝生差別，是名一切勝生。處所差別，名一切地。如有尋有伺地別釋應知。（陵本九卷十頁<sup>674</sup>）

非此更復墮在彼數。

癸二、徵

何以故？

癸三、釋

由此真界離諸戲論，唯成辦者內自證故。

唯成辦者內自證故者：此中成辦，謂般涅槃。聖道為因所成辦故，由成辦義是果義故。

己五、差別<sup>2</sup> 庚一、辨相<sup>2</sup> 辛一、問

問：於有餘依涅槃界中、若無餘依涅槃界中，已般涅槃諸阿羅漢有何差別？

辛二、答<sup>3</sup> 壬一、墮不墮數

答：住有餘依，墮在眾數；住無餘依，不墮眾數。

壬二、有苦離苦

住有餘依，猶有眾苦；住無餘依，永離眾苦。

壬三、六處相應不相應

住有餘依所得轉依，猶與六處而共相應；住無餘依，永不相應。

庚二、釋難<sup>2</sup> 辛一、問

問：若無餘依涅槃界中已般涅槃，所有轉依永與六處不相應者，彼既無有六處所依，云何而住？

辛二、答<sup>2</sup> 壬一、明依因

答：非阿羅漢所得轉依六處為因，然彼唯用緣真如境修道為因，是故六處若有若無，尚無轉依成變異性，何況殞沒。

壬二、明安住

又復此界非所遍知，非所應斷，故不可滅。

又復此界非所遍知等者：非苦諦攝，故非遍知。非集諦攝，故非應斷。

己六、有<sup>3</sup> 庚一、明體性

問：於無餘依涅槃界中般涅槃已，所得轉依當言是有，當言非有？答：當言是有。

庚二、顯實相

問：當言何相？答：無戲論相，又善清淨法界為相。

庚三、辨因緣<sup>2</sup> 辛一、問

問：何因緣故，當言是有？

辛二、答<sup>2</sup> 壬一、理釋

答：於有餘依及無餘依涅槃界中，此轉依性皆無動法；無動法故，先有後無不應道理。

此轉依性皆無動法者：清淨真如所顯名無動法應知。

壬二、喻成<sup>2</sup> 癸一、標法

又此法性非眾緣生，無生無滅。

癸二、喻合

然譬如水澄清之性，譬如真金調柔之性，譬如虛空離雲霧性。是故轉依，當言是有。

己七、常<sup>2</sup> 庚一、明體相

問：當言是常，當言無常？答：當言是常。

庚二、釋因緣

問：何因緣故，當言是常？答：清淨真如之所顯故，非緣生故，無生滅故。

己八、樂<sup>2</sup> 庚一、問

問：當言是樂，當言非樂？

庚二、答<sup>3</sup> 辛一、標

答：由勝義樂，當言是樂，非由受樂說名為樂。

辛二、徵

何以故？

辛三、釋

一切煩惱及所生苦皆超越故。

己九、殊勝<sup>2</sup> 庚一、顯平等<sup>2</sup> 辛一、問

問：於無餘依涅槃界中般涅槃者，為有少分差別意趣殊異不耶？

辛二、答<sup>3</sup> 壬一、標

答：一切無有。

壬二、徵

所以者何？

壬三、釋

非此界中可得安立下中上品；不可施設高下勝劣，此是如來、此聲聞等。

庚二、釋妨難<sup>2</sup> 辛一、有障無障難<sup>2</sup> 壬一、問

問：何因緣故，無有差別？所以者何？諸聲聞等有餘殘障，於無餘依涅槃界中而般涅槃，佛一切障永無所有。

壬二、答<sup>2</sup> 癸一、略釋<sup>3</sup> 子一、標

答：住有餘依涅槃界中，可得安立有障、無障；住無餘依涅槃界中，畢竟無障可立差別。

子二、徵

何以故？

子三、釋

於此界中，一切眾相及諸麤重，皆永息故，皆永滅故。

癸二、廣辨<sup>2</sup>

子一、徵

所以者何？

子二、釋<sup>2</sup>

丑一、有障

諸阿羅漢住有餘依涅槃界時，一切眾相非悉永滅，異熟麤重亦非永滅，由彼說有煩惱習氣，即觀待彼相及麤重，安立有障。

丑二、無障

住無餘依涅槃界時，彼永無有。是故當知，於此界中無有有障、無障差別。

辛二、作諸佛事難

問：若此界中，永無有障，如諸如來離一切障，阿羅漢等亦復如是。何因緣故，阿羅漢等不同如來作諸佛事？答：彼闕所修本弘願故，又彼種類種姓爾



故，阿羅漢等決定無有還起意樂而般涅槃，是故不能作諸佛事。

決定無有還起意樂等者：諸佛如來不住生死、不住涅槃。聲聞不爾，捨生死已，唯住涅槃，故作是說。

己十、異性<sup>2</sup> 庚一、舉色

問：於無餘依涅槃界中般涅槃者，所有無漏界此與諸色，當言有異，當言無異？答：當言非異，亦非不異。

庚二、例餘

如與諸色，與諸受等，當知亦爾。與一切行、與一切界、與一切趣，亦復如是。

與一切行等者：謂或即眼處，或離眼處，如是不可思議；或即耳、鼻、舌、身、意處，或離耳、鼻、舌、身、意處，如是不可思議；是名與一切行非異，亦非不異。此說由自性故不可思議。或在欲界，或離欲界，如是不可思議；或在色界、無色界，或離色界、無色界，如是不可思議；是名

與一切界非異，亦非不異。或在人中，或離人中；或在天上，或離天上；如是不可思議；是名與一切趣非異，亦非不異。此說由處故不可思議。如菩薩地決擇中說應知。（陵本七十四卷九頁<sup>5701</sup>）

己十一、自在<sup>2</sup> 庚一、正辨相<sup>2</sup> 辛一、得自在

問：於無餘依涅槃界中般涅槃者，於色等法，當言獲得自在，當言不得自在？答：當言獲得自在。

辛二、能現前<sup>2</sup> 壬一、問

問：此所得自在，當言能現在前，當言不能現在前？

壬二、答<sup>2</sup> 癸一、標

答：一分能現在前，一分不能現在前。

癸二、釋

謂諸如來，於無餘依涅槃界中般涅槃已，能現在前，所餘不能令現在前。

庚二、釋妨難<sup>2</sup> 辛一、問

問：若此界中離諸戲論，由此因緣不墮眾數，云何復能起現在前？

辛二、答<sup>2</sup> 壬一、釋因

答：由先發起正弘願故，又由修習與彼相似道勢力故。

壬二、喻成

譬如正入滅盡定者，雖無是念：我於滅定當可還出，或出已住。然由先時加行力故，還從定出，依有心行而起遊行。當知此中道理亦爾。

己十二、迴向<sup>2</sup> 庚一、明能發趣<sup>2</sup> 辛一、辨相<sup>2</sup> 壬一、問

問：迴向菩提聲聞，為住無餘依涅槃界中，能發趣阿耨多羅三藐三菩提耶？為住有餘依涅槃界耶？

壬二、答<sup>3</sup> 癸一、標

答：唯住有餘依涅槃界中可有此事。

癸二、徵

所以者何？

癸三、釋

以無餘依涅槃界中，遠離一切發起事業，一切功用皆悉止息。

辛二、釋難<sup>2</sup>

壬一、生證得難<sup>2</sup>

癸一、問<sup>3</sup>

子一、標

問：若唯住有餘依涅槃界中，能發趣阿耨多羅三藐三菩提者，云何但由一生，便能證得阿耨多羅三藐三菩提耶？

子二、徵

所以者何？

子三、釋

阿羅漢等尚當無有所餘一生，何況當有多生相續。

癸二、答<sup>3</sup>

子一、由增壽行<sup>2</sup>

丑一、標

答：由彼要當增諸壽行，方能成辦。

增諸壽行方能成辦者：謂增壽行，方能發趣阿耨多羅三藐三菩提，名能成辦，非證彼果。由下自釋，彼所修行極成遲鈍，非一劫餘所能成辦故。

丑二、釋<sup>2</sup> 寅一、引教證<sup>2</sup> 卯一、舉教言

世尊多分依此迴向菩提聲聞，密意說言：物類善男子，若有善修四神足已，能住一劫，或餘一劫。

卯二、隨難釋

餘一劫者，此中意說過於一劫。

寅二、顯修相

彼雖如是增益壽行，能發趣阿耨多羅三藐三菩提，而所修行極成遲鈍，樂涅槃故，不如初心始業菩薩。

物類善男子等者：攝事分說：又諸聖者引發所有最勝神通，隨所願樂，延諸壽行，或住一劫，或一劫餘，謂過一劫。不定種姓補特伽羅名為物類，當知此類唯住內法。（陵本九十八卷七頁<sup>7345</sup>）此應準釋。由彼不定種姓補特伽羅，不正了知有如是事，謂此聖者名為物類故。

子二、留有根身<sup>2</sup> 丑一、示般涅槃

彼既如是增壽行已，留有根身，別作化身，同法者前方便示現於無餘依般涅槃界而般涅槃。由此因緣，皆作是念：某名尊者，於無餘依般涅槃界已般涅槃。

丑二、常遠離住

彼以所留有根實身，即於此界贍部洲中，隨其所樂，遠離而住，一切諸天尚不能覩，何況其餘眾生能見。

子三、蒙佛覺悟

彼於涅槃多樂住故，於遍遊行彼彼世界，親近供養佛菩薩中，及於修習菩提資糧諸聖道中，若放逸時，諸佛菩薩數數覺悟；被覺悟已，於所修行能不放逸。

壬二、一切迴向難<sup>2</sup> 癸一、問

問：若阿羅漢迴向菩提，便能證得阿耨多羅三藐三菩提者，何因緣故，一切阿羅漢不皆迴向無上菩提？

癸二、答<sup>2</sup> 子一、正答所問<sup>2</sup> 丑一、由種性別<sup>3</sup> 寅一、標

答：由彼種性有差別故。

寅二、徵

所以者何？

寅三、釋<sup>2</sup> 卯一、舉多差別

諸阿羅漢現見種性有多差別，謂或見有諸阿羅漢俱分解脫，或復見有唯慧解脫，於無餘依般涅槃界而般涅槃。

卯二、結非一切

是故當知，由彼種性有差別故，非一切阿羅漢皆能迴向無上菩提。

丑二、由根等別

復次，迴向菩提聲聞，或於學位即能棄捨求聲聞願，或無學位方能棄捨。由彼根性有差別故，所待眾緣有差別故。

子二、兼釋餘難

如迴向菩提聲聞，由遇緣故，乘無上乘而般涅槃。

由遇緣故者：謂為諸佛菩薩數數覺悟故。

如是菩薩，設為如來及諸菩薩之所棄捨，因棄捨故，若遭尤重求下劣乘般涅槃緣，應乘下乘而般涅槃。然無處無容，諸佛菩薩如是放逸，棄捨於彼，定無是處。

庚二、明隨證得<sup>3</sup> 辛一、般大涅槃<sup>2</sup> 壬一、標同如來

復次，迴向菩提聲聞，若隨證得阿耨多羅三藐三菩提，爾時即同如來，於無餘依般涅槃界而般涅槃。

壬二、成不定性<sup>2</sup> 癸一、問

問：迴向菩提聲聞，從本已來，當言聲聞種性，當言菩薩種性？

癸二、答<sup>2</sup> 子一、標

答：當言不定種性。

子二、釋



譬如安立有不定聚諸有情類，於般涅槃法性聚中，當知此是不定種性。

辛二、有餘依位

復次，彼即於此住處轉時，如無死畏，如是亦無老病等畏。如來亦爾。

彼即於此住處轉時等者：謂彼迴向菩提聲聞，於住有餘依涅槃界中，轉能發趣阿耨多羅三藐三菩提，留有根身，修大乘行故。此有根身無有眾苦，故無死畏，亦無老病等畏，由住解脫身故。依此義說，如來亦爾。

辛三、無餘依位<sup>2</sup> 壬一、成所作事

彼及所餘，於無餘依涅槃界中般涅槃者，於十方界當知究竟不可思議，數數現作一切有情諸利益事。

壬二、名極秘密<sup>3</sup> 癸一、喻能成就

如首楞伽摩三摩地中，說幻師喻、若商主喻、若船師喻，當知此中道理亦爾，是名最極如來祕密。

癸二、辨應隨轉<sup>2</sup> 子一、地別

於此及餘種種差別如來祕密，勝解行地修行菩薩下忍轉時，隨其勝解差別而轉；從此轉勝進入增上意樂淨地，如是乃至於九地中，展轉增進勝解清淨；第十地中，於此勝解最善清淨。

子二、勸修

於彼如來諸祕密中，是諸菩薩應正隨轉。

癸三、結不思議

當知如來如是祕密，不可思議、不可度量，超過一切度量境界。

丁三、略不說餘

於此地中餘決擇文，更不復現。

乙三、總義決擇

問：於法決擇，總義云何？答：

由品類差別 而建立諸法 即於彼釋難 分別一行等  
如是應知此中總義。

乙四、結顯餘類

當知於彼一一地中，皆有無量決擇差別，我今且略開示少分。由此方隅、由此所學、由此教導，諸有智者餘類應思。

瑜伽師地論科句披尋記卷第八十

